



1000/1





47

4

S.

C

O.

b


N.

6-9

~~14~~
3
A
29



14-2-C. 37



ARTIS
LOGICÆ

PARS PRIMA.



ARTIS LOGICÆ.

PRIMA PARS.

De Dialecticis Institutionibus,
quas Summulas vocant.

AUCTORE

P. M. F. IOANNE
DE S. THOMA

LISBONIENSI

Ordinis Prædicatorum.

Complutensis Academiæ publico
Theologiæ Professore in
Cathedra Vespertina,

*Collegij S. Thomæ Regente, & Sacræ
Inquisitionis Censore.*



BONONIÆ, M.DC.LXXXIV.

Typis Iosephi Longi. Superiorum permissu.







LECTORI.



Breuitatem lectan-
tes, ociosum vi-
debitur morosa
præfatione dif-
fundi, vel ipsa
Spiritus Sancti sententia id præ-
damnante 2. Machab. 2. *Stultum*
est ante istoriam disfluere, in ipsa
verò historia succingi. Ne ergo
tædium, & onus Lectori in ip-
so limine iniiciamus, tantum
admonuerim, studij nostri
scopum eo collimasse, vt ad
breuem, & concissam metho-
dum,

dum, pro viribus, Logicæ,
& Philosophiæ disciplinam
iuxta S. Thomæ sensum redige-
remus. Id circò non solum vi-
dum est eius solidam sequi, &
imitari doctrinam, sed ordi-
nem, brevitatem, modestiam-
que æmulari.

Vt methodum, ordinem-
que sequeremur, in operis
fronte Logicam in duas par-
tes diuidimus. Prima, Diale-
cticas disputationes, quas Sum-
mulas vocant, complectitur,
& circa formam logicalem
versatur. Secunda, circa Præ-
dicabilia, & Prædicamenta,
ac Libros Posteriorum, tra-
ctat de instrumentis logicali-
bus ex parte materiæ, &
posterioristice resolutionis, vt
abundantius in initio huius li-
bri adnotamus.

Vt brevitatem imitaremur,

im-

immensam inextricabilium
quæstionum syluam, & spinosa
Sophismatum dumeta ex-
cidere curauimus, quæ audi-
entium mentibus onerosæ, &
pungentes, vtilitatis nihil,
dispendij non parum affere-
bant. Ad hæc, metaphysicas
difficultates, pluresque alias
ex libris de Anima, quæ di-
sputantium ardore in ipsa sum-
mularum cunabula irruerant,
suo loco emandauimus, & tra-
ctatum de signis, ac notitijs, in
Logica super librum Perihæ-
redem expeditimus. Quicquid autem
in tractatu de termino, & alijs
locis ad Logicam remittimus,
ibidem etiam loca adnotamus.
Nec omninò tamen euadere
potuimus, quin aliqua libare-
mus ex præcipuis, magisque
necessarijs difficultatibus, quæ
& docentibus, & discipulis

ad logicales quæstiones expli-
candas conducebant. Curabit
autem lector, ut viso aliquo
textus capitulo, difficultates
illi correspondentes inquirat
in quæstionibus, sic enim om-
nes, quæ occurrerint, faci-
lius percipiet, & euincere po-
terit.

Ut denique modestiam (gra-
tiores inter Angelicas Sancti
Doctores virtutes, gemmam)
breui huic annulo exculpere-
mus, placuit sic diuersorum
Authorum placita, aut refer-
re, aut impugnare, aut sequi,
ut plerunque a proluxa citatio-
ne, & publicatione nominum
abstineremus, nec enim hæc
nostra euulgamus, aut con-
tentioni, aut æmulationis ze-
lo obsecundantes, sed verita-
tis inquisitioni seruientes, quæ
doctrinam respicit, non perso-
nas;

nas ; & vt audientium com-
modo prospiceremus, quibus
foelicius instillatur doctrina,
si non tam aucthorum, & au-
thoritarum concertationi,
quam veritatis solius luctæ stu-
deatur. Quam vt multiplica-
to foenore assequi possis hu-
manissime Lector, tenui hoc,
sed affectuoso calamo plenissi-
mè peroptamus. Vale.



V. D. Fulgentius Orighetus
Rector Pœnitentiariæ pro
Illustriss. & Reuerendiss.
D. D. Iosepho Musoto
Vicario Capitulari Bononiæ.

Reimprimatur

Fr. Vincentius Vbaldinus Vi-
carius Generalis S. Officij
Bononiæ Ordinis Prædi-
catorum.

IN-

INDEX CAPITVLORVM, ET QVÆSTIONVM CVM ARTICVLIS.

Prologus totius Dialecticæ.

PRÆLVDIVM PRIMVM.

*Quo proponitur Dialecticæ disputationis
exercitium, & praxis.*

PRÆLVDIVM SECVNDVM.

Artis Logicæ divisio, ordo necessitas.

LIBER PRIMVS.

*De his, quæ spectant ad primam operationem
intellectus.*

C aput I. Definitio terminū .	pag.	1
Caput II. Definitio, & divisio signi		4
Caput III. De quibusdam divisionibus termi- norum .		2
Caput IV. De alijs divisionibus terminorum .	pag.	11
Caput V. De Nōmine .		14
Caput VI. De Verbo .		17

Index Capitulorum

LIBER SECVNDVS.

*De his, quæ pertinent ad secundam
operationem intellectus.*

C aput I. De Oratione in communi, & eius diuisione.	21
Caput II. De modo sciendi.	23
Caput III. De Definitione.	25
Caput IV. De Diuisione.	29
Caput V. De Augmentatione.	32
Caput VI. De Propositione, siue Enuncia- tione.	35
Caput VII. De Diuisionibus Propositionis. pag.	38
Caput VIII. De materia Propositionum.	44
Caput IX. De proprietatibus Propositionis, & quo ordine tractandæ sunt.	46
Caput X. De Suppositione.	ibid.
Caput XI. De Diuisionibus suppositionis.	51
Caput XII. Regulæ Suppositionis.	56
Caput XIII. De Relatione.	61
Caput XIV. De Ampliatione, Restrictione, & Alienatione.	64
Caput XV. De Appellatione.	70
Caput XVI. De Oppositione.	85
Caput XVII. De conditionibus requisitis ad species oppositarum propositionum, & Regu- lis cognoscendi ipsas oppositiones speciales.	78
Caput XVIII. De Æquipollentia Propositio- num.	84
Caput XIX. De Cōuersione Propositionum.	86
Caput XX. De Modalibus.	88
Caput XXI. De Quantitate, Qualitate, Oppo- sitione.	89

Questionum cum Articulis.

fitione, & Æquipolentia modalium.	98
Caput XXII. De Reductione Modalium ad suas de inesse.	99
Caput XXIII. De Hypotheticis Propositioni- bus.	102
Caput XXIV. De Exponibilibus.	107

L I B E R T E R T I U S.

De Tertia operatione Intellectus.

C aput I. de Consequentia, & diuisione eius.	114
Caput II. De inductione.	116
Caput III. De ordine, & modo resoluendi ter- minos per Ascensum, & Descensum.	118
Caput IV. De syllogismo, eiusque materia, & forma.	121
Caput V. De diuisione syllogismi penes mate- riam, & formam.	123
Caput VI. Explicantur omnes tres figurae, & modi syllogismorum.	227
Caput VII. De Reductione syllogismorum imperfectorum ad perfectos.	133
Caput VIII. De Syllogismo expositorio.	141
Caput IX. De modo inueniendi medium.	143
Caput X. De Principijs, quibus innititur tota ars syllogizandi.	146
Caput XI. Quibus principijs vniuersaliter inni- tatur bonitas Consequentiae.	149
Caput XII. De Principijs defectuum malae Consequentiae.	153
Caput XIII. De Defectibus in particulari.	155
Caput XIV. De Fallacijs.	165

Index Capitulorum

QVÆSTIO PRIMA.

De Termino.

- A**rticulus I. Vtrum recto ordine doctrinæ incipiat Dialctica à Termino. 169
- Articulus II.** Vtrum sit bona definitio Termini enunciatiui, & in quo eius formalitas consistat. 179
- Articulus III.** Vtrum definitio termini Syllogistici bona sit, & quæ eius formalitas. 191
- Articulus IV.** Quod sit definitum Termini, & pro quo supponat. 203
- Articulus V.** Vtrum Voces significant per prius conceptus, an res. 211
- Articulus VI.** Vtrum terminus habeat aliquam diuisionem essentialem. 219

QVÆSTIO SECVNDA.

De Nomine.

- A**rticulus I. Quomodo intelligenda sit illa particula. Cuius nulla pars significat separata. 228
- Articulus II.** Vtrum Nomen infinitum rectè excludatur à ratione Nominis. 232
- Articulus III.** Vtrum casus obliqui rectè excludantur à ratione Nominis. 241

QVÆSTIO TERTIA.

De Verbo.

- A**rticulus I. Quid sit significare cum tempore, & absolui à tempore. 249

Art.

Questionum cum Articulis.

Articulus II. Vtrum Verbum possit infinitari
intra propositionem. 257

QVÆSTIO QVARTA.

De Oratione, & Modo sciendi.

Articulus I. Vtrum sit bona definitio Ora-
tionis, & quod sit eius definitum. 263

Articulus II. Vtrum definitio Definitionis re-
ctè sit tradita. 274

Articulus III. Vtrum definitio Diuisionis, &
ea, quæ ad diuisionem pertinent, rectè tra-
dantur. 290

QVÆSTIO QVINTA.

De Enunciatione.

Articulus I. In quo consistat ratio Enun-
ciationis vt abstrahit à Cathégorica, &
Hypoethetica. 297

Articulus II. Vtrum Enunciatio Cathégorica
sit aliqua simplex qualitas, & conceptus in
mente, vel composita formaliter. 311

Articulus III. Vtrum diuisio in Hypoetheticam,
& Cathégoricā sit essentialis, & vniuoca. 329

Articulus IV. Vtrum diuisiones in affirmati-
nam, & negatiuam, in vniuersalem & par-
ticularem sint bonæ, & essentielles. 335

QVÆSTIO SEXTA.

*De Suppositione, & alijs proprietatibus
partium Enunciationis.*

Articulus I. Vtrum definitio Suppositionis
sit bona. 344

Arti-

Index Cap. & quest. cum art.

- Articulus II.** Vtrum Suppositio impropria reperitur in conceptu mentis ultimato. 357
Articulus III. Quæ sint notanda circa alias species Suppositionis, & proprietates logicales. pag. 368
Articulus IV. Vtrum Regulæ Appellationis traditæ in textu veræ sint. 275

QVÆSTIO SEPTIMA.

De Oppositione, & Conuersione Propositionum.

- Articulus I.** Vtrum Opositio Contradictoria sit maxima inter omnes Oppositiones. 382
Articulus II. Vtrum dari possint aliquæ Contradictoria, quæ simul sint veræ, aut falsæ. pag. 388
Articulus III. Vtrum Regulæ Conuersionis sint rectè assignate. 404

QVÆSTIO OCTAVA.

De Consequentiâ, & Syllogismo.

- Articulus I.** Vtrum rectè assignetur differentia inter Consequentiam bonam, & malam. 410
Articulus II. Vtrum Inductio sit Consequentia formalis. 415
Articulus III. Vtrum Conclusio sit de essentia Syllogismi, an solum Præmissæ. 421
Articulus IV. Vtrum Syllogismus rectè diuidatur in perfectum, & imperfectum. 424

PRO-

PROLOGVS

Totius Dialecticæ

PRÆLVDIVM

PRIMUM

Quo proponitur Dialecticæ
disputationis exercitium,
& praxis .



*In ipsa fronte artis Dialecticæ
quam pro exiguitate nostra ex-
plicare aggredimur) formam,
modumque disputationis tyro-
nibus in ipso exercitio, & pra-
xi proponere visum est, quæ sic
breuiter explicari potest.*

*Igitur in quacunque disputatione, primo loco
arguens proponere curet argumentum, omnino ad
formam redactum, omnibus alijs, siue verborum
ambagibus, siue longis declarationibus amputa-
tis, succinque ac distinctè syllogismum, vel en-
thymema proponat. Et syllogismus continet tres
propositiones, quæ dicuntur Maior, & Minor, &
Conclusio, scilicet consequens per notam illationis, quæ
est particula, ergo, connexas: ipsa autem conne-
xio vocatur illatio, vel consequentia. Enthymema
autem continet duas propositiones, quarum prima
vocatur Antecedens, secunda Consequens, eodem
etiam modo connexas, v. g. intendendo probare quod
vita*

Prologus.

vita voluptuosa non sit amplectenda, sermo sic syllogismus.

Quicquid honestati virtutis repugnat, non est amplectendum, vita voluptuosa honestati virtutis repugnat, ergo non est amplectenda. Vel si volo formare enihymema ex antecedente, & consequente, sic formo. Vita voluptuosa opponitur arduitati virtutis, ergo non est amplectenda.

Audita propositione argumenti, defendens ad nihil aliud attendat, quam ut integre, ac fideliter propositum argumentum repetat, & interdum argumentum resumit, perpendat an aliqua praemissarum sit vera, ut concedatur, vel falsa, ut negetur, an dubia, vel equiuoca, ut distinguatur; item consequentia, seu illatio an sit bona, vel mala. Resumpto semel argumento, & nihil ad illud respondens, secundo repetat, & ad singulas propositiones respondeat hoc ordine. Si fuerint tres propositiones, & primam videat esse veram, dicant concedo maiorem; si videat esse falsam, dicat nego maiorem: videat non pertinere ad conclusionem inferendam, dicat transeat maior (quanquam hoc verbo modeste, & parca utendum est, nec nisi clare constet propositionem impertinenter se habere.) Si videat maiorem esse dubiam, aut equiuocam, dicat, distinga maiorem, & super terminum, in quo est equiuocatio, faciat distinctionem breuibus verbis, & non confusis. Data autem distinctione, non statim illam explicet, nisi vel impugnator id petat, vel non satis clare fuerit prolata; & tunc breuissime illam explicet. Praesertim autem in initio disputationis non consumat tempus in explicandis distinctionibus, sed ab ipsa forma
nulla

Totius Dialecticæ.

Nullatenus recedat. Concessa maiore, vel sub
distinctione explicata, procedat ad minorem, &
eandem obseruet in negando, vel concedendo, aut
distinguendo, sicut diximus de maiori. Deinde
ad conclusionem deueniendo, si est concedenda,
dicat, concedo consequentiam, si neganda, dicat
nego consequentiam. Si autem est distinguenda,
non dicat, distinguo consequentiam, sed distin-
guo consequens; consequentia enim, cum confi-
rat in ipsa illatione, non verò in assertione ve-
ritatis, potest esse bona, vel mala illatio, & sic
concedi, aut negari ut bona, vel mala sed non
distingui, quia distinctio cadit super equiuoca-
tionem, aut ambiguitatem propositionis, quate-
nus habet diuersos sensus in significando verita-
tem, non super ipsam conuenientiam illationis.
Ipsam autem consequens est propositio illata,
quæ potest esse certa, aut equiuoca, aut ambi-
gua, unde quando equiuoca est, distinguitur,
& sic non dicitur distinguo consequentiam, sed di-
stinguo consequens. Si tamen concedendum aut ne-
gandum est consequens, quia id fieri non potest, nisi
concedendo, aut negando ipsam consequentiam, suffi-
cit dicere, nego, vel concedo consequentiam non verò
consequens.

Facta distinctione super aliqua propositione,
quoties occurrat eadem equiuocatio, adhibeat
eandem distinctionem. Non subdistinguat sen-
sum distinctionis semel concessum nisi euidenter
alia equiuocatio appareat, quæ priori distinctio-
ne tolli non potuit. Quandocumque falsum totius
est negare, nec permittere ut transeat, nisi cer-
tò constet de malitia consequenti. Si sensum
propositionis non percipiat, ut veritatem, aut
falsitatem, vel equiuocationem discernat, pro-

Prologus

ut ab arguente ut eius sensum explicet, & tunc resumat.

Denique curet pauca respondere, & solum alligari formæ argumenti, nec de omnibus, quæ dicit, velit rationem reddere, nisi ab ipso petatur, sed totum onus probandi arguenti relinquat. sic enim, & argumenti vis formalis innotescit, & citius expeditur.

Ad munus argumentatoris pertinet. Primo, non præmittere plures præsuppositiones, nec inculcare plura media, nec propositiones nimis longas, aut intricatas proponere, sed succincte ad firmam se attingere; non pluribus interrogantibus utendo, sed magis probationes urgendo, nisi quando vis argumenti ad hoc devehitur, ut petatur ratio dictorum, vel quando status disputationis, & punctus difficultatis nondum est sufficienter declaratus. Secundo, prosequatur semper idem medium per suas causas, & principia, vel ad inconueniens deducendo, non verò diuertat ad aliud medium, nec repetat probationem secundam propositam aut eiusdem, aut alijs verbis, quia utrumque valde prolixum, & tediousum est. Denique non semper utatur syllogismo, sed quancumque entymemate, quod breuius, & concisius procedit, minusque manifestat vim latentis illationis, ideoque maiorem respondentem incutit difficultatem.

Ad munus tandem Patroni, seu Præsidentis spectat. Primo, attentè totum progressum argumenti, & disputationis comprehendere. Secundo, providere ut forma arguendi, & respondendi omnino seruetur. Tertiò officium respondentis non assumere, vel præuenire, & multò minus impugnatoris, sed providere iuxta quod viderit indigere responderentem, suggerere negationem, concessionem, aut distinctionem propositionis. Tandem in fine iudicium de disputatione breuiter ferre, & obscura declarare.

PRÆ-

PRAELVDIVM

SECVNDVM.

Artis Logicæ Diuisio, Ordo, Necessitas.

IN omni arte duo sunt præcipuè consideranda scilicet, materia, in qua ars operatur, & forma, quæ in tali materia inducitur, sicut in facienda domo, materia sunt lapides, & ligna, forma autem est compositio, quia ista inter se coordinantur in unâ figuram, & structurâ domus. Materiam artifex non facit, sed præsupponit, formam verò inducit, quæ quia propriè educitur ab arte, est etiam principaliter inventa ab illa, utpotè factura eius. Est autem Logica ars quædam, cuius munus est dirigere rationem ne in modo discurrendi, & cognoscendi erret, sicut ars ædificatoria dirigit artificem ne erret in facienda domo, & ideo Logica dicitur ars rationalis, non solum quia est in ratione ut in subiecto, sicut aliæ artes, sed quia materia, quam dirigit, sunt ipsa opera rationis.

Et quia ratio ad discurrendum, & ferendum iudicium procedit per modum resolutionis, hoc est, in sua principia deducendo, & probationes quibus manifestatur, discernendo; idem est Logicam dirigere rationem ne erret, ac dirigere ut recte, & debite resoluat. Vnde Aristot. partes Logicæ, quæ docent certum præbere iudicium, vocant analyticas, idest resolutorias, quia docent recte,

Prologus

rectè, & sine errore resolvere. Fit autem rectè resolutio, tum ex debita forma, tum ex certitudine materiæ. Materia sunt res, seu objecta, quæ solumus rectè cognoscere. Forma autem est ipse modus, seu dispositio; quæ connectuntur objecta cognita ut debite discurratur, & cognoscatur, quia sine connexionem, nec veritas aliqua concipitur, nec ex una veritate ad aliam fit discursus, & illatio. Et resolutio ex parte formæ, dicitur pertinere ad priorem resolutionem; ex parte verò materiæ secundum certitudinem, & conditiones debitas, ad posteriorem resolutionem, eo quod consideratio formæ artificiosæ est prior in aliqua arte, quàm consideratio materiæ.

Hinc ergo summus divisionem artis Logicæ, & facimus duas partes. In prima agemus de omnibus his, quæ pertinent ad formam artis Logicæ, & ad prioristicam resolutionem, de quibus egit Philos. in libris Periherm, & in liæis Priorum, & in Summulis tradidit solent tyronibus. In secunda verò parte agemus de his, quæ pertinent ad materiam Logicalem, seu ad posterioristicam resolutionem, maxime in Demonstratione, ad quam præcipue ordinatur Logica. Et in hac prima parte formalem breuem textum prædiscipulis primum erudiendis, deinde pro professoribus: quæstiones difficiliore disceptamus. In secunda verò parte, iuxta textum Porphyrij, & Arist. summam positum, utiliores, & gravior res subiiciemus disputatione.

Ordo agendi.

CUM Logica dirigat modum rectè ratiocinandi, & sine ipsis actus rationis, in quibus
de

Totius Dialecticæ.

de uno proceditur ad alium, ut docet S. Thom.
1. Poster. lect. 1. non potest melior ordo observa-
ri, quam ut tractatum Logicæ per has tres ope-
rationes distribuamus. Prima operatio nostri in-
tellectus vocatur simplex apprehensio, ut in
intelligo hominem, nihil de illo affirmando, vel
negando. Secunda est compositio, aut diuisio, cum
videlicet ita cognosco rem, ut illi aliquid attri-
buam, vel negem, ut cum dico hominem esse al-
bum, aut nego hominem esse lapideum. Tertia ope-
ratio est discursus, ut cum ex aliqua veritate
nota infero, & colligo aliam non ita notam, ut
cum ex ista veritate, homo est rationalis, in-
fero, ergo est disciplinabilis. Primum ergo ap-
prehendo terminos, deinde compono ex illis propo-
sitionem, denique formo ex propositionibus dis-
cursum. Sic ergo in hac prima parte distribu-
emus tres libros. Primum pro his, quæ pertine-
ad primam operationem, ubi agemus de simpli-
cibus terminis. Secundum pro secunda operatio-
ne, ubi agemus de oratione, & propositione,
eiusque proprietatibus. Tertium pro tertia, ubi
agemus de modo discurrendi, & formandi syl-
logismos, & inductionem, ceteraque pertinentia
ad ratiocinandum.

In secunda autem parte Logicæ agemus de
his, quæ pertinent ad materiam talium opera-
tionem, præcipue ut ordinatur ad formandum
certum iudicium ex veritatibus necessarijs, quod
fit per Demonstrationem; veritates autem ne-
cessario pendunt ex prædicatis essentialibus, quæ
coordinantur in prædicamentis, & hæc ex prædi-
cabilibus, quæ dicunt modos prædicandi, ut la-
tius initio secundæ partis Logicæ explicabitur.
Nec est inconueniens, quod de simplicibus, &
his,

Prologus totius Dialecticæ .

his , quæ pertinent ad primam operationem agatur in Logica his , quia , ut notat S.Th. 1. Periher. lect. 1. de dictionibus simplicibus sub alia consideratione agitur in Prædicamentis , scilicet , ut significant simplices essentias , sub alia in libro Perihermenias , scilicet , ut sunt partes enunciationis , sub alia in libris Priorum , scilicet ut constituunt ordinem syllogisticum .

Denique , quia in discursu procedi potest tripliciter ad formandum iudicium , scilicet Cericè per Demonstrationem , Topicè per Opinionem , Erro-ronce per Sophismata ; ideo Arist. postquam in libris Posteriorum egit de Demonstratione , & Sciē- tia , agit in Topicis de Opinatio , & in Elenchis de Sophistico Syllogismo .

Necessitas huius Artis .

Maxima est , tum generali ratione omnium artium , quæ necessaria sunt ut homo in suis operibus recte , & sine errore dirigatur , tum specialiter , quia Logica dirigit opera rationis , ex quibus omnis discursus , & ratiocinatio pendet ut recta sit , & sine errore , & ordinate procedens , quod utique valde necessarium est homini ratione utenti . Sed de hoc amplius q. 1. Proemiali , & Pat. Logica ,

I LIBER PRIMVS

De his, quæ spectant ad primam operationem intellectus.

CAPVT PRIMVM,

Definitio terminis.



ARIE De definitione termini sentiunt Auctores secundum quod considerat in eo diuersos respectus, vel officia, siue partis componentis quomodocumque, siue partis principalis, & per modum extremi tantum,

siue per modum terminantis resolutionem propositionis, & syllogismi, siue per modum prædicati, & subiecti. Et quidem considerationes istæ veræ sunt, & omnes in termino locum habent, sed oportet videre quamam conuenientius explicet naturam termini, vt pertinet ad præsens. Cum enim mens nostra in scientijs resolutoriè procedat, & præsertim in Logica, quæ analytica ab Aristotile dicitur, quia resolutoria, oportet quod sit designabile vltimum elementum, seu terminus huius resolutionis, ultra quod non fiat resolutio ab alio; sicut etiam in naturali generatione materia prima

Logica Pars I.

A

ma

2 Lib. I. Summ.

ma est ultimum principium resolutionis, alioquin vel procedetur in infinitum, vel non fiet perfecta resolutio. Et quia idem est terminus resolutionis, & principium compositionis; id quod fuerit ultimum elementum in quod composita Logicalia resoluuntur, dicetur etiam primum ex quo cætera componuntur.

Hoc igitur attendentes dicimus nos agere in presenti de termino, sub conceptu ultimi elementi, in quod terminatur omnis resolutio compositionis logicæ etiam ipsius propositionis, & orationis, quia ab hoc ut à primo, & simpliciori convenit incipere. Et licet Aristoteles in 1. Priorem definiat terminum per id, in quod resolvitur propositio ut in prædicatum, & subiectum; tamen ibi non definiuit terminum in tota sua latitudine, sed contractè ut deseruit ad fabricam, & compositionem syllogisticam, in qua syllogismus constat ex tribus terminis quatenus sunt extrema in propositionibus, & induunt habitudinem partium syllogisticarum idest illatiarum. Cæterum alibi consideravit Aristoteles terminum sub uniuersaliori ratione, ut etiam est communis nomini, & verbo, & non sub vocabulo termini, sed sub vocabulo dictionis ut induit ordinem componentis enuntiationem, non habitudinem inferentis in syllogismo. Vnde D. Thom. 1. Perierm. lect. 8. §. *Excludis*, exponens illud verbum Aristotelis, *Nomen ergo*, & *verbum dictio sit sola*, inquit *Et videtur ex modo loquendi quod ipse imposuerit hoc nomen ad significandum partes enuntiationis*. Datur ergo secundum Aristotelem, & D. Thomam aliqua ratio communis partibus enun-

enuntiationis, quam Philosophus dictionem, nos terminum vocamus, quia in ipsa omnis resolutio terminatur, non solum syllogismi, sed etiam enuntiationis, quæ ex simplicibus componitur, & in illa resolvitur. Et ibidem lect. 5. §. *Ostendit*, dicit S. Thom. *Quod aliquando nomen sumitur prout communiter significat quamlibet dictionem, etiam ipsum verbum.* Et in opusc. 48. in initio vocat terminos *partes enuntiationis*. Ab hac ergo communissima acceptione termini, tanquam ab ultimo elemento totius resolutionis Logicæ dicimus esse incipiendum, & de illo tradendam definitionem.

Et sic definitur terminus, seu dictio, non per extremum propositionis tantum, aut per prædicatum, & subiectum, sed per aliquid communis, scilicet, *id ex quo simplex conficitur propositio*, vel potius immitantes Aristotelem, qui nomen, verbum, & orationem per voces definit, quia sunt signa nobis notiora, definitur: *vox significatiua ad placitum ex qua simplex conficitur propositio, vel oratio*: ut autem comprehendit mentalem terminum, & scriptum, definietur: *signum, ex quo simplex conficitur propositio*.

Dicitur, *signum*, vel *vox significatiua*, ad excludendum voces non significatiuas, ut Bli-teri, sicut illas exclusit Aristot. in nomine, & verbo; & cum omnis terminus sit nomen, verbum, vel aduerbium, si nihil horum est vox non significatiua, non est terminus, ut latius in quæstione de hac re ostendam. Dicitur *ad placitum*, ad excludendas voces significatiuas naturaliter, ut gemitus. Dicitur

4 . Lib. I. Summ.

ex qua simplex conficitur propositio, ad excludendum ipsam propositionem, seu orationem quæ non est primum elementum componens, sed est aliquid compositum vt totum, & si aliquando componit, non simplicem, sed hypotheticam propositionem componit.

An verò terminus sit extra propositionem actu pars quantum ad essentiam, & habitudinem partis, licet non quoad exercitium componendi, dicemus infra q. 1. de termino art. 3.

C A P V T II.

Definitio, & diuisio signi :

Quia ergo tam terminus, quàm oratio, & propositio, & reliqua instrumenta Logicalia per significationem definiuntur, eo quod intellectus cognoscit per conceptus significatiuos, & loquitur per voces significatiuas, & in vniuersum omnia instrumenta, quibus ad cognoscendum, & loquendum utitur, signa sunt; ideo vt Logicus exactè cognoscat instrumenta sua, scilicet terminos, & orationes, oportet, quòd etiam cognoscat quid sit signum. Signum ergo definitur in communi, *id quod potentie cognoscitiue aliquid aliud à se repræsentat*. Quæ definitio vt melius innotescat, oportet considerare quòd est quadruplex causa cognitionis, scilicet, efficiens, obiectiua, formalis, & instrumentalis. Efficiens vt *ipsa potentia, quæ elicit cognitionem*, sicut oculus, auditus, intellectus. Obiectum est *res quæ mouet, vel ad quam tendit cognitio*, vt cum video lapidem, vel hominem.

Caput II. 5

nem. Formalis est ipsa notitia, quæ redditur potentia cognoscens, ut visio ipsa lapidis, vel hominis instrumentalis est medium, per quod obiectum representatur potentiae, sicut imago exterior Cæsaris repræsentat Cæsarem. Obiectum est triplex, scilicet, motuum tantum, terminatum tantum, motuum, & terminatum simul: motuum tantum est quod mouet potentiam ad formandum notitiam non sui, sed alterius, sicut Imperatoris imago, quæ mouet ad cognoscendum Imperatorem. Terminatum tantum est res cognita per notitiam ab alio obiecto productam, sicut Imperator cognitus per imaginem. Terminatum, & motuum simul, quod mouet potentiam ad formandam cognitionem sui, sicut quando paries in se videntur.

Igitur facere cognoscere latius patet quam representare, & representare, quam significare. Nam facere cognoscere dicitur de omni concurrente ad cognitionem, & sic dicitur quadrupliciter, scilicet, effectiue, obiectiue, formaliter, & instrumentaliter. Effectiue, ut de ipsa potentia eliciente cognitionem, & de causis ad eam concurrentibus, ut Deo mouente, intellectu agente, seu producente species, habitu adiuuante, &c. Obiectiue: ut de ipsa, quæ cognoscitur; v. g. si cognosco hominem, homo, ut obiectum facit cognoscere se ipsum præsentando se potentiae. Formaliter, ut de ipsa notitia, quæ tanquam forma reddit cognoscentem. Instrumentaliter, ut de ipso medio deferente obiectum ad potentiam, ut imago Imperatoris deferat Imperatorem quasi medium, & hoc

vocamus instrumentum . Repræsentare dicitur de omni eo , quo aliquid fit præsens potentia , & sic dicitur tripliciter , scilicet , obiectiue formaliter , & instrumentaliter : obiectum enim repræsentat se obiectiue , vt paries : notitia repræsentat formaliter : vestigium instrumentaliter . Significare dicitur de eo , quo fit præsens aliquid distinctum à se , & sic solum dicitur dupliciter , scilicet formaliter , & instrumentaliter .

Hinc nascitur duplex diuisione signi : Nam qua parte signum ordinatur ad potentiam , diuiditur in signum *formale* , & *instrumentale* quatenus verò ordinatur ad signatum , diuiditur penes causam ordinantem illud in *naturale ad placitum* , & *ex consuetudine* . Signum formale est *formalis notitia* , quæ se ipsa , & non mediante alio repræsentat . Signum instrumentale est , quod ex præexistente cognitione sui aliquid aliud à se repræsentat , sicut vestigium bouis repræsentat bouem , & hæc definitio solet tradi communiter de signo . Signum naturale est , quod ex natura rei repræsentat quauis impositione ; & consuetudine remota , & sic repræsentat idem apud omnes , vt fumus ignem . Signum ad placitum , quod repræsentat aliquid ex impositione voluntatis per publicam auctoritatem , vt vox homo . Signum ex consuetudine , quod ex solo usu repræsentat sine publica impositione , sicut mappa supra mensam significant prandium .

CAPUT III.

De quibusdam diuisionibus terminorum.

Prima diuifio termini est *in mentalem, vocalem, & scriptum*. Mentalis est *notitia seu conceptus*, ex quo *simplex conficitur propositio*. Vocalis supra est definitus: cap. 1. Scriptus est *scriptura ad placitum significans*, ex qua *simplex conficitur propositio*.

Terminus mentalis, si attendamus ad diuerfas species essentiales eius, diuiditur pene in obiecta, a quibus species notitiarum sumitur, & sic non agimus de diuisione illorum in presenti; sed solum agimus de quibusdam generalibus conditionibus notitiarum, seu conceptuum, quibus distinguuntur varij modi cognoscendi. Et nota diuidi hic notitiam simplicem, idest pertinentem tantum ad primam operationem, agimus enim de diuisione termini mentalis, terminus autem ad primam operationem spectat. Vnde in hac diuisione notitiarum non includitur aliqua notitia pertinet ad discursum, aut ad compositionem; nulla enim istarum est terminus, vel simplex apprehensio, Et similiter remouetur omnis notitia practica, & quæ dicit ordinem ad voluntatem; quia voluntas non mouetur à simplici apprehensione termini, sed à compositione, seu iudicio de conuenientia rei, vt dicemus in lib. de Anima.

Igitur notitia, quæ est simplex apprehensio, seu terminus mentalis, Primo diuiditur in *notitiam intuitiuam, & abstractiuam*, quæ

diuisio non solum amplectitur notitiã in-
tellectiuam, sed etiam sensuum externorum,
quæ semper sunt notitiæ intuitiue, & in-
ternorum, quæ aliquando sunt intuitiue,
aliquando abstractiue. Notitia intuitiua est
notitia rei præsentis. Et dico præsentis, non
præsentatæ ipsi potentia, esse enim præsens
pertinet ad rem in se ipsa, vt est extra po-
tentiam, esse præsentatam conuenit rei, vt
obiectæ ipsi potentia, quod omni notitiæ
commune est. Notitia abstractiua est *notitia
rei absens*, quæ opposito modo intelligitur
ad intuitiuam.

Secundò diuiditur natura ex parte conceptus
in conceptum vltimum, & non vltimum.
Conceptus vltimatus est *conceptus rei significa-
te per terminum*, vt res, quæ est homo, est
significata per vocem *homo*. Conceptus non vl-
timatus, scilicet medius est *conceptus ipsius termini,
vt significantis*, vt huius termini *homo*.

Tertiò. Diuiditur conceptus *in directum,
& reflexum*. Reflexus est, *quo cognoscimus
nos cognoscere*, atque ita habet pro obiecto ad
quem actum, vel conceptum, aut potentiam
intra nos. Directus est, *quo cognoscimus ali-
quod obiectum extra conceptum nostrum*, nec re-
flectimus supra cognitionem nostram, vt cum
cognoscitur lapis, vel homo.

Secunda diuisio termini pertinet propriis, &
principalis ad terminum vocalem, & sic
diuiditur terminus *in vniuocum, & æquiuo-
cum*. Terminus vniuocus dicitur: *Qui sua
significata eodem conceptu significat*, vt *ly ho-
mo* significat omnes homines vt conueniunt
in eodem conceptu naturæ humanæ: & in-
telli-

intelligitur in eodem conceptu simpliciter, non proportionaliter tantum vno; sicut analogia, quæ saltem proportionem vnum dicuntur, vt in Logica q. 13. Dicemus. *Æquiuocus terminus dicitur, qui sua significata non eodem, sed pluribus conceptibus significat*, id est non vt conueniunt aliquo modo etiam proportionaliter, sed vt differunt; sicut canis significat animal, & sydus. Et ideo non datur æquiuocatio in conceptu ultimo mentis, vt dicemus cit. loco Logicæ art. 2. quia conceptus est naturalis similitudo, & si est vnus, representatam eius est vnum; si autem plura attingit, est vt conueniunt in aliqua ratione vna, quod est proprium vniuocorum. Et ideo hæc diuisio propriè tangit terminum vocalem, in quo inuenitur æquiuocatio, id est vnitatis vocis cum pluralitate significationis, quia significatio ad placitum est, non naturalis. Vide etiam quæ dicuntur in Logica q. 23. art. 4. circa 2. argum.

Et aduerte quod Arist. definiuit in Antepredica. æquiuoca. *Quorum nomen commune est, ratio verò significata diuersa*, quia illa definitio dabatur de rebus significatis per nomen æquiuocum, vel vniuocum, quæ dicuntur æquiuoca æquiuocata (id est æquiuocè significata) Nos verò definimus hic terminos æquiuocè, vel vniuocè significantes, qui dicuntur æquiuoca æquiuocantia (id est æquiuocè, vel vniuocè significantes.)

Diuiditur Æquiuocum in æquiuocum à casu, & à consilio. Primum est simpliciter æquiuocum, & conuenit ei definitio data. Secundum est analogum, & est id, quod signi-

ficat sua significata, ut sunt unum, secundum quamdam proportionem, & non simpliciter, sicut sanum dictum de animali, & de herba. De his tractamus in Logica q. 13. & 14.

In presenti nota duas regulas pro Analogis. Prima *Analogum per se sumptum stat pro famosiori significato*, sicut dicendo, homo, & nihil addendo; quod restringat, vel determinet, stat pro homine viuo, non pro picto. Secunda *in analogis vel æquiuocis talia sunt subiecta, qualia permittuntur à suis prædicatis, vel restrictionibus*, idest, quando nomen significat plura, determinatur ad standum pro aliquo iuxta exigentiam prædicati, vel restrictionis, ut si dicas canis latrat, stat pro cane, qui est animal. Has regulas explicamus in Logica q. 13. art. 2.

Tertia diuisio termini est in *cathegorematicum*, & *syncathegorematicum*, quasi latine dicas significatum, seu prædicatum, & consignificatum. Cathegorematicus est, qui aliquid per se significat. Vbi, *ly per se*, coniungendum est cum, *ly aliquid*, idest, significat aliquid, quod repræsentatur ut aliquid per se, sicut cum dico, homo. Terminus syncathegorematicus est, qui aliquo modo significat, ut aduerbium velociter, faciliter, signum omnis, quoddam &c. ~~Id~~ dicitur aliquo modo significare, non quia verè, & propriè non significet, sed quia significatum eius non repræsentatur ut res per se, sed ut modus ei, idest exercendo modificationem alterius rei.

CAPUT IV.

De alijs Diuisionibus Terminorum.

Quarta diuifio eft termini Cathegorematici in varias fubdiuifiones, quatum vna non fubordinatur alteri; fed quali ex æquo conueniunt termino. Et reduci poffunt iſtæ fubdiuifiones ad quinque præcipuas. Prima eft: *Terminus* cathegorematicus alius *communis*, alius *ſingularis*. *Terminus communis* eft, qui ſignificat plura diuiſim, vt homo, & intelligimus plura diuiſim, id eſt communicabiliſiter ad plura, ſignificat enim aliquid, quod, vel ex parte rei ſignificatæ, vel ſaltem ex modo concipiendi non repugnat intelligi, vt communicatum pluribus, quæ ratione etiam hoc nomen Deus eſt terminus communis propter modum ſignificandi illum ex parte noſtri conceptus, vt explicamus in Log. q. 5. art. 3. *Terminus ſingularis* eſt, qui *unum tantum ſignificat*, vt Petrus, hic homo, id eſt, qui non habet ſignificatum communicabile pluribus, nec etiam ex modo ſignificandi. Et hic adiungitur diuiſio termini in collectiuum, & diuiſiuum. *Collectiuus*, qui *in ſingulari plura copulatiui ſignificat*, vt ly Populus Salmantica, &c. *Diuiſiuus*, qui *unum in ſingulari, vel plura diuiſim ſignificat*, vt Petrus, homo.

Secunda ſubdiuiſio: *Terminus* cathegorematicus alius *abſolutus* alius *connotatiuus*. *Abſolutus*, qui ſignificat aliquid per modum per ſe ſtans, id eſt ad modum ſubſtantiæ, ſive in

se substantia sit, ut homo, siue ad modum substantiæ, idest sine subiecto concipiatur, ut albedo. Connotatiuus, *qui significat aliquid per modum alteri adiacentis*, ut album, cæcum, vnde connotatiuum debet habere vnum significatum principale, & in recto, quod est idem cum suo absoluto, ut album, & albedo, & aliud in obliquo, scilicet, illud cui adiacet, & in quo inuenitur, & non significat connotatiuum in obliquo, & de connotato, nisi illud, cui verè conuenit, non cum imaginario, & falso; nec sufficit connotare obiectum, sicut scientia, sapientia, quæ sunt absoluta, & tamen respiciunt obiecta, sed debet connotare *subiectum in quo inuenitur*. Et caue ne confundas connotatiuum, concretum, & adiectiuum. Nam concretum solum opponitur abstracto, & potest inueniri in termino absoluto, ut homo est concretum, & absolutum. Dicitur ergo concretum, *quod significat aliquid tanquam constitutum ut quod*: Abstractum verò *quod significat aliquid ut quo constituitur*. Adiectiuum etiam opponitur substantiuo non connotatiuo, vnde potest inueniri connotatiuum quod non sit nomen adiectiuum, ut pater, creator, licet omne adiectiuum sit connotatiuum.

Tertia subdiuisio: Terminus categorematicus alius *primæ intentionis*, alius *secundæ intentionis*. Terminus primæ intentionis est, *qui significat aliquid secundum quod habet in re, vel in suo proprio statu*, idest secluso statu, quem habet in intellectu, & prout conceptum, sicut album, homo ut in re. Terminus secundæ intentionis est, *qui significat aliquid secundum*

alium id quod habet per conceptum mentis, & in statu intellectus, sicut species, genus, & alia similia quæ Logicus tractat. Et dicuntur ista primæ, & secundæ intentionis, quia id, quod conuenit alicui secundum se, est quasi primum in illo, & status proprius, quod verò conuenit alicui secundum quod est intellectum, est quasi secundum, & secundus status superueniens primo, & ideo vocatur secundæ intentionis, quasi secundi status.

Quarta subdiuisio: Terminus cathegorematicus, alius complexus alius incomplexus. Terminus complexus est terminus cuius partes sunt per se significatiuæ, vt homo albus. Terminus incomplexus, cuius partes non sunt significatiuæ seorsum: vt homo. Et nota duo. Primum, quod terminus complexus, etiam potest esse oratio, sed sub alio modo, & formalitate est oratio, sub alio est terminus. Est oratio, quando considerantur illæ partes significatiuæ, vt componentes vnum totum, quia quasi attribuendo vnum akeri sistit ibi intellectus, vt in quodam toto composito. Est terminus, quando considerantur illæ partes significatiuæ, non vt componentes totum, sed vt facientes quandam partem compositam ex alijs partibus, ordinabilem tamen de se ad componendum totum, sicut caput est pars hominis composita tamen ex oculis, auribus ore, &c. Secundum est, quod, vt terminus sit complexus debet habere partes significatiuas per se, idest habentes, & exercentes suam significationem etiam intra ipsum complexum quod componunt, ita quod si aliqua pars deponeretur à sua significatione, complexum de-

destrueretur, unde præcipua ratio termini complexi est, quod suæ partes subordinantur pluribus conceptibus, ut docet S. Thom. 1. Pariterm. lect. 4. Quia ratione termini compositæ figuræ, ut equifer, legifer, &c. apud Dialecticum sunt incomplexi, quia subordinantur unico conceptui incomplexo, & unica significatione sunt impositi, ita quod licet equus deponeretur à sua significatione in se ipso, adhuc ly equifer significaret idem.

Quinta diuisio pertinet ad comparisonem terminorum inter se, nam *alij sunt imperinentes, seu disparati*, idest, quorum unus nec alterum infert, nec alteri repugnat, ut album, & dulce, doctus, & iustus. *Alij sunt pertinentes*, idest, quorum alter alterum infert, vel alteri repugnat; & ideo diuiduntur in pertinentes sequela, & pertinentes repugnantia: pertinentes sequela, quia se consequuntur, & comitantur, ut homo, & risibile: pertinentes repugnantia, quia opponuntur, & repugnant inter se, ut videns, & cæcum, calidum, & frigidum. De pertinentibus repugnantia agitur in postprædicamentis in capite de oppositis, & infra agendo de oppositione propositionum, & ideo hic supersedendum est.

C A P V T V.

De Nomine.

E Gimus hucusque de termino, tanquam de simplici parte orationis, & completente in se omnes partes propositionis, quomodo

modocumque illarum partes sint : nunc specialiter descendimus ad partes quibus ipsa oratio de necessitate constituitur , & diuidimus illas non secundum varium modum significandi , sicut hucusque fecimus de termino , sed secundum diuersum modum componendi , & constituendi orationem , quæ apud Dialecticum sunt duæ , scilicet , nomen , & verbum , de quibus agit Aristoteles in 1. Perihæz. & vt notat S. Thom. ibi lect. 1. sola ista duo considerantur à Dialectico , vt partes orationis prætermittis alijs : *Quia solum istæ scilicet nomen , & verbum de necessitate requiruntur ad enuntiationem , eo quod sine illis , nec simplex enuntiatione stare potest .* Nomen ergo componit enuntiationem , tanquam extremitas , verbum tanquam vniens , & medium copulans , & sic habent diuersum modum in construendo propositionem .

Nomen ergo definitur ab Arist. *Quid est vox significatiua ad placitum sine tempore , cuius nulla pars significat separata , finita , & recta .* Ita definiunt Aristoteles 1. Perihæz. & ibi explicat S. Thom. lect. 4. Primæ tres particule sunt exposte in definitione termini , scilicet *vox , significatiua , & ad placitum .* Reliquæ quatuor sunt propriæ nominis , & discriminant nomen ab his quæ proprie nomina non sunt . Illa ergo particula , *sine tempore* , distinguit nomen à verbo , quod significat cum tempore , vt cap. sequenti videtur , & ideo *ly sine tempore* in nomine non excludit tempus , vt rem significatiua , sed significationem cum tempore , tanquam modum significandi ; quia nomen significat rem , at extremum stans , verbum

bum ut fluens, seu uniens, & agens; omnis autem actio tempore, & motu decurrit. Dicitur cuius nulla pars significat separata, ad excludendam orationem, & terminum complexum, illam, quia oratio non est nomen, sed componitur ex nomine istum, quia terminus complexus non est nomen, sed plura nomina, eadem autem ratio est entis, & uniusentis.

Finita ponitur ad excludendum nomina infinita, ut *non homo*. Vbi nota quod *ly non homo* si sumatur in vi duarum dictionum *tanquam negatum*, est quid complexum, & excluditur per priorem particulam, cuius nulla pars, &c. Si verò sumatur in vi simplicis dictionis, sic est infinitatum, & excluditur a ratione nominis, non quia non possit esse pars propositionis, ut prædicatum, & subiectum, sed quia non habet modum nominis, qui est notare, & determinatum aliquid significare, nomen autem infinitatum non significat aliquid determinatum, sed tollit determinatum significatum, & quia tollendo significatum procedit, non autem ponendo, nomen non est. Vbi discerne quòd non est propria vis nominis infiniti non significare aliquid, nam hoc nomen, *nihil*, non significat aliquid: sed tollere significatum quod est in aliquo nomine, & ideo iure excluditur à ratione nominis, quia tollit significatum nominis, nec habet officium ponendi, sed tollendi notamen significatum.

Refla ponitur ad excludendos casus obliquos, per quas nomen declinatur, ut hominis, homini, &c. Et excluduntur isti à nomine, quia per se non sunt nomina, sed ratione sui

prim-

principalis, seu nominatiui à quo deriuantur, & à quo cadunt, vnde nominatiuus, & obliquus significant eandem rem, sed non exercent significationem eodem modo, quia non vt conduit ad significandam rem tanquam quid, & vt extremum quoddam in se, sed vt alterius, & respectiue ad alterum, vnde sequitur, quod non reddant suppositum verbo substantiuo, sed impersonali, vt pœnitet me, & sic faciunt orationem reductiue, seu subintelligendo nominatiuum, ac si diceretur pœnitentia tenet me.

CAPUT VI.

De Verbo.

Definitur verbum ab Aristotele; quod est vox significatiua ad placitum cum tempore, cuius nulla pars significat separata finita, & recta, & eorum quæ prædicantur semper est vera. Ita Aristoteles 1. Periherm. & D. Tho. ibi lect. 3. Primæ tres particulæ, scilicet vox, significatiua, & ad placitum in definitione termini explicitæ sunt.

Particula *cum tempore*, quæ ponitur ad differentiam nominis, nihil aliud designat, quàm significare rem aliquam per modum motus, aut actionis, & passionis, eo quod motus mensuratur tempore, & significare cum tempore est significare non ipsum tempus, vt res quædam est, id enim fit per nomen, sed significare rem aliquam, vt mensuratum tempore; tunc autem mensuratur tempore, quando significatur vt efluens secundum aliquem motum, aut actionem, motus enim
& actio,

& actio, primò, & per se mensurantur tempore. Vnde fit quòd quando verbum absoluitur à tempore, vt cum dico homo est animal, & in alijs propositionibus æternæ veritatis, non desinit verbum significare cum tempore, idest, per modum actionis, seu fluxus, sed desinit restringere veritatem propositionis, vt dependeat à tempore, idest, quòd non vniantur extrema ratione solius temporis, & dependenter ab aliquo temporali, sed per suam intinsecam quidditatem, licet hoc ipsum per modum temporis, & actionis significetur, de quo vide inf. q. 3. art. 1.

Quinta particula cuius nulla pars significat separata, ponitur ad differentiam orationis, & ad excludendum verba complexa, quæ non sunt vnum verbum, sed plura verba, sicut diximus de nomine. Nec verbum, siue adiectiuum, siue substantiuum subordinatur duplici conceptui, quasi significet rem aliquam, & significet actionem, seu motum quasi modum vnionis, seu compositionis; hæc enim non sunt duo significata, nec duo conceptus, sed vnum significatum cum tali modo significandi, sicut etiam nomen significat rem per modum per se stantis, vbi res, & modus per se stantis non sunt duo significata, quia nulla res significatur sine aliquo modo. Et ipsum verbum est siue sit de secundo adiacente, vt quando dico, Petrus est, siue de tertio adiacente, vt cum dico, est albus, addendo tertiam vocem vt prædicatum, semper significat idem, scilicet, esse quia vt dicit Sanctus Thomas 1. Periherm. lect. 5. in fine, *ista actualitas est communiter omnis formæ siue substantialis, siue accidentis*

cidentalis, & inde est, quod quando volumus significare quancumque formam inesse alicui significamus per verbum est, unde ex consequenti significat compositionem. Ita D. Thom.

Sexta particula Finita excludit verbum infinitum, ut non ambulat, non ambulet, eadem ratione, qua, & nomina infinita exclusa sunt a ratione nominis. Et distinguitur verbum negatum à verbo infinitato; quod negatum respondet conceptui complexo, scilicet ipsius verbi, & particulæ, non, verbum autem infinitatum respondet unico conceptui sicut diximus de nomine; & verbum negatum facit propositionem negativam, infinitatum autem non. Quod si verbum intra propositionem positum infinitatur, non est quantum ad copulam, & unionem extremorum, hæc enim per negationem numquam infinitatur sed negatur, efficitque propositionem negativam, sed solum quoad rem significatam infinitatur ut inf. q. 3. art. 2. dicetur.

Septima particula Recta ponit. ad excludenda verba obliqua, & sicut in nomine illud dicitur obliquum, quod declinat, & cadit à proprio modo nominis, quod est significare per modum quid, & per se stantis, obliquum autem significatur, ut alterius; sic in verbo, obliquum dicitur, quod cadit à modo proprio verbi, quod est significari cum motu, & actione quando scilicet significat actionem præterito, aut futuro, &c. quia hæc simpliciter non est actio, sed tantum illa, quæ est presens, unde per declinationem temporum fit obliquatio verbi.

Ultima particula ponitur ab Aristotele, &
Diuo

Diuo Thoma , ideoque, & nos illam ponimus,
 licet ab alijs omittatur, & ponitur ad exclu-
 dendum participium, quod quidem potest
 poni tamen ex parte prædicati, quàm subiecti,
 licet significet cum tempore, & ideo excludi-
 tur à ratione verbi, quia verbum semper ex
 parte prædicati se tenet, quia vel significat
 ipsum prædicatum subiecto, & ideo est, no-
 ta, idest signum eorum quæ dicuntur,
 idest, quæ prædicantur, quia componit
 & vnit illa subiecto, vt dictum est:
 si quando verò ponitur ex
 parte subiecti, vt verbum
 infinitiui modi,
 est

quia tunc verbum accipitur in vi
 nominis, non per modum
 verbi. Ita D. Tho. 1.
 Perih. lect. 5.



LIBER

SECUNDVS

*De his quæ Pertinent ad secundam
operationem intellectus.*

CAPVT PRIMVM.

*De Oratione in communi, & eius
diuisione.*

DEFINITVR oratio ab Aristotele;
Oratio est vox significatiua ad placi-
tum, cuius partes separat aliquid si-
gnificant, vt dictio, non vt affirmatio,
& negatio. Ita Arist. 1. Perihe. & D. Tho. ibidem
lect. 6. Difinitur hic oratio in communi tamen
respectu orationis perfectæ, quam imperfectæ,
simplicis, aut hypotheticæ: & primæ tres par-
ticulæ explicatæ sunt in definitione termini.
illa autem particula, cuius partes significant se-
parate, non potest melius explicari, quàm di-
cendo quòd oratio subordinatur conceptui
composito, vt ex D. Thom. elicetur 1. Perihe.
lect. 6. ita quòd etiam intra ipsam orationem
habeantur partes componentes ipsam, quæ
distinctis; & separatim conceptibus correspon-
deant, vt componentibus vnum totum, & ra-
tione primi, dictiones compositiæ figuræ, vt
respublica, signifer, &c. non sunt oratio, quia
non respondent duplici conceptui, sed vni,
licet

licet voces separatae ab oratione diuersa significant : ratione ve ò secundi distinguitur oratio à termino complexo, quia terminus complexus habet etiam partes significantes, & plures conceptus, sed per modum partis vltimus componentis, non per modum totius compositi.

Vltima particula ponitur ab Aristotel. & D. Thom. ad designandum quòd partes orationis ad minus debent esse significatiuae, vt dictio, idest, vt terminus, & non requiritur quòd fiat affirmatio, & negatio, nam etiam si oratio sit hypotetica, & habeat partes, quae constant ex affirmatione, & negatione, tamen quia etiam ipsa affirmatio, & negatio oratio est, & debet resolui in partes significatiuas, quae significant solum vt simplex terminus, & non vt affirmatio, ideo ad definiendam orationem in communi ponitur id, quod omni orationi commune est, scilicet habere partes, quae sint simplices termini, seu dictiones.

Diuiditur autem oratio prima sui diuisione in perfectam, & imperfectam. *Perfecta* oratio dicitur secundum D. Thom. i. Periherm. lect. 7. illa, quae perfectum sensum generat in animo auditoris. *Imperfecta*, quae sensum imperfectum generat. Dicitur autem perfectus, vel imperfectus sensus, non quia vna importet assensum altera non, vna verum, aut falsum, altera non, sed ex eo praecise quòd vna, scilicet perfecta, non reddit suspensum intellectum & quasi expectantem totum sensum orationis, sed perfecte complet, & exprimit integram sententiam, sicut cum dico: *Deus est summum bonum*: imperfecta vero, quae non integrum

grum sensum explicat, sed quasi suspendit intellectum, ut cum dico *Petrus disputans; si dormiatis, cum transieret, & similia*. Quæ orationes valde affines sunt terminis complexis, & solum differunt ex modo componendi; & coniungendi terminos, quia in oratione coniunguntur per modum totius, & si imperfecti, & cum insensione: in termino complexo per modum partis compositæ.

C A P V T II.

De Modo sciendi.

ANtequam de oratione perfecta, quæ est propositio, agamus, oportet tractare de Modo sciendi: licet enim plura, quæ pertinent ad modum sciendi in tertia operatione intellectus inueniantur, scilicet argumentatio: quia tamen etiam alia in secunda operatione inveniuntur, & quædam etiam ad orationem imperfectam pertinent, ideo modus sciendi in genere non determinatur ad orationem perfectam, vel imperfectam, atque adeo opportunè antequam agamus de perfecta oratione determinare, agimus de modo sciendi in communi, qui tam in oratione perfecta, quam imperfecta inueniri potest.

Igitur Modus sciendi in communi definitur, quod est *oratio alicuius ignoti manifestativa*. Vbi nota aliud esse manifestare, aliud significare: licet enim signum videatur rem significatam manifestare potentiæ, tamen aliud est manifestare, de quo agimus in præsentia, aliud significare: manifestum enim summiunt

mitur dupliciter, vno modo vt opponitur obscuro, alio modo vt opponitur incognito, & non applicato potentiae cognoscenti. Primo modo manifestatio fit per aliquid notius, & magis clarum, quo tollitur obscuritas illa, & sic manifestare ignotum in intellectu nostro pertinet ad modum sciendi, dummodo id fiat per orationem, nam manifestatio, quæ fit per rationem formalem simplici modo manifestantem, sicut autoritas dicentis manifestat credibilia, non est modus sciendi: quia non est oratio, seu explicatio complexa, idest, ad scientiam ordinata, quæ modum illatiui habet. Secundo modo manifestatio fit per aliquod medium, seu instrumentum applicans nobis obiectum non applicatum, & hoc modo manifestare pertinet ad signum, seu ad repræsentatiuum communiter loquendo.

Quando ergo aliquid ignotum, seu obscurum indiget explicatione per aliquam orationem, quæ explicet, & tollat illam obscuritatem, talis oratio dicitur modus sciendi, quia omnis manifestatio scientia dicitur, aut ad scientiam ordinatur. Duo autem sunt quæ intellectui possunt manifestari per orationem, scilicet, vel aliquid incomplexum, vel aliqua veritas complexa. Id quod est incomplexum, vt homo, cælum, terra, &c. explicatur definitione quantum ad obscuritatem suæ quidditatis, aut diuisione quantum ad confusionem partium, aut multitudinis, quæ in re aliqua continetur. Veritas autem complexa si sit obscura, aut dubia, manifestatur per probationem, probatio autem fit per discursum, & consequentiam, & sic est argumentatio: vnde modus

us sciendi adæquatè diuiditur in definitionem ; diuisionem , & argumentationem ex parte rerum manifestabilium . Qua ratione aliquando dicitur definitio , & diuisio pertinere ad primam operationem ; scilicet apprehensionem simplicem ratione sui obiecti , quod manifestat , quod est aliquid in complexum .

C A P V T III.

De Definitione .

Definitio est oratio naturam rei , aut termini significationem exponens , sicut cum dico *homo est animal rationale* , naturam hominis explico , quæ in illo termino *homo* non explicabatur , & cum dico *album est habens albedinem* , non explico naturam albi ; sed significationem nominis , quia idem est , ac si dicam , *album est vox significans id quod habet albedinem* . Definitioni correspondet definitum , tanquam obiectum eius quod cum ipsa conuenitur . Vnde oportet explicare tria ; primum , quæ conditiones requirantur , vt aliqua definitio sit bona ; secundum , quæ conditiones requirantur , vt aliquid sit definitum ; tertium , quotuplex sit definitio , & quor modis fiat .

Circa primum , tres conditiones requiruntur ad bonam definitionem : *Prima* , est quod definitio debet tradi per genus , & differentiam , & quia hæc conditio non solum complectitur definitionem essentialem in qua propriè inuenitur genus , & differentia , sed etiam accidentalem , & descriptiuam in qua non

est propriè genus, & differentia, sed aliquid loco illius; idèò intelligimus nomine generis aliquid commune, nomine differentiae aliquid distinctiuum particulare; & ita sensus est quòd omnis bona definitio, vt explicet naturam aliquam, debet explicare illam per id quod est ei commune cum alijs, & per id quod est sibi proprium, & à cæteris distinguit, sic enim totam ei naturam complectitur. *Secunda* conditio est quòd definitio clarius significare debet quàm definitum, quia illud manifestat: & inde infertur quòd non debet definitum intrare definitionem, quia sic non redditur clarior, sed magis perplexa, sicut in illa definitione hominis, quòd est animal rationale, non bene adderetur animal rationale, quod est homo. *Tertia* conditio est, vt definitio non sit redundans, nec diminuta, si enim aliquid habet plus quàm definitum, vel minus, hoc ipso naturam eius non explicat, attribuit enim illi aliquid quod non habet, vel ab eo tollit quod habet, & ità definitio non potest alij conuenire, quàm definitio, sicque est optimus locus arguendi à definitione, ad definitum, & è contra.

Circa secundum, tres etiam conditiones requiruntur, vt aliquid sit definitum, seu vt possit definiri. *Prima* quòd sit vnum per se, idest vna essentia, si enim plures essentias explicat, non est vnum definitum, sed plura: & idèò prius, quàm aliquid definiatur tollenda est æquiuocatio, & confusio pluralitatis, & tunc vnumquodque definiendum est. Si autem plura se habeant per modum vnius, & concurrant ad vnam essentiam constituendam, vel

vel vnum se habeat ut res, alterum ut modus illius, non repugnat vnica definitione comprehendendi. *Secunda* conditio est, ut definitum sit vniuersale, nam cum sola quidditas, & natura definiatur, singularia quæ supra naturam addunt conditiones indiuiduales definiri non possunt, sicut nec sub scientia cadere, licet singularitas in communi definiri possit, quia tunc accipitur, ut quidditas, & natura quædam. *Tertia* conditio est, ut omnino definitum, si rigorosa, & propria definitione definiatur, sit species aliqua contenta sub aliquo genere, eo quod omnis definitio propria constet genere, & differentia, & sic debet tradi de aliquo, quod contineatur sub genere, nisi forte definiatur per extrinsecas causas, aut habitudines, quod non ita rigorosam definitionem importat.

Est autem duplex definitum, scilicet remotum, & propinquum, quod diuersimode explicatur à diuersis, prout diuerso modo considerant rationem propinqui, & remoti: Quidam enim dicunt definitionem propinquam esse ipsum nomen, seu terminum significantem rem definitam, remotum verò esse ipsam rem significatam, ut si definitio hominem esse animal rationale, terminus *homo* est propinquum definitum, res verò significata remotum, eo quod res medijs terminis nobis appropinquant, vnde in definitione quid nominis solum est vnicum definitum. Alij dicunt quod definitum propinquum est ipsa natura, & quidditas, quæ immediate cadit sub definitione, remotum verò sunt illa in quibus inuenitur talis natura, scilicet indiuidua, quando

Enim definitio hominem, immediatè definitur natura humana, remote Petrus, & alia indiuidua eius. Vtroque modo potest dici.

Circa tertium, definitio est multiplex. *Primo* diuiditur in definitionem quid nominis, & quid rei. Illa est definitio quid nominis, *quæ explicat significationem nominis*, vnde maxime accedit ad rationem etymologiæ. Definitio quid rei, *quæ explicat naturam rei significatæ*: sicut si definitio album quod est idem atque habens albedinem, est definitio quid nominis; si autem dico quod est disgregatiuum visus, est definitio quid rei, explicat enim quid sit res ipsa, prima verò quid significat nomen. Et in ista distinctione definitionis quid nominis, & quid rei semper procedimus in sensu formali, & per se, nam non negamus quòd ex definitione quid rei etiam deueniamus in notitiam propriæ significationis nominis, & sepe non potest explicari significatio nominis, nisi rem ipsam declarando, sed ex eo, quòd directè, & per se explicat vnaqueque definitio iudicandum est quæ definitio nominis, vel rei.

Secundo, definitio quid rei diuiditur in essentialem, descriptiuam, & causalem. *Definitio essentialis, seu quidditatiua est oratio rem aliquam per suas partes, seu predicata essentialia explicans*, vt homo est animal rationale. Cum autem considerentur in vnaqueque re partes physicae, vt materia, & forma, & partes metaphysicae, vt genus, & differentia, duplex quoque est definitio quidditatiua scilicet *physica*, quæ traditur per materiam, & formam, & *metaphysicam*, quæ traditur genus, & dif-

& differentiam, quanquam etiam in physica; materia ponatur loco generis, forma a loco differentiae, ut sic verificetur quodd omnis definitio constat genere, & differentia, seu aliquo loco generis, & differentiae, *Definitio descriptiva est quae traditur per eius accidentia, sine propria, sine communia, ut si dicas homo est animal risibile, aut animal bipes. Definitio causalis est, quae traditur per causas extrinsecas, quae causae extrinsecae sunt duae, scilicet efficiens, & finalis, ut dicitur in 2. Physic. quia non constituunt naturam, sed extra illa sunt (nam materia, & forma sunt causae intrinsecae) ut si definias animam humanam, quodd est forma creata à Deo ad beatitudinem,*

C A P V T IV.

De Diuisione.

Diuisio est oratio rem aliquam per sua membra, aut terminum per varias significationes distribuens, sicut si dicam animal aliud est rationale, aliud irrationale; Canis significat syndus, & significat animal. Et quia diuisio ordinatur ad manifestandum per distributionem confusionem diuisi, sicut definitio ad manifestandam quidditatem, tres conditiones exiguntur ad bonam diuisionem. *Prima* quodd singula membra sint inferiora, idest minora diuisio, nam omne totum est maius sua parte. *Secunda* quodd omnia membra diuidentia simul exhaustiant, seu adaequant totum diuisum, quia in toto non est aliud quam omnes suae partes simul. *Tertia* quodd membra diuidentia habeant inter se oppositionem aliquam

saltem formalem, quia si nullam oppositionem haberent, neque dictionem haberent, sed identitatem, & sic non essent diuersa membra. Omnes istæ conditiones videri possunt in hac diuisione : *Animal aliud rationale, aliud irrationale; & in hac : Bonorum aliud honestum, aliud utile, aliud delectabile.*

Addunt quidam quartam conditionem, scilicet, vt diuisio fiat tantum in duo membra diuidentia, aut saltem in quàm paucissima. Sed licet verum sit quod omnis diuisio potest educi in duo membra, si tradatur per contradictoria, vt *Bonorum aliud honestum, aliud non honestum*, tamen non est hoc semper necessarium ad bonitatem diuisionis, sed quando aliquod genus distribuitur per species ex æquo, & immediate subiectas, in illas diuidi potest; si autem non diuidatur in plures immediate, & ex æquo subiectas, debet fieri diuisio in duo membra, vel in quàm paucissima, & deinde in alia inferiora distribui; sicut substantia non benè diuideretur in hominem, plantam, & angelum, sed ordine quodam in corporalem, & spiritualem; corporalis in viuentem, & non viuentem, &c.

Species, seu modi diuisionis sunt multæ, cum enim diuisio distribuat totum in suas partes, sicut esse totum dicitur multis modis, ita, & diuisio. Datur enim totum essentialè, totum integrale, totum vniuersale, totum potentiale, & sic multiplicari possunt species diuisionum.

Et vt breuiter omnes comprehendere possis, facito duas lineas, seu ordines. Quædam linea est diuisionum per se, alia diuisionum

per

per accidens, seu accidentalis. In diuisione per se include quinque species, quæ hoc modo colliguntur, nam omne quod diuiditur, aut est vox significans respectu suarum significationum, aut est res significata. Si primum, est *diuisio nominis*, si secundum, est *diuisio rei*. Res autem, quæ est totum, comparari potest, aut ad partes quibus integratur, aut ad partes quibus constituitur essentialiter, aut ad partes sibi subiectas. Si primo modo fiat, est *partitio* qua aliquid diuiditur per partes integrantes, vt si dicas corpus humanum diuiditur in caput, pectus, & pedes; vniuersum in angelos, corpora corruptibilia, & incorruptibilia. Si secundo modo, est *diuisio essentialis in sua constituentia* vt si dicas hominis alia pars est anima, alia corpus: vel hominis alterum extremum est animal, alterum rationale. Si tertio modo, aut fit in partes sibi subiectas secundum prædicationem, aut secundum potestatem. Si secundum prædicationem, est *generis in species*, quia de speciebus prædicatur genus, vt de inferioribus: ad quam etiam pertinet diuisio generis per differentias, imò videtur esse eadem, quia genus non diuiditur in differentias, sed per differentias diuiditur in species, & melius explicatur, quando fit per differentias, vt animalium aliud rationale, aliud irrationale, & hæc est diuisio propriissima, & quidditativa, vtpote de his in quæ, & per quæ essentialiter contrahitur genus, & in qua diuisum prædicatur de membris diuidentibus. Si fiat diuisio in partes subiectas, quæ se habent vt potentia, est *diuisio totius potentialis*, vt si dicas animæ aliud intellectu

ctium, aliud appetitiuum potentiae aliud iudicatum, aliud consiliatum, aliud imperatum, quae diuisio est penes diuersa officia, seu potentias rei.

In linea diuisionum per accidens, etsi multiplicari possint infinitae diuisiones, quia de his, quae sunt per accidens non datur certa regula, tamen frequentiores sunt tres: *Prima est diuisio subiecti in accidentia*; vt animalium aliud album, aliud nigrum: *Secunda è conuerso accidentis in subiecta*; vt alborum, aliud nix, aliud lac: *Tertia accidentis in accidentia*; vt alborum, aliud dulce, aliud amarum, &c.

Regulae diuisionis, seu loci arguendi sunt tres, qui deducuntur ex conditionibus bonae diuisionis: *Prima*: A diuiso ad diuisionem; & è conuerso, valet consequentia affirmatiue, vel negatiue. Patet, quia se habent conuertibiliter. *Secunda*: A toto diuiso cum negatione vnius membri, si sit diuisio bimebris, vel plurium, si sit multiplex, ad positionem eius membri quod restat, bona est consequentia, vt equus est animal, & non est rationale, ergo irrationale. *Tertia*: Quando membra sunt realiter opposita, bene valet à positione vnius membri ad negationem alterius: patet, quia opposita non possunt esse simul saltem naturaliter, & per se loquendo.

C A P V T V.

De Argumentatione.

DE hac tertia specie modi sciendi agendum nobis est in 3. lib. ad quem directe spectat, cum pertineat ad tertiam operationem intel-

Intellectus. Pro præfenti ubi distinximus species modi sciendi sufficit notare hæc tria .

Primum est definitionem argumentationis , quæ est *Oratio in qua uno dato , aliud sequitur* , ut si dicam , Petrus est animal , ergo est corpus . Quare argumentatio debet componi , & constare ex tribus , scilicet *antecedente* , seu præmissa tanquam inferente , & *consequente* tanquam illato , & *nota illationis* , quæ est coniunctio antecedentis , & consequentis illationem , seu sequellam denotans .

Secundum est , quod species argumentationis sunt quatuor , scilicet *sylogismus* , *enthymema* , *inductio* , & *exemplum* . Et possunt reduci ad duas , scilicet ad syllogismum , & inductionem , nam enthymema est quidam syllogismus imperfectus , seu truncatus , & exemplum est quedam pars inductionis . Diuiditur autem in istas species argumentatio in quantum manifestatiua est veritatis , in quo eius consistit quidditas . Dux autem solum sunt viæ manifestandi veritatem , scilicet , vel discurrendo ex principiis per intellectum notis , vel ad sensibilia , & singularia deducendo , quia ibi est origo totius notitiæ nostræ . Si fiat primo modo , est per syllogismum , qui constat ex tribus propositionibus , maiori , minori , & consequente , vel ex duabus si sit enthymema , scilicet antecedente , & consequente ; & ideo est imperfectus syllogismus , quia ponit unam propositionem pro antecedente , & syllogismus duas , cuius nota vis inferendi consistit in vnione aliquorum in vno tertio , unde inferuntur vnionem eorum inter se . Si secundo modo , est inductio , quæ non ex connexionem cum

vno terito, sed ex pluribus singularibus sufficienter enumeratis infert vniuersaliter sic fieri in omnibus, & ad hoc reducitur exemplum, quod ex vno singulari infert non vniuersale, sed aliud simile.

Tertium est, quòd aliæ diuisiones argumentationis dantur præter istas species, sicut ex *parte notæ illationis* alia argumentatio est rationalis, scilicet quæ fit per particulam *ergo*, vt homo est animal, ergo est viuens, alia conditionalis, quæ fit per particulam *si*, vt si Sol lucet, dies est: alia causalis, quæ fit per particulam *quia*, vt quia homo est rationalis, est risibilis, & differt inter ista tria, quòd ad veritatem conditionalis sufficit, quòd sit bona consequentia licet extrema sint falsa, vt hæc est conditionalis vera: si homo volat, habet alas, & tamen extrema sunt falsa. Ad veritatem rationalis requiritur quòd antecedens, & consequens sint vera, ad veritatem inquam, nam ad bonitatem consequentiæ etiam ex falso potest sequi verum, vt dicemus lib. 3. Ad veritatem causalis, quod sint vera, & antecedens sit causa consequentis: est enim verum quòd homo est animal, & est risibilis, sed falsum, quòd quia est animal, sit risibilis.

Ex *parte autem qualitatis* consequentiæ, diuiditur in bonam, & malam. Bona consequentia est, in qua antecedens infert consequens, taliter quòd non potest antecedens esse verum, & consequens falsum. Mala consequentia est, in qua antecedens non infert consequens, licet videatur, seu significetur inferri, ratione cuius significationis denominatur consequentia, sed mala, quia non infert,

infer, sed datur antecedens verum, & consequens falsum.

De regulis consequentiarum ad discernendum bonas à malis dicemus lib. 3. vbi ex professo agendum est de defectibus consequentiae.

C A P V T VI.

De Propositione, siue Enunciatione.

PRAECIPUA species perfectae orationis est enunciatio, seu propositio, & de illa magna in Dial.ica tractatio est; quia potissimum deseruit syllogismo, & discursui. Et sumimus pro eodem propositionem, & enunciationem, quia sic obtinuit vsus etiam inter Sapientes, vt constat in disputationibus communibus, in quibus magis vtimur nomine propositionis, quam enunciationis, & sic etiam vtitur S. Th. 1. p. q. 13. art. 12. nomine propositionis pro enunciatione: aliàs verò officium propositionis distinxit à simplici officio enunciationis cum Aristot. 1. Poster. lect. 5. & opusc. 48. tractata de syllogismo simpliciter cap. 1. scilicet quod propositio addit supra enunciationem quòd proponatur, ad inferendum aliquid in argumentatione. Definatur ergo enunciatio, quòd est *oratio verum, vel falsum significans indicando*, vt cum dico homo est animal. Ita ex Arist. 1. Perihe. D. Thom. lect. 7. *Oratio ponitur loco generis significare verum, vel falsum loco differentiae*, per quam distinguitur enunciatio à ceteris orationibus, siue imperfectis, siue perfectis

non explicantibus veritatem. *Particula indicando* ponitur ad designandum, quo pacto verbum in propositione simplici deferuiat ad significandum verum, vel falsum, idest per modum asserendi, quod communiter sit verbo indicatiui modi, vel ad illud debet reduci, veritas autem in simplici enunciatione assertiuè significatur, siuè affirmando, siuè negando. In hypotheticis autem, licet non semper assertiuè procedatur, vt in conditionalibus non indicatiui modi, v.g. si percuteres Petrum, te occideret, & similibus tamen ex aliquo sensu subintellecto reduci potest veritas propositionum ad assertionem, eo modo quo reduci potest ad categoricas.

- *Vt autem* constet quid sit significare verum, nota ex D. Thom. 1. Periherm. lect. 7. quod veritas est in enunciatione, sicut in signo intellectus veri, vel falsi, sed sicut in subiecto test verum, vel falsum in mente (idest in iudicio mentis) vt dicitur in 6. Metaph. in obiecto autem, sicut in causa, quia vt dicitur in libro Prædicamentorum, ab eo quod res est, vel non est, oratio vera, vel falsa est. Loquitur autem hic D. Thom. de enunciatione vocali, vel non iudicatiua, quando dicit quod est in enunciatione veritas, sicut in signo intellectus veri, vel falsi, nam loquendo de enunciatione iudicatiua mentali, in illa est veritas, sicut in subiecto.

Sed tamen quia etiam iudicatiua mentalis significatiua est, & repræsentatiua veritatis obiectiue, vltcrius dicimus quod significare verum, vel falsum in propositione mentali, non est aliud, quàm significare per modum

com-

componentis ; aut diuidentis , ita quòd significetur aliquid , vt iudicabile , sicut ex hoc quòd aliquòd prædicatum copulatur , vel disiungitur à subiecto , resultat quòd conformetur , & adæquetur , vel non conformetur ipsi rei , non solum conformitate , vel difformitate assimilationis , sed attributionis , & coniunctionis prædicati cum subiecto , nam assimilatio ad rem extra etiam in simplici apprehensione inuenitur , & ita docet S. Thomas 1. p. q. 16. art. 2. quod *simplex apprehensio , vel sensus est verus , sed non cognoscit verum , quia non cognoscit conformitatem veritatis , quia non applicat aliquid alicui , vel remouet ab eo .* Quia propter significare applicationem vnius ad aliud , vel potius significare rem applicando vnum alteri per modum iudicabilis , est significare verum , vel falsum . Ipsa autem veritas propositionis , non est ipsa significatio veri , vel falsi , sed conformitas , seu adæquatio , cum re significata , ex tali significatione resultans , quod totum vnico verbo significare volunt , qui dixerunt , quòd significare verum est significare rem esse qualiter se res habet , & significare falsum , significare aliter , quam se res habet . Hoc autem non est solum significare aliquammodo sicut sineathogorema , nec solum aliquid simplex , sicut cathegorema , sed aliquid compositum , seu aliquid quod est applicatio vnius ad alterum , quod est enuntiativa oratio . Quomodo autem veritas ipsa , aut falsitas non sint essentia propositionis , sed significatio ex qua resultat veritas , vel falsitas , & quomodo vna veritas formaliter non sit maior , nec minor alia dicemus inf. q. 5.

Sed aduerte quòd sunt aliquæ propositiones se falsificantes, seu destruentes suam veritatem, sicut, & aliæ destruentes suam possibilitatem, vel suam necessitatem, & hoc contingit, quando ex ipsamet verificatione propositionis sequitur quòd sit falsa, idest, ex eo, quòd ita sit, sicut per illam significatur, vt si dicam, omnis propositio est falsa, vel hæc propositio est falsa, ipsammet demonstrando, ex eo enim, quòd ita sit, sicut significat, sequitur ipsam esse falsam. Et tales propositiones simpliciter sunt falsæ, quia licet habeant verificationem, illa tamen non est simpliciter veritas, quia ea illa sequitur falsitas, malum autem est ex quocumque defectu, & id vnde sequitur falsum, simpliciter non est verum.

CAPVT VII.

De Diuisione Propositionis.

Omissa diuisione propositionis in veram, & falsam, quæ simpliciter non est diuisio; cum eidem propositioni conuenire possit, imò veritas, & falsitas non sunt formaliter in ipsa propositione, quatenus enunciativa est, sed quatenus iudicatiua, iudicium autem pertinet ad assensum, & dissensum, enunciatio ad copulationem extremorum super quam cadit iudicium assensus tanquam supra materiam, vt dicemus q. 4. art. 1. Ommissa ergo hac diuisione, & agendo solum de propositione quatenus enunciativa est.

Omnes diuisiones propositionis ad quatuor prin-

principales, quasi ad capita reducuntur. *Prima* diuisio est in *propositionem categoricam*, & *hypotheticam*, quæ est diuisio essentialis, vt dicemus loco prædicto, nam tenet se ex parte partium quibus constat, est enim *categorica propositio*, quæ habet *subiectum*, *copulam verbi*, & *prædicatum* tanquam partes principales sui, omnis enim propositio verbo constare debet, vt Aristoteles docet 1. Periherm. cap. 4. & cum eo D. Thom. ibid. lect. 1. & 8. *Subiectum* dicitur illud, de quo aliquid dicitur. *Prædicatum*, id quod de aliquo dicitur, vt in hac propositione homo est albus, ly *Homo* dicitur subiectum, ly *Albus* prædicatum, & ly *est* copula verbalis, & quia ex istis tanquam ex principalibus constat hæc propositio, dicitur categorica, idest prædicatiua, & ab alijs dicitur simplex, quia solum ex verbo, & nomine componitur, vt dicit S. Thomas lect. 8. citata, nec enim est alia compositio simplicior. *Hypothetica*, quæ ab alijs dicitur composita, seu coniunctione vna, dicitur illa, quæ habet duas categoricas tanquam partes principales sui: vt si homo currit, homo mouetur. Et sic differunt hypothetica, & categorica penes copulas, & penes extrema copulata, quia hypothetica non vnit verbo, sed particula, &, vel, si, & similibus, nec immediate vnit terminos, sed propositiones.

Secunda diuisio est ex parte quantitatis propositionis, in *uniuersalem*, *particularem*, *indefinitam*, & *singularem*. Et sicut in naturalibus quantitas rei sequitur materiam, ita in propositionibus quantitas sequitur subiectum, quod est quasi materia respectu prædicati, &
copu

copulæ , constat autem quod extensio propositionis , seu quantitas eius sumitur penes pluralitatem , & extensionem subiectorum , quibus prædicatum conuenit . Vnde hæc diuisio est accidentalis . Igitur *propositio vniuersalis est illa in qua subiectum propositionis afficitur aliquo signo vniuersali* Signa autem vniuersalia sunt *omnis , nullus , quilibet , neuter , & similia* , quæ distributionem pro pluribus important , vnde talia signa non affiguntur nisi termino communi , vt *omnis homo disputat* .

Sed aduerte quod in propositione distinguitur aliquando subiectum distributionis à subiecto prædicationis , seu enuntiationis , vt in hac propositione , *Cuiuslibet hominis equus currit* , vbi cursus prædicatur de equo , vt de subiecto , sed distributio non conuenit subiecto , sed homini . Itaque illud subiectum propositionis , cui affigitur signum distributionis , dicitur subiectum distributionis . Sed hæc distributio , & vniuersalitas est simpliciter distributio , quando non dependet , nec restringitur ab alio termino antecedente , cuius resolutio prius dari debeat , quam resolutio termini distributi , est autem distributio secundum quid , quando est dependens ab alia priori resolutione , vt si dicam , *hominis quilibet equus currit* , licet ly equus afficiatur signo distributionis , non tamen simpliciter est vniuersalis , quia restringitur à ly hominis , & non possumus resolvere , id est , descendere sub illo termino *Equus* , antequam ascendamus sub illo termino *hominis* , vt in lib. 3. in tractatu de inductione clare ostendemus ,

&

& sic vniversalitas propositionum tunc est simpliciter talis, quando in sua distributione, & resolutione, seu descensu est independens ab aliqua priori resolutione alterius termini, quando autem est dependens, est vniversalitas secundum quid.

Propositio particularis est in qua subiectum afficitur signo particulari, vt quidam homo disputat. Signa particularia sunt, quidam aliquis, alter, & similia, quæ pluribus conuenire faciunt, sed non distributiue. Propositio indefinita est, in qua subiectum est terminus communis, & nullo signo afficitur, vt homo disputat. Propositio singularis est, in qua subiectum est terminus singularis, vel terminus communis affectus signo singularitatis, vt Petrus disputat, iste homo disputat. Terminus autem singularis est, qui de uno solo, & non de pluribus potest prædicari.

Tertia diuisio est in propositionem affirmatiuam, & negatiuam, quam D. Thom. 1. Periherm. lect. 8. appellat generis in species. Affirmatiua propositio est, in qua prædicatum affirmatur de subiecto, vt homo est albus: Negatiua in qua prædicatum negatur de subiecto, & sic affirmatio facit compositionem, negatio vero diuisionem.

Quia ergo affirmatio, & negatio penes copulam attenditur, oportet aduertere, quod duplex est copula, *quædam principalis*, quæ vnit prædicatum subiecto; *quædam minus principalis* (quam etiam implicationis vocant, quæ est pars extremis; vt quando dico Petrus, qui est doctus, est iustus, illud *qui est*, tenet se ex parte subiecti, & constituit vnum extremum

munum super quod cadit copula vniens prædicatum, & ista est principalis. Copula principalis, *alia est simplex, alia complexa*; simplex v^o quando vnā solum pono v. g. Petrus est iustus; complexa, vt quando ponitur duplex v. g. Petrus est, vel fuit iustus. Et quidem in copulis complexis, si vtrāque negetur, vel vtrāque affirmetur, clare constat, quòd tota propositio est affirmatiua, vel negatiua, vt Petrus nec est, nec fuit albus, est simpliciter negatiua, Petrus est, & fuit albus, simpliciter affirmatiua; si autem vna affirmetur, & altera negetur, vt si dicas Petrus est, vel non fuit albus, formaliter est mixtæ qualitatis, virtualiter autem illa dicitur affirmatiua, quæ ex se infert vnā affirmatiuam, & virtualiter negatiua illa, quæ infertur ex vna negatiua. *Cuius ratio est*, quia si vna propositio infert vnā affirmatiuam, illa propositio illata non potest verificari, nisi supponat extrema, ergo oportet quòd etiam in eius antecedente extrema supponant, quia non potest antecedens esse verum, & consequens falsum in bona consequentia. Ergo oportet, quòd talis propositio inferens affirmatiuam per bonam consequentiam sit virtualiter affirmatiua, hoc est, exigit ad sui verificationem idem quod affirmatiua scilicet, suppositionem extremorum v. g. hæc propositio Petrus est, & non fuit albus, est virtualiter affirmatiua, quia infert hanc Petrus est albus, quæ est absolute affirmatiua.

E-contra verò, si vna propositio infertur ex vna negatiua, dicitur virtualiter negatiua licet in se sit mixtæ qualitatis, quia non exigit ad sui verificationem nisi id quod exigit negatiua, sci-

et.

et quod verificetur sine suppositione extremorum, eo quod inferitur ex vna negatiua, quæ sine suppositione extremorum verificatur, & per consequens eodem modo verificabitur ea quam infert, quia in bona consequentia, si antecedens est verum, consequens non potest esse falsum, sicut hæc, Petrus est, vel non fuit albus, inferitur ex ista, Petrus non fuit albus, & ita prima est virtualiter negatiua.

Propositio negatiua, cum constet ex copula negata, negatio autem est malignantis naturæ, quæ destruit quicquid post se inuenit, consequenter duplicata negatio efficit affirmationem, quia prima negatio destruit secundam. Et eodem modo cum negatio habeat vim distribuendi, si inuenit subiectum distributum, tollit distributionem eius, quod Dialectici vocant immobilitare, & sic negatio mobilizat, id est, distribuit immobilitatum, & immobilizat mobilitatum, id est, distributum, vt si dicas non omnis homo disputat, *ly non omnis* est idem, quod *quidam* de quibus in c. de Æquipol.

Quarta diuisio est in propositionem de inesse, & modalem. *Modalis propositio* est in qua verbum, seu copula afficitur aliquo ex his quatuor modis, scilicet, necessario, contingenter, possibiliter, impossibiliter, quia isti modi afficiunt ipsum verbum quantum ad rationem, & modificationem componendi propositionem, & copulandi, *Propositio autem de inesse* est illa, quæ sine talibus modis copulat; & componit unum extremum cum alio, quamuis aliis aduerbijs modificantibus verbum, aut prædicatum constet, vt hæc *Propositio, Petrus est albus, Petrus iuste vivit*, sunt de inesse, hæc
verò

verò modalis, *Petrus contingenter disputat*, necessario videt, &c. De his modalibus latius dicemus tractando de Oppositionibus.

Omnes istæ diuisiones fiunt, & sumuntur ex parte copulæ, præter illam, quæ est in vniuersalem; & particularem, &c. Quæ sumitur penes quantitatem ex parte subiecti; categorica enim, & hypothetica penes copulam distinguuntur, quia categorica constat copula verbali, hypothetica coniunctione propositionum. Item affirmatiua constat copula affirmata, negatiua copula negata: modalis constat copula modificata modificatione tangente ipsam compositionem: Propositio de inesse copula simplici, & absoluta.

CAPVT VIII.

De materia Propositionum.

IN propositione subiectum habet rationem materiæ quasi partialis respectu prædicati, quia prædicatum de subiecto dicitur, & quasi in eo recipitur. Rursus subiectum, & prædicatum dicuntur quasi materia copulæ, quia secundum habitudinem, & conuenientiam predicari ad subiectum fit, vel non fit debito modo vnio ipsa inter prædicatum, & subiectum. Et hæc habitudo terminorum, ex quibus quasi ex materia propositio componitur, dicitur absolutè propositionum materia. Et est triplex, alia naturalis, alia contingens, alia remota. *Naturalis, in qua vnus terminus est de essentia alterius, & sic vel fundant habitudinem essentialem, vt si dicas ho-*
mo

mo est animal, vel necessariam propriæ passionis, vt homo est risibilis. *Contingens in qua prædicatum accidentaliter conuenit subiecto, & potest adesse, & abesse sine subiecti corruptione*, vt Petrus est iustus. *Remota in qua prædicatum repugnat subiecto*, vt homo est lapis & sufficit repugnantia naturalis, nam supernaturaliter id quod erat in materia remota, scilicet Deus, & homo, factum est in materia naturali postquam Verbum factum est homo.

Prædicatio, alia identica, alia formalis. Item alia directa, alia indirecta. Identica, in qua idem de seipso, vel synonymum de synonymo prædicatur, vt homo est homo. *Formalis, in qua prædicatur forma, vel aliquid ad instar formæ de aliquo*, vt homo est iustus, homo est animal. *Prædicatio directa est, in qua prædicatur id, quod habet rationem formæ, de eo, quod habet rationem subiecti*, siuè sit forma essentialis, vt definitio, vel pars definitionis de definito, & superius de inferiori, siuè sit forma accidentalis de subiecto; vnde, & prædicatio directa, alia est essentialis, alia accidentalis.

Indirecta prædicatio est, in qua è conuerso

subiectum dicitur de forma, aut defini-

nium de definitione, vt colora-

tum est homo, animal ra-

tionale est homo, &

ista propriè

non

est essentialis aut accidenta-

lis. Sed de his latius

in Logica q. 5.

art. 2.

CAPVT IX.

De proprietatibus Propositionis, & quo ordine tractanda sunt.

Explicata natura propositionum, earumque diuisione, & diuersitate materiæ, sequitur ordinis doctrinæ agere de proprietatibus propositionis, Quædam autem proprietates sequuntur ipsa extrema, seu partes propositionis, quædam totam ipsam propositionem, Proprietates partium propositionis, quæ solum conueniunt illis, prout intrâ propositionem sunt, quinque sunt, scilicet *suppositio*, *ampliatio*, *restrictio*, *alienatio*, *appellatio*. Proprietates, quæ sequuntur totam propositionem sunt, *oppositio*, *conuersio*, *aquipollentia*. Et istæ proprietates possunt inueniri tam in propositionibus de inesse, quàm in Modalibus. Et idcirco prius agemus de proprietatibus extremorum propositionis, deinde de proprietatibus totius propositionis, & prius in propositionibus de inesse, deinde in modalibus.

CAPVT X,

De Suppositione.

Suppositio definitur, quòd est *acceptatio termini pro aliquo de quo verificatur*. Multi ex Recentioribus hanc definitionem non admittunt existimantes, quòd suppositio solum est acceptio nominis pro re quam significat, nec distinguunt suppositionem à significatione,

ne, seu exercitio significationis, qua vox substituitur in significando loco rei. Vnde illud antiquum, & acceptatum principium, quoddamque propositiones sunt de subiecto non supponente, & ideò, si sint affirmativæ, falsæ sunt, ab ipsis rejicitur, quia omne nomen, siue intra, siue extra propositionem supponit, hoc ipso, quoddam substituitur pro aliquo apud intellectum, nam & Aristoteles dixit in 1. Elenchorum, quoddam quia res nobiscum ferre non possumus, utimur nominibus pro rebus.

Ceterum euidenter distinguit S. Thomas inter significationem nominis, & suppositionem in q. 9. de po enria art. 4. in corpore, & ad 6. & idem colligitur ex prima parte, q. 39. art. 5. ad 5. ubi admittit illam regulam Sophistarum. *Quoddam nomina substantiua supponunt, adiectiua verò non supponunt, sed copulant*, ergo apud S. Thom. non est idem significatio, quoddam suppositio.

Denique rationem huius assignauit S. Thom. in 3. sent. d. st. 6. quæst. 1. artic. ubi ita inquit, *quoddam in quolibet nomine est duo considerare, scilicet, id à quo imponitur nomen, quoddam dicitur qualitas nominis, & id cui imponitur, quoddam dicitur substantia nominis, & nomen proprie loquendo dicitur significare formam, siue qualitatem, dicitur verò supponere pro eo cui imponitur*, Et inde infert solutione ad 1. quoddam diuersitas suppositionis non facit equiuocationem, sed diuersitas significationis. Distinguit ergo manifeste Sanctus Thomas suppositionem à significatione. Et nos ex eius verbis dicimus, quoddam cum significatio nominis sit quædam substitutio pro re significata, dupliciter potest intelligi-

Intelligi substitutio; vno modo substitutio re-
 presentatiua, qua ipsæ voces nobis ingerunt
 res significatas; & hæc non est suppositio, sed
 significatio. Alio modo est substitutio, quasi
 applicatiua, qua postquam intellectus acce-
 pit representationem, & significationem vo-
 cis, applicat diuersimodè in propositionibus
 ipsum nomen, vt stet pro cui vult aliquid
 applicare; sicut cum dico, *homo est albus*, *ly*
homo, non solum mihi representat naturam
 humanam, sed etiam substituo illud pro eo,
 cui applicanda est albedo, per illam copulam
est. Vnde consideratur intellectus an respectu
 talis copulæ detur verè, & propriè subiectum
 quod sit homo, & si datur, verè substituit ta-
 le subiectum in propositione: si autem non
 inuenitur, substitutio est nulla, sicut si dice-
 rem Antichristus fuit bonus, Adam est albus,
 non substituo, nec supponunt illa subiecta
 quia respectu illius copulæ *fuit*, non datur
 Antichristus, & respectu illius copulæ *est*, non
 datur Adam, & sic vocantur propositiones de
 subiecto non supponente.

Sic ergo explicatur definitio: Suppositio est
acceptio termini, idest, acceptio substantiua ab
 intellectu facta in ordine ad aliquam copulam
 in propositione, & sumitur pro acceptione
 passiuæ ex parte termini accepti, non pro acti-
 uæ ex parte intellectus accipientis. Additur
 in definitione, *Pro aliquo de quo verificatur*,
 intelligere pro quo verificatur illa acceptio seu
 substitutio, non de quo verificatur propo-
 sitio, non cum requiritur ad suppositionem
 veritas, seu verificatio propositionis, siqui-
 dem etiam in propositione falsa datur suppo-
 sitio,

titio, vt cum dico Homo est lapis, ly *Homo*, supponit, quia verè inuenitur id cui conuenit esse homo respectu illius copulæ *est*, & secundum exigentiam eius, sed requiritur ad suppositionem verificatio acceptionis termini, & substitutionis eius, idest, quòd id cui conuenit illud nomen, & pro quo substituo illud in ordine ad copulam propositionis, verè inueniatur, & detur iuxtà illius copulæ exigentiam.

Quare ad comprobandam, & ostendendam suppositionem termini vtimur propositione demonstrante illam in ordine ad copulam, vt si dico Homo est albus, ostendo quòd homo supponit, quia in ordine ad illam copulam *est*, demonstrato homine, verum est dicere, *hoc est, Homo*, & in ista propositione Adam fuit, ly *Adam* supponit, quia hoc indiuiduum, demonstrat *Adam*, aliquando fuit, & si dico *homo est nomen*, verificatur suppositio subiecti dicendo *Homo*, demonstrata voce, *est* ly *homo*, seu est vox homo, & sic de cæteris. Hæc autem demonstratio, quando dico *Hoc est &c.* non requiritur quòd fiat ad sensum, sed sufficit quòd ad intellectum demonstretur, quia præterita, & futura non demonstrantur ad sensum, & similiter occulta, vt si dicam, *Aurum est non demonstratum*, scilicet aurum, quòd est in terra, ly *aurum* supponit, quia verificatur dicendo, *Hoc demonstrato auro per intellectum, est aurum*, non autem demonstrato per sensum; sic enim falsificaretur propositio, sicut etiam falsificatur, si ly *non demonstratum*, referatur etiam ad intellectum. Quare propositio demonstrans suppositionem non dat illi verificationem, sed designat, &

Logica Pars I. C osten-

ostendit illam, & sic cum dicitur quòd *suppositio est acceptio pro aliquo de quo verificatur*, intelligitur sic, de quo verificatur in propositione in qua ponitur, quasi in exercitio, in ea verò in qua demonstratur, quasi in actu signato, ut in manifestante seu probante suppositionem.

Ex dictis colligitur, quòd suppositio termini non datur extra propositionem: licet enim terminus, & quælibet vox significatiua extra propositionem significet ut terminus; non tamen applico, & substituo illum pro aliquo, verificando illum secundum exigentiam alicuius copulæ, nisi in propositione, in qua solum inuenitur copula, & inuenitur applicatio vnius ad alterum per modum prædicati, & subiecti, & sic substitutio applicatiua pro aliquo verificata secundum exigentiam copulæ, quod est suppositio, extra propositionem non datur; substitutio verò significatiua, & ordinata ad componendam propositionem datur.

Colligitur secundo quòd suppositio, ut explicatur in definitione, ita generaliter est definita, quòd etiam adiectiuus quando adiectiuè tenentur potest applicari, ut si dicam Petrus est albus, ly *albus* etiam accipitur pro aliquo de quo verificatur, & cui conuenit ratio albi iuxta exigentiam copulæ. Si tamen suppositio accipiat strictius pro eo quod est non solum accipi pro aliquo, sed etiam reddere suppositum verbo, quod est strictiori modo supponere, sic adiectiua non supponant, sed copulant suum significatum formale alteri supposito, ut dicebant Antiqui.

CAPVT XI.

De Diuisionibus Suppositionis .

Suppositio cum sit acceptio termini pro eo de quo verificatur, dicit respectum, & ordinem ad tria, & penes illa sumuntur eius diuisiones. Dicit enim respectum *ad significatum*, pro quo supponit, *ad verbum*, in ordine ad quod supponit, *ad signum modificans*, quo modificatur ad supponendum.

Primo ergo ex parte significati, diuiditur suppositio in propriam, & impropriam. *Suppositio propria est acceptio termini pro eo, quod proprie significat, vel representat*, vt cum dico, Leo rugit, accipitur Leo pro animali, quod proprie significat: *Impropria suppositio est acceptio pro eo, quod improprie significat, & quasi metaphoricè*, vt cum dico, vicit Leo de Tribu Iuda, accipitur Leo pro Christo quem proprie non significat. Et sic in istis propositionibus, *Christus vicit, Leo de Tribu Iuda vicit*, licet accipiat subiectum pro eodem, scilicet pro Christo, diuerso tamen conceptu, & representatione, nam in primo representatur Christus absolute, & simpliciter, quia proprie; in secundo verò representatur Christus cum connotatione ad Leonem verum, & ita nomen *Leo* improprie representat, & supponit pro Christo, quia ratione connotationis, & non simplicis ac directi significati illum representat, & ideo illi modi metaphoricæ locutionis habent elegantiam, & delectationem, quia non simplici modo, sed quasi quodam

circuitu, & connotatione res significant.

Propria suppositio diuitur in tres species, scilicet *materiam, simplicem, personalem*, *Materialis est acceptio termini pro se*, idest pro ipsa voce, & ideo in definitione suppositionis propriè posuimus, quod est acceptio pro eo quod propriè significat, & repræsentat, quando enim supponit materialiter, repræsentat se, non significat, vt cum dico, *Homo est nomen*, *Blytiri est vox*, nisi forte subintelligas, *vox homo*, *vox Blytiri*. Cognoscitur suppositio materialis ex tribus: primo si ponatur terminus non significatiuus, vt *Blyteri Scindapsus*: isti enim non possunt supponere nisi pro se. Secundò si ponantur signa materialitatis, vt sunt, *hæc dictio*, *hic terminus &c.* faciunt stare rem demonstratam per illa materialiter. Tertiò si ex parte prædicati ponatur aliquid, quod non significat rem, sed terminum, vt si dicas *homo est vox*, *homo est nomen*.

Suppositio simplex est. *Acceptio termini pro eo quod primo, & immediate significat*, & non mediate, vt si dico, *Homo est species*, ly *homo* supponit suppositione simplici. Vbi aduerte nomina significare duo: primum quod est quasi primarium, & formale: secundum quod est id in quo inuenitur tale primarium, & est quasi secundario significatum à nomine, quia in eo quasi supposito, & materiali susceptiuo reperitur id quod significat nomen, v. g. *homo* significat primario, & immediate humanam naturam, mediatè verò omne illud in quo illa inuenitur, idest, omnia individua hominis. Suppositio ergo simplex est

ac-

acceptio termini pro eo quod est significatum primario, & immediatè, ita præcisè, quòd non transit ad secundarium significatum, & ad ea, in quibus inuenitur primarium, sed cum præcisione stat pro primario significato, & ideo est simplex, & præcisa suppositio, quæ stat in immediato, & primario significato, non quasi duplex quæ transeat ad secundum & mediatum, sicut quando dico, Homo est species, non accipitur homo pro indiuiduis, sed pro homine vt sic, & præscindendo ab indiuiduis, vnde non valet Homo est species, ergo Petrus est species. Et ideò in simplici suppositione semper intercedit appellatio, quia predicatum conuenit subiecto sub aliqua præcisione, & formalitate, qua non descendit ad indiuidua.

Suppositio personalis est *Acceptio termini pro indiuiduis*, seù pro his, quæ materialitè, & mediatè significantur, & ideò vocatur personalis, quia conuenit quasi personis, seù suppositis alicuius rei, sicut cum dicimus *omnis homo est animal*, conuenit hoc etiam indiuiduis, & benè valet descendendo, ergo iste homo est animal, &c. vnde suppositio personalis est capax ascensus, & descensus, non simplex.

Deinde tertio diuiditur suppositio personalis ex ordine ad verbum, seù copulam, in essentialem, seù naturalem, & accidentalem. Suppositio naturalis est *Acceptio termini pro omnibus*, quibus *natus est accipi*; seù alijs verbis, est *acceptio termini pro eo, cui intrinsecè, & essentialiter conuenit prædicatum*, vt homo est animal, vbi verbum, *est*, abstrahit à tempore it-

sui verificatione. Suppositio accidentalis est *Acceptio termini pro his solum, de quibus verificatur iuxta exigentiam verbi seu alio modo, est acceptio termini pro eo cui prædicatum non intrinsecè, sed accidentaliter convenit, ut in hac homo est iustus, homo disputat.*

Quarto diuiditur suppositio ex parte significationis, in communem, & singularem. Communis est *acceptio termini communis pro suis inferioribus, ut homo disputat. Suppositio singularis, & discreta est acceptio termini singularis pro re singulari, ut Petrus disputat, hic homo disputat.*

Quinto diuiditur suppositio communis ex parte signorum, in determinatam, & confusam. Suppositio determinata est *acceptio termini communis indefiniti, aut signo particulari affecti, ut homo disputat, quidam homo disputat. Suppositio confusa est acceptio termini communis cum signo uniuersali, vel etiam speciali signo confusionis, ut omnis homo disputat, tantum homo disputat. Confusa est duplex, altera distributa alte a confusa tantum. Distributa est acceptio termini communis, qui immediatè afficitur aliquo signo distributionis, ut omnis homo disputat, ly homo stat distributue. Confusa tantum est acceptio termini, qui afficitur mediatè signo uniuersali affirmatiuo, vel aliquo speciali signo confusionis; exemplum primi, omnis homo est animal, ly animal stat confuse tantum; exemplum secundi, tantum homo disputat, oculus requiritur ad videndum, ly homo, & ly oculus stant confuse. In cap. seq. explicabimus specialia signa confusionis. Et ista confusa, vel est confusa disiuncta, vel copulata.*

ta . *Disiuncta* est , quam exemplis allatis explicauimus . *Copulata* quæ afficitur signo *collectino* , vt omnes Apostoli sunt duodecim , omnes Planetæ sunt septem , *ly Apostoli* , & *ly Planetæ* stant confuse copulatæ , scilicet collectiue .

Solet etiam cognosci differentia istarum suppositionum ex descensu , vel ascensu , qui unicuique debetur , nam suppositioni determinatæ debetur descensus disiunctiuus ; distributiue copulatiuus ; confusæ tantum , disiunctus , vel copulatus . Quis sit autem ascensus copulatiuus , & disiunctiuus , disiunctus , & copulatus , dicetur libro sequenti , cap. 2. & 3.

Cum autem solum personali suppositioni debeat ascensus , & descensus , quia ascensus , & descensus sumitur per ordinem ad individua ad quæ descendimus ab vniuersali , vel ascendimus ab ipsis singularibus ad vniuersale , soli autem personali conuenit accipi pro indiuiduis ; ideò optimè dignoscitur varia suppositio personalis pones varium descensum , & ascensum ad individua . Et quia descensus , & ascensus , quasi quidam motus est , ideo terminus sub quo possumus immediate , & independenter ab alio descendere , & ascendere dicitur supponere , seu stare mobiliter , quando autem non potest descendere , aut ascendere immediate , sed dependenter à resolutione alterius termini (idem est resolutio , quod descensus , & ascensus) dicitur stare immobiliter . Et descensus disiunctus , vel copulatus non reputantur simpliciter resolutio termini , quia non fit descensus per propositiones noiores , quo ad veritatem , sicut ad resolutionem re-

quitur, sed per numerationem eiusdem termini, ut si dico, omnis homo est animal, disiunctus descensus debetur illi termino, *Animal*, sic dicendo, omnis homo est hoc, vel illud, vel illud, vel illud animal: Ad equitandum requiritur equus, sub *ly equus* fit descensus disiunctus, requiritur hic vel ille, vel ille equus ad equitandum: quæ numeratio non magis manifestat, & resoluit veritatem, sed solum numerat terminos. Et similiter omnes Apostoli sunt duodecim, resoluitur sic, iste, & ille, &c. sunt duodecim.

CAPUT XII.

Regule Suppositionis.

VT melius cognoscantur suppositiones determinatæ, distributiæ, & confusæ, solent tradi aliquæ regulæ, quæ sunt generales pro omnibus, & aliæ quæ sunt speciales pro relatiuis, habent enim relatiua specialem difficultatem in resoluendo suam suppositionem.

Antequam verò tradantur Regulæ, supponendum est esse quædam signa, scè notas, & sineathegoremata, quæ afficiunt terminos ad faciendum illos stare vniuersaliter, vel particulariter, & sic efficiunt suppositionem distributam vel determinatam, vel confusam tantum. Signa vniuersalitatis sunt, quædam affirmatiua, quædam negatiua, quædam mixta. Affirmatiua ut *Omnis*, *Quilibet*, *Cunctus*, *Totus*, &c. Negatiua, ut *Nullus*, *Nemo*, *Non*, *Nec*, Mixta, ut *Contingenter*, *Tantum*, & alia quæ expo-

exponuntur per affirmationem, & negationem, ut contingenter homo est albus, exponitur sic, potest esse, & potest non esse albus; Tantum homo est rationalis, exponitur, Omne rationale est homo, & nihil aliud ab homine est rationale. Et sunt aliqua signa vniuersalitatis, seu distributionis completæ, scilicet quæ nihil includunt particularitatis, ut *Omnis*, *Nullus*, absolute sumpta: alia sunt signa vniuersalitatis, seu distributionis non completæ, ut *Alter*, *Neuter*, *Omne* pro generibus singulorum. Item est signum vniuersalitatis, *ly*, *Et*, copulatiue tantum, ut quando dico Petrus, & Paulus est animal; habet enim vim vniuersalitatis, quia copulat plura individua.

- Signa particularia sunt *Aliquis*, *Quidam*, *Nonnullus*, &c. & particula *vel*, quæ non copulant terminos, sed disiungit. Signa specialia confusionis, quæ scilicet non distribuunt, sed confundunt, sunt *ly omnis* collectivè acceptum, *ly tantum*, ut cum dico, tantum Homo est discursivus *ly requiritur*, aut *ly promitto*, & similia, ut requiritur equus ad equitandum, promitto tibi librum, Bis cantavi Missam, in istis propositionibus terminus tenetur confuse tantum, quia non licet sub illo ascendere, aut descendere.

- Inter signa distributionis affirmatiua, & negatiua hoc interest, quod virtus distributionis affirmatiuæ sistit in termino immediato, non autem transit ad mediatum, sed relinquit illum confusum, ut si dico, omnis homo est animal, solum *ly homo* distribuitur, *animal* verò confunditur. Et ferè omnis suppositio

confusa habet ortum ex aliqua vniuersalitate mediata, à qua dependet in sui resolutione vel formaliter, vel virtualiter, sicut ly *tantum*, ideò est signum confusionis, quia habet vnā exponentem in qua terminus affectus à ly *tantum* sequitur mediatè vnā vniuersalem, vt si dico, tantum homo est rationalis, exponitur per hanc: Omne rationale est homo, vbi *homo* sequitur mediatè vniuersalem distributam & si dico, ad equitandum requiritur equus, & equiualet isti, Ad omnem equitationem requiritur equus, vel non potest fieri aliqua equitatio sine equo, vbi sequitur vniuersalem affirmatiuam, & quando dico, Bis cantauit Missam, ly Bis tenetur copulatur, & est signum vniuersalitatis. Itaque scilicet semper confusa suppositio oritur virtualiter, aut formaliter ex vniuersalitate affirmatiua mediata, à qua dependet. At verò vniuersalitas negatiua distribuit terminum immediatè, & mediatè positum, quia negatio distribuit totum quòd inuenit post se, vt nullus homo est lapis, ly *homo*, & ly *lapis* distribuuntur.

Ponuntur ergo sex Regulæ ad cognoscendas suppositiones. *Primæ est*: Omnis terminus nullo signo affectus, aut signo particulari, supponit determinate, vt *homo disputat*, *aliquis homo disputat*; quæ suppositio determinata vocatur, quia verificatio eius debet fieri in aliquo determinato supposito, non in aliquo vagè, & secundum numerationem copulatam, vel disiunctam, vt in confusa, nec in distributione, & vniuersalitate, vt in distributiuæ. Et non dicitur suppositio indefinita, licet conueniat termino in propositione

ne indefinita, vt *homo disputat*, quia indefini una dicitur respectu propositionis, quia veritas eius stare potest siue in vno tantum indiuiduo, siue in multis. At verò suppositio termini non verificatur indefinite, aut vage, sed ostendendo determinate hoc indiuiduum, vel illud in suppositione determinata.

Secunda regula : Omnis terminus affectus immediate signo vniuersali affirmatiuo, vel affectus signo vniuersali negatiuo mediatè, vel immediate, supponit distributiue, vt omnis homo est animal, ly *homo* stat distributiue; *Nullus homo est lapis*, vterque terminus stat distributiue.

Tertia : Omnis terminus communis, qui sequitur mediatè signum vniuersale affirmatiuum, vel generalius loquendo : Omnis terminus, qui dependet in sui resolutione ex aliqua priori vniuersalitate, vel formaliter in se, vel virtualiter in sua exponente, supponit confuse disiunctim, idest, debetur illi solum descensus, & ascensus disiunctus, non disiunctiuus, vt omnis homo est animal, ly *animal* stat confuse; tantum homo est rationalis, ly *homo* stat confuse, quia vna suarum exponentium est hæc, omne rationale est homo, vbi ly *homo* supponit confuse.

Quarta regula : Terminus communis affectus immediate signo collectiuo supponit confuse copulatiua, vt *omnes Apostoli Dei sunt duodecim*, quia sub illo termino *Apostoli* solum licet ascendere copulatiua, non copulatiue.

Quinta : Si concurrant duo signa vniuersalia super eundem terminum, videndum est quomodo dempta prima negatione, aut signo

vniversali remaneat; & si remaneat distributis in ordine ad terminum supponentem determinatè, antea supponebat confuse; si autem remanet distributivè in ordine ad supponentem confuse, antea stabat determinate, vt si dicam, *Nullus homo non est animal*, dempta prima negatione, scilicet ly *Nullus*, ly *animal* remanet distributum in ordine ad ly *homo*, qui stat determinate, & sic antea ly *animal* supponebat confuse: si autem dicam, *Non omnis homo est animal*, dempto ly *non*, remanet *homo* distributus in ordine ad ly *animal* stans confuse, & sic antea supponebat determinatè.

Sexta Regula: In complexis quorum vna pars se habet vt determinans alia vt determinabilis, vt si dicam *equus hominis*, vbi ly *hominis* determinat, & restringit ly *equum*, quando accipiuntur vnica acceptione, pars illa quæ se habet vt determinans non potest resolui antequam resoluat^r totum complexum: si verò non accipiatur vnica acceptione, potest vtraque pars resolui ante resolutionem totius, vt si dicas, *Hominis equus est animal*, vel *Hominis quilibet equus est animal*, sub vtroque potest descendi, & ascendi iuxta regulas communes. Dicitur accipi vnica acceptione, quando obliquus sequitur post rectum, quia facit quasi vnum terminum cum illo: idem est enim dicere *equus hominis*, & *equus possessus*. Accipitur autem pluribus acceptionibus quando obliquum antecedit, vt *hominis equus*, quia sumuntur vt diuersæ acceptiones, seu vt diuersi termini capaces diuersæ suppositionis, & resolutionis de quo vide infr. q. 7. ar. 2. arg. 5.

CAPUT XIII.

De Relatione.

Circa Relatiua notandum est, quòd loquimur de rellatiuo grammaticali, vt *qui, alius &c.* non de rellatiuo logicali, quod pertinet ad prædicamētum relationis. Et definitur tale rellatiuum, quòd est *rei ante late recordatiuum*. Diuiditur autem in rellatiuum substantiæ, & accidentis. Relatiuum substantiæ est quod refert suum antecedens per modum substantiæ, vt *ly, qui, ly ille &c.* Relatiuum accidentis, quod refert antecedens per modum denominatiui, vt *ly quale, ly tale, &c.* Et vnum quodque istorum, vel est rellatiuum identitatis scilicet quod refert, & accipitur directè pro eo, pro quo suum antecedens, vt *Petrus est doctus, & ille disputat, nix est alba, & talis est cynus,* vel est rellatiuum diuersitatis, quod scilicet accipitur pro alio quam suum antecedens; refert autem suum antecedens in obliquo, vt *Petrus disputat, & alius loquitur, idest, alius à Petro, vbi ly à Petro, refertur in obliquo; nix est alba, & alter est cornus, vbi ly alter refert aliud accidens a suo antecedente.*

Denique aliud est rellatiuum reciprocum, scilicet quod regressionem quandam significat super suum antecedens, vt *homo diligit se, Petrus est ipsemet;* & non reciprocum, quod scilicet talem regressionem non significat, vt *Petrus est albus, & ille loquitur, Petrus qui loquitur est albus.* Et regressio stat in hoc, quod rellatiuum reciprocum non solum refert suum antecedens, vt subiectum, sed etiam vt prædicatum, vnit enim
idem

idem sibi ipsi . At verò non reciprocum refert suum antecedens vt subiectum, cui aliquid aliud vnit, vel ab eo diuidit .

Igitur pro relatiuis sunt quatuor regulæ: *Prima* quantum ad resolutionem, seu expositionem relatiui . Relatiuum *Qui*, positum in vna propositione, resoluitur seu exponitur per vnâ propositionem copulatiuam significatam per hunc terminum, & *ille*, vt si dicas Petrus, qui est doctus, disputat, resoluitur sic Petrus est doctus, & ille disputat, homo est animal, qui est rationalis, resoluitur sic homo est animal, & ille est rationalis .

Sed in resoluendo relatiuo aduerte duo: *Primum* quòd aliquando relatiuum est pars extremi, & cum copula implicationis, vt si dicas, Petrus, qui est doctus, disputat, *ly qui est doctus* tenet se ex parte subiecti, & facit vnum extremum cum illo, & item implicatur illa copula cum extremo, vocaturque copula implicationis . Tunc ergo relatiuum non semper resoluitur immediatè, sed dependet à resolutione sui complexi, quod contingit quoties copulatiua, per quam est resoluendum, habet aliquam partem falsam si immediatè resoluat, vt si dicas, omne animal, quod est rationale, est risibile, non potest *ly quod* immediate resolui, fieret enim hic sensus, omne animal est rationale, & illud est risibile, vbi prima pars copulatiuæ est falsa: sed oportet prius descendere sub distributione illa, & tunc resoluetur relatiuum . *Secundum* est, quòd quando vna affirmatiua habens copulam implicationis de *ly Qui*, resoluitur immediatè per copulatiuam, sua contradictoria debet

Resolui per disiunctiuam, vt hæc, aliquod animal, quod est rationale, est risibile, habet hanc contradictoriam, nullum animal, quod est rationale, est risibile, hæc non potest resolui per copulatiuam, sicut sua affirmatiua, sed per disiunctiuam, quia copulatiua non opponitur contradictoriæ altera copulatiua, quia habet eandem vniuersalitatem ratione de ly, *Et*, sed disiunctiua. Vnde melius est ad euitandas istas difficultates, non resolueret relatiuum *Qui* per copulatiuam, nisi facto prius descensu, & resolutione totius complexi in singulares.

Secunda Regula est pro restrictione relatiuorum. In resolutione relatiui facta per copulatiuam, relatiuum vniuersalis propositionis refert suum antecedens positum in altera restrictè, vt animal est rationale, & illud est risibile, ly *illud* refert restrictè animal, scilicet illud animal quod est rationale. Et nihil aliud est referre restrictè, quàm referre antecedens pro eo supposito, pro quo verificatur, non autem est sensus quod referat omnes terminos inuentos in categorica sui antecedentis, vt si dicas, omnis homo est animal, & ille est risibilis, non intelligitur, *ille* omnis homo, non enim designari potest aliquid quod sit omnis homo, sed ille homo qui est animal, & pro quo verificatur quod est animal.

Tertia Regula pro suppositione relatiui reciproci. Relatiuum reciprocum supponit suppositione sui antecedentis, ita quod descendendo, aut ascendendo sub antecedente, fit descensus sub relatiuo reciproco, & hoc vocant aliqui suppositionem sigillatam, idest
quò

sub suppositione alterius conclusam, quia non indiget alia suppositione quàm sui antecedentis, vt homo diligit se, ly *se* supponit determinatè sicut ly *homo*, Mater diligit filium suum, ly *suum*, quod est reciprocum deriuatiuæ speciei, quantum ad conotationem quam includit, supponit sicut suum antecedens, connotat enim matrem in obliquo ly *suum*, idest, filium matris, & prout sic connotatum in obliquo supponit sicut ipsum antecedens.

Quarta. Regula pro suppositione relativi non reciproci. Relatiuum hoc non supponit suppositione sui antecedentis, sed iuxta naturam signorum quibus afficitur, sicut alij termini, vt omnis homo disputat, & ille doctè loquitur, ly *ille*, non stat distributiuè, sed determinate: aliquod animal est rationale, & omnis homo est illud, ly *illud* stat confuse tantum.

CAPVT XIV.

De Ampliatione, Restrictione, & Alienatione.

Ampliatio definitur quod est *extensio termini à minori ad maiorem suppositionem*, vt homo potest esse iustus, extenditur vsque ad homines possibiles. Restrictio est *coarctatio à maiori ad minorem suppositionem*, vt homo, qui est iustus, est sapiens, non stat pro omni homine, sed pro eo tantum qui iustus est.

Vt intelligantur istæ definitiones Nota, quod terminus dupliciter potest ampliari, vel restringi, vno modo in ordine ad plura, vel paucio-

pauciora supposita quibus conuenit. Secundo in ordine ad plura tempora, vel pauciora in quibus verificatur. Primo modo solum ampliatio, & restrictio inuenitur in termino communi; solum enim terminus communis habet indiuidua, quibus conuenire potest, unde talis ampliatio, & restrictio solum inuenitur in suppositione personali accidentali, nam simplex suppositio non transit ad indiuidua, naturalis verò omnibus absolutè conuenit, sola verò accidentalis pluribus, vel paucioribus conuenire potest, de pluribus enim dicitur, Omnis homo est coloratus, quàm hæc, Aliquis homo currit, & de pluribus dicitur, homo est sapiens, quàm hæc, homo iustus est sapiens. Secundo verò modo ampliatio, & restrictio etiam termino singulari conuenit, potest enim aliquod singulare verificari in pluribus differentiis temporum, Et tunc dicitur ampliari terminus quantum ad differentias temporis, quando verificari potest in pluribus temporibus, seu differentiis temporum disiunctim, seu diuisim, nam si supponit in ordine ad plura tempora copulativè potius restringitur, ut si volo verificare quòd aliquis homo, qui est vel fuit, est albus, facilius id inuenitur, quàm si velim verificare de homine aliquo, qui est, & fuit, & ideo illud primum ampliatur in pluribus suppositis, hoc restringitur.

Licet autem differentiarum temporum apud Physicos sint solum tres, in ampliatione tamen Logica attenduntur quinque, scilicet præsens, præteritum, & futurum, possibile, & imaginabile. Et sunt aliquæ regulæ quibus di-
guo.

gnoscitur quando terminus aliquis ampliatur
Prima : In propositionibus constantibus copula de præterito , terminus antecedens verbum ampliatur ad id quod est , vel fuit subsequens verò restringitur ad id quod fuit ; vt Petrus fuit albus , ly *Petrus* potest stare pro eo qui modo est , & fuit , vel qui fuit tantum , & iam non est ; sed ly *album* stat solum pro albo præterito , album enim præsens non verificabitur per ly *fuit* , sed per ly *est* in quantum præsens , etiam si aliàs fuerit . Similiter si constat copula de futuro , ampliatur terminus antecedens verbum ad id quod est , vel erit , sequens verò restringitur ad id quod erit , vt Petrus erit albus , Antichristus erit peccator .

Intellige tamen quòd semper requiritur quòd terminus antecedens qui ampliatur fuerit , si est de præterito , & futurus sit , si est de futuro , aliàs non verificaretur propositio , quia non rectè vniuerentur extrema , sed ampliatio stat in hoc quòd terminus ita stet pro præterito , aut futuro , quòd pereandem copulam etiam verificari possit de subiecto præsentis , dummodo etiam fuerit , aut futurus sit .

Secunda Regula . Terminus significans inceptionem ampliat omnes terminos ante se & post se ad id quod est , vel erit : significans verò desitionem , ad id quod est , vel fuit ; vt si dicas motus incipit esse , motus desinit esse . Idem dicitur de termino significante actionem incipiendi , vel corrumpendi ; vel prioritatem , & posterioritatem ; ampliat enim terminum supra quem cadit actio incipiendi ad præsens , & futurum , vt Petrus ædificat basilicam , vel ad præsens , & præteritum , si significat corrup-

tio-

Caput XIV. 67

tionem, vt Petrus destruit domum. *Ly domus,* & *ly basilica* ampliantur ad eam quæ est, vel erit, aut est vel fuit.

Tertia regula: Verbum, *Potest,* & *ly Possibile,* possitum in propositione, ampliat omnes terminos ad posibilia, vt homo potest esse albus, verificatur de homine, & albo possibili. Idem inuenitur in terminis significantibus aptitudinem, aptitudo enim quædam possibilitas est; ampliantur autem subiecta ad posibilia, si significetur aptitudo ad existendum non verò solum ad agendum, vt Petrus est generabilis, vel corruptibilis, hæc verò Petrus est risibilis, vel intellectiuus non ampliat subiectum, quia aptitudo ad agendum supponit esse subiecti, licet si propria passio sit, conueniat non supponendo esse.

Quarta Regula: Iste terminus, *Imaginatio,* aut verbum, *Imaginetur,* ampliat omnes terminos antecedentes, & subsequentes ad imaginabilia, vt corpus imaginario est chymera. Similiter terminus significans actum animi interiorum, vt *volo, intelligo, &c.* ampliare potest terminum super quem cadit tanquam supra obiectum vsque ad imaginabilia, vt Petrus intelligit chymæram, ampliatur *ly chymæra* ad rem imaginabilem.

Restrictio est coarctatio à maiori ad minorem suppositionem; & potest fieri restrictio, vel quo ad tempus, vt Petrus qui fuit non erit, vel quo ad genus scilicet foemininum, vel masculinum, vt si sumatur Aliquis homo est albus pro solis masculis, vel pro solis foeminis; & denique quo ad supposita per adiectiuum, vel per genitiuum possessionis adiunctum verb. g.
homo

homo albus currit , equus hominis non currit
 genitium enim possessionis restringit sicut ad
 iectium . Et potest restrictio fieri , vel per co
 pulam implicationis , vt Petrus , qui est iustus
 est doctus , vel per simplicem adiectiui apposi
 tionem , vt Petrus iustus est doctus , Petrus , qu
 praterijt , non erit , Petrus prateritus non erit
 imò habitudinem copulae implicationis pro sup
 positis ad quæ restringit , & pro tempore ad
 quod dicit ordinem , optimè intelliges redu
 cendo ad participium per modum adiectiui , vt
 Petrus , qui est , erit , Petrus existens erit An
 tichristus , qui non est , erit Antichristus non
 existens erit .

Regula arguendi in ampliacione , & restri
 ctione sunt eadem , quia amplum , & non re
 strictum sunt idem , & sumuntur pro eo quod
 est superius seu comunius , non amplum . autem ,
 seu restrictum pro eo , quod est inferius . Et so
 lent tradidisse Regulæ , sed reducuntur ad duas
 quia solum duplici modo procedit consequen
 tia , vel ab amplo ad non amplum idest à supe
 riori ad inferius , vel è conuerso , à non amplo ad
 amplum , idest ab inferiori ad superius .

Prima Regula : Procedendo ab amplo ad
 non amplum , siuè à non restricto ad restri
 ctum (idem enim sunt) valet consequentia
 in affirmatiuis , si procedatur cum distribu
 tione ampli , & posita constantia non ampli ;
 in negatiuis etiam sine constantia non ampli ;
 Si verò procedatur sine distributione ampli ,
 seu non restricti , nunquam valet consequen
 tia , nec negatiuè , nec affirmatiuè . *Costan
 tiam* , vocamus affirmationem de existentia
 alicuius subiecti , vt si dicam , omnis homo
 est

est albus, non possum inferre, ergo Petrus est albus, nisi addam constantiam, & *Petrus est* qua constet illud indiuiduum dari. Sed si dicam, nullus homo est albus, etiam sine constantia inferetur, ergo Petrus non est albus, quia ad negatiuam non requiritur suppositio, & existentia extremorum.

Secunda Regula. A non amplo ad amplum siue à restricto ad non restrictum, valet consequentia opposito modo, scilicet in affirmatiuis si procedatur ad amplum siue distributione ampli, etiam sine constantia non ampli, in negatiuis si arguatur sine distributione ampli, & cum constantia, vt bene valet Petrus disputat, ergo homo disputat, Petrus non disputat, & Petrus est, ergo aliquis homo non disputat. Sine constantia autem posset consequens esse falsum, casu, quo tantum esset Paulus in mundo, & disputaret, tunc enim omnis homo disputaret, & verum esset antecedens quòd, Petrus non disputat, quia non est. Si verò arguatur cum distributione ampli, nunquam valet consequentia, nec affirmatiuè, nec negatiuè, vt si dicas homo disputat, ergo omnis homo disputat, aliquis non disputat, ergo nullus disputat, est falsa.

Alienatio, quæ ab alijs solet dici Remotio, est *distractio termini à propria ad impropriam significationem*, vt homo est pictus, Petrus est leo, scilicet in crudelitate: vnde alienatio pertinet ad impropriam suppositionem, & terminus alienans subiectum ponitur à parte prædicati, quia talia sunt subiecta qualia permittuntur à suis prædicatis, at vero quando
po-

ponitur, vt adiectiuum ex parte subiecti, restringit illud quasi adiacens ei; non verò alienat, vti si dicas, homo pictus est imago ly *pictus* non alienat, sed restringit ipsum analogum trahens ad minus principale.

CAPVT XV.

De Appellatione.

Appellatio apud Grammaticos est idem, quòd nominatio, & appellare est nominare. Apud Dialecticos sumitur pro applicatione qua speciali modo significatum vnius termini applicatur ad significatum alterius, & sic definitur appellatio, quòd est *applicatio significati formalis vnius termini ad significatum formale alterius*, vt si dicas, Petrus est magnus Logicus, ly *magnus* non conuenit absolutè Petro, sed sub ratione, & formalitate Logicæ, vnde appellatio inducit hunc effectum, quòd terminus appellans non absolute conueniat subiecto, sed ratione eius super quod appellat, & quasi alligatus illi formalitati, media qua subiecto applicatur, sicut in dicta propositione ly *magnus* non absolute conuenit Petro, sed ratione Logicæ. Et ideo appellationis variatio, magnum defectum affert in paralogismis, & aliquando valde latentem. Dicitur autem in definitione *applicatio significati formalis ad significatum formale*, quia applicatio formalis ad materiale tantum est simplex applicatio, seu prædicatio, non autem appellatiua, quæ aliquid applicat ad obiectum mediante aliqua formalitate, &

non

non absolute, unde si dicas Petrus est citharæ-
 dus, & bonus, vtrumque prædicatum applica-
 tur simpliciter, & absolute subiecto, non autem
 appellatiue vnum ad alterum, idest, sub aliqua
 formalitate alterius.

Appellatio diuiditur in realem, & rationis.
Appellatio realis est quæ fit secundum accidentia,
aut formalitates reales, vt Petrus est magnus
logicus. Appellatio rationis est quæ fit mediante
accidente Rationis, vt homo est species, non
enim conuenit prædicatum homini absolute, sed
homini, vt abstractè concepto, vbicumque au-
tem aliquod prædicatum non conuenit subiecto
absolute, sed ratione alicuius formalitatis, est
appellatio.

Quatuor sunt regulæ appellationis, duæ
 primæ pro appellatione reali, duæ aliæ pro
 appellatione rationis. Pro appellatione rea-
 li est. *Prima Regula.* Quando adiectiuum
 ponitur à parte prædicati, & substantiuum
 à parte subiecti, non est appellatio ad forma-
 le substantiuum, sed applicatio ad suppositum
 eius. Itaque prædicatum respectu subiecti non
 appellat, sed simplici modo applicat suum
 significatum ad suppositum materiale subie-
 cti, quod Antiqui solebant dicere alijs verbis,
 quòd subiectum stat materialiter, & prædi-
 catum formaliter: de quo vide S. Thom. 3. p.
 q. 16. art. 7. & 9. Exemplum est in hac: Me-
 dicus est magnus, album est dulce, hic ho-
 mo, demonstrato Christo, est æternus, ap-
 plicatur in his prædicatum ad suppositum
 materiale subiecti. Excipimus propositio-
 nem in qua subiectum supponit suppositio-
 ne simplici, vt homo est species, nam ibi,
 homo;

homo, præscindit à suppositis, & supponit abstractè ab illis. Et nomine *suppositi* intelligimus suppositum importatum per nomen, non suppositum quod conuenit rei, & non importatur per nomen, vnde hæc est falsa; essentia diuina generat, quia actus generandi applicatur ad essentiam, quæ est suppositum illius nominis, non ad personam quæ in re est suppositum essentiae.

Et nota aliquando terminum importare vicem duplicis suppositio, quod in re est idem, sed ratione formali diuersum, & mutatio istius suppositi est sicut mutatio appellationis, & hæc est fallacia accidentis, quæ frequenter accidit in paralogismis, vt si dicas, albedo est similitudo, similitudo est intensa, ergo albedo est intensa, variatur suppositum, quia albedo realiter est idem cum similitudine, sed non formaliter, ideoque suppositum variatur formaliter, & similiter non valet in diuinis, Pater est Deus, Filius est Deus, ergo Filius est Pater, quia ille terminus *Deus*, etsi realiter sit idem, virtute est multiplex, & identificari potest, & modificari in tribus personis, illis manentibus distinctis, & qualibet inadæquatè modificante essentiam, de quo vide inf. lib. 3. cap. 6.

Denique quando ex parte subiecti ponitur *In quantum*, fit appellatio ex parte prædicati ad terminum reduplicatum, quia est idem, ac si poneretur ex parte prædicati, vt Christus in quantum homo est creatura, Petrus in quantum albus disgregat visum, &c. Hæc enim non absolutè conueniunt subiecto, sed ratione termini reduplicati,

Secur.

exequitur ; ergo similiter in Logica habitus docens , & iudicans distinguitur ab operante , & vteute .

Confirmatur. Quia actus vteutis multiplicati generant aliquem habitum , non Logicæ docentis , quia non sunt actus scientifici , & sic non generant , neque augent scientiam , ergo alium distinctum à docente .

Respondetur . Negan. conseq. Et disparitas est , quia in prudentia est distincta difficultas ad imperandum , & applicandum voluntatem ad opus , quàm in iudicando , & consiliando , in Logica verò non . Cuius radix sumitur ex Doctrina Div. Thom. 2.2. qu. 47. art. 8. quia perfectio artis consistit in iudicando non in percipiendo ; perfectio verò prudentiæ è conuerso , vnde reputatur melior artifex qui volens peccat in arte , quàm qui ignorans . E contra verò imprudentior , qui volens peccat . Quod præcipuè verificatur in arte Logicæ , cuius materia sunt ipsi actus rationis : tota enim difficultas intellectus est in iudicando , seu ordinando de aliqua veritate , quicquid verò restat , ut alij actus dirigantur ex ista veritate sic cognita non habet speciale difficultatem , quia intellectus naturaliter tendit ad obiecta semel proposita . Vnde totum artificium , & ordinatio tenet se ex parte obiectorum quæ attinguntur à cognitione naturaliter tendente ad illa . In moralibus autem post iudicatum , & cognitum bonum , restat præcipua difficultas in applicanda voluntate propter eius libertatem , seu indifferentiam vel resistenciam ad bonum regulatum . Vnde requirit distinctum habitum , in quo consumatur prudentia .

gnoscitur quando terminus aliquis ampliatur
Prima : In propositionibus constantibus copula de præterito, terminus antecedens verbum ampliatur ad id quod est, vel fuit subsequens verò restringitur ad id quod fuit; vt Petrus fuit albus, ly *Petrus* potest stare pro eo qui modo est, & fuit, vel qui fuit tantum, & iam non est; sed ly *album* stat solum pro albo præterito, album enim præsens non verificabitur per ly *fuit*, sed per ly *est* inquantum præsens, etiam si aliàs fuerit. Similiter si constat copula de futuro, ampliatur terminus antecedens verbum ad id quod est, vel erit, sequens verò restringitur ad id quod erit, vt Petrus erit albus, Antichristus erit peccator.

Intellige tamen quòd semper requiritur quòd terminus antecedens qui ampliatur fuerit, si est de præterito, & futurus sit, si est de futuro, aliàs non verificaretur propositio, quia non rectè viderentur extrema, sed ampliatio stat in hoc quòd terminus ita stet pro præterito, aut futuro, quòd pereandem copulam etiam verificari possit de subiecto præsentis, dummodo etiam fuerit, aut futurus sit.

Secunda Regula. Terminus significans inceptionem ampliat omnes terminos ante se & post se ad id quod est, vel erit: significans verò desitionem, ad id quod est, vel fuit; vt si dicas motus incipit esse, motus desinit esse. Idem dicitur de termino significante actionem incipiendi, vel corrumpendi; vel prioritatem, & posterioritatem; ampliat enim terminum supra quem cadit actio incipiendi ad præsens, & futurum, vt Petrus ædificat basilicam, vel ad præsens, & præteritum, si significat corrup-

tio-

Caput XIV. 67

tionem, vt Petrus destruit domum. *Ly domus*, & *ly basilica* ampliantur ad eam quæ est, vel erit, aut est vel fuit.

Tertia regula: Verbum, *Potest*, & *ly Possibile*, possit in propositione, ampliat omnes terminos ad posibilia, vt homo potest esse albus, verificatur de homine, & albo possibili. Idem inuenitur in terminis significantibus aptitudinem, aptitudo enim quædam possibilitas est; ampliantur autem subiecta ad posibilia, si significetur aptitudo ad existendum non verò solum ad agendum, vt Petrus est generabilis, vel corruptibilis, hæc verò Petrus est risibilis, vel intellectiuus non ampliat subiectum, quia aptitudo ad agendum supponit esse subiecti, licet si propria passio sit, conueniat non supponendo esse.

Quarta Regula: Iste terminus, *Imaginario*, aut verbum, *Imaginatur*, ampliat omnes terminos antecedentes, & subsequentes ad imaginabilia, vt corpus imaginario est chymera. Similiter terminus significans actum animi interiorum, vt *volo*, *intelligo*, &c. ampliare potest terminum super quem cadit tanquam supra obiectum vsque ad imaginabilia, vt Petrus intelligit chymæram, ampliat *ly chymæra* ad rem imaginabilem.

Restrictio est coarctatio à maiori ad minorem suppositionem; & potest fieri restrictio, vel quo ad tempus, vt Petrus qui fuit non erit, vel quo ad genus scilicet fœmininum, vel masculinum, vt si sumatur Aliquis homo est albus pro solis masculis, vel pro solis fœminis; & denique quo ad supposita per adiectiuum, vel per genitiuum possessionis adiunctum verb. g.
homo

homo albus currit, equus hominis non currit, genitium enim possessionis restringit sicut adiectivum. Et potest restrictio fieri, vel per copulam implicationis, ut Petrus, qui est iustus, est doctus, vel per simplicem adiectivi appositionem, ut Petrus iustus est doctus, Petrus, qui præterijt, non erit, Petrus præteritus non erit, imò habitudinem copulæ implicationis pro suppositis ad quæ restringit, & pro tempore ad quod dicit ordinem, optimè intelliges reducendo ad participium per modum adiectivi, ut Petrus, qui est, erit, Petrus existens erit Antichristus, qui non est, erit Antichristus non existens erit.

Regula arguendi in ampliacione, & restrictione sunt eadem, quia amplum, & non restrictum sunt idem, & sumuntur pro eo quod est superius seu comunius, non amplum autem, seu restrictum pro eo, quod est inferius. Et solent tradidisse Regulæ, sed reducuntur ad duas, quia solum duplici modo procedit consequentia, vel ab amplo ad non amplum idest à superiori ad inferius, vel è conuerso, à non amplo ad amplum, idest ab inferiori ad superius.

Prima Regula : Procedendo ab amplo ad non amplum, siuè à non restricto ad restrictum (idem enim sunt) valet consequentia in affirmatiuis, si procedatur cum distributione ampli, & posita constantia non ampli; in negatiuis etiam sine constantia non ampli; Si verò procedatur sine distributione ampli, seu non restricti, nunquam valet consequentia, nec negatiuè, nec affirmatiuè. *Constantiam*, vocamus affirmationem de existentia alicuius subiecti, ut si dicam, omnis homo est

est albus, non possum inferre, ergo Petrus est albus, nisi addam constantiam, & *Petrus est* qua constet illud indiuiduum dari. Sed si dicam, nullus homo est albus, etiam sine constantia inferretur, ergo Petrus non est albus, quia ad negatiuam non requiritur suppositio, & existentia extremorum.

Secunda Regula. A non amplo ad amplum siue à restricto ad non restrictum, valet consequentia opposito modo, scilicet in affirmatiuis si procedatur ad amplum sine distributione ampli, etiam sine constantia non ampli, in negatiuis si arguatur sine distributione ampli, & cum constantia, vt bene valet Petrus disputat, ergo homo disputat, Petrus non disputat, & Petrus est, ergo aliquis homo non disputat. Sine constantia autem posset consequens esse falsum, casu, quo tantum esset Paulus in mundo, & disputaret, tunc enim omnis homo disputaret, & verum esset antecedens quòd, Petrus non disputat, quia non est. Si verò arguatur cum distributione ampli, nunquam valet consequentia, nec affirmatiue, nec negatiue, vt si dicas homo disputat, ergo omnis homo disputat, aliquis non disputat, ergo nullus disputat, est falsa.

Alienatio, quæ ab alijs solet dici Remotio, est *distractio termini à propria ad impropriam significationem*, vt homo est pictus, Petrus est leo, scilicet in crudelitate: vnde alienatio pertinet ad impropriam suppositionem, & terminus alienans subiectum ponitur à parte prædicati, quia talia sunt subiecta qualia permittuntur à suis prædicatis, at verò quando
po-

ponitur, vt adiectiuum ex parte subiecti, restringit illud quasi adiacens ei; non verò alienat, vt si dicas, homo pictus est imago ly *pictus* non alienat, sed restringit ipsum analogum trahens ad minus principale.

CAPVT XV.

De Appellatione.

Appellatio apud Grammaticos est idem, quòd nominatio, & appellare est nominare. Apud Dialecticos sumitur pro applicatione qua speciali modo significatum vnus termini applicatur ad significatum alterius, & sic definitur appellatio, quòd est *applicatio significati formalis vnus termini ad significatum formale alterius*, vt si dicas, Petrus est magnus Logicus, ly *magnus* non conuenit absolutè Petro, sed sub ratione, & formalitate Logicæ, vnde appellatio inducit hunc effectum, quòd terminus appellans non absolute conueniat subiecto, sed ratione eius super quod appellat, & quasi alligatus illi formalitati, media qua subiecto applicatur, sicut in dicta propositione ly *magnus* non absolutè conuenit Petro, sed ratione Logicæ. Et ideò appellationis variatio, magnum defectum attert in parallogismis, & aliquando valde latentem. Dicitur autem in definitione *applicatio significati formalis ad significatum formale*, quia applicatio formalis ad materiale tantum est simplex applicatio, seu prædicatio, non autem appellatiua, quæ aliquid applicat ad obiectum mediante aliqua formalitate, &
non

non absolutè , vnde si dicas Petrus est citharæ-
 dus , & bonus, vtrumque prædicatum applica-
 tur simpliciter , & absolutè subiecto, non autem
 appellatiuè vnum ad alterum, idest , sub aliqua
 formalitate alterius .

Appellatio diuiditur in realem , & rationis.
Appellatio realis est quæ fit secundum accidentia ,
aut formalitates reales , vt Petrus est magnus
logicus . Appellatio rationis est quæ fit mediante
accidente Rationis , vt homo est species , non
enim conuenit prædicatum homini absolutè, sed
homini, vt abstractè concepto , vbicumque au-
tem aliquod prædicatum non conuenit subiecto
absolutè , sed ratione alicuius formalitatis , est
appellatio .

Quatuor sunt regulæ appellationis , duæ
primæ pro appellatione reali , duæ aliæ pro
appellatione rationis . Pro appellatione rea-
li est . Prima Regula . Quando adiectiuum
ponitur à parte prædicati , & substantiuum
à parte subiecti , non est appellatio ad forma-
le substantiuum , sed applicatio ad suppositum
eius . Itaque prædicatum respectu subiecti non
appellat , sed simplici modo applicat suum
significatum ad suppositum materiale subie-
cti , quod Antiqui solabant dicere alijs verbis ,
quòd subiectum stat materialiter , & prædi-
catum formaliter : de quo vide S. Thom. 3. p.
q. 16. art. 7. & 9. Exemplum est in hac : Me-
dicus est magnus , album est dulce , hic ho-
mo , demonstrato Christo , est æternus , ap-
plicatur in his prædicatum ad suppositum
materiale subiecti . Excipimus propositio-
nem in qua subiectum supponit suppositio-
ne simplici , vt homo est species , nam ibi,
homo;

homo, prescindit à suppositis, & supponit abstractè ab illis. Et nomine *suppositi* intelligimus suppositum importatum per nomen, non suppositum quod conuenit rei, & non importatur per nomen, vnde hæc est falsa; essentia diuina generat, quia actus generandi applicatur ad essentiam, quæ est suppositum illius nominis, non ad personam quæ in re est suppositum essentiae.

Et nota aliquando terminum importare vicem duplicis suppositio, quod in re est idem, sed ratione formali diuersum, & mutatio istius suppositi est sicut mutatio appellationis, & hæc est fallacia accidentis, quæ frequenter accidit in paralogismis, vt si dicas, albedo est similitudo, similitudo est intensa, ergo albedo est intensa, variatur suppositum, quia albedo realiter est idem cum similitudine, sed non formaliter, ideoque suppositum variatur formaliter, & similiter non valet in diuinis, Pater est Deus, Filius est Deus, ergo Filius est Pater, quia ille terminus *Deus*, etsi realiter sit idem, virtute est multiplex, & identificari potest, & modificari in tribus personis, illis manentibus distinctis, & qualibet inadæquatè modificante essentiam, de quo vide inf. lib. 3. cap. 6.

Denique quando ex parte subiecti ponitur *In quantum*, fit appellatio ex parte prædicati ad terminum reduplicatum, quia est idem, ac si poneretur ex parte prædicati, vt Christus in quantum homo est creatura, Petrus in quantum albus disgregat visum, &c. Hæc enim non absolutè conueniunt subiecto, sed ratione termini reduplicati.

Secur

exequitur ; ergo similiter in Logica habitus docens , & iudicans distinguitur ab operante , & vtente .

Confirmatur. Quia actus vtentis multiplicati generant aliquem habitum, non Logicæ docentis, quia non sunt actus scientifici, & sic non generant, neque augent scientiam, ergo alium distinctum à docente .

Respondetur. Negan. conseq. Et disparitas est , quia in prudentia est distincta difficultas ad imperandum , & applicandum voluntatem ad opus , quàm in iudicando , & consiliando, in Logica verò non . Cuius radix sumitur ex Doctrina Diu. Thom. 2.2. qu. 47. art. 8. quia perfectio artis consistit in iudicando non in percipiendo ; perfectio verò prudentiæ è conuerso , vnde reputatur melior artifex qui volens peccat in arte , quàm qui ignorans : E contra verò imprudentior , qui volens peccat . Quod præcipuè verificatur in arte Logicæ , cuius materia sunt ipsi actus rationis : tota enim difficultas intellectus est in iudicando , seu ordinando de aliqua veritate, quicquid verò restat , vt alij actus dirigantur ex ista veritate sic cognita non habet speciale difficultatem, quia intellectus naturaliter tendit ad obiecta semel proposita. Vnde totum artificium, & ordinatio tenet se ex parte obiectorum quæ attinguntur à cognitione naturaliter tendente ad illa. In moralibus autem post iudicatum, & cognitum bonum, restat præcipua difficultas in applicanda voluntate propter eius libertatem, seu indifferentiam vel resistenciam ad bonum regulatum. Vnde requirit distinctum habitum, in quo consumatur prudentia .

Ad confirmationem respondetur. Quod actus Logicae utentis generant quandam facilitatem per modum dispositionis, & expeditionis in applicatione materiae, non per modum nouae artis, seu habitus, quia habitus generatur de nouo, vel crescit, non per quoscumque actus, sed per illos qui ipsam specificam rationem, & formale motuum habitus per se attingunt non qui secundario consequuntur, vel dispositiue se habent tantum, eo quod habitus non generatur de nouo, aut crescit nisi secundum substantialem & formalem rationem suam; aliae verò formalitates accessoriae sunt. Est exemplum in D. Thom. 2. 2. q. 144. art. 1. & 5. ubi inquit quod ex frequentatis actibus verecundiae non generatur habitus distinctus à temperantia, quia verecundia non est habitus virtutis perfectae, sed dispositio ad generandam temperantiam, non ergo omnes actus frequentati etiam imperfecti, & secundarii generant nouum habitum perfectum qualis est scientia, sed aliquid imperfectum in genere habitus, quod est quasi dispositio, seu expeditio quaedam in ipso exercitio artis. Et distinctio haec dispositionis, seu expeditionis ab habitu intelligitur melius in his, quae pertinent ad intellectum, quia inuenimus aliquando habitum sine facilitate exercitij, ve, gr. habitum scientiae sine ordinatione expedita specierum, ut in illo cui fit prima demonstratio, & generat habitum scientiae, nondum tamen habet species ordinatas, & expeditas de omnibus alijs conclusionibus scientiae, & è contra inuenimus facilitatem exercitij sine habitu in eo qui coordinatas habet species ob frequens exercitium de omnibus conclu-

clusionibus, & ex errore in aliquo principio amisit habitum, verbi gratia, ex errore fidei amisit principia veræ Theologiæ, & non consequenter ipsum habitum Theologiæ, sed non species coordinatas conclusionum.

QVÆSTIO II.

*De ente rationis Logico, quod est
secunda intentio.*



VT obiectum, seu materiam Logi-
cæ tractare incipiamus, ipso or-
dine doctrinæ oportet ab vniuer-
salioribus incipere, & sic disputa-
tionem inchoamus ab ente ratio-

nis, non quidem prout præcise opponitur en-
ti reali, & est commune omnibus entibus ra-
tionis, sic enim pertinet ad Metaphysicum, sed
vt est commune solis secundis intentionibus,
quæ ad Logicum spectant. Circa quod tria
consideranda occurrunt. *Primum.* Quodnam
sit hoc ens rationis? *Secundum.* Quotuplex
sit? *Tertium.* Per quam causam formetur?
Prius tamen vt aliqua saltem imperfecta noti-
tia entis rationis in communj habeatur, aliqua
de ipso genere entis rationis prælibanda sunt.

ARTICVLVS I.

*Quid sit ens rationis in communi,
Et quotplex.*

ENs rationis in omni sua latitudine, si nominis significationem attendamus, dicitur *Id quod dependet aliquo modo à ratione*; potest autem dependere, vel vt effectus à causa, vel vt obiectum à cognoscente. Primo modo inuenitur aliquid dupliciter dependere à ratione, vel quia est ab ipsa vt ab efficiente, sicut opera artis, quæ per rationem excogitantur, & fiunt, vel quia est in ipsa vt in subiecto & causa materiali, sicut actus, & habitus sunt in intellectu. Sed vterque iste modus pertinet ad ens reale, quia ens sic dictum habet veram, & realem existentiam, dependentem tamen ab intellectu. Quod autem secundo modo ab intellectu dependet, scilicet vt obiectum, dicitur propriè ens rationis, vt pertinet ad præsens, quia nullum esse habet extra rationem, sed solum obiectiuè dicitur esse in ipsa, & sic opponitur enti reali. Quod quidem licet aliqui negauerint, communi tamen Theologorum, & Philosophorum consensu dari constat, cum omnes distinguant ens reale ab ente ficto, seu rationis, quia illud existit in rerum natura, hoc non habet existentiam in re, sed solum cognoscitur, & fingitur. Imò ipsa experientia sufficienter id probat, cum videamus multa nos imaginari, & cognoscere quæ omninò impossibilia sunt, & talia sunt entia ficta. Entia quidem, quia cognoscuntur ad modum entis: ficta

Ita verò, quia non correspondet illis aliquid esse verum à parte rei.

Ex quibus elici potest definitio, seu explicatio entis rationis in communi, scilicet. *Quòd fictus habens esse obiectivè in ratione, cui nullum esse correspondet in re.* Quod sumitur ex D. Thom. lib. de ente, & essentia cap. 1. & 5. Metaph. lect. 9. & 1. p. q. 16. ar. 3. ad 2. dicente: *Quòd ens rationis dicitur, quod cum in re nihil ponat, & in se non sit ens, formatur tamen, seu accipitur ut ens in ratione.* Qui modus explicandi convenientior est, quia cum ens dicatur ab essendo, & per ordinem ad existentiam, sicut ens reale definitur per ordinem ad esse, quod verè habet & in re, ita ens rationis, quod illi opponitur, oportet quòd opposito modo explicetur: scilicet quòd non habet esse in re, & habet illud in cognitione obiectivè. Quod verò aliqui dicunt ens rationis consistere in denominatione extrinseca, quia res dicitur cognita, ut Durandus in 1. dist. 19. q. 5. na. 7. in primis dubium assumitur, cum inter Authores valde controuersum sit, an denominatio extrinseca formaliter sit ens rationis, ut statim dicemus. Deinde falsum est vniuersaliter loquendo ens rationis ut sic consistere in sola denominatione cogniti, nam ista denominatio, vel est forma constituens ens rationis, vel est id quod suscipit formationem entis rationis. Primum esse non potest, cum denominatio ista etiam cadere possit super entia realia, quae denominantur cognita, nec tamen hac denominatione formantur in entia rationis, quia ficta non redduntur. Si secundum, verum est denominationem extrinsecam apprehendi ut ens ratio-

nis, sed non solum denominatio extrinseca, sed alia etiam non entia, vt negationes, priuationes, &c.

Si autem queras Quid sit habere esse in cognitione. *Respondetur*. Hoc pendere ex his, quæ postea dicenda sunt de causa, & actu, quo formatur ens rationis. Interim sufficit audire D. Thom. 4. Metaphys. lect. 1. vbi inquit: *Discimus aliqua in ratione esse, quia ratio de eis negotiatur quasi de quibusdam entibus, dum de eis aliquid affirmat, vel negat.* Quod non est intelligendum quasi ens rationis solum formetur per propositionem, quæ negat, vel affirmat, sed quia formatio propositionis circa obiectum, quod non habet esse à parte rei, est signum, quod ad modum entis ab intellectu accipitur, quia ei applicatur copula, quæ significat esse. Itaque ipse actus intellectus attingens obiectum ad modum entis, quod extra intellectum non est, habet duo, & in quantum cognitio reddit cognitum, & sic in obiecto solum ponit denominationem extrinsecam cogniti, & in quantum ad instar entis reddit tale obiectum cognitum cum in re non sit ens, & hoc est dare esse rationis, seu esse fictum. Et sic D. Tho. opusc. 42. cap. 1. dicit: *Quòd tunc efficitur ens rationis, quando intellectus nititur apprehendere quod non est, & ideo fingit illud ac si esset ens, & in 1. sent. dist. 2. qu. 1. art. 3. inquit: Quòd ens rationis consequitur ex modo intelligendi rem quæ est extra animam, & huiusmodi sunt intentiones quas intellectus noster adinuenit, vbi S. Thom. pro eodem reputat in ente rationis effici, adinueniri, apprehendi, & consequi ex modo intelligendi, & ita vt infra dicemus,*

ens, ens rationis non habet formaliter esse fictum, seu obiectuum per hoc quod reddatur cognitum, ut *Quod*, sic enim iam supponitur habere esse, seu rationem aliquam supra quam cadat denominatio cogniti, sed ille actus, qui respicit non ens sub ratione, & modo entis, dicitur fingere, seu formare ens rationis, & non solum denominare. Et in hoc consistit habere esse obiectiue in intellectu, idest ex ipso modo cognoscendi effici apprehensiuē ut ens quod non est ens.

Dices. Ergo omne obiectum, quod aliter ab intellectu concipitur quā sit in re, est ens rationis. Consequen. est falsum, nam plura entia realia cognoscimus ad instar alterius, & non sicut sunt in se, sicut Deum, & Angelos, & ea quæ non sumus experti.

Negat. Consequentia. Quia talia entia supponuntur in re esse vera entia realia, vnde ex modo cognoscendi non attribuitur illis ratio entis, sed quia modo proprio, & speciali suo non attinguntur, dicuntur attingi ad instar alterius. Quod tamen non sufficit ut denominentur entia à ratione absolute in ratione entis, sed in ratione talis entis denominantur modo alienæ naturæ non propriæ esse cognita, & connotationem inde recipiant in suo cognosci.

Habita notitia entis rationis in communi, restat etiam breuiter attingere *quodplex sit ens rationis*. De diuisione ergo quæ ens rationis in tota sua latitudine diuidit, non pertinet agere ad Logicum, qui solum tractat de ente rationis Logico, quod est vnum ex membris diuidentibus: sed tamen ut sciatur ad

quod membrum diuisionis pertineat, *Breviter dicimus*, D. Thom. in q. 21. de Veritate art. 1. diuidere ens rationis communissimè sumptum in duo membra adæquatè diuidentia, scilicet in *Negationem*, & *Relationem rationis*, *Id*, inquit. *Quod est rationis, non potest esse nisi duplex, scilicet negatio, vel aliqua relatio; omnis enim positio absoluta aliquid in rerum natura existens significat*. Sub negatione autem etiam priuationem includit, nam priuatio est quædam negatio, seu carentia formæ in subiecto apto ad recipiendam formam oppositam, negatio autem est carentia in subiecto repugnante formæ, sicut negatio potentie visuæ in lapide est negatio, in homine priuatio. Relatio etiam hoc habet proprium ex vi sui conceptus, qui est ad alterum, quod possit inueniri in sola apprehensione, & non in re, quando scilicet ita se habet ad aliud, quod non est in aliquo, vt D. Thom. ostendit 1. p. q. 28. art. 1.

Huius autem diuisionis sufficientiam non omnes admittunt, quia existimant *Aliqui* prius esse diuidendum ens rationis in illud quod habet fundamentum in re, & quod non habet, & primum vocatur rationis ratiocinatæ, secundum rationis ratiocinantis: Solum autem illud, quod est rationis ratiocinatæ dicunt diuidi in negationem, & relationem, quod verò est rationis ratiocinantis per omnia genera putant diuagari. Videatur Serna in Logica disp. 1. sect. 4. q. 2. art. 3. Magister Cabero de vniuer. disp. 1. dub. 3. Merinero disp. 3. q. 2. *Alij* existimant nullam dari speciem determinatam entis rationis, sed omnem repugnantiam, seu omne impossibile, & contra-

dictiq

ditionem implicans dicunt esse speciem entis rationis, quia omne illud ens fictum. Ita Martinez disp. 2. prol. §. 1. *Alij* alias species prohibito assignant, de quibus non est curandum.

Dicendum nihilominus est Optimam, & adequatam esse hanc diuisionem, & magis directè conueniens enti rationis in communi; Nam in ente rationis tria possumus considerare. *Primum est*, subiectum cui attribuitur. *Secundum est* ratio ipsa quæ concipitur, & attribuitur alteri. *Tertium est*, id ad cuius instar concipitur, & apprehenditur. Ex parte subiecti cui attribuitur, aliquando inuenitur fundamentum ut tali, vel tali modo aliquid ei attribuitur, aliquando non, & ita respectu huius sumitur illa distinctio entis rationis cum fundamento, vel sine fundamento in re; accipitur enim hoc respectiue ad id cui attribuitur tale ens rationis. Similiter ex parte eius ad cuius instar concipitur ens rationis non repugnat per omnia genera diuagari, quia aliquando potest fingi, & apprehendi aliquid ad instar substantiæ, ut chymæra, mons aureus, aliquando ad instar quantitatis, ut vacuum, aliquando ad instar qualitatis, ut sors, vel cæcitas concipiatur tanquam nigredo, vel forma quædam obscura, &c. Ac verò si consideremus ens rationis ex parte rei conceptæ; seu ex parte eius quod ad modum entis realis cognoscibile est, cum in re non sit ens, adequatè diuiditur in illa duo membra tanquam in prima genera entis rationis, scilicet in *negationem*, *relationem*, sub quibus plures negationes, & relationes, subdiuiduntur, & quia hoc est formale quod attingitur in ente.

rationis, ideo hæc diuisio est directæ, & formalis, cum tamen aliæ diuisiones etiam possint admitti, sed quasi desumptæ ex conditionibus entis rationis, non quasi directè sub illo positæ. Est autem adæquata hæc diuisio: quia ratio ipsa entis rationis formaliter consistit in oppositione ad ens reale, scilicet quod non sit capax existentie, hoc autem vel est aliquid positium, vel non positium; si non positium est negatio, idest non ponens, sed tollens formam: si positium, solum potest esse relatio, quia omne positium absolutum, cum non concipiatur ad aliud, sed in se, vel in se est substantia, vel accidens in alio, quare non potest aliquid positium absolutum sumi ut ens rationis, cum per ipsum conceptum essendi in se, vel in alio, realitatem aliquam importet: sola verò relatio, quia non dicit solum conceptum, *in*, sed etiam conceptum, *ad*, ratione cuius præcisè non dicit existentiam in se, sed extrinsecam termini attingentiam, ideo non repugnat concipi sine realitate, atque adeò ut ens rationis, concipiendo illud non ut in alio, vel ut in se, sed ut aliud cum negatione existentie in aliquo.

Sed obijcies duo: Primò ad probandum non rectè dici priuationem, & negationem essentia rationis: Nam priuatio, & negatio nullo intellectu considerante dicunt carentiam formæ, & denominant subiectum carens, ergo non sunt carentie fictæ, nec entia rationis. Patet consequen. quia ens rationis dependet à cognitione ut sit, & ut conferat suum effectum formalem, ergo si ante cognitionem dat suam denominationem rebus, negatio non est ens
ratio-

rationis, & idem argumentum fit de denominatione extrinseca, verbi gratia, esse visum, esse cognitum, quod nullo intellectu considerante per hoc solum quod datur visio parietis in oculo denominatur paries visus, & similiter ante resultantiam entis rationis potest denominari natura superior, & inferior, prædicatum, vel subiectum, &c.

Et confirmat. Quia denominatio extrinseca sequitur ad formam realem existentem in alio subiecto, ergo est forma realis. Consequenter patet. Quia sicut denominatio, quæ sequitur ad formam substantialem est substantialis, & quæ sequitur ad accidentalem est accidentalis, ita quæ sequitur ad formam realem debet esse realis.

Respondetur. Negationem ut dicit carentiam formæ dari à parte rei negativè, quia ipsa forma in re non est, non tamen ex hoc dicitur ens rationis, sed quia cum in re non sit ens, sed carentia formæ, accipitur ab intellectu per modum entis, & ita ante considerationem intellectus denominat subiectum carens, sed ista carentia propriè non est effectus formalis; nec tollere formam est aliqua forma, sed per modum effectus formalis accipitur ab intellectu, quatenus per modum formæ accipitur, & consequenter ad modum effectus formalis, cum in re illa carentia non sit effectus formalis, sed ablatio illius. Et similiter denominatio extrinseca à parte rei datur quantum ad formam denominantem, sed quia applicatio eius ad rem denominatam non est realiter in ipsa re denominata; ideo concipere illam formam ut adiacentem, &

applicatam ipsi rei denominatæ, aliquid rationis est. Esse autem prædicatum, & subiectum, superius, & inferius ante cognitionem intellectus solum inuenitur fundamentaliter, non formaliter sub conceptu relationis, vt latius dicetur agendo de vniuersalibus.

Ad confirmationem Respondetur. Aliquos absolutè sentire, quòd denominatio extrinseca est aliquid rationis, vt Pater Vasquez 1. p. disp. 115. n. 2. & 1. 2. disp. 95. cap. 10. Alij verò quòd absolutè est aliquid reale realitate tamen extrinseca, non intrinseca, quæ sine aliquo rationis superaddito præbet suum effectum. Ita Suarez disp. ult. Metaphys. sect. 2. & alij. Sed verius videtur, quòd in denominatione ista concurrant duo, scilicet ipsa forma vt ratio denominans, & adiacentia, seu applicatio eius ad denominatum vt conditio. Et quantum ad ipsam formam, manifestum est esse aliquid reale, sicut visio quæ paries denominatur visus, realis formæ est in oculo; applicatio tamen eius vt tangit subiectum denominatum, non est aliquid reale, quia nihil in ipso pariete ponit; omne autem non reale apprehensum est quid rationis, & sic ex parte applicationis in forma denominata aliquid rationis est denominatio extrinseca. Dicitur tamen denominatum subiectum ante operationem intellectus, non ratione eius quod in illo ponit, sed ratione eius quod extra illud supponit, quæ in se est forma realis, sed non realiter existit in eo quod denominat, vnde ratione non existentiaë furnitur vt ens rationis, ratione autem præexistentiaë in alio à quo respicit rem denominatam, dicitur denominare ante operationem intellectus.

Et

Et si inquiratur ad quod membrum huius diuisionis pertineat denominatio extrinseca, quando concipitur ut ens rationis?

Respondetur pertinere ad relationem, quia non concipitur ut afficiens negando, & tollendo formam, sed ordinando, & dependendo ab eo, unde sumitur denominatio, vel ad id ad quod imponitur, & destinatur per cognitionem.

Secundo obijciuntur ad probandum quòd non sit diuisio adæquata. Nam unitas rationis qualis attribuitur vniuersali ab intellectu, est aliquid rationis, & non relatio, neque negatio; Non relatio, quia unitas dicitur absolute, non respectiue; Non negatio, tum quia unitas dicit aliquid positium, & non puram negationem, ut dicit S. Thom. 1. p. q. 11. art. 1. Tum quia si esset negatio, deberet concipi per modum entis rationis, & sic non diceretur unitas rationis, idest negatio rationis, sed ens rationis absolute. Et similiter dualitas, seu distinctio rationis non est negatio, cum potius tollat negationem unitatis, nec relatio, quia super distinctionem, seu dualitatem fundatur relatio distinctorum, ergo est altera species.

Confirmatur in his, quæ sunt purè figmenta, ut chymara, mons aureus, & similia; hæc enim non sunt negationes, nec relationes, sed plures substantiæ ab intellectu adunatæ ex partibus inter se repugnantibus. Et similiter potest dari qualitas, vel quantitas rationis, ut si vacuum accipiatur per modum quantitatis, vel tenebræ per modum qualitatis, ergo non omnia entia rationis ad illa duo reducuntur.

Respon-

Respondetur. Aliquos existimare quòd vnitas rationis tantum sumitur ex vnitae conceptus, & distinctio ex pluralitate, vt videre est in Torrejon tract. 2. de Vniuers. disput. 2. q. 2. quòd quidem verum est ex parte causae efficientis, seu causantis ens rationis, quam in praesenti non inquirimus, sed de obiectiua, seu fundamentali. *Vnde respondemus* quòd vnitas rationis ex parte obiecti pro formali pertinet ad negationem, seu priuationem, quia nihil aliud est quam segregatio eius, in quo est conuenientia à pluribus facientibus differentiam. *Et ad primam impugnationem*

Respondetur. Quòd secundum D. Thom. in illo loco, vnitas materialiter, & entitatiue est aliquid positium, sed formaliter est negatio diuisionis. *Et ad secundum Respond.* Quod non repugnat quòd ista vnitas rationis sit etiam ens rationis, siquidem ipsa negatio, seu separatio pluralitatis, & differentiae, per modum entis accipitur ab intellectu. Et ad id quòd additur de dualitate, seu distinctione rationis.

Respondetur. Quòd distinctio rationis formaliter relatio rationis est, & est ipsamet relatio distinctorum, quae hoc ipso quòd sola ratione distinguuntur, eorum distinctio relatio quaedam est, licet ipsa extrema ad instar absolutorum aliquando distincta concipiantur, verbi gratia, ad modum duplicis substantiae, &c. Fundatur autem relatio ista distinctionis, non super alia distinctione formaliter accepta, sed fundamentaliter, idest, in pluralitate virtuali, quae tenet se ex parte obiecti vt pluralitati conceptum subiicitur.

Ad confirmat. Respond. Omnia illa figmenta esse

esse entia rationis, quæ sunt negatio; non vèrò dari substantiam rationis, vel quantitatem rationis, quia non est substantia, vel quantitas id, quod per rationem formatur ad instar entis realis, sed negationes substantiæ, vel quantitatis ad instar substantiæ, vel quantitatis concipiuntur. Non dicitur autem ens rationis id, ad cuius instar aliquid concipitur, sed id quod concipitur ad instar entis cum non sic in se ens. De hoc vide latius infra qu. 17. de Relat. ar. 2.

Ex hoc sequitur quòd in vniuersali metaphysico, quod solum dicit naturam abstractam & per modum vnius conceptam, vt sequent. quæstione dicemus, iam inuenitur aliquid rationis, scilicet id quod ex vi abstractionis conuenit naturæ representatæ, seu cognitæ, idest vnitas siue aptitudo, aut non repugnantia ad essendum in pluribus, istæ enim negationes aliquid rationis sunt, sed non sunt formaliter secundæ intentiones, quæ in relatione consistunt fundata in naturis sic abstractis, & tamen dicitur vniuersale sic abstractum Metaphysicum, non Logicum, quia non omne ens rationis formaliter, & directè pertinet ad Logicum, sed secundæ intentio vt ex D. Thom. ostendimus quæstione præcedenti art. 3. hæc autem est relatio rationis, non negatio vt vnitas, & tamen conuenit rei abstractæ, & vni.

ARTICVLVS II.

*Quid sit secunda intentio, & relatio rationis
Logica, & quod duplex.*

Hoc ens rationis est, de quo propriè agit Logicus quatenus ex ordinatione conceptuum adinuenitur talis relatio quæ à Logico consideratur. Et ita D. Thom. in 4. Metaphys. lect. 4. inquit: *Quòd ens rationis dicitur propriè de illis intentionibus quas ratio adinuenit in rebus consideratis, sicut intentio generis, speciei, & similium, & huiusmodi ens rationis est propriè subiectum Logicæ.*

Supponenda ergo sunt, quæ de terminis primæ, & secundæ intentionis diximus in primo libro Summul. & sumitur intentio in præsentì, non prout dicitur actum voluntatis, qui distinguitur ab electione, & respicit finem, sed pro actu, seu conceptu intellectus, qui dicitur intentio generali modo, quia tendit in aliud, scilicet in obiectum. Et ita sicut conceptus alius est formalis, alius obiectiuus, scilicet ipsa cognitio, vel res cognita; ita alia est intentio formalis, alia obiectiua, obiectiua dicitur ipsa relatio rationis, quæ attribuitur rei cognitæ: formalis verò ipse conceptus per quem formatur, sicut quando concipimus animal tanquam superius ad sua inferiora, ipsa vniuersalitas ex parte animalis se tenens dicitur intentio obiectiua seu passiuæ; ipse verò conceptus, quo sic concipitur animal, dicitur intentio formalis, & sic aliud est formalis intentio ut distinguitur contra obiectiuam, aliud.

aliud formalitas intentionis secundæ ut tenet se ex parte obiecti cogniti, hæc enim semper est aliquid rationis utpotè ex cognitione resultans, illa verò est actus realis.

Vocatur verò *secunda* intentio ista secundum differentiam à *prima*, quasi dicatur secundus status, seu conditio obiecti. Potest enim obiectum considerari in duplici statu, primo secundum quod est in se, siue quantum ad existentiam, siue quantum ad quidditatem. Secundo ut est in apprehensione; & status iste essendi in cognitione est secundus respectu status essendi in se, qui est primus; quia sicut cognoscibilitas sequitur ad entitatem, ita esse cognitum est post illud esse quod habet in se: illæ ergo affectiones, seu formalitates, quæ conueniunt rei prout in se, vocantur primæ intentiones; quæ conueniunt rei prout cognita, vocantur secundæ; & quia pertinet ad Logicam dirigere res secundum quod sunt in apprehensione, ideo per se considerat Logica intentiones secundas quæ conueniunt rebus ut cognitis.

Ex quo deducitur primò. Quòd non omnis relatio rationis est secunda intentio, omnis tamen secunda intentio formaliter sumpta, & non solum fundamentaliter est relatio rationis, non forma realis, non denominatio extrinseca, ut malè aliqui putant. Prima pars constat manifestè: Quia licet omnis relatio rationis resultet ex cognitione, non tamen omnis ista relatio denominat rem solum in statu cogniti, qui est status secundus, sed etiam in statu existentie extra cognitionem, sicut relatio Creatoris, & Domini non denominat Deum

Deum in se cognitum, sed Deum existentem; & similiter esse Doctorem, esse Iudicem: Neque enim homo ut cognitus est Doctor aut Iudex, sed homo existens, & ita denominant illae relationes pro statu existentiae.

Vbi discerne. Quod licet cognitio sit causa, ex qua resultat relatio rationis, quod omni enti rationis commune est, & ita ut conueniat, & denominet relatio rationis aliquod subiectum, necessario exigit cognitionem, non tamen semper cognitio reddit ipsum obiectum aptum, & congruum susceptuum talis denominationis, ita ut solum conueniat illi in esse cognito, sed solum hoc contingit in intentionibus secundis. Et ita relatio Creatoris & Domini, Iudicis & Doctoris, ut denominet subiectum requirit cognitionem, quae talem relationem causet, sed non quae constituat subiectum in esse cognitio capax ut denominationem illam suscipiat: At verò esse genus, vel speciem, non solum supponit cognitionem causantem tales relationes, sed etiam supponit cognitionem, quae reddat subiectum abstractum ab inferioribus, & super rem sic abstractam cadit illa denominatio.

Secunda verò pars est expressa D. Tho. opus. 42. cap. 12. vbi dicit: Quod secundae intentiones sunt proprietates conuenientes rebus ex eo quod sunt in intellectu: & qu. 7. de potentia art. 9. Quod sequuntur modum intelligendi, & 4. Metaphys. lect. 4. Quod conueniunt rebus prout cognita ab intellectu. Non ergo reales formae sunt, sed rationis, & constat hoc, tum quia ratio generis & speciei, & reliquorum vniuersalium consistit in relatione superiorum
ad

ad inferiora, quæ non possunt esse relationes reales, aliàs daretur vniuersale formaliter à parte rei, tum etiam quia istæ intentiones supponunt pro fundamento esse cognitum, sicut genus supponit rem esse abstractam ab inferioribus, & ratione abstractionis ei conuenit, ergo supponit denominationem extrinsecam cogniti, & abstracti, non verò formaliter est ipsa denominatio extrinseca, & multo minus sunt formæ reales, sic enim descenderent ad ipsa singularia, in quibus realiter inuenirentur, & non solum in abstracto à singularibus. Ipse autem actus intellectus est quidam actus realis, sed non est ipsa intentio secunda obiectiua, de qua nunc agimus, sed formalis ex qua ista obiectiua resultat.

Secundo sequitur. Quòd licet prima intentio absolute sumpta debeat esse aliquid reale, vel conueniens alicui in statu realitatis, aliàs non esset simpliciter prima, quia semper id quod est reale præcedit, & prius est eo quod est rationis, nihilominus tamen non repugnat etiam in ipsa secunda intentione aliam secundam intentionem fundari, & tunc secunda intentio fundans induit quasi conditionem primæ intentionis respectu alterius fundatæ, non quia sit simpliciter prima, sed quia est prior illa, quam fundat: Nam cum intellectus sit reflexiuus supra suos actus, potest ipsam secundam intentionem reflectere cognoscere, & super ipsam cognitam fundare aliam secundam intentionem, sicut intentio generis, quæ tribuitur animali, iterum vt cognita potest fundare secundam intentionem speciei quatenus intentio generis est quædam species

cies prædicabilis. Et tunc secunda ista intentio fundata denominat priorem fundantem, ratione cuius dicitur quod genus formaliter est genus, & denominatiue species. Quod frequenter contingit in istis secundis intentionibus, quod secundum se vna formaliter sit talis, & denominatiue vt cognita sit alia, & nihilominus omnes istæ dicuntur secundæ intentiones licet vna fundetur super aliam, non tertia vel quarta intentio, quia omnes conueniunt obiecto vt cognito; esse autem cognitum est semper status secundus rei. Et quia vna intentio vt fundat aliam induit quasi conditionem primæ respectu illius, & sic illa quæ fundatur semper dicitur secunda.

Dices. Secunda intentio respicit primam vt correlatiuum, quia secunda dicitur per respectum ad primam, ergo non vt fundamentum, sed vt terminum. *Item.* Secunda intentio prædicatur de suo fundamento, vt *homo est species*, sed secunda intentio non prædicatur de prima, nam hæc est falsa, *prima intentio est secunda intentio*, ergo non fundatur in illa.

Respondetur ad Primum. Secundam intentionem non respicere primam vt correlatiuum per modum termini, sed per modum subiecti cui attribuitur, & quod denominat, vel in quo fundatur: & sic dicitur per ordinem ad primam vt ad subiectum, non vt ad terminum, sicut relatio dicitur per ordinem ad absolutum vt ad subiectum vel fundamentum, non verò vt ad correlatiuum, nisi induat rationem termini, qui iam est aliquid respectiuium, vt dicemus in prædicamento relationis,

nis. Et similiter correlatiuum formale secundæ intentionis semper est aliqua secunda intentio.

Ad secundum dicitur. Quod secunda intentio prædicatur de prima in concreto, sicut album de homine, sed non in abstracto, & ideo est verum quod *homo est species*, & falsum quod *prima intentio sit secunda intentio*. Nam etiam secundæ intentiones nomine abstracto significari possunt, tam in communi per hoc nomen, *secunda intentio*, quam in particulari; ut hoc nomine, *Vniuersalitas*, *Genereitas*, & similia, quæ solum important formam rationis in abstracto, subiectum autem seu rem in qua fundantur non significant directe sed in obliquo, sicut albedo in abstracto importat corpus in obliquo, quia est qualitas corporis.

Si Quæras. Quotuplex sit secunda intentio, & quomodo diuidatur. *Respond.* Omnem relationem diuidi ratione sui fundamenti proximi, seu rationis fundandi, ut dicemus in prædicamento relationis. Unde similiter relatio rationis, quæ ad instar relationis realis formatur, recte diuidetur per sua fundamenta. Cum autem fundamentum secundæ intentionis sit res ut cognita, & ut subest statui apprehensionis iuxta diuersum ordinem cogniti, ad cuius ordinationem secunda intentio formatur, sumetur quoque diuisio secundæ intentionis. Unde quia aliter ordinatur, & dirigitur prima operatio intellectus, aliter secunda, & aliter tertia, ideo penes diuersas ordinationes istarum operationum diuidetur secunda intentio, & in qualibet operatione secundum diuersum

uersum ordinem dirigibilitatis erit diuersa intentio, sicut in prima operatione alia est intentio termini, quæ ordinatur vt pars enunciationis, & syllogismi, sub qua diuersæ intentiones part's continentur, sicut ratio Nominis, ratio Verbi, & aliorum terminorum; alia est intentio vniuersalitatis per modum superioris prædicabilis, quæ etiam diuiditur in varios modos vniuersalitatis, vt genus &c. cui correspondet intentio subiectibilitatis, sicut inuenitur in indiuiduo & alijs inferioribus prædicatis.

In secunda autem operatione inuenitur intentio orationis, quæ diuiditur per varios modos orationis perfectæ, & imperfectæ, rursus propositio, quæ est vna ex orationibus perfectis, diuiditur per affirmatiuam, & negatiuam, & alias diuisiones, quas lib. 2. Summul. explicamus. Et rursus propositio fundat alias secundas intentiones, quæ sunt proprietates propositionis, vt oppositio, & conuersio, quæ pertinent ad totam propositionem, & suppositio, & ampliatio, prædicatum, & subiectum, aliaque similia, quæ sunt proprietates partium propositionis, vt in eodem libro explicatum est.

Denique in tertia operatione est intentio consequentiæ seu argumentationis, quæ diuiditur per inductionem, & syllogismum, & illa per ascensum, & descensum, hic per varios modos & figuras, de quibus ibidem dictum est.

ARTICVLVS III.

Quid sit Distinctio, & unitas rationis ratiocinantis, & ratiocinantis.

Explicatio istorum terminorum maxime conducit ad plura, quæ in vniuersalibus tractantur circa distinctionem graduum superiorum & inferiorum, pluribus etiam quæstionibus Metaphysicis, & Theologicis deseruit. Vnde exacta huius difficultatis resolutio illuc reseruanda est. Hic tamen saltem rudibri Minerua ipsos terminos oportet declarare.

Igitur aduertendum est. Quod ista nomina, *Distinctio, Pluralitas, Diuisio, Separatio, Diuersitas, Differentia*, licet aliquando promiscuè accipiantur pro eodem, non tamen sub eadem formalitate significant. Nam *Distinctio*, seu *Pluralitas*, vel *Multitudo* opponuntur unitati, vel identitati, *diuisio* verò vel *separatio* vnioni, seu continuitati; *Diuersitas*, & *Differentia* dicunt distinctionem cum inclusione vel exclusione conuenientiæ: ea enim sunt diuersa, quæ in nullo conueniunt; ea differunt, quæ in aliquo conueniunt, & in alio distinguuntur, non autem se totis diuersa sunt, de quo Philosoph. & D. Thom. 5. Metaphys. lect. 12.

Loquendo ergo in genere, conueniunt communiter Authores, quòd sicut dantur solum duo genera entium, scilicet realis & rationis, ita datur solum duplex distinctio scilicet realis, & rationis; unitas enim & distinctio debent sequi ordinem, & rationem entis, & sicut

cut non dantur plura genera entium , & im-
plicat dari ens medium inter reale , & rationis ,
ita nec plura genera distinct ionum .

Et quidem distinctio realis in genere loquen-
do , est *Remotio , seu carentia identitatis , quæ
datur à parte rei sine apprehensione , seu fitione
intellectus* . Distinctio verò rationis , quæ be-
neficio intellectus fit , & in re non datur . Di-
uidi autem solet hæc distinctio rationis in di-
stinctionem rationis ratiocinantis , & rationis
ratiocinatæ . Illa prima dici solet distinctio ,
quæ fingitur ab intellectu sine fundamento in
re , & ita solum est distinctio quoad modum
significandi , & intelligendi , sicut quando
idem apprehenditur prædicari de se , & distin-
gui à se . Secunda verò dicitur formata ab in-
tellectu cum fundamento in re , vt quando di-
stinguimus in Deo attributa , & in eadem for-
ma gradus , seu prædicata essentialia , quæ sunt
eiusdem entitatis . Distinctio realis diuiditur
in realem simpliciter , vt inter duas res , verbi
gr. Petrum & Paulum , quantitatem & quali-
tatem , & in realem modalem , seu formalem ,
vt inter rem & modum , v. g. inter hominem ,
& sessionem , vel vbi , siue inter duos modos .
Dari autem entitates modales minores reali-
bus , in Metaphysica probandum est , hic sup-
ponendum .

Cæterum duplicem illam distinctionem
rationis ratiocinantis , & ratiocinatæ non
omnes admittunt . Sed quidam excludunt di-
stinctionem rationis ratiocinantis , & solum
admittunt illam , quæ habet fundamentum
aliquod in re ; distinctionem verò rationis
ratiocinantis vtpotè fictam solum esse repe-
ticio

tionem eiusdem conceptus sine resultantia alicuius distinctionis in conceptu obiectiuo. Videatur Suarez in Met. disp. 7. sect. 1. Vasqu. 1. p. dist. 117. cap. 3. Alij verò putant ex hac distinctione ficta etiam in conceptus obiectiuos refundi aliquam distinctionem, non tamen in ipsis fundari.

Sed per aliud extremum videntur procedere ij, qui solam admittunt distinctionem rationis ratiocinantis, eò quòd non assignant pro fundamento distinctionis rationis aliquid quod sit à parte rei vnum cum virtuali distinctione, sed existimant distinctionem virtualem re vera actualem esse ex natura rei, & secuso opere intellectus, in quo subtilitas Scoti, & tota eius schola cum Diu. Thom. controuertit. Existimat enim Scotus, quòd præter distinctionem realem siue modalem, quæ in re versatur inter res, seu modos saltem de potentia Dei separabiles, & distinctionem rationis, quæ consistit, & sumitur ex diuersis conceptibus, dari aliam, qua vnum ex ipsa natura, & essentia sua, & ante omne beneficium intellectus non est de intrinseco, & formali conceptu alterius, & ita in sensu formali non identificantur, & consequenter formaliter diuiduntur, licet in eadem realitate, & entitate conueniant, & ita conueniant, quòd nec de potentia absoluta separari possint. Et ita vocat hanc distinctionem *formalem ex natura rei*, idest negantem identificationem in sensu formali ex ipsa propria rei natura, ratione cuius opposita, seu contradictoria possint verificari de istis formalitatibus. Quare distinctio rationis non supponit fundamen-

tum distinctionis virtualis in re, sed hoc ipso quòd res ex se habet rationes diuersos conceptus fundantes, idest quorum vnum non est de conceptu alterius, ex natura sua actuale diuisionem, seu negationem identitatis habet, & sic solum remanet distinctio rationis ratiocinantis.

Qui verò distinctionem rationis ratiocinatæ admittunt, idest cum fundamento in re, non eodem modo assignant hoc fundamentum. Nam quidam existimant in ipsa re, quæ per rationem distinguitur, nec actuale, nec virtuale distinctionem supponi, sed sufficere quòd res aliqua sit cognoscibilis ad instar eorum, quæ realiter distincta sunt, & cum connotatione quadam ad illas, cum imperfecto tamen modo attingendi, & cognoscendi rem. Quod tenet Vasquez vbi supra, & declarat Torreion tract. 2. disp. 1. q. 1. Alij verò videntes quòd imperfectio cognoscendi vnum, & idem ad instar eorum, quæ realiter distincta sunt, saluari potest etiam quando sine vilo fundamento distinguere volo id, quod formaliter est vnum & idem, & de conceptu intrinseco illius, solum quia ad similitudinem diuersarum rerum id effingo, dixerunt fundamentum distinctionis rationis requirere in ipsa re, quæ distinguitur, aliquam eminentiam vnientem diuersas perfectiones seu formalitates, quod vocatur virtualis distinctio, quia eadem forma virtute facit sola quicquid facerent diuersæ, vt ex Caiet. 1. p. q. 39. ar. 1. §. *Ad secundum* verò colligitur. Cui adiungi debet imperfectus modus intelligendi non valentis totam illam eminentiam vnico actu attingere,

re, sed diuersis conceptibus, licet alij neque hoc requirant.

Dico primò. Distinctio rationis ratiocinantis est illa, quæ inter extrema, quæ distinguit, nullam identitatem tollit ex parte obiecti, neque materialiter seu entitatiuè, neque formaliter, atque aded distinctionem virtualem non supponit, sed tota distinctio est in ipso modo significandi & concipiendi. Distinctio verò rationis ratiocinatæ est, quæ relinquit ex parte obiecti identitatem materiale, sed non formalem seu virtualem. Vocamus identitatem formalem illam, quæ proprio & formali conceptu exprimitur, seu quo formaliter aliquid constituitur. Vndè dicuntur differre formaliter, quæ differunt definitione seu ratione propria. Identitatem materiale, seu in sensu identico vocamus, quando aliqua sunt idem in ipsa entitate & realitate, non in ipsa ratione, quæ per se primò significatur. De qua distinctione videndus est Caiet. de ente, & essentia, c. 3. litera E. Sumiturque ex D. Thom. 1. p. q. 13. art. 4. & q. 7. de Potent. art. 6. & 1. contra Gent. cap. 36. vbi inquit, *Quod quamuis nomina de Deo dicta eandem rem significant; non tamen sunt synonyma, quia non significant eandem rationem.* Ac denique 1. p. q. 41. ar. 4. ad 3. in fine inquit, *Quod inter intelligere, & intellectum in Deo solum datur distinctio ex modo significandi;* quæ utique distinctio est rationis ratiocinantis. Itaque istæ duæ distinctiones sic se habent, quod vna minus tollit identitatem extremorum quàm alia, cum manifestum sit minorem esse distinctionem rationis ratiocinantis quàm ratiocinatæ:

natae; illa enim sic dicitur, quia solum ex ipso intelligente, seu ratiocinante originatur; hæc vero etiam ex ipso obiecto fundamentum præbet. Ergo si relinquit in obiecto omnem identitatem tam in sensu identico, quam formali, nullo modo ab ipso obiecto originatur distinctio, sed solum ab intelligente; si verò obiectum sit quidem vnum sed non in omni sensu, licet in re habeat identitatem, fundabit respectu intelligentis distinctionem.

Dico secundò. Ad fundamentum distinctionis rationis ratiocinatae non sufficit distinctio earum rerum ad quarum instar sit distinctio, sed in ipso obiecto requiritur fundamentum distinctionis. Ratio est clara, quia vel in ipso obiecto, quod distinguitur, est aliqua proportio, seu fundamentum ut ad instar illarum rerum distinctarum concipiatur, vel non. Si primum, iam non sumitur tota ratio distinguendi ex parte eorum ad quorum instar concipitur, sed ex parte ipsius obiecti quod hanc proportionem & fundamentum habet. Si secundum, ergo stat quòd sine vlllo fundamento rem istam concipiamus in ordine ad ea quæ distincta sunt, & sic sine fundamento distinguamus, quod est esse distinctionem rationis ratiocinantis, sicut si idem à seipso distinguas concipiendo in ordine ad res diuersas.

Dico Tertiò. Distinctio rationis ratiocinatae non supponit distinctionem aliquam ex natura rei actualem ex parte obiecti, nec illa datur: Quando verò actualiter fit ab intellecta ista distinctio, ex conceptibus intellectus resultant diuersi conceptus obiectiui non in esse rei, sed in esse obiecti, & repræsentati.

De

De prima parte conclusionis dicemus quæst. sequen. art. 6. Inter Thomistas est communis, & apud multos negantes illam distinctionem formalem actualem ex natura rei mediam inter realem, & rationis. Et videri potest Caiet. 1. p. q. 39. ar. 1. & de ente, & essentia cap. 6. q. 12. & M. Soto q. 3. Vniuers. Curs. Carmel. disput. 3. Vniuers. q. 4. Breuiter dicimus, quod licet Scotus, & eius schola non neget illam distinctionem verè existere à parte rei, & quantum ad hoc realem esse, sed affirmet solum consistere in hoc quod vnum realiter quidem sit alterum, sed tamen realiter vnum non sit de conceptu alterius; cæterum ex hoc ipso sumitur fundamentum ad negandum istam distinctionem esse veram, & actualem à parte rei ante operationem intellectus, quia illa non identificatio formalis non est aliud quam negatio habitudinis, & connexionis intrinsecæ vnius cum alio, sed hæc negatio non sufficit constituere extrema distincta actualiter, & distinctionem ipsam reddere realem, ergo. Maior est certa, quia vnum esse de conceptu formali, alterius nihil aliud est, quam habere connexionem, seu habitudinem essentialem, & intrinsecam cum alio, ergo negatio istius identitatis solum est negatio istius habitudinis, & connexionis. Minor probatur. Posita illa negatione habitudinis essentialis tantum, extrema non manent ita distincta, quod possint fundare inter se relationem huius distinctionis, vt patet in attributis diuinis, quæ Scotus ponit hoc modo distinguere; & tamen inter vnum, & aliud non sunt relationes reales; solum enim quatuor

relationes reales notionales agnoscunt Theologi, & in eodem homine in quantum homo ad se ipsum ut animal non datur relatio realis, ergo neque distinctio, quia distinctio relatio quædam est, si ergo non existit in re relatio, neque distinctio.

Secunda verò pars conclusionis ex eo explicatur, quia apprehensio non causat aliquid in genere rei in obiecto apprehenso, sed tantum in genere cogniti, & in hoc conueniunt tam distinctio rationis ratiocinantis, quam ratiocinata, sed differunt in hoc, quòd distinctio rationis ratiocinata ita distinguit ipsa extrema, quòd non omnia, quæ manifestantur respectu vnius conceptus, manifestantur etiam respectu alterius, sed in vno relucet aliqua ratio, vel formalitas, quæ in alio non relucet, eò quòd obiectum respectu talis luminis, & cognitionis non est ex omni parte, seu formalitate manifestabile: vbi autem est diuersa manifestatio, & diuersum manifestabile, resultat diuersa ratio obiecti in esse obiecti, idest, in esse cognoscibilis, seu manifestabilis, non in esse rei, & ita respondet diuersum obiectum conceptibus istius distinctionis rationis ratiocinata. At verò distinctio rationis ratiocinantis non respicit diuersam manifestationem in obiecto, ita quòd vnum extremum manifestetur vni conceptui, & alterum alij, sed idem extremum, seu obiectum manifestatur vtrique conceptui quantum ad intrinsecam rationem obiecti, nam si diuersa formalitas, seu ratio repræsentaretur vni & alteri, non haberent identitatem secundum formales rationes, sed in illis differ-

rent,

rent, atque adeò in esse obiecti.

Et ex hoc Aliqui, vt Suarez, & Vasq. vbi sup. videntur esse moti ad dicendum quòd distinctio rationis ratiocinantis non est propriè distinctio ex parte conceptus obiectiui, sed solùm repetitio conceptus formalis circa idem omninò obiectum: In quo tamen falluntur, quia bis concipere seu cognoscere idem obiectum non sufficit ad distinctionem rationis ratiocinantis: Alioquin etiam sensus externus bis videndo Petrum diceretur facere hanc distinctionem. Oportet ergo quòd vt intellectus illam faciat, aliquam comparationem, vel respectum apprehendat in ipso obiecto, quo accipiat ipsum quasi duo, non quidem secundùm diuersas rationes in ipso obiecto intrinsecas, & ex parte eius fundatas, sed ex ista comparatione extrinseca resultantes, sicut quando prædicatur idem de se ipso vt *Petrus est Petrus*, fit quædam comparatio eiusdem ad se ipsum, ratione cuius quasi duplicatum concipio ipsum Petrum, & ita fit distinctio non quasi in ipso obiecto intrinsecè, & secundùm propria consideratio, sed quasi extrinsecè, & secundùm comparationem, vel respectum adiunctum. In Distinctione autem rationis ratiocinatæ, licèt versetur circa eandem rem, quia tamen non adæquatè omnes ipsius rationes repræsentat, quilibet conceptus respiciens distinctam rationem in ipso obiecto format distinctam rationem obiecti quasi intrinsecam, quia ex his, quæ ipsi obiecto intrinsecè conueniunt, accipit vnum, & relinquit aliud, & ita in esse obiecti quasi intrinsecè fit ista distinctio, quia in rationibus,

quæ in obiecto inueniuntur fundatur. Et hoc modo distinctionem istam explicat S. Thom. 1. sentent. dist. 2. q. 1. ar. 2. Et sumitur etiam ex locis supra citatis dum inquit: *Quod diuersi conceptus, seu nomina de Deo, licet eandem rem significant, sed non eandem rationem.* Et in 1. dist. 22. q. 1. ar. 3. *Dicimus, inquit, Deum vere esse sapientem, & bonum, & non tantum in intellectu ratiocinantis, & inde veniant diuersa nomina attributorum, quæ omnia quamuis significant vnâ rem non tamen secundum vnâ rationem.*

Nec obstat. Quod in opusc. 9. in principio dicit D. Thom. *Quod distinctio inter attributa Diuina non est ex parte ipsius Dei, sed in conceptionibus intellectus, in quibus est diuersa ista ratio significata subiectiue;* in his enim verbis, vel alijs similibus solum docet Diu. Thom. quod distinctio ista actualiter solum habetur per conceptiones intellectus, & non ante ex parte Dei: quod verò ex conceptione intellectus resultet distinctio in obiecto in esse obiecti, vel in illo fundetur in quantum manifestatur vna ratio ex parte obiecti, & alia non, D. Tho. non negat; imò in alijs locis citatis aperte affirmat.

Dico vltimò. Fundamentum distinctionis rationis ratiocinatæ ex parte obiecti est virtualis aliqua distinctio, seu eminentia rei, quæ vnica existens plures rationes, seu perfectiones continet in aliquo esse: Ex parte autem nostri intellectus est imperfectio ipsius non adequatè concipientis omnes illas rationes obiecti, sed diuersis conceptibus ea attingentis, seu comparantis. De hac conclusione videntur
 dus

dus est D. Thom. citato loco 1. sent. dist. 2. q. 1.
 ar. 2. ubi luculenter eam tractat, & docet, &
 Caiet. 1. p. q. 39. ar. 1. Ratio autem est: quia res
 aliqua quanto superior, & eminentior plures
 perfectiones vnit quàm inferior, vnde in
 vna entitate simplici modo inveniuntur
 rationes, quæ in inferioribus diuersas entita-
 tes constituerent: vnde intellectus si lumine
 suo non manifestat omnes illas rationes, sed
 vno conceptu attingit vnâ, & alio aliam,
 distinguit illas in esse obiecti, cum tamen in
 esse rei distincta non sint, sed vnum. Funda-
 mentum ergo huius distinctionis consistit in
 eminentia, seu vnitâ rei continente plures
 rationes, simul cum intellectu inadæquatè at-
 tingente illam, & sic pluribus conceptibus diui-
 dente, & abstrahente vnâ rationem ab aliâ.
 Hac ratione distinguit noster intellectus diui-
 na attributa, quæ in vna forma diuinitatis sunt
 vnum, quia tamen illa forma adæquatè non
 attingitur à nostro intellectu, sed ad instar re-
 rum creatarum, diuidit illas secundum diuer-
 sos conceptus explicando vnâ rationem, &
 non explicando aliam. Hoc etiam modo gra-
 dus Metaphysici, idest prædicata superiora,
 & inferiora, vt esse animal, esse viuens in eo-
 dem distinguuntur ratione ratiocinata, vt in-
 fra latius dicetur. Et sic in singulis distinctio-
 nibus rationis ratiocinatæ inuenietur, quòd
 omnes illæ habent radicem & principium in
 aliqua forma, quæ secundum aliquam emi-
 nentiam continet plures rationes, ab intelle-
 ctu autem inadæquatè illas attingente diui-
 duntur. Videatur D. Thom. locis suprâ citatis,
 & libro de ente, & essentia cap. 3. Logico

enim ista libere sufficiat de his distinctionibus.

Soluntur argumenta.

Primò arguitur. Ad probandum quòd distinctio rationis ratiocinatae fundatur super aliquam distinctionem ex natura rei; quia ante operationem intellectus concurrunt omnia principia sufficientia ad distinctionem actua-lem, eo quòd ante operationem intellectus verificantur duo contradictoria, quæ respectu eiusdem verificari non possunt, sed de distinctis, siquidem omnis oppositio quædam distinctio est, si ergo in re verificatur oppositio, etiam & distinctio. Est autem verum dicere ante operationem intellectus, Animal non est propria, & specifica natura hominis, rationale autem sic: Quod essentia diuina communicatur, Persona autem non communicatur: Quod filius procedit per intellectum, non verò per voluntatem: Ergo istæ rationes ex natura rei habent aliquam distinctionem. Similiter ante operationem intellectus verificantur diuersæ definitiones, quia aliter definitur Animal, aliter Homo, aliter Natura, aliter Persona in Diuinis, & similiter attributa; quæ autem diuersas habent definitiones, etiam & diuersa constitutiva. Et ita si à parte rei diuerso modo definiuntur, etiam ex natura rei distinguuntur. Denique. Quia conceptus formales circa ista obiecta sunt distincti, ergo supponunt ipsos obiectiuos esse distinctos, aliàs fieret circulus quod conceptus formales distinguerentur per obiectiuos, obiectiuui verò per formales.

Re-

Respondetur. Quòd omnia ista non sunt sufficientia indicia distinctionis actualis ex natura rei, sed sufficit virtualis, qualis inuenitur in eminentia alicuius formæ non actualiter separantis, sed vniens diuersas rationes, nam contradictoria possunt verificari de eodem sub diuersis rationibus concepto, non sub eadem, præsertim quando contradictoria fiunt sub aliqua reduplicatione, vel appellatione saltem virtuali, vt quia explicant aliquem actum, vel rationem pertinentem ad aliquem actum animæ, vel significationem alicuius formalitatis, vt quod essentia communicatur, persona non communicatur, filius procedit per intellectum, non per voluntatem; explicatur enim proprius actus notionalis procedendi, communicandi, vel non communicandi, atque adeò cadunt illa contradictoria super naturam, vel personam sub proprio conceptu personæ, vel naturæ.

Et ad instantiam, quòd ista contradictoria in re verificantur, & omnis oppositio facit distinctionem. *Respond.* Quòd contradictoria verificantur in re ratione diuersarum rationum virtualium, quæ fundamentaliter non actualiter sunt diuersa. Et oppositio facit distinctionem quando inducit limitationem, quæ ipsas formas separet. Si verò in aliqua forma eminentiori fiat vniens plures rationes facit distinctionem virtualement, non actualem. *Similiter*. Animal non est natura specifica hominis sumendo animal sub abstractione ab homine, & in quantum est illi commune, & rationale pertinet ad propriam naturam hominis vt distinguitur ab animali, & sic ista

non sunt contradictoria, quia non sunt eiusdem de eodem, idest, ut stat sub eodem conceptu, & manifestatione.

Ad id quod dicitur de definitione Respond. Quòd cum aliquid definiatur in quantum apprehenditur, non repugnat quòd si de eodem apprehenduntur, & præscinduntur diuersæ rationes formales, etiam diuerso modo definiantur, & explicentur.

Ad ultimum dicitur. Non committi circulum, quia conceptus formales distinguuntur ex diuersis obiectiuis non actualiter, sed virtualiter diuersis, actu tamen in ipsa apprehensione redditis diuersis.

Secundò arguitur. Ad probandum quòd non inuenitur distinctio rationis in ipsis obiectis, sed solum in conceptibus, & denominatione extrinseca obiectorum. Nam ista distinctio nihil ponit actu in obiectis in genere rei ut reddat illa distincta, nisi denominationem rationis, qua obiectum redditur sic vel sic cognitum, ergo hæc distinctio non inuenitur formaliter nisi in conceptibus, in obiecto autem secundum extrinsecam denominationem.

Et confirmatur. Quia istæ formalitates non repræsentantur distinctæ, quia ex natura sua distinctæ sint, ut contra Scotum diximus, nec quia sint obiectiue distinctæ, ita quòd repræsentetur vna, & non alia, quia hoc non sufficit ut dicantur esse plures, nam nisi fiat distinctio ab intellectu non resultat pluralitas. Si autem fit distinctio, & ex parte obiecti non correspondet ei diuisio ex natura rei, ergo verè intellectus non diuidit, ergo solum potest dici distinctio, quia dantur diuersi conceptus

ceptus denominantes obiectum , non tamen quòd illi distinctioni conceptuum aliqua distinctio ex parte obiectorum respondeat .

Respondetur . Quòd ista distinctio conceptuum non ponit aliquam distinctionem in obiecto in esse rei , sed in esse obiecti manifestabilis inquantum inadæquatè obiectum ipsum attingitur , & manifestatur quantum ad vnum , & non quantum ad aliud , & hoc non est sola extrinseca denominatio , qua res dicatur cognita , sed qua dicatur diuerso modo manifestata , ex qua resultat distinctio rationis , non quidem in ipsis conceptibus formalibus , qui realiter distinguuntur , sed in ipso obiecto ut in esse obiecti manifestato .

Ad confirmationem respond. Non oportere quòd illi distinctioni rationis per diuersos conceptus resultanti correspondeat actualis diuisio ex parte obiecti extra intellectum , sed sufficit quòd correspondeat virtualis secundum quòd inadæquatè manifestabilis , vel comparabilis ad diuersos conceptus , & sic verificatur illa cognitio distinguens . Neque enim affirmat quòd à parte rei sint distincta , sed sine affirmatione respicit rem virtualiter distinctam , quæ diuersam manifestationem , & conceptum fundat , abstrahentium enim non est mendacium , neque falsitas . Vndè dicit S. Thom. 1. contra Gent. cap. 36. *Quòd intellectus concipiens multa de vno non est falsus , quia illud simplex esse diuinum huiusmodi est , ut ei secundum formas multiplices aliqua assimilari possint .*

ARTICVLVS IV.

*Per quam potentiam, & per quos actus fiant
entia rationis.*

Constat Potentias quibus fit ens rationis debere esse potentias operantes immanenter, nam quæ transeunter operantur patet facere aliquid extra intellectum existens, potentia autem immanentes alia sunt cognoscitiua, alia appetitiua. Et de appetitiuis Aliqui dixerunt etiam ex voluntate resultare entia rationis, vt Scotus contra quem agit Caiet. 1. p. qu. 28. art. 1. quamuis Scotus loqui videatur de ente rationis non strictè, sed prout hoc nomen ratio comprehendit intellectum, & voluntatem in 3. dist. 26. qu. 2. §. *Resp.* Imò Aliqui hoc extendunt ad quamlibet potentiam, vnde resultat in obiecto extrinseca denominatio, eò quòd existimant ens rationis in denominatione extrinseca consistere, de quibus diximus præced. art. De potentijs verò cognoscitiuis dubitari potest saltem de sensibus internis, vt de Imaginatiua, vel Phantasia, quia multa fingunt, & imaginantur, quæ sunt entia omninò ficta.

De actu verò formante ens rationis in duobus etiam potest esse dubium. Primò: *An possit fieri per actum absolutum*, qualis est operatio simplex, An requirat aliquem comparatiuum, vel compositiuium. Secundò: *An requirat actum reflexum*, quo cognoscatur de ipso ente rationis formato tanquam de obiecto cognito, ad hoc vt existat; An verò sufficiat

ciat actus directus, quo cognoscatur aliquid, quod non est ens, ad instar entis.

Dico primò. Neque Voluntas, neque Sensus externi formant entia rationis, ita quòd ex vi actuum eorum habeant esse. Conclusio est certa, & probatur vnica ratione. Quia tam voluntas, quàm sensus externi non formant suum obiectum, sed extra se supponunt formatum, ergo non fingunt aliquid intra se, sed si respiciunt obiectum fictum, ab alio supponunt esse fictum, & formatum. Anteced. patet in voluntate, quæ supponit obiectum propositum per cognitionem, siue sit verum, siue apparens, ergo ipsa non facit obiectum, sed in obiectum propositum fertur. Sensus verò externi feruntur in obiecta extra se posita non intra se: quicquid autem habet esse extra potentiam cognoscentem non est ens rationis. *Nec obstat*, quòd sensus falli videatur in multis, atque adeò fictè cognoscere, non enim fallitur sensus externus in se, sed occasionaliter dicitur falli, quia præbet occasionem intellectui vt fallatur, sicut visus videns aurichalcum, non fallitur iudicando quòd sit aurum, sed hoc iudicium pertinet ad intellectum, visus autem solùm apprehendit illam apparentiam coloris aurichalci, in quo falsitas, aut fictio non fuit.

Dico secundo. Sensus inter^{du} non formant entia rationis formaliter lo^{quendo}, licet materialiter repræsentare possint id ad cuius instar formatur aliquod ens fictum, quod est materialiter formare entia rationis: Dicimus *formaliter loquendo* non formare illa, idest discernendo inter ens rationis, & ens reale, & con-

concupiendo id quod non est ens ad instar entis realis, *materialiter* autem cognoscere ens rationis est ipsam apparentiam realis entis attingere, sed non discernere inter id quod rationis, & realitatis est, v. g. imaginatiua potest formare montem aureum, & similiter animal compositum ex capra, & Leone, & Serpente, quod est chymera, sed in istis solum attingit id quod sensibile, seu quoad sensum repræsentabile est. Quod autem habeant habitudinem ad non ens, & ex ista habitudine entia ficta, seu rationis dicantur, quod est formaliter discernere inter ens, & non ens, sensus internus non attingit. *Ratio* videtur manifesta. Quia sensus internus non potest ferri in aliquid nisi sub ratione sensibilis, quod autem id, quod sibi repræsentatur ut sensibile, opponatur enti reali, ad ipsum non pertinet iudicare, quia non concipit ens sub ratione entis. Quod autem aliquid accipiatur tanquam ens fictum formaliter consistit in hoc, quod cognoscatur nihil entitatis habere in re, & tamen ad instar entis attingi, alioquin non discernitur inter ens reale, & ens fictum, sed solum attingitur illud ad cuius instar formatur ens rationis, quod quando est aliquid sensibile non repugnat à sensu cognosci, sed ad sensum solum pertinet id, quod in illo de sensibilitate est, ~~est~~ attingere, habitudinem verò ad non ens cuius loco subrogatur, & unde fictè habet esse, ad sensum non pertinet, & ideo ens fictum sub formali ratione ficti ab ente vero non discernit.

Quod verò ens fictum materialiter possit cognoscere sensus, constat manifestè, non

qui;

quidem quia sensus etiam externus potest cognoscere colorem fictum, seu apparentem, quia iste color licet fictus sit color, non tamen est ens fictum, sed verum, & reale, scilicet aliquid ex luce resultans; sed ex eo probatur. Quia sensus internus multa adinuicem componit, quæ extra se nullo modo sunt, aut esse possunt, cognoscit ergo aliquid quod in se est ens fictum, licet ipsam fictionem non apprehendat, sed solum id quod in illo ente ficto tanquam sensibile se offert: Priuationem autem proprii obiecti, vt tenebras, sensus non percipit fingendo illas ad modum entis, sed actum videndi non eliciendo.

Dico tertio. Intellectus indiget aliquo actu comparatiuo, vt entia rationis formentur, & dicantur formaliter esse, & non solum fundamentaliter. Hæc conclusio sumitur ex D. Tho. 1. Periherm. lect. 10. vbi inquit: *Quod huiusmodi intentiones (de vniuersalibus loquebatur) intellectus format secundum quod comparat eas ad res, quæ sunt extra animam.* Et q. 7. de potentia art. 11. inquit: *Quod relationes rationis aliæ sunt quas intellectus inuenit, & attribuit rebus intellectis, aliæ verò quæ consequuntur modum intelligendi, licet illum modum intellectus non adinueniat, sed ex modo intelligendi consequatur.* Et primas quidem relationes ratio adinuenit considerando ordinem eius, quod est in intellectu ad res, quæ sunt extra, vel etiam ordinem intellectuum ad inuicem & aliæ vero consequuntur ex eo quod intellectus intelligit vnum in ordine ad aliud. Ergo omnes intentiones existimat Diu. Thom. formari per aliquem actum comparantem. *Et ratio conclusio.*

clusionis est. Quia omne ens rationis, vel est relatio, vel aliqua negatio. Si relatio, debet comparatiuè apprehendi ad terminum, si negatio, debet concipi positiuè ad instar entis, quod est comparatiuè ad alterum, quæ negatio si concipitur absolutè, non concipitur positiuè, cum in se nihil positium sit, debet ergo concipi ad modum entis, non solum quia ex parte principij cognoscendi per speciem realem concipi debet, sed etiam quia ex parte termini cogniti debet accipi ad instar entis, & hoc exigit aliquam notitiam comparatiuam, sicut quando concipio Romam ad instar Toleti, comparatiuè concipio Romam, & non absolutè, quia connotatiuè, & respectiuè ad aliud. Ita quando negationem concipio ad instar entis, non absolutè, sed respectiuè, & comparatiuè concipio illud: relatio autem rationis, quia positiuè de se dicitur, & non negatiuè, aliundè indiget comparatiua cognitione, scilicet quia relatio comparatio quædam est ad terminum, & rursus quia ad instar relationis reatis concipitur, licet in se positiuè dicatur. Nomine autem actus comparatiui non solum intelligimus comparationem compositiuam, vel iudicatiuam, quæ pertinet ad secundam operationem, sed quamcumque cognitionem, quæ cum connotatione, & ordine ad aliud concipit, quod etiam extra secundam operationem fieri potest, ut quando apprehendimus relationem per ordinem ad terminum: potest etiam fieri ens rationis per comparisonem compositiuam, aut discursiuam, imò quia de cæcitate intellectus affirmat, *quod est*, probat Philos. & D. Tho.

5. Metaph. lect. 9. & alibi sæpè quòd cæcitas est ens rationis. Per illam ergo enuntiationem qua de non ente affirmatur aliquid, positivè concipitur ac si esset ens, scilicet per connotationem ad verbum est.

Et dixi in conclusione, *ut entia rationis dicantur formaliter esse, & non solum fundamentaliter*: Nam fundamentum relationis rationis non requirit istam comparisonem, ut patet quando simplici abstractione denudatur natura à conditionibus individuantes, & tamen ibi non est actus comparisonis, sed sola præcisio ab inferioribus, sed tunc univèrsale non est univèrsale Logicum formaliter, sed Metaphysicum, quod est fundamentum intentionis Logicæ, ut infra quæst. 4. dicitur.

Vndè colliges. Quòd in relationibus rationis contingit fieri denominationem, etiam antequam actu cognoscatur per comparisonem ipsa relatio, solum per hoc quòd ponatur fundamentum, v. gr. natura denominatur univèrsalis hoc ipso quòd abstrahitur, etiam antequam actu comparetur; & literæ in libro clauso sunt signum, etiam si actu non consideretur relatio signi, quæ est rationis, & Deus denominatur Dominus, etiam si actu non consideretur relatio domini, sed ratione potentie denominationis, in quo differunt relationes rationis à realibus, quia reales non denominant nisi existant, sicut non dicitur aliquis pater nisi actu habeat relationem ad filium, nec similis nisi habeat similitudinem, etiam si habeat fundamentum. *Cuius ratio est?* quia in relationibus rationis esse actuale ipsarum con-

consistit in actualiter cognosci obiectiuè, quod non prouenit ex fundamento, & termino, sed ex intellectu, vnde multa poterunt ratione fundamenti dici de subiecto sine resultantia relationis, quia hæc non sequitur ipsum fundamentum, & terminum, sed cognitionem: In relationibus verò realibus, cum relatio naturaliter resultet ex fundamento, & termino, nihil conuenit ex vi fundamenti in ordine ad terminum nisi media relatione: intelligimus autem conuenire denominationem hanc ratione fundamenti proximi absolute loquendo, sed non omni modo, quia non sub illa formalitate, qua denominatur à relatione vt cognita, & existente, denominatur enim Deus ante relationem Dominus, sed non relatus, quod in relationibus realibus non contingit, quia non existente relatione, nec absolute denominant in ordine ad terminum.

Dico ultimò. Cognitio formans ens rationis non est reflexa respiciens ipsum tanquam rem cognitam, vt quod, sed illa cognitio directa, quæ ipsum non ens reale, vel quod realiter relatum non est, denominat cognitum ad instar entis, vel relationis realis, dicitur formare, vel ex illa resultare ens rationis. *Ratio est manifesta.* Quia talis cognitio qua ipsum ens rationis denominatur cognitum reflexè, & tanquam, quod, supponit ens rationis formatum, siquidem super ipsum fertur, tanquam super terminum cognitum, ergo talis cognitio reflexa non primo format ipsum, sed supponit formatum, & quasi speculatur ipsum ens rationis. Vnde ab intentionibus sic reflexè cognitis non fit denominatio in cogn-

gnoscentem, sicut quando Angelus, vel Deus intelligit hominem syllogizare, aut propositionem formare, non propterea dicitur Deus syllogizare, vel enuntiare, & tamen intelligit quasi in actu reflexo, & signato ipsum syllogismum, & propositionem, & intentiones Logicas; & idem est quando aliquis intelligit istas intentiones speculando naturam earum, tunc enim non formantur ipsae intentiones speculatae, sed super ipsas fundantur aliae quatenus cognoscuntur in vniuersali, vel per modum praedicationis, &c. Et ita dicit S. Thom. opuscul. 42. cap. 2. *Quod tunc efficitur ens rationis, quando intellectus nititur apprehendere quod non est, & ideo fingit illud ac si ens esset.* Et in 1. sent. dist. 2. q. 1. ar. 3. dicit: *Quod intentiones consequuntur ex modo intelligendi rem extra animam, non ergo cognitio reflexa, qua praecise ens rationis denominatur cognitum ut quod, sed qua denominatur cognitum ad instar entis id, quod non est, formaliter & per se primo format ens rationis.*

SOLVUNTUR ARGUMENTA.

Primo arguitur. Nam multae aliae potentiae praeter intellectum versantur circa non entia attingendo illa, & ordinando ad instar entis realis, ergo etiam formabunt entia rationis. Anteced. probat. in voluntate, & sensu interno, nam voluntas tendit appetendo in bonum apparens, quod non est bonum in re, ordinat etiam vnum ad aliud ut medium in finem, quod aliquando verè non est medium, nec verè ordinatur, ergo comparat vnum alte-

alteri, comparatione non existente in re, quod est formare ens rationis. Similiter sensus præsertim internus comparat vnum alteri formando propositiones, & discursus circa singularia, & speciebus diuersis format ens fictum, vt ex auro, & monte, montem aureum, vt docet D. Thom. 1. p. q. 12. art. 9. Ergo cognoscit entia ficta. Et generaliter ex omni sensu consequitur denominatio extrinseca cogniti, quæ est ens rationis.

Respond. neg. anteced. Ad probat. Respond. Quod voluntas cum feratur in obiectum cognitum, & apprehensum, formaliter non cognoscit illud, nec dat illi esse per rationem, sed solum id, quod resultat ex actu appetitus, est aliqua denominatio extrinseca, quæ quidem est ens rationis fundamentaliter; quando autem actu cognoscitur ad instar formæ, seu relationis realis, tunc existit actu; bonum ergo apparens voluntas ipsa non fingit, sed cognitum, & sibi propositum supponit, & sic non format ipsa. Ordinatio autem mediij ad finem etiam sibi proponitur ab intellectu, ipsa verò solum appetendo ordinat, non agnoscendo: talis autem ordinatio ponit quidem denominationem extrinsecam in re ordinatè volita, non formaliter reddit ens rationis cognitum.

Ad id quod additur de sensu. Respondetur. Quod sensus internus ita comparat vnum alteri formando propositionem, & discursum, quod ipsam ordinationem prædicati, & subiecti, & antecedentis ad consequens formaliter non cognoscit discernendo relationem fictam à reali. Et similiter montem aureum cognoscit

scit quantum ad id quod sensibile est in illis partibus repræsentatis auri, & montis, non quantum ad rationem fictionis, ut distinguitur à realitate. Quod est cognoscere non formaliter in ratione entis ficti, sed materialiter id ad cuius instar fingitur, quod in se non est. Denominatio autem extrinseca, quæ sequitur ad cognitionem sensus inquantum denominatio extrinseca, non est formaliter relatio rationis, sed fundamentaliter, tunc autem est formaliter, quando ad instar relationis cognoscitur.

Secundo arguitur. Simplex apprehensio intellectus etiam non comparat, neque discernit rationem ficti à ratione entis veri, quia aliàs non esset simplex apprehensio, sed comparativa, seu compositiva cum altero, ergo non format ens rationis formaliter loquendo, sicut neque sensus interni.

Et confirm. Quia simplex apprehensio non est fictio, fictio enim falsitati subiecta est, simplex autem apprehensio semper est vera, & præcise repræsentat rem ut est in se, seu ut proponitur sibi, ergo eius obiectum non est ens fictum, & consequenter, neque ens rationis.

Respondetur. Quòd simplex apprehensio non comparat unum alteri affirmando, vel negando, benè tamen discernendo unum ab alio, & ordinem unius ad alterum attingendo, sicut cognoscit relativa, & attingit definitionem rei, & congruitatem terminorum, ac prædicamentorum distinctionem. Undè in prædicamentis secundum Philosophum agitur de simplici apprehensione, ut dicit Sanct. Thom. 1. Periherm. lect. 1. habet ergo sufficientem com.

comparationem ad formandum ens rationis. Sensui autem interiori non negamus formationem entis rationis ex defectu comparisonis, sed ex defectu vniuersalitatis, cognoscendi, quia non cognoscit vniuersaliores rationes discernendo inter ens verum, & fictum, quod tamen facit simplex apprehensio, discernit enim prædicamenta ab ijs, quæ in prædicamento non sunt.

Ad confirmat dicitur. Quòd simplex apprehensio non est fictio per modum enuntiationis affirmando, vel negando, in quo consistit fictio, quæ est deceptio, seu falsitas, sed bene potest esse fictio per modum formationis apprehendendo aliquid quod in re non est, seu rem impossibilem ad modum entis, & discernendo ipsum ab ente vero, & reali. Vnde non semper apprehendit rem vt est in se, quasi nunquam ad instar alterius, cum plura apprehendamus non per proprios conceptus, sed per connotatiuos, sed apprehendit vt est in se, idest sine additione compositionis, ratione cuius dicitur etiam quòd simplex apprehensio non est falsa, quia formaliter non iudicat, neque enuntiat, in quo solum consistit veritas, vel falsitas formalis: bene tamen potest aliquid, quod non est, apprehendere ad instar eius quod est, sine hoc quòd affirmet, vel neget.

Vltimo arguitur. Nam ens rationis etiam sine actu comparatiuo potest existere, ergo & formari. Anteced. probat. nam in primis; quando in ipso exercitio formatur aliqua propositio, vel syllogismus, resultat secunda intentio, & ipsa propositio denominatur esse,

se, & tamen tunc non cognoscitur comparati-
uè relatio ad suum terminum, vel ad instar re-
lationis realis. *Item.* Quando ipsum ens ra-
tionis reflexè dicitur cognitum, per hoc co-
gnosci habet esse, siquidem obiectiuè termi-
minat cognitionem, quod est obiectiuè existe-
re. Nec est aliqua ratio cur natura realis in
communi concepta, & cognita dicatur esse obie-
ctiuè, ens autem rationis cognitum in commu-
ni non dicatur existere obiectiuè. Cognosci-
tur autem in communi quando reflexere, & in
actu signato reddi-ur cognitum. Denique Phi-
los. in 5. Met. & Diu. Tho. ibi lect. 9. dicunt:
*Quòd cæcitas, & quodlibet ens rationis dicitur
esse ex hoc, quòd vera est propositio, qua dicimus
cæcitas est, sed quando formatur hæc propositio
non consideratur priuatio ad instar entis,
nec fit ille actus comparatiuus, ergo sine tali
actu existit formaliter ens rationis.*

Respond. neg. anteced. Ad primam prob. di-
citur: Quòd quando formatur propositio, non
est adhuc formaliter secunda intentio propositi-
onis, sed fundamentaliter proximè, sicut
quando abstrahitur natura vniuersalis à singu-
laribus, nondum est intentio vniuersalitatis,
sed fundamentum eius. Denominatur tamen
propositio, & syllogismus hoc ipso, quòd for-
matur in exercitio, sicut denominatur aliquid
vniuersale Metaph. hoc ipso quod abstrahitur,
nam vt supra diximus, denominatio formæ ra-
tionis etiam ex ipso fundamento proximo po-
test haberi, antequam formaliter cognoscatur,
& existat forma rationis.

Ad secundam probat. dicit. Quòd ens ratio-
nis quando cognoscitur reflexere, existit obie-

Atiue vt denominatum extrinsecè in esse cogniti, non vt primò formatum, terminare autem cognitionem quasi extrinsecè, & tanquam id super quod cadit cognitio, non est formari in ratione entis, sed formatum supponi, & sic præsuppositum denominari à cognitione reflexa, quæ est quasi secunda, non prima respectu entis rationis. Quando autem cognoscitur ens rationis in communi, non dicitur formari, quia iam formatum supponitur, sed formatur ipsa vniuersalitas, seu communitas sub qua cognoscitur, natura autem realis quando cognoscitur in vniuersali, non ipsa est quæ formatur, sed vniuersalitas eius, quæ tunc primo ad instar relationis accipitur, cum obiectum relatiue cognoscitur ad inferiora.

Ad vltimam probat. dicitur. Quod quando formatur illa propositio, cæcitas est, in ipso exercitio consideratur cæcitas vt existens, atque adeò ad instar entis realis, & sic formaliter tunc est ens rationis, & tunc cognoscitur comparatiue, tam respectu sui prædicati, quàm respectu eius ad cuius instar concipitur vt existens.

ARTICVLVS V.

Virum Deus formet entia rationis.

HÆc difficul. magna ex parte Theologica est, sed quia ex principijs Logicis dependet, & non parum conducit ad perfectam intelligentiam formationis entium rationis, communiter solet in præsentia à Recentioribus tractari.

Licet

Licet ergo in hac difficultate variae sint Authorum sententiae, vnum tamen tanquam certum supponendum est, & in alijs duobus videtur esse totus cardo difficul. Supponimus Deum cognoscere entia rationis, quæ nos formamus, quantumcumque sint chymærica, & sine fundamento, quod aliqui sine fundamento negant, vt Vasquez 1. part. disp. 118. cap. 2. & 3. & alij, contra quos docet S. Thom. 1. par. quæst. 14. art. 9. cum constet cognoscere Deum perfectissime actus nostros, quibus imaginamur & fingimus ista entia rationis. Et ex illo Sapientiae 8. aperte colligitur. *Scit versutias sermonum, & dissolutiones argumentorum, signa, & monstra scit antequam fiant.* Et quomodo sciret Deus, quæ cogitamus, nisi obiecta cogitata videret, quæ sunt figmenta, & ens rationis.

Difficul. verò est in duobus. *Primum*: An entia rationis sic à nobis formata, hoc ipso quod à Deo cognoscuntur, ex ipsa cognitione Dei sicut denominantur cognita, ita denominentur esse, siquidem eorum esse est cognosci. *Secundum*: An omnia entia rationis ita fundentur in modo intelligendi imperfecto, vt Deus per se ipsum nullo modo ea formare possit.

Dico ergo primò: Ex eo quod Deus intelligit entia rationis vt formata à nostro intellectu, non dicitur ea formare, neque ex vi illius cognitionis talia entia rationis formaliter, & per se dicuntur esse. Hæc conclusio ex dictis in præcedenti art. manifestè sequitur. Diximus enim ens rationis non existere, nec formari per illam cognitionem qua cognoscitur,

ut quod, & ut terminus cognitus, sic enim solum redditur cognitum denominatiue, sicut alia res quando cognoscuntur, Deus autem quando cognoscit entia rationis formata à me, supponit illa existere per talem formationem, & cognoscit illa, *ut quod*, ergo solum reddit illa cognita extrinsecè, non autem formaliter & per se formata.

Et confirmat. Quia id, quod cognoscitur *ut* existens extra propriam potentiam, non potest habere esse ex vi talis cognitionis, nam ens rationis non potest esse extra potentiam formantem illud, quando autem cognoscitur ens rationis *ut* formatum ab alio, cognoscitur extra potentiam, scilicet in cognitione alterius, ergo ex vi talis cognitionis non accipit esse, & formationem tale ens rationis, atque adeò illa cognitio non est formatiua entis rationis, sed cognoscitiua formati; vnde cognoscit illud *ut* pendens à meo intellectu, non à suo.

Dico secundo. Illa entia rationis, quæ ex sua ratione intrinseca formantur, & cognoscuntur ex imperfecta apprehensione rei, Deus nullo modo potest per se immediatè formare. Talia sunt pura signenta, *ut* chymerae, intentiones Logicæ, quæ resultant ex cognitione componente, & discurrente, distinctiones rationis, quæ fundantur super cognitionem limitatam alicuius obiecti, *ut* distinctio diuinorum attributorum. Hæc conclusio à nemine negatur supponente quòd dantur talia entia rationis, quæ imperfectam cognitionem ad sui formationem exigant: nullus enim imperfectam cognitionem Deo tribuit. Quòd autem
ista

ista suppositio vera sit, aliqui negant, qui Deo formationem entium rationis concedunt, qui videri possunt apud P. Merin. disp. 3. de vniuer. q. 6. sed tamen sumitur ex D. Thom. in 1. dist. 2. q. 1. art. 2. vbi distinctionem diuinorum attributorum reducit ad imperfectionem cognoscentis, & super eminentiam cogniti, quia scilicet noster intellectus non valet adæquatè totum, quod est in ipsa forma diuinitatis: Similiter aliquas relationes rationis, & intentiones Logicas fundari super cognitionem imperfectam manifestè constat: Quia istae relationes fundantur in rebus cognitis per abstractionem, per praedicationem, seu compositionem, aut discursum: sunt enim relationes vniuersalis abstracti ab inferioribus praedicti ad subiectum, antecedentis ad consequens, ergo intellectus carens abstractione, compositione, & discursu non poterit per se immediatè talia entia rationis formare, sicut neque sensus externus ea format, quia caret isto modo cognoscendi. *Ac denique* Quia intellectus formas illas per suam immediatam cognitionem denominatur ab istis, intellectus enim formans intentionem syllogismi dicitur syllogizare, & formans intentionem propositionis dicitur enuntiare &c. Deus autem non dicitur syllogizare, aut enuntiare; ergo relationes istas per suam cognitionem immediatè non format, sed solum à nobis formari cognoscit, quod pertinet ad primam conclusionem, non ad istam secundam, in qua loquimur de cognitione immediatè formante, non ab alio formatam cognoscente.

Dico tertio. Aliqui respectus rationis sunt, qui

qui non fundantur super cognitionem imperfectam, & tales causantur ab intellectu diuino quasi fundamentaliter proximè, non formaliter eo modo, quo ex nostra cognitione consequuntur, & causantur. Pro huius conclusionis intelligentia notandum est aliquos respectus, seu distinctiones rationis non fundari in modo imperfecto cognoscendi Deum, sed potius in modo perfectæ cognitionis, quatenus cognoscitur sub omni modo, quo participabilis, & imitabilis est à creaturis, quod sine comparatione ad creaturas non potest cognosci, & ista comparatio quidam respectus rationis est, quia Deus non respicit realiter creaturas; cum sit omnino independens, & ab illis absolutus. Sed tamen dupliciter ista comparatio potest intelligi conuenire Deo, vno modo quia consideratur ad instar respectus formalis, & relationis realis, licet in se relatio realis non sit. Alio modo potest intelligi, non vt formaliter comparatio Dei ad creaturas, sed potius vt ordinans creaturas ad se, & reddens illas participatas, & imitantes sui, vnde accipitur fundamentum, vt etiam ipse Deus consideretur vt comparatus ad creaturas. Hoc secundo modo intelligo S. Thom. quando dicit respectus ideales, qui rationis sunt, ab æterno conuenire Deo, & causari ab intellectu diuino comparante essentiam suam ad creaturas, vt 1. p. q. 15. ar. 2. ad 3. & 4. vbi docet: *Causari istos respectus non à rebus, sed ab intellectu diuino comparante essentiam suam rebus.* Ceterum isti respectus rationis dicuntur causari ab intellectu diuino, hoc est fundari, & sunt intellecti à Deo fundamentaliter, vt
vide.

Videtur colligi ex ipso D. Thom. in 1. dist. 36. q. 2. ar. 2. ad 2. ubi inquit: *Quòd istæ relationes secundum rationem, & intellectum in Deo sunt, quia intellectus diuinus ab æterno fuit intelligens essentiam suam diuersimodè à creaturis imitabilem, & propter hoc fuit ab æterno pluralitas idæarum in intellectu diuino, non in natura ipsius: igitur S. Thom. solùm attribuit intellectui diuino cognitionem essentiæ suæ ut imitabilis est diuersimodè à creaturis. Quòd autem istam imitabilitatem ad modum comparationis, & relationis intelligat, S. Thom. non dicit, igitur si causare istos respectus solùm est intelligere essentiam suam ut diuersimodè imitabilem, & imitabilitas ista est fundamentum relationis rationis, non ipsa relatio rationis formaliter, non enim Deum esse imitabilem, & participabilem est formaliter esse comparatum, & ordinatum ad creaturas, quod formaliter facit illa relatio reddendo comparatum, & ordinatum, oportet quòd de causatione fundametalis explicemus D. Tho. quando dicit respectus istos causari ab intellectu diuino.*

Et ratio huius conclusionis sic explicatæ ea est: Quia relatio rationis tunc formatur quando consequitur ex modo cognoscendi, ita quòd intellectus nititur apprehendere, quod non est ens, & quando ad modum relationis intelligitur quod non est relatio in re, tunc formatur relatio rationis. Hoc autem totum est imperfectè cognoscere, & quasi connotatiuè attribuendo alicui id, quòd in se non habet.

Itaque relatio illa rationis non potest co-

gnosci à Deo nisi vel per suam essentiam tanquam per rationem cognoscendi à qua participetur, vel ad instar relationis realis, vel ut formatum ab intellectu nostro, vel per oppositam formam, quam tollit, sicut negatio. Primo modo non potest concipi à Deo, quia relationis non est participatio Dei, sicut neque ab ipso causata, neque ad instar illius formari potest, cum nihil reale sit quod ad instar Dei se habeat. Nec secundo modo, quia sic cognosceretur à Deo ens rationis eo modo quo nos illud apprehendimus, idest attribuendo ei entitatem quam non habet, sicut quando nos cognoscimus non ens ad instar entis. Nec tertio modo, quia sic non formatur immediate à Deo ens rationis, sed formatum à nobis intelligitur. De quo iam diximus in prima conclus. in ista autem loquimur de formatione facta immediate à Deo. Nec ultimo modo, quia sic non accipitur ut ens rationis, sed ut datur à parte rei talis negatio per modum formæ ablatae, non ad instar formæ positivæ: nec est idem cognoscere negationem per formam oppositam, & ad instar alicuius, non enim ad instar suæ oppositæ intelligitur quando per eam eius ablatio cognoscitur. Ridiculum autem valde est quod aliqui dicunt, posse Deum cognoscere aliquid aliter ac est, dummodo etiâ cognoscat ut est. Hoc enim est idem ac dicere; potest Deus habere aliquam imperfectionem, dummodo etiam perfectionem habeat.

SOLVUNTUR ARGUMENTA.

Primo arguitur, Ad probandum Deum simpliciter loquendo formare entia rationis ex hoc quod cognoscit nos ea formare. Ens rationis consistit in cognosci, & cognosci est eius esse, sed entia rationis habent cognosci à Deo hoc ipso quod cognoscit nos ea formare, ergo habent esse obiectivè per talem cognitionem, siquidem sunt obiectum cognitionis. *Confirm.* Nihil aliud est efficere ens rationis quàm cognoscere non ens ad modum entis, sed quando Deus cognoscit meam fictionem, cognoscit ibi illa figmenta ad modum entis, quia sic continentur ibi; ergo dum fictiones nescit, figmenta facit: Mai. constat, & min. prob. nam Deus apprehendendo meam fictionem, facit figmentum meum suæ cognitioni esse præsens, ergo dat illi esse obiectivè, quia esse obiectivè est præsencia ad cognitionem.

Respondetur. Quod ens rationis non consistit in cognosci quasi denominativè extrinsecè, hoc enim est commune enti reali, & rationis, sed in cognosci quasi consequitivè, idest quando ex ipso cognosci consequitur quod non ens se habeat ut ens: quando verò ex cognitione præcise sequitur denominatio cogniti, non est formatio entis rationis, sed formatum supponitur, quia ut formatum cognoscitur, unde ex hoc quod sic formatum cognoscatur, non habet esse obiectivè formaliter, sed denominativè tantum, tunc autem formaliter dicitur habere esse, quando non

habet aliud esse quàm cognosci, si autem postquam formatum est cognoscitur, iam supponitur habere esse, & consequenter ex tali cognitione non consequitur esse, sed illud esse, quod habet, denominatur cognitum, ut ergo formaliter, & primò accipiat esse, oportet quòd intellectus cognoscat id quod non est ens, & ex modo cognoscendi, quia ad instar entis cognoscitur, consequatur quòd in ipso cognosci sit ens. *Ad confirm. dist. min.* Cognoscit fictionem ad modum entis formaliter & immediatè, nego. Præsuppositivè, & mediatè, idest ut formatam & contentum in mea cognitione, conced. *Ad probat. dicitur.* Quòd Deus sic cognoscendo figmentum, & ens rationis, facit illud esse obiectivè præsens sibi, ut formatum ab alio intellectu, & cognitum, ut quòd, transeat, ut formatum à se, nego. Unde non dat esse illi obiectivè formaliter, ut dictum est, sed denominativè, quia ut formatum ab alio cognoscit, non primo & per se format. *Secundo arguitur.* Deus cognoscit omnia obiecta eo modo quo cognoscibilia sunt, sed entia rationis ex se non habent propriam intelligibilitatem, sed solum ad modum entis realis cognoscibilia sunt, ergo hoc etiam modo cognoscuntur à Deo: sed hoc est formari ens rationis, quando cognoscitur ad instar entis realis, ergo formatur à Deo. Mai. est D. Thom. 1. p. q. 14. ar. 9. ubi dicit: *Cognoscere Deum omnia quaecumque sunt quocumque modo.*

Confirm. Quia si Deus non format entia rationis, maximè propter perfectionem sui actus, qui sic attingit obiectum per apprehensionem, quòd etiam iudicat per assensum, sed

sed bene stat, quòd Deus intelligat non ens ad modum entis, & tamen iudicet tale ens esse fictum, non enim in ipso iudicio consistit formatio entis rationis, sed in cognitione exprimente non ens ad modum entis. Nos enim per simplicem apprehensionem etiam ante iudicium formamus ens rationis, ergo potest dari formatio entis rationis, licet Deus iudicet non esse ens verum. Denique cum perfectione diuini actus stat, quòd Deus cognoscat priuationes, & creaturas non existentes, & affirmet de illis quòd non sunt entia, ergo ex tali cognitione illarum priuationes, & non entia redduntur cognita, sed hoc esse cognitum in illis non est ens reale, ergo est ens rationis.

Respond. Deum cognoscere omnia cognoscibilia quocumque modo cognoscibilia sunt ex parte rei cognitæ, sed non omni modo ex parte modi cognoscendi, alioquin probaretur, quòd Deus cognoscit per discursum, quia tali modo res sunt cognoscibiles à nobis, & sic ly, *quocumque modo*, non debet construi cum ly, *cognoscit*, sed cum ly, *sunt*, idest, *quæ sunt quocumque modo*, Deus cognoscit.

Dicere autem, Quòd non est inconueniens Deum cognoscere aliquid ad instar alterius, dummodò etiam cognoscat i lud in se, iam diximus omnino esse impossibile. Cæterum ex parte rei cognitæ, non est inconueniens quòd Deus cognoscat ens rationis eo modo, quo cognoscibile est à nobis, quatenus cognoscit illud formatum à nobis. *Ex quod additur* de cognoscibilitate aliena, quæ ens rationis est cognoscibile, *Diximus*, Quòd licet ens rationis cognoscatur cognoscibilitate aliena ex

parte rei cognita, & ut est in nostro intellectu, si tamen cognoscitur ut formatum, talis cognoscibilitas aliena non format ipsum, nec constituit, sed solum denominat extrinsecè cognitum, quia iam formatum inuenit.

Ad Confirm Respond. Non repugnare formationem entis rationis Deo ex eò quòd simul apprehendit, & indicat, sed quia non potest apprehendere vnum ad instar alterius, quod est apprehendere modo connotatiuo, licet cognoscat nos apprehendere ad instar alterius, & in nostro conceptu formata entia rationis videat.

Et ad aliam partem Confirm. Respond. Quòd Deus intelligit priuationes per formam oppositam qua priuant, ut dicit Diu. Thom. 1. par. q. 14. ar. 9. & 1. contra Gent. c. 72. Non autem ad instar formæ oppositæ, repugnat enim esse ad instar si est opposita, & res non existentes, possibilestamen, cognoscit per suam essentiam, esse autem cognitum quod ex tali cognitione resultat, est denominatio extrinseca, quæ non est ens rationis formaliter, sed fundamentaliter, ut suprà dictum est. Et quando affirmat de negationibus, & priuationibus, & alijs figmentis, quòd non sunt, vel sunt impossibilia, ipsas negationes, & priuationes inquantum negationes, apprehendit per formam negatam; inquantum entia rationis, vel ut figmenta, apprehendit illa ut formata à nobis, non à se, & de illis sic formatis à nobis affirmat esse impossibilia.

Tertiò arguitur contra ultimam conclus. Respectus idæales sunt æterni, non in aliquo intellectu creato, sed in diuino, ut S. Tho. docet

cet locis citatis in conclusione, ergo formaliter, & non solum fundamentaliter sunt in diuino intellectu. Conseq. patet, tum quia respectus, ut intellecti, sunt actu, & non fundamentaliter tantum, cum formale eorum esse sit intelligi, tum quia D. Thom. concedit intellectui diuino, quod negat humano, sed in intellectu humano illi respectus intellecti habent esse formaliter, & non solum fundamentaliter, ergo & in diuino. Tum denique quia hac ratione etiam diceretur distinctio attributorum esse ab æterno, quia fundamentaliter est ab æterno, licet formaliter sit solum in intellectu creato.

Confirm. Quia D. Thom. dicit: *quod illi respectus causantur ab intellectu diuino comparante essentiam suam ad res*, sed non causantur quantum ad fundamentum, hoc enim supponitur ab intellectu, causantur ergo quantum ad formale illius relationis, & distinctionis rationis. Similiter neque comparat essentiam suam nisi ipsam comparisonem intelligendo, ergo redditur comparatio cognita, & habens esse obiectiue, quod est esse ens rationis formaliter.

Respondetur. Illos respectus idæales esse æternos, fundamentaliter proximè, non formaliter, secundum illam formalitatem, qua ad instar relationis concipiuntur.

Ad primam prob. conseq. Respond. Illos respectus esse intellectos à Deo non formaliter in se, sed in suo fundamento, idest in essentia cognita ut imitabili à creaturis, quod docet ipse D. Tho. supra citatus. Comparatio autem essentia diuinæ non est cognita ad instar relationis.

lationis, & ideo non est formaliter in intellectu diuino ut relatio, sed creaturæ intelliguntur subiectæ imitabilitati diuinæ essentiæ, in qua fundantur illi respectus, & ita fundamentaliter proximè dicitur cognosci relatio comparisonis. Itaque illi respectus dicuntur intellecti eo modo quo essentia dicitur comparata, scilicet cognoscendo imitabilitatem Dei, non comparisonem ad instar relationis formando.

Ad secundam probat. dicitur, D. Thomam concedere intellectui diuino, quod negat humano, quantum ad hoc quod est cognoscere ab æterno imitabilitatem illam essentiæ diuinæ, quam comparat ad creaturas, hoc enim non potest ab æterno cognoscere intellectus humanus. Quod autem illa imitabilitas, & comparatio cognoscatur ad instar relationis, & distinctionis realis, non concedit D. Thom. ipsi intellectui diuino.

Ad tertiam prob. dicitur. Quod est latum discrimen inter fundamentum distinctionis attributorum, & distinctionis idæarum: attributa enim fundant suam distinctionem in ipsa eminentia naturæ diuinæ continente omnes perfectiones, non ut cognita à Deo, sed ut cognoscibilia à nobis; ita quod utrumque requiritur, & ex parte diuinæ naturæ tanta eminentia, & ex parte cognoscentis tanta limitatio: At verò distinctio idæarum non fundatur in eminentia diuina ut limitatè cognoscibili, sed ut diuersimodè imitabili, & illos diuersos modos imitabilitatis cognoscere ad maximam perfectionem diuinæ cognitionis pertinet.

Ad Confr. Respond. Quod illi respectus causatur ab intellectu diuino, id est fundantur in
intel-

Intellectus autem non causat fundamentum remotum; potest tamen causare fundamentum proximum aliquarum relationum rationis, siquæ aliquæ intentiones Logicæ fundantur in natura ut cognita, respectus autem idearum non fundantur in natura diuina secundum se, sed ut cognita per modum diuersæ imitabilitatis: non enim proponitur Deo ut exemplar, nisi inquantum cognita, & ratione huius imitabilitatis cognitæ dicuntur respectus ideales pertinere ad complementum idearum, scilicet, ut cognoscantur ideæ tanquam distinctæ. Cæterum ipsa imitabilitas, & comparatio diuinæ essentiæ ad creaturas non cognoscitur à Deo ad instar relationis ex parte Dei se tenentis, sed solum dicitur comparare essentiam suam cognoscendo illam ut imitabilem à creatura. Quando autem comparatio ipsa, & imitabilitas ad instar relationis cognoscitur, tunc formaliter dicuntur esse illi respectus in cognitione.

Q V Æ S T I O III.

De Vniuersali secundum se.



EXPLICATO ente rationis in communi, oportet descendere ad explicandas intentiones Logicæ, quæ deseruiunt ad cognoscenda, & ordinanda Prædicamenta, scilicet ipsa Vniuersalia, & Prædicabilia. Et prius oportet considerare rationem Vniuersalitatis secundum

secundum se, & in communi, deinde de vnoquoque Prædicabili in particulari.

Circa Vniuersale autem secundum se, tria occurrunt considerata. *Primum est*. Ipsa ratio vniuersalis. *Secundum*; Causa à qua fit. *Tertium*: Actus vniuersalis qui est prædicatio actualis de inferioribus.

Circa primum tria inueniuntur in Vniuersali secundum se. *Primum* est ipsa natura quæ in communi consideratur, & est subiectum quod denominatur vniuersale. *Secundum* est fundamentum ipsius vniuersalitatis, quod est vnitas abstracta à multis, & aptitudo ad essendum in illis. *Tertium* est ipsa formalis relatio, seu intentio vniuersalitatis qua respicit inferiora. Et de istis in hac quæstione agendum est.

ARTICULVS I.

Explicatur diuersa acceptio Vniuersalis, & definitio illius.

Communis omnium intelligentia, & conceptus est, nomine *vniuersalis* intelligi id quod habet respectum aliquem ad plura; contra ponitur enim singulari quod incommunicabile est ad multa. Sed quia contingit multipliciter aliquid respicere plura, & habere se erga plura, multipliciter etiam contingit accipi vniuersale. Et reducuntur omnes acceptiones eius ad tres. Est enim Vniuersale in significando, Vniuersale in causando, Vniuersale in essendo seu prædicando, *Vniuersale in*

Id in significando est signum aliquod, quod ipsum vniuersale significat, siue ad plura vniuersaliter applicari potest, sicut nomina, seu termini communes significant res in communi, & ad plura applicari possunt, ut homo animal.

Vniuersale in causando est illud, cuius virtus ad plures effectus se extendit, siue sit efficiens, siue in alio genere causæ, ut Cælum, & Deus. Nota quod vniuersalitas in causando ita respicit effectus suos, quod in illis non attingit solum rationes, seu prædicata vniuersalia, & communia, sed etiam particularia, imò quantò vniuersalior est virtus in causando, tanto profundius penetrat effectum, omnesque particulares illius rationes attingit & causat, eò quod omnes participant illam rationem communem, & sic virtus quæ potest super totam illam rationem, consequenter potest super omnia, quæ illam participant. Sicut causa vniuersalis corporum attingit omnes rationes corporeas vsque ad indiuiduales differentias, & Deus, qui est causa vniuersalissima entis in quantum ens, causat omnem rationem quæ quoquo modo participat entitatem. Quod principium pro multis difficultatibus Theologicis deseruit, præsertim ad intelligendum quomodo ex parte causæ inferioris nihil præsupponitur ad agendum, siue quoad substantiam operis, siue quoad modum, quod non præueniatur à causa superiori in quantum participatur & descendit ab illa.

Denique vniuersale in essendo, seu predicando est illud, quod respicit plura, in quibus habet esse, & de quibus prædicatur, sicut animal inue-

inuenitur in omnibus animalibus, & homo in omnibus hominibus. Definitor autem vniuersale hoc vltimo modo acceptum: *Vniuersale est vnum in multis, & de multis*: vel vt Arist. definit. 7. Metaph. tex. 14. *Vniuersale est, quod pluribus inesse natum est*. Vbi lect. 13. notat S. Thom. non dixisse Philosophum, vniuersale esse, quod pluribus inest, sed quod pluribus inesse aptum est, quia plura vniuersalia sunt, quæ de facto non existunt nisi in vno singulari, vt Sol, & Luna, explicat autem illa prima definitio data omnia, quæ concurrunt ad rationem vniuersalis, scilicet *subiectum, fundamentum, relationem ad terminum, & propriam passionem*. Subiectum quidem, & fundamentum explicatur in illo verbo, *Vnum*, dicit enim rem quæ est vna, & vnitatem, explicatque ipsam vnitatem vt separatam à multis, & communicabilem illis, quam communicabilitatem expressius explicat definitio Philosophi, dicens, *Quod aptum est inesse*; vnitatem autem à multis separata, & aptitudo vt sit in illis, sunt fundamentum relationis vniuersalis, sicut potentia ad generandum est fundamentum relationis paternitatis: ipsa autem relatio, in qua consistit formalis vniuersalitas, explicatur per ordinem ad suum terminum, scilicet *in multis*: hæc enim se habent tanquam inferiora, quæ directè respicit vniuersale. Dicitur autem *esse in multis* per identitatem cum illis, quia per communicationem vniuersale fit idem cum singulari seu inferiori, & dicitur *esse de multis* per prædicationem, nihil autem prædicatur de alio nisi sit idem cum illo, non diuersum, & per hoc explicatur

tur prædicabilitas, quæ est passio vniuersalitatis.

Ex dictis colliguntur duo. *Primum*. Quomodo explicanda distinctio duplicis Vniuersalis, alterum Metaphysicum, alterum Logicum, quia enim Metaphysicus considerat principaliter naturas, Logicus verò intentiones, seu relationes rationis, ipsa natura seu subiectum abstractum à pluribus dicitur vniuersale Metaphysicum, quia in illo directè, & principaliter consideratur natura; abstractio autem seu vniuersalitas tanquam *Conditio*; est enim conditio requisita ad omnem scientiam ipsa vniuersalitas, quia nulla scientia agit de singularibus. At verò vniuersale Logicum principaliter respicit ipsam intentionem, seu formam qua aliquid denominatur vniuersale, quæ est secunda intentio, & relatio rationis; hanc enim præcipuè considerat Logicus, præsuppositiuè autem naturam, tanquam id in quo fundatur vniuersalitas, agit enim de secundis intentionibus vt fundantur in primis. Et sic intelligitur quòd Metaphysicus, & Logicus agunt de eodem, sed diuerso modo, vt 4. Metaph. dicitur lect. 4. apud D. Thom. *Metaphysicus* principaliter de natura, *Logicus* de intentione.

Secundò Colligitur. Quòd vniuersalitas, & particularitas pertinent ad rationem status ipsius naturæ quæ ab vniuersalitate, vel singularitate denominari potest. Vnde triplex status solet assignari in qualibet natura, vt constat ex doctrina D. Thomæ 4. cap. de ente, & essentia, & Caſetano ibi. *Primus est*, status naturæ secundum se, quia in eo non conside-

ran.

rantur nisi tantum illa, quæ constituunt ipsam naturam, & quidditatem, vnde vocatur etiam status indifferentiæ, quia natura secundum se indifferens est ad prædicata accidentalia. Et vocatur etiam status solitudinis, quia natura est sola ab omni extrinseco prædicato. Et vocatur etiam communis negatiuè, quia non intelligitur multiplicata natura. *Secundus status est*, secundum esse quod habet in singularibus, qui est status singularitatis. *Tertius denique status est*, secundum esse quod habet in abstractione intellectus, quæ abstractio etiam dici potest status solitudinis, non pro solitudine ab omni extrinseco prædicato, sed solum pro solitudine, seu præcisione ab indiuiduis. Et isti duo status non conueniunt naturæ secundum se, quia neuter eorum est prædicatum essenziale naturæ; si enim natura secundum se esset vniuersalis, nunquam posset esse singularis, vel si secundum se esset singularis, nunquam posset inueniri vniuersalis. Quare in statu naturæ secundum se, omnia, quæ non sunt prædicata quidditatiua, illi denegantur. Et hinc est quod extrema, quæ videntur contradictoria, addita particula *secundum se*, negantur de natura in illo primo statu; dicimus enim quod natura secundum se neque est vna nec plures, nec est alba nec est non alba, quod est dicere, essentialiter non est vna, essentialiter non est plures, sed capax vtriusque. Nec tamen inde inferas verificari duas contradictorias de natura secundum se; hoc enim nunquam est possibile, sed semper altera est vera, altera falsa; si enim dicas, homo secundum se non est albus, homo secundum se

se est albus, hæc secunda est falsa, & prima vera, quia est sensus, homo essentialiter non est albus, quod verum est, homo essentialiter est albus, quod falsum est; & sic non valet, secundum se non est album, ergo secundum se est non album, quia variatur appellatio propter illam particulam, secundum se.

ARTICVLVS II.

*Verum Vniuersaliter materialiter sumptum,
& pro subiecto inueniatur à
parte rei.*

EX vno principio dimanarunt in hac parte duæ extremæ sententiæ. Fuit enim antiquissima opinio Heracliti, & Cratilli circa tempora Socratis, vt refert Arist. 1. Metaph. lect. 10. apud D. Tho. qui dixerunt de sensibilibus non posse dari scientiam, quia sunt in continuo fluxu & motu, vnde Cratillus in tantam deuenit dementiam, (vt inquit Aristot. 4. Metaph. & ibi D. Thom. lect. 12.) quod opinatus est oportere nihil verbo dicere, eò quod veritas rei transibat priusquam finiretur oratio.

Ex hac opinione sumpsit Plato occasionem ponendi naturas separatas à singularibus, quas idæas nominauit, quia cum videret singularia esse in continuo fluxu & motu, negauit (quod verum est) de illis non dari firmam & certam scientiam, sed quia dementiam Cratilli voluit euitare, quod nulla scientia, & veritas daretur, finxit extra singularia inueniri naturam, quæ in re sine singularitate
existe-

existeret, ut de illa daretur scientia.

At verò per aliud extremum Nominales consentientes cum Platone, & Cratillo, quòd singularia non sunt obiecta veritatis certæ propter suam contingentiam, & perpetuum motum, & ex alia parte contra Platonem negantes naturas à singularibus separatas existere, dixerunt pro vniuersalibus solas voces significantes remanere, sine rebus significatis. Quorum sententiam omninò euitandam grauius admonet D. Anselm. lib. de Incarnat. Verbi c. 2. *Cum omnes* (inquit) *ut causissimè ad sacrae pagine quaestiones accedant, sunt commonendi, illi utique nostris temporis Dialectici, imò Dialecticæ hæritici, qui quidem non nisi flatum vocis putant esse vniuersales substantias &c.*

Dico ergo primò: Vocibus & conceptibus vniuersalium verè simpliciter correspondet pro obiecto aliqua entitas, seu natura, quæ vniuersalis denominatur: non quidem quæ existat à parte rei sub illo statu vniuersalitatis, & abstractionis, sed quæ per ipsam abstractionem in effectus ita attingat in obiecto naturam, ut non attingat singularitatem; vel ita attingat superiora prædicata, quòd non inferiora. In qua abstractione nulla inuenitur falsitas ex parte intellectus, sicut nec in visu datur aliqua falsitas ex eò quòd ita attingat colorem in pomo, quòd non attingat saporem, non separando ipsum in re à sapore, sed non coniungendo vtrumque in cognitione: ita ergo apprehenditur homo ab intellectu sine singularitate licet in re non sit sine illa.

Sic docetur ista conclusio à Philosopho, qui perpetuò hanc Platonis sententiam im-

pu-

pugnat, & ex consequenti Nominalium sententiam condemnat. Videri potest præcipue S. Tho. 1. Metaph. lect. 10. ubi de hac opinione Platonis sic inquit. *Patet autem diligenter inveniendi rationes Platonis quod ex hoc in sua positione erravit, quia credidit quod modus rei intellectæ in suo esse est sicut modus intelligendi ipsam rem, & ideo quia inuenit intellectum nostrum dupliciter abstracta intelligere; uno modo sicut vniuersalia intelligimus abstracta à singularibus; alio modo sicut Mathematica abstracta à sensibilibus, utrique abstractioni intellectus posuit respondere abstractionem in essentia rerum, unde posuit & Mathematica esse separata, & species: hoc autem non est necessarium; nam intellectus esse intelligat res per hoc quod similis est eis quantum ad speciem intelligibilem per quam fit in actu, non tamen oportet quod modo illo sit species illa in intellectu, quo in re intellectæ; nam omne quod est in aliquo, est per modum eius in quo est, & ideo ex natura intellectus, quæ est alia à natura rei intellectæ, necessarium est quod alius sit modus intelligendi, quo intellectus intelligit, & quores existit. Hucusque D. Thom. Qui etiam videri potest 4. cap. de ente & essentia, & in opusc. 55. & 56. & 1. p. q. 15. ar. 1.*

Ex quo loco & verbis D. Thomæ colligitur reiiciendam esse sententiam Platonis, & Nominalium, quia non distinxerunt inter modum essendi, & modum cognoscendi; si enim eo modo, quo res cognoscitur abstracta à singularibus, esset à parte rei, vel ista res sub illo modo existens produceretur à Deo, vel non produceretur à Deo, si non, nihil esset, vel esset ipse Deus,

Deus, qui est singularissimus; si à Deo productum est, ergo per aliquam actionem singularem, à Deo enim qui singularis est non potest nisi actio singularis procedere, ergo & singularem terminum, seu effectum habet. Quare modus iste vniuersalitatis nullo modo potest existere in ipsis rebus, sed solum ex modo cognoscendi naturam sine singularitate resultat.

Ex quo etiam Nominalium sententia destruitur negantium correspondere conceptui illi sic abstrahenti aliquid reale ex eo, quod modus ille abstrahendi non inueniatur in re, quandocumque enim plura coniunguntur in aliquo à parte rei, intellectus non semper debet plura illa simul accipere, sed vnum potest sine alio attingere. Id autem quod accipitur remoto alio, verum & proprium ens est, licet non sine alio in re existat, sicut patet in exemplo supra allato de viso attingente verum, & realem colorem pomi, non tamen saporem, igitur accipere vnum & omittere aliud, non est formare conceptum falsum, sed inadæquatum, aliquid ergo correspondet ei ex parte obiecti cogniti, licet non cum omni modo, quo inuenitur à parte rei, nec omne illud, cum quo coniungitur, intelligatur. Et hoc manifestius apparet in ipsa compositione, & diuisione intellectus, quando enim affirmo de aliquo subiecto aliquid, quod illi conuenit, non affirmato alio, quod illi coniunctum est, vt cum dico, homo est animal, nō affirmando quòd sit corpus, vel Deus est misericors, pomum est coloratum, & similia, vel talis affirmatio est falsa, vel vera, falsa esse non potest, cum

cū affirmetur aliquid, quod illi non repugnat, sed conuenit; si autem est vera, ergo aliquid correspondet illi conceptui ex parte rei; si enim nihil illi corresponderet, vera esse non posset: ergo stat bene quod respondeat aliquid ex parte obiecti conceptui inadæquato, & præciso, licet in re præcisum non sit, sed simul cum alio existat. Et sic secundum distinctionem conceptus adæquati, & inadæquati optimè intelligitur abstractio vniuersalis, quæ tunc datur quando non concipitur totum, quod est in obiecto, tam natura, quam singularitas, sed inadæquatè attingitur vnum scilicet natura, omisso alio, scilicet singularitate.

Sed inquirunt Nominales, Conceptum vniuersalem significantem, ver. gr. hominem vel animal esse quati nomen collectivum, quod non significat aliquid vnum, sed adunatum, scilicet omnes homines, seu omne id cui conuenit ipsa ratio hominis, & ita quando dico, homo est animal, sensus est, omne quod est homo, seu omnes homines sunt animal. Quæ ratione videntur aliqui in conceptu analogo entis ponere, quod id quod correspondet illi conceptui, est tota collectio entium sub quadam confusione.

Cæterum hæc euasio ex duplici capite excluditur. Primò quando nomen vniuersale ponimus à parte prædicati, vt quando dicimus, Petrus est homo, esset enim sensus quod Petrus est omnes homines, seu omne quod est homo, quod patet esse falsum. Secundò ponendo ex parte subiecti terminum communem sine distributione, vt homo currit,

esset sensus quod omnes homines, seu omne quod est homo currit, & sic omnes propositiones indefinitæ essent falsæ. Et hæc propositio, essentia diuina non generat, quæ est catholica, redderetur falsa, quia esset sensus, omne quod est essentia diuina non generat, quod manifestè est falsum, nam Pater est res quæ est essentia diuina, & generat.

Quare nullo modo nomen vniuersale potest esse nomen collectiuum, sed aliquid vnum significat, abstractum tamen à singularitate. Et quod additur de conceptu entis infr. quæst. 14. discutietur quomodo abstrahat, vel includat inferiora. Constans tamen esse debet, quòd hoc nomen ens non est nomen collectiuum, quia non significat aggregationem omnium inferiorum, sed conuenientiam in ratione analogà, quæ tamen quia non est simpliciter vna, sed solum proportionaliter, non simpliciter abstrahit ab inferioribus, sed solum secundum quid; ideòque dicitur illa includere implicite, & in confuso, non explicitè, vt ibidem ostendetur.

Dico secundo. Vniuersale pro substrato, seu materiali potest esse aliquid reale, idest natura à parte rei dabilis, licet non cum illo statu vniuersalitatis, vnde pro formali, idest pro vniuersalitate, & abstractione, non nisi in cognitione inuenitur. Hæc constat ex dictis, & de ea videri potest Philosophus in Prædicamentis c. de substantia, vbi secundas substantias, quæ sunt genera, & species dicit subsistere in primis: & in 7. Met. tex. 44. & sequentibus, vbi D. Thom. lect. 23. sic inquit: *Vniuersale dupliciter potest accipi, vno modo pro*

pro ipsa natura, cui intellectus attribuit intentionem universalitatis, & sic universalis ut genera, & species substantias rerum significant, & prædicantur in quid, animal enim significat substantiam eius, de quo prædicatur, & homo similiter: alio modo potest accipi universale in quantum est universale, & secundum quod natura prædicta subest intentioni universalitatis. idest, secundum quod consideratur animal vel homo ut unum in multis, & sic posuerunt Platonicæ animal, & hominem in sua universalitate esse substantias &c. Hæc Diu. Thom. Itaque universalitas, ut ibi pluribus rationibus ostendit, non est substantia vel aliquid reale, sed accidens rationis, quod pertinet ad statum ipsius rei cognitæ, quem acquirit ex eo quod cognoscitur cum præcisione quadam abstrahendo ab indiuiduatione. Ex hoc enim natura, quæ in re non existit sine conditione indiuiduante, in cognitione intellectus manet nudata ab illa. Et pertinet hoc ad statum naturæ in cognitione, quia eadem natura extra cognitionem posita in re amittit illum modum essendi universaliter, retenta quidditate naturæ.

SOLVUNTUR ARGUMENTA.

Sententia Platonis ferè tota fundabatur in perpetuitate scientiæ & veritatum, quæ ad scientias pertinent, quæ sunt veritates necessariæ, & æternæ; istæ autem non inveniuntur in singularibus, quia singularia sunt corruptibilia, & contingentia, ergo inveniuntur extra singularia, vel non erunt realia, &

Vera obiecta, sed ficta per intellectum ea quæ sciuntur; similiter dantur cunctæ exemplares, à quibus singularia participant suam essentiam, sicut Petrus participatione hominis est homo, & participatione animalis animal. Ergo datur homo, & animal separatum, à quibus istæ participationes derivantur.

Respond. Obiecta scientiarum, & veritates, quæ ab illis attinguntur, dici perpetuas, & æternas, non ratione alicuius existentiae æternæ, quam realiter habent in aliquo subiecto extra intellectum divinum, sed dicuntur æternæ obiectivè & negativè, idest, quia connectio veritatum essentialium, quæ sunt obiecta, non dependet ab aliquo fundamento temporali, vel existentia facta in tempore, sed ex se habet semper veritatem attingibilem ab intellectu quantuncumq; intellectus sit æternus, & nullo modo fundatam in aliqua ratione libera, vel contingenti, quare non est necesse, quod veritas, quæ attingitur à scientia, existat subiectivè extra singularia, sed obiectivè attingatur, sine illis. Ad illud de causis exemplaribus respondetur, dari quidem causas exemplares quarum participatione res creatæ habent suas naturas, sed istæ causæ exemplares sunt idæ divinæ, non naturæ creatæ à singularibus separatae.

Secundo arguitur. Supposita opinione Scoti infra tractanda, quod ex natura rei, & ante operationem intellectus distinguuntur gradus superiores ab inferioribus, v.g. animal ab homine, homo ab individuis, ergo à parte rei datur extra intellectum gradus superior non includens inferiorem; sed hoc ipso, quod non inclu-

includit illum est vniuersale, vtpotè de se abstractum ab inferioribus, ergo datur à parte rei abstractio naturæ à singularitate, & superioris prædicati ab inferiori.

Respond. Hanc opinionem Scoti longè distare à fictione Platonis, cum expressè Scotus affirmet gradus istos superiores, & inferiores ita distingui secundum suas rationes formales, quòd tamen non possit vna separatim existere ab alia, nec de potentia absoluta; sed subtilitas Scoti in eo consistit, quòd ex natura rei, & ante operationem intellectus formalis, quæ sumitur pro conceptu gradus superioris, non includit ex suo essentiali conceptu formalitatem, quæ deseruit pro gradu inferiori, quòd verò separatim possit ab illa existere, nec somniauit Scotus, sicut posuit Plato.

Tertio arguit, pro sententia Nominalium. Quia conceptus obiectiuus vniuersalis; vel est aliquid vnum; vel plura, si plura, habetur intentum, quia vox seu conceptus vniuersalis solum erit nomen collectiuum immediatè significans aggregationem plurium, si verò est vnum, illud in quantum vnum non est aliquid reale, sed in quantum vnum est obiectum illius conceptus vniuersalis, ergo in quantum obiectum illius conceptus non est aliquid reale. Maior patet. Quia in quantum vnum non existit extra intellectum, neque existere potest: illud autem est ens reale quod est capax existentiae.

Confirmatur. Quia ex eo quòd detur talis natura vniuersalis abstrahens à pluribus indiuiduis, sequuntur plura inconuenientia.

Primo : Quia omnia illa indiuidua sunt , illud vnum vniuersale , ergo sunt idem inter se , quaecumque enim sunt eadem vni tertio , sunt eadem inter se , sed Petrus , & Paulus sunt idem vni tertio , scilicet homini , qui est aliquid reale , ergo sunt realiter idem inter se . **Secundo :** vel ipsa natura vniuersalis descendit tota ad quodlibet indiuiduum , vel vna pars descendit ad vnum indiuiduum , & alia ad aliud : hoc secundum dici non potest , sic enim Petrus esset pars hominis , non integre homo : si verò dicatur primum , admittimus Mysterium Trinitatis in creaturis , quod natura hominis vna existens , & aliquid reale , tota communicatur vni indiuiduo , & tota alteri . **Tertio :** Ille homo in vniuersali , vel est corruptibilis vel non : Si non est corruptibilis , ergo corruptibilitas non est propria passio eius , quod est falsum , quia omnis homo est corruptibilis . Si est corruptibilis , ergo & generabilis , ergo ad illum potest terminari generatio , & existentia , quod est ponere ideas Platonis .

Respondet. Quod ille conceptus obiectiuus est vnus , non vnitatem reali , sed rationis , & praecisionis ; *& ad probat. Dicitur.* Quod illud vnum est aliquid reale , materialiter acceptum pro subiecto vnitatis , non formaliter pro ipsa vnitatem praecisionis , & relatione vniuersalitatis . Et sic licet non existat à parte rei sub illo statu vnitatis praecisae , existit tamen illa natura sub alio statu . Et hoc sufficit vt dicatur , ens reale & capax existentiae absolute , & secundum se , licet non in omni statu .

Ad confirm. respond. Primum inconueniens non sequi , quia illa maxima intelligitur de his ,
quae

quæ sunt eadem vni tertio, quod ita est vnum, vt virtualiter non sit multiplex. Quod D. Th. 1. p. q. 28. art. 3. appellat esse idem vni tertio *re & ratione*, idest, vni tertio, quod est idem secundum rem, & secundum rationem, & non virtualiter multiplex, natura autem vniuersalis virtualiter est multiplex, quia est communicabilis in plura, vnde ex identitate cum illa non sequitur identitas indiuiduorum inter se. *Vel secundo*: omnia indiuidua dicuntur esse vnum in natura communi non vnitæ reali, sed vnitæ similitudinis, & conuenientia, quæ per intellectum accipitur tanquam vnitæ, vnde non sequitur quod sunt vnum inter se, sed solum similia & conuenientia; per rationem autem accipiuntur tanquam vnum.

Ad secundum inconueniens dicitur. Quod communicatio naturæ vniuersalis ad singularia non est sicut communicatio totius integralis ad partes integrantes, sed sicut totius prædicabilis ad partes subiectiuas, in quo non fit diuisio per partes, sed diuersa multiplicatio naturæ in diuersis indiuiduis. Vnde in diuisione integrali quælibet pars non adæquat totum, in communicatione verò vniuersalis ad particularia, quælibet pars subiectiua adæquat totum quantum ad naturam communicatam, sed non quantum ad extensionem & multiplicabilitatem illius. Quod longè distat à Mystério Trinitatis in quo non fit communicatio per multiplicationem naturæ, sed per identitatem eiusdem naturæ singularis cum tribus personis.

Ad tertium inconueniens Respond. Quod homo in communi dicitur corruptibilis, & ge-

nerabilis quantum ad radicem & convenientiam corruptibilitatis, non quantum ad exercitium: conuenit enim corruptibilitas naturæ, sed exercetur in indiuiduis; sicut conuenit ei risibilitas, sed exercitium ridendi non conuenit naturæ in communi, sed indiuiduo. Vnde hoc in omnibus proprijs passionibus inuenitur, quod connexio, & conuenientia earum est respectu naturæ communis; exercitium verò respectu indiuiduorum.

ARTICVLVS III.

Virum vnitas formalis ut distincta à singulari conueniat naturæ ante operationem intellectus.

Quia vniuersale, ut dictum est in art. 1. definitur. *Quod est vnum in multis, seu aptum ad essendum in multis*, necesse est declarare, quomodo illi conueniat vnitas, & quomodo conueniat aptitudo ad essendum in multis. Et in hoc articulo agemus de vnitatem, in sequenti de aptitudine.

Duo ergo pro presenti difficultate notanda sunt. *Primum*, Quid nomine vnitas formalis intelligamus? *Secundum*. In quo consistat punctus difficultatis, & controuersie inter scholam D. Thomæ, & Scoti circa distinctionem huius vnitatis formalis ab indiuiduali ex natura rei? *Vnitas* ergo generaliter loquendo formaliter importat carentiam diuisionis; & dicit aliquid posituum ex parte entitatis, & aliquid negatiuum ex parte formalis, quod addit supra entitatem, ut colligitur ex D. Th.

1. par.

¶ p. q. 11. ar. 2. ad 2. & in 1. dist. 9. quæst. 4. a. r. ad 2. & dist. 24. q. 1. art. 3. Vnde ex diuersa ratione negandi diuisionem solet diuersus modus unitatis resultare, ut tamen resultet non solum diuersus modus unitatis, sed diuersa unitas absolute, oportet quod non solum varietur modus negandi diuisionem, sed etiam ratio ipsa entitatis positua diuersa reddatur, quia diuersitas unitatis absoluta facit multitudinem, plures enim unitates multitudo est, ubi autem non est multitudo non est diuersa unitas absolute loquendo, licet sic diuersus respectus negandi diuisionem, multitudo enim non componitur ex negationibus, sed ex entitatibus quantum ad positum, quod includitur in unitate, ut S. Thom. docet loco citato q. 11. primæ partis. Quando ergo in præsentī distinguimus unitatem formalem, & individualement, & uniuersalem, & rursus formalis distinguitur in genericam, & specificam, non distinguimus varias unitates absolute, & ex parte entitatis posituæ, quasi illæ constituent aliquam multitudinem, sed solum distinguimus varios respectus negandi diuisionem. Cum enim concurrant in aliqua re & principia formalia, quæ constituunt quidditatem, & materialia, quæ pertinent ad indiuiduationem, quando principia formalia sunt indiuisa, idest, non fit diuisio penes formalia principia, tunc ex illo respectu carenti diuisione quantum est ex parte talium principiorum dicitur unitas formalis, quæ adhuc variari potest penes variationem principiorum formalium, nam quedam principia formalia sunt generica, & quedam specifica, & si detur carentia negativis

penes principia generica tantum, dicitur vnitas formalis generica, si autem sit carentia diuisionis penes principia specifica, dicitur vnitas formalis specifica. Quando verò non solum datur carentia diuisionis ex parte principiorum formalium, sed etiam ex parte materialium, quæ pertinent ad indiuiduationem, tunc illa vnitas est numerica, seu indiuidualis. Et quia quidditas & indiuiduatio simul concurrunt in vno indiuiduo, non repugnat etiam inueniri vnitatem formalem coniunctam vnitati indiuiduationis. Si autem per intellectum separatur ab omni indiuiduatione, vnitas illa formalis manebit præcisa, & tunc dicitur vnitas vniuersalis seu præcisionis.

Secundo notandum est, Punctum controuersie & difficultatis inter Scholam Diu. Thom. & Scoti in hac parte non consistere in eo quòd vnitas formalis inueniatur in re ita distincta ab vnitate singulari, quòd vel existat separata ab illa (hoc enim esset ponere idæas Platonis) vel quòd positiuè inueniatur communis ad vnitatem numeralem, hoc enim Scot. nunquam dixit, sed solum in duobus consistit eius sententia: Primum quòd inueniatur à parte rei vera & propria vnitas, quæ concomitatur naturam secundum se consideratam, quæ neque est numerica, nec vniuersalis, sed minor numerica, eo quòd non est ita indiuidua, sicut numerica, vnde ista vnitas, quia conuenit naturæ secundum se consideratæ, in omni statu inuenitur: In statu quidem præcisionis manet coniuncta vnitati vniuersali: in statu autem singularitatis manet coniuncta vnitati numericæ, sed tamen vera & propria

vni-

Vnitas est etiam secundum se considerata, & non solum ratione unitatis numericae, vel praecisionis sibi adiunctae, sed in vnoquoque individuo, & datur vnitas numerica, & praeterea vnitas formalis, & in vnoquoque vniuersali datur eadem vnitas formalis, & simul vnitas praecisionis: *Secundum est.* Quod haec vnitas formalis, quae conuenit naturae secundum se dici potest vniuersalis negatiue, idest, non singularis, quia de se illa natura, & consequenter vnitas eius neque singularis est, neque vniuersalis positiue, vt etiam sentit D. Thom. 4. cap. de ente & essentia. Solum enim in illo statu conueniunt naturae praedicata quidditatiua, & propriae passionis, quarum vna est vnitas. Videatur Scotus in 2. dist. 3. qu. 1. §. *Sed contra*, & §. *Ad questionem*.

Dicitur autem haec vnitas formalis conuenire ex natura rei, quia consequitur ipsa principia naturae secundum se, & non beneficio intellectus.

Aliqui tamen sinistre interpretati Scotum dixerunt, istam unitatem ita conuenire naturae in statu solitudinis, & secundum se, quod non descendit ad individua, neque in illis inuenitur, sed secluso illo statu solitudinis euanescit ista vnitas. Alij autem per aliud extremum, voluerunt hanc unitatem formalem, ita in singularibus inueniri, quod etiam retineat ibi aliquid vniuersalitatis, saltem imperfecte, & inchoate, quatenus existit in pluribus actibus; non tamen secundum aptitudinem, qua potest praedicari de pluribus, de quo videri potest apud Conimb. q. 4. Vniuers. art. 3.

Nihilominus pro resolutione. *Dico primo.*

Naturæ secundum se, non conuenit aliqua unitas; quæ positiuè, & absolutè unitas sit minor numerali, & quæ à parte rei inueniatur coniuncta cum unitate numerica, sed solum conuenit unitas formalis negatiua, idest, negatio diuisionis per principia formalia. Itaque in re inuenitur conuenientia, & similitudo vnius naturæ cum alia in prædicatis quidditatiuis, quam intellectus per modum unitatis assumit, & consequenter inuenitur in qualibet natura negatio diuisionis per principia formalia. Et in hoc est ferè tota æquiuocatio in hac parte, quod existimatur negationem diuisionis solum fieri per veram & positiuam unitatem; cum tamen etiam fieri possit per solam conuenientiam; quæ enim conueniunt, ex vi illorum principiorum per quæ conueniunt, non diuiduntur. Ita sumitur ex Caietano 4. cap. de ente & essentia q. 6. & hoc ipsum ibi docet D. Thom. dicens, *Quod natura secundum se, neque est vna nec plures; Si quæramus (inquit) utrum ista natura possit dici, vna vel plures; neutrum concedendum est, quia utrumque est extra intellectum humanitatis, & utrumque potest sibi accideret; si enim pluralitas esset de ratione eius, nunquam posset esse vna, cum tamen vna sit secundum quod est in Socrate; similiter si unitas esset de intellectu, & ratione eius, tunc esset vna, & eadem natura Socratis, & Platonis, nec posset in pluribus pluralificari.* Ita D. Thom. 1. 2. 2. q. 2. a. 2. ad 2. Ex cuius verbis sumitur fundamentum huius conclusionis; Quia unitas positiua tunc absolutè, & simpliciter est unitas, quando non solum negat diuisionem à x vna parte, sed re-

Inquit subiectum, seu entitatem ex omni parte indiuisam, & determinatè reductam ad vnitatem: si enim ex aliqua parte relinquit locum diuisioni, vel pluralitati, solum secundum quid erit vnum, & non simpliciter; sufficit enim ad tollendam vnitatem simpliciter, quòd ex aliqua parte non sit sublata diuisio, seu pluralitas, sed natura considerata secundum se non habet ex omni parte sublata diuisionem, nec remouet omnia principia pluralitatis, ergo non habet vnitatem formale positivè, & simpliciter: Minor probat. Quia natura secundum se considerata est indifferens ad pluralitatem, vel vnitatem, & determinate neutrum sibi vendicat, vt probat ratio D. Thomæ, quia si haberet pluralitatem nunquam posset esse vna, & si vnitatem, nunquam posset plurificari, quia illud quod conuenit naturæ sub illo statu essentialiter illi conuenit, quia solum est status, in quo considerantur prædicata quidditatiua, & quidquid ibi conuenit quidditatiuè conuenit, ergo natura pro illo statu est indifferens vt sit determinate vna, vel determinatè plures, quia ex sua quidditate neutri repugnat; ergo nondum habet statum, in quo remoueat, & repugnet omni principio plurificationis, & diuisionis; ergo nondum habet vnitatem positiuam.

Nec obstat, quòd habet negationem diuisionis penes principia formalia, quia hoc solum probat habere vnitatem negatiuam, ratione cuius dixit Dignus Thomas opusc. 42. cap. 7. *Quòd in ipsa natura absolutè accepta est quædam vnitas cum definitio eius sit vna, & hæc est vnitas non simpliciter & positivè, sed quantum*

tum ad negationem diuisionis per principia formalia, quæ solum pertinent ad definitionem, sed de unitate positua, & simpliciter subdit ibi D. Tho. id quod dixerat loco citato de ente, & essent. *Quod non est de intellectu nature absolute unitas aliqua neque, etiam pluralitas, quia utrumque potest sibi accidere.* Et hoc amplius manifestatur, quia ista negatio diuisionis penes principia formalia taliter afficit naturam secundum se consideratam, quod multiplicata natura in statu indiuiduationis; etiam ipsa negatio multiplicatur, & non manet unica in omnibus indiuiduis, ergo signum est, quod non reddebat naturam vnā simpliciter, quia taliter ibi inuenitur negatio diuisionis formalis, quod adhuc est cum indifferentia vt ipsamet negatio plurificetur, vel vna maneat: negatio autem indiuiduationis, quæ adhuc in se non est vna quomodo potest reddere naturam simpliciter vnā? Non ergo omnimodam unitatem ex parte subiecti habet, quousque talis natura in aliquo statu reperiatur, vel singularitatis, vel vniuersalitatis.

Dico. Secundo. Licet natura secundum se sit negativè communis, & negatio diuisionis formalis, quæ illi conuenit sit etiam negativè communis, id est, non singularis, tamen in re, & extra intellectum absolute, & de facto nunquam reperitur ista unitas neque posituè, neque negativè communis.

Ratio Concl. est. Quia hoc ipso quod natura ponitur extra intellectum accipit statum singularitatis, cum non possit inueniri natura sine singularitate, aliàs poneretur natura Platonica extra intellectum, posita autem singularitate

non solum remouetur; communitas positiua; quam in intellectu natura acquirit, quod etiam Scorus faretur, sed etiam remouetur communitas negatiue, tum quia non manet vna negatio in illis naturis singularizatis, sicut enim multiplicatur ipsa natura specifica, ita & negatio indiuisiōis formalis, quæ naturam comitatur: Tum etiam: Quia esse communem negatiue est non esse diuisam in multis, sed posita singularitate manet diuisa in multis, cum verè, & positiue natura sit multiplicata, quod est habere oppositum illius negationis, quæ negatiue est communis, idest, non diuisa, ergo non manet communis negatiue, sicut aer posita luce non manet negatiue tenebrosus, quia ipsa illuminatio expellit negationem lucis.

Dices: Natura illa singularis, & extra intellectum adhuc non habet illam multiplicationem ex se, sed ex statu singularitatis adiuncto, ergo secundum se semper manet illa natura communis negatiue, & conuenit illi vnitas formalis communis negatiue quantum est ex se, non obstante multiplicatione.

Respondetur. Quod non sufficit aliquam naturam non habere ex se aliquam formam, vel prædicatum accidentale vt dicatur simpliciter non habere illud, quando illi reuera conuenit absolute, licet ex proprijs, & intrinsicis non conueniat, sicut homini ex proprijs non conuenit esse album, neque aeri esse lucidum, & tamen quando actu homo est albus, & aer illuminatus, non possumus dicere quod absolute non sit talis, quia ab intrinseco id non habet: sic natura licet secundum se non sit multiplicata, & diuisa, & consequenter negatiue

gatiuè communis, idest, non singularis; si tamen actu sit singularizata, & multiplicata, non manet amplius negatiuè communis, licet ex proprijs neque sit communis, neque singularis, & hoc semper illi conuenit. Atque ita nunquam debet concedi absolutè quòd natura secundum se est communis negatiuè in re, sed quòd ex proprijs, & essentialibus non habet singularitatem, & multiplicationem in re, quod est verum, absolutè tamen habet illam, vt autem denominetur communis negatiuè in re, non sufficit quòd ex se non sit singularis, vbi ly *ex se* pertinet ad modum non essendi; sed quòd careat ipsa singularitate.

Sed. obijcies. Quia D. Thom. 4. cap. de ente, & essentia dicit, Quòd Natura secundum se est id quòd prædicatur de indiuidualis; hoc autem est proprium vniuersalitatis, ergo natura secundum se vniuersalis est.

Respondetur. Quòd, vt bene aduertit Caietanus ibi circa 3. dub. In natura aliud est res, quæ prædicatur, aliud conditio, seu status vt prædicetur. Res quidem quæ prædicatur est natura secundum se, eius enim quidditas communicatur inferioribus. Conditio autem seu status, vt communiceetur, est superioritas, & vniuersalitas, hæc non conuenit naturæ secundum se; esse autem rem, quæ prædicatur de singularibus, hoc est, quòd conuenit naturæ secundum se, nec amplius dicit D. Thomas.

Disco. vltimò. Facta præcisione à singularibus per intellectum, natura & eius vnitas formalis habet rationem vnitatis determinatæ, & positiuè in quantum redditur vnitas communis ad multa, quæ est vnitas præcisionis.

Et si.

Et similiter contracta ad singularia redditur una unitate numerica, quare nunquam unitas formalis inuenitur simpliciter, & positivè, nisi sit unitas vniuersalitatis, vel singularitatis. Hæc conclusio constat ex dictis, & de illa unitate dicit D. Thom. opusc. 42. citato cap. 7. *Quod alia est unitas nature, quam habet ab intellectu in quam omnia supposita conueniunt*. Sentit ergo quòd natura, cui conuenit formalis unitas ab intellectu unitatem accipit rationis determinatam. Et similiter in opusc. 55. inquit D. Thom. *Quòd illa natura quæ est vniuersalis in quantum est in anima est una numero*, idest, concepta ad modum unitatis positivæ ac si esset una numero. Et opusc. 29. dicit: *Quòd nature relinquitur unitas rationis in communicatione sua*, non ergo est unitas à parte rei. Et ratio est clara, quia natura sic concepta solum repræsentat id in quo conueniunt omnia inferiora, tanquam si esset una natura separata ab omnibus illis, sed si ista natura sic existeret à parte rei, ut concipitur (sicut Plato dicebat) à parte rei haberet unitatem positivam, ergo in intellectu illam habet, quia sub unitate concipitur. Et hæc unitas attribuitur ab intellectu ipsi nature cognitæ, licet fundamentum habeat in ipsa re propter similitudinem, & conuenientiam inferiorum in aliqua una ratione: sed tamen redditur una illa ratio communiter concepta in quantum habet rationem uniformem ad omnia individua, quæ sunt extra animam, & ratione huius uniformitatis plures homines sunt unus homo, sicut dicit D. Tho. opusc. 41. cap. 7. & opusc. 55. Unde non repræsentat iste conceptus sic uni-

for-

formis omnia indiuidua immediate, & formaliter, sed vnam rationem, in qua conueniunt, repræsentat directè; materialiter autem, & mediate ipsa inferiora, quibus talis ratio conuenit, & in quibus multiplicatur dissoluta unitate præcisionis.

Ex quo inferes male aliquos explicare unitatem vniuersalis per hoc, quòd non sit aliud quàm essentia multorum, seu ipsa multa concepta per ordinem ad aliquam communem operationem, passionem, vel accidens. Sed hoc non est verum, nam si vnitas naturæ communis non est aliud quàm plura per ordinem ad vnam operationem, inquiri quomodo operatio illa, vel accidens, aut passio sint vnum? Si solum per similitudinem æque sunt plura, atque ipsæ res quarum sunt passio, nam etiam res, seu naturæ similes sunt. Si autem propter istam similitudinem operatio, vel passio accipitur vt vna ab intellectu, cur non etiam ipsa natura quæ eandem similitudinem habet?

SOLVUNTUR ARGUMENTA.

Primò arguitur communi illo argumento. Petrus, & Paulus à parte rei non distinguuntur formaliter, sicut distinguitur Petrus ab equo, ergo sunt vnum formaliter à parte rei, & illa vnitas non est numeralis, quia in unitate numerali non sunt vnum, sed distincti, ergo datur vnitas formalis à parte rei distincta à numerali.

Et confirmatur. Quia quot modis dicitur vnum oppositorum tot modis dicitur & aliud, sed datur distinctio formalis à parte rei diuersa à

sa à numerali, sicut homo, & equus formaliter in re distinguuntur, seu specificè, ergo etiam datur vnitas formalis distincta à numerali à parte rei.

Respond. Probare argumentum quòd Petrus, & Paulus habent vnitatem formalem à parte rei fundamentaliter, & quantum ad vnitatem negatiuam, non formaliter, & secundam vnitatem positiuam. Vocamus vnitatem fundamentalem conuenientiam, seu similitudinem; hæc enim datur à parte rei, quia Petrus, & Paulus sunt similes in natura: sed ista conuenientia non est vnitas; conuenientia enim potius supponit distinctionem extremorum. Similiter cum dicimus dari vnitatem negatiuam formalem, non est sensus, quòd in duobus indiuiduis sit eadem negatio, cum sint diuersa subiecta, sed quòd vtraque negatio facit vnum, & eundem effectum, scilicet illam naturam non esse diuisam per principia formalia. Eodem modo dicendum est, quòd duo indiuidua diuersæ speciei minus sunt vnum quàm indiuidua eiusdem, idest, minus conuenientia, & similia, neutra magis vel minus vnum vnitate reali, & positiua.

Ad confirm. Respond. Similiter probare, quòd sicut datur distinctio formalis in re, ita datur vnitas formalis in re, sed sufficit, quòd sit vnitas negatiua, vel fundamentalis, quæ solum est conuenientia, & similitudo, hæc enim etiam opponitur diuisioni formali.

Secundò arguitur. Natura secundum se ut distinguitur ab indiuiduatione est vera entitas, ergo habet veram, & formalem vnitatem, quæ est passio entis. Nec sufficit conuenien-

uenientia, aut similitudo, quia passio entis non est conuenientia, vel similitudo, sed vnitas, ergo illa conuenit naturæ secundum se, & non conuenit illi vnitas numerica, vt constat, ergo formalis, seu specifica.

Et confirm. Quia ipsa similitudo & conuenientia est relatio fundata in vnitate, & non in vnitate conuenientie & similitudinis, sic enim conuenientia fundaretur in conuenientia, ergo in vera, & propria vnitate, non in vnitate numerica, quia hæc non datur inter Petrum, & Paulum, ergo in vnitate formali.

Respondet. Vnitatem inueniri in natura eo modo quo ipsa natura inuenitur, si enim consideratur natura sine aliquo statu determinata, sed solum secundum principia essentialia, sic non consideratur vt habens vnitatem determinatè, & positiuè, sed solum negatiuè, id est, non est diuersa penes illa principia formalia: in re autem, quia habet statum singularem, determinatè habet etiam vnitatem positiuam, non qua plures naturæ singularizata dicantur vni, sed qua quælibet natura habet suam vnitatem, & in ratione specifica, & formali conuenientiam, & negationem diuisionis penes eadem principia formalia.

Quod si instet. In natura secundum se inuenitur entitas positiuæ, & inuenitur negatio diuisionis, quoad principia formalia, ergo inuenitur plena, & perfecta vnitas quia hæc non consistit in alio, quàm in entitate cum negatione diuisionis.

Respondetur. Non inueniri in tali natura negationem diuisionis absolutè, & ex omni parte, sed solum sub illa reduplicatione quantum

um est ex principijs formalibus, & quia relinquit indifferentiam, vt habeat pluralitatem, vel unitatem absolute; & per principia materialia, ideo perfecte, & simpliciter non manet vna, sed solum negatiue, & sub illa reduplicatone dicta, & hoc modo semper aliqua unitas saltem negatiua consequitur ens in quocunque statu.

Ad confirmat. respond. Quod similitudo, & conuenientia pro relatione fundantur in ipsa conuenientia, & similitudine pro fundamento, & sic non fundatur conuenientia in conuenientia, sed relatio conuenientie in ipsa unitate, seu uniformitate conuenientie; quæ est fundamentum talis relationis; non autem fundatur in unitate simpliciter, quæ potius repugnat conuenientie.

Tertio arguitur. Unitas formalis est illa qua aliquid dicitur vnum formale, seu vnum in specie, sed vnum indiuiduum sine consortio alterius non dicitur vnum in specie, neque enim admittimus quod Petrus est vnum in specie, nisi addamus, Petrus cum Paulo, vel cum Francisco; ergo unitas formalis non multiplicatur in quolibet indiuiduo, sed facit plura indiuidua esse vnum inter se. Vnde D. Th. 3. par. q. 2. art. 5. ad 2. inquit: *Quod natura humana non habet rationem speciei secundum quod est in vno indiuiduo, sed secundum quod est abstracta ab omni indiuiduo, vel secundum quod est in omnibus.* Ergo sentit D. Thom. unitatem speciei in omnibus indiuiduis inueniri; & non in vnoquoque seorsum.

Respond. distin. min. Vnum indiuiduum sine consortio alterius non dicitur vnum in specie,

cie, quantum ad similitudinem, & conuenientiam concedo. Quantum ad indiuisiōem specificam nō go. Habet enim natura, quæ est in vno indiuiduo, etiam prout in illo, negatiōem diuisiōis specificæ per principia formalia. Conuenientiam autem, & similitudinem cum alio indiuiduo non habet sine consortio alterius, & sic dicitur illa vnitas formalis facere plura indiuidua vnum inter se, quia facit illa conuenire in vno, seu habere similitudinem, & conuenientiam in natura.

Ad locum P. Thom. Respond. Quod natura humana habet rationem speciei secundum quod est in omnibus indiuiduis eo modo quo dicitur, vniuersale esse in multis, vel fundamentaliter, quia abstrahitur vna natura à multis, in quibus inuenitur vna, non per identitatem, & vnitatem simpliciter, sed per conuenientiam, & similitudinem, vel quia est in multis per prædicationem, & aptitudinem ad essendum in illis, sed hoc habet per intellectum, & non in re per vnitatem communem multis.

Ultimo arguitur. Quia natura in statu solitudinis habet quidquid requiritur, vt sit libera à singularitate, quia neque est contracta, neque determinata, neque incommunicabilis secundum se, ergo secundum se est communicabilis, & non singularis, & contrahibilis, ergo vnitas, quam habet, est vnitas communis multis.

Respond. Quod posita illa reduplicatione secundum se non valet à negatiua ad affirmatiuam variato prædicato penes finitum, & infinitum, neque valet à negatione vnus absolute

Intè ad positionem alterius, & sic non valet, natura secundum se non est singularis, nec determinata, nec incommunicabilis, ergo secundum se est communicabilis, vel vniuersalis, &c. Nam secundum se neque est vnum, nec alterum, sed vtriusque est capax. Erit autem contradictio si dicas, homo secundum se non est communicabilis, homo secundum se est communicabilis, sed hæc secunda est falsa, & prima negatiua est vera, & à destructione vnius valet ad positionem alterius, seruando semper eandem reduplicationem, seu appellationem illius particulæ, secundum se, nunquam tamen affirmari debet determinatè de illa natura secundum se, quòd est communicabilis, vel quòd secundum se est incommunicabilis, sed semper negatiua est vera, quòd secundum se & essentialiter neque est vnum, neque alterum.

ARTICVLVS IV.

*Virum aptitudo, & indifferentia ad multa
conueniat rebus extra operationem
intellectus.*

EAdem fere controuersia est in hac questione, ac in præcedenti, nam qui admittunt vnitatem formalem communem ex natura rei, pari modo admittunt ex natura rei conuenire ipsam indifferentiam, & aptitudinem ad multa.

Cæterum in liberanda hac aptitudine, & indifferentia vnitatis ab vniuersalitate quam Plato posuit non parum laboratur ab authoribus huius assertionis. Nam Scotus in 2. distin. 3. q. 1.

q. 1. §. *Ad questionem*, & §. *Sed contra*, solam
 fatetur naturam in illo statu, scilicet prioritate,
 qua consideratur secundum se, habere unita-
 tem, nec singularizantem, nec vniuersalizantem
 sed indifferentem ad vtrumque, & ideo hæc in-
 differentia non sufficit ad vniuersalitatem in
 actu, quia est indifferens ad habendam illam,
 non autem habet illam vniuersalitatem quia
 sit indifferens ad prædicationem, & existen-
 tiam in multis. Alij in ipsamet natura, se-
 cundum se existimant vere dari unitatem præ-
 cisionis ab inferioribus, & consequenter habi-
 tudinem proximam ad existendum in multis
 singularibus supposita opinione de distinctione
 actuali inter gradus superiores, & infe-
 riores, de qua sequenti articulo sexto, nec ta-
 men dicunt inueniri in re vniuersalitatem,
 quia illa indifferentia non conuenit naturæ
 tanquam prædicatum intrinsecum, sed ratio-
 ne illius status solitudinis, quæ solitudo solui-
 tur descendendo ad individua, de qua videat-
 ur Fons 3. Met. cap. 28. q. 5. sect. 3. Suar. disp.
 5. Met. sect. 2. nu. 9. in fine, qui tamen id rejicit.
 Videantur alij apud Commb. q. 4. vniu. art. 3.
 sect. 2. Alij denique adhuc perus dixerunt ap-
 titudinem ad multa etiam in indiuiduis inue-
 niri, sed per modum actus non per modum po-
 tentiæ. Putant enim naturam contractam, &
 singularem, quantum est ex ratione naturæ,
 manere aptam ad plura, etsi illa aptitudo im-
 pediatur per differentiam singularem, ne de
 alijs prædicetur sicut materia prima, quando
 est sub vna forma retinet aptitudinem ad ha-
 bendum aliam, licet impeditam quando est
 sub prima forma. Et naturam sic contractam
 in plu-

in pluribus dicunt esse vniuersale actuale, non potentiale, idest, habere actum existendi in multis, non potentiam præcisam ab illis, contra quos vide Conimb. q. 4. de vniu. art. 4.

Verum pro resolutione notandum, nomine, *Aptitudinis*, seu *potentia indifferentis ad multa*, non intelligi in præsentī aliquam potentiam positiuam ad agendum aliquid, vel recipiendum, cum vniuersale, de quo agimus in præsentī, non respiciat inferiora tanquam effectus, quia non est vniuersale in causando: sed esse potentiam per modum capacitatis, seu non repugnantia, vt multiplicetur in multis, & sit in illis per identitatem, & consequenter per prædicationem quatenus vniuersale, & particulare, superius, & inferius, significant quoddam totum, vniuersale quidem, quasi indeterminatum, & abstractum, particulare verò, vt determinatum, & contractum, & quia indeterminatum potest fieri determinatum, dicitur habere aptitudinem vt sit in illo, & prædicetur de illo.

Et quidem hæc aptitudo potest considerari formaliter, & positiuè in quantum respicit inferiora, vel fundamentaliter pro ipsa capacitate, seu non repugnantia ad respiciendum inferiora, & descendendum ad illa, in hac enim non repugnantia fundatur ille respectus, & quando sumitur positiuè, seu per modum respectus, est ipsa formalis intentio, seu vniuersalitas in actu, quam à parte rei dari etiam Scotus negauit, solum admittens communitatem negatiuè ex natura rei, quæ non est aliud, quam naturam ex se non esse singularem. Quare punctus difficultatis in præsentī est an

ratione huius communis negatiue inuenitur in natura secundum se sumpta aliqua non repugnantia, seu capacitas ut sit in pluribus, & predicetur de illis.

Nec distinguimus in presenti aptitudinem ad essendum in multis, & ad predicandum de multis, quia licet sint distincti respectus vniuersalitas, & predicabilitas, siquidem predicabilitas est passio vniuersalitatis, ut infra dicetur, tamen capacitas, seu non repugnantia eadem est ad essendum in multis, & ad predicandum de multis, quia ista duo, scilicet, esse, & predicari, ita essentialiter coordinantur, ut posito vno sequatur aliud: quando autem aliqui actus essentialiter ordinantur, eadem aptitudo, seu non repugnantia est ad vnum, & ad alterum: sicut formam vniuersalis materiae, & materiam recipere esse ab illa, in eadem capacitate, seu non repugnantia materiae fundantur.

Sit ergo *unica conclusio*. Ista aptitudo, seu non repugnantia, quae est fundamentum proximum vniuersalitatis nullo modo inuenitur in natura secundum se, neque ut contracta in indiuiduis, sed in natura abstracta, & praecisa per intellectum: Itaque illa non repugnantia ad essendum in multis sequitur naturam ratione status, non ratione quidditatis. Hae conclusio est Sancti Thomae, & communis Thomistarum, de qua videri potest Caietanus cap. 4. de ente, & essentia quae est 7. & sumitur ex D. Thoma in opusc. 56. ubi inquit: *Habilitas essendi in pluribus non est de essentia hominis, quia tunc homo, qui est in se, esset habilis ad participationem plurium, quod est impos-*

impossibile. Et 4. cap. de ent. & essent. Non potest, inquit, dici, quod ratio vniuersalis conueniat naturae sit acceptae (scilicet secundum se) quia de ratione vniuersalis est unitas, & communis, naturae autem humanae neutrum eorum conuenit secundum suam absolutam considerationem, si enim communitas esset de intellectu hominis; tunc in quocumque inueniretur humanitas, inueniretur communitas. Relinquitur ergo, quod ratio speciei accidet naturae humanae secundum illud esse, quod habet in intellectu, &c. Et prosequitur Diuus Thomas ostendens quomodo natura in intellectu habeat unitatem ex eo quod habet rationem uniformem ad omnia individua, quae sunt extra animam prout est imago omnium.

Est ratio Vnica, & efficax pro conclusione ex eo deducitur, quia aptitudo ista, quae est fundamentum proximum vniuersalitatis, non est sola communitas negatiua, seu negatio habendi singularitatem, sed est capacitas, seu non repugnantia, ut natura vna existens multiplicetur in multis, ergo in statu, in quo natura non est vna, nec plures, vel in statu, in quo est contracta ad indiuiduationem, non habet capacitatem unitatis ad multiplicationem: Sed in statu singularitatis habet repugnantiam ad istam multiplicationem: in statu autem solitudinis, seu naturae secundum se, nondum habet unitatem multiplicabilem in plura, sed solum praedicata quidditatiua, inter quae non potest numerari ista capacitas, seu non repugnantia unitatis ad multiplicationem. Alioquin vbicumque esset natura conueniret, illi talis capacitas, quod manifeste est.

falsum, cum à parte rei sit incapax ad existendum in multis.

Nec sufficit dicere. Quòd est incapax à parte rei absolutè loquendo, sed non est incapax ex vi principiorum essentialium. Hoc, inquam, non sufficit: Quia licet natura secundum se non sit incapax, neque ad existendum in multis, neque ad singularitatem in vno, tamen non potest dici quòd ibi habeat capacitatem unitatis ad multa, qualis requiritur ad fundandum vniuersalitatem, quæ est capacitas absolutè, & non solum quòd ex aliqua parte non sit incapax. Sicut etiam in lapide est incapacitas simpliciter ad intelligendum, & consequenter non habet fundamentum intellectualitatis, licet ex eo præcisè, quòd sit substantia, non sit incapax ad intellectualitatem. Sic aliud est dicere, quòd natura secundum se non est incapax unitatis ad multa, aliud est quòd secundum se sit capax, & habeat talem non repugnantiam, cum nondum habeat talem non repugnantiam, cum nondum habeat ipsam unitatem, quæ multiplicabilis est in multis.

Et confirm. Quia natura secundum se, & in singularibus non est capax intentionis, & respectus positiui ad multa, ergo neque fundamenti proximi istius relationis, qualis est aptitudo in natura secundum se, neque in indiuiduis. Sed omnino dicendum est, quòd ista aptitudo necessario supponit unitatem capace[m] multiplicationis in multis. Vnde quandiu in natura non inuenitur talis unitas, neque aptitudo reperitur; ista autem unitas solum est unitas abstracta, & non realis, vel naturæ secundum se.

Dices

Dices. Non est solidum illud fundamentum D. Tho. quod ea quæ conueniunt rei secundum se, semper conueniunt, nam continuum de se est diuisibile in partes, & tamen in coelo diuidi non potest; & de se omnis quantitas diuidi potest in infinitum, non tamen quantitas in re naturali sic diuidi potest.

Respond. Quòd ista dicuntur conuenire secundum se non posituè, & absolutè, sed negatiuè, idest, habent non repugnare, & pro aliquo statu solum, non pro omni actu conuenire. Eodem ergo modo, naturæ secundum se non repugnat quantum est ex principijs essentialibus vniuersalitatem habere, vel particularitatem, si tamen posituè, & absolutè illi secundum se conueniret capacitas ad prædicandum vnum de multis, in omni statu conueniret. Et hoc efficaciter probat ratio D. Th.

SOLVUNTUR ARGUMENTA.

PLura argumenta, quæ afferuntur pro sententia Scoti, vel potius illi attribuantur, fundantur in illa æquiuocatione præcedenti articulo soluta à negatiua ad affirmatiuam pennis prædicatum infinitum, vt natura secundum se non est singularis, ergo secundum se est communis, non est incapax ex principijs essentialibus ad essendum in multis, ergo est capax.

Et secundò fundatur hoc in proprietatibus naturæ vniuersalis, quæ conueniunt naturæ secundum se, sicut esse obiectum intellectus, esse perpetuæ veritatis, habere vnā definitionem, & alia similia, quæ non conueniunt

naturæ in indiuiduo, & tamen conueniunt naturæ secundum se, & ante operationem intellectus, quia obiectum præcedit actum suum, si ergo actus intellectus versatur circa vniuersale, datur vniuersale ante illum actum.

Denique. Quia non repugnant ista duo, quòd natura ex principijs materialibus sit singularis, & contracta; ex principijs tamen formalibus, & specificis sit indeterminata, & consequenter apta ad essendum in pluribus, licet impediatur per ipsam singularitatem, sicut materia prima habet aptitudinem ad plures formas, licet sit impedita quamdiu est sub vna, vt informetur illis, & natura Angelica est apta ad essendum in multis in sententia Thomistarum, licet absolute illi repugnet esse in illis.

Hæc omnia ex dictis in præcedenti articulo soluta manent. Nam quod attinet ad primam probationem constat, quòd posita particula, *secundum se*, illa possunt negari de subiecto, quæ illi essentialiter non conueniunt. Ad affirmandum autem, quòd aliquid conueniat etiam si sit aliquid negatiuum, oportet quòd secundum essentialem connexionem conueniat, sin minus nullo modo conuenit posita particula *secundum se*, & ita à negatione eius, quod accidentaliter conuenit, non inferitur oppositum affirmatiuum de prædicato infinitato. Et sic non valet, natura secundum se non est singularis, ergo secundum se est non singularis, & multo minus, ergo est vniuersalis.

Ad secund. instant. dicitur. Quòd esse obiectum intellectus, & esse perpetuæ veritatis quantum ad ipsam rationem obiectiuam ex
par-

parte rei cognita datur à parte rei , & præcedit intellectum , quantum autem ad conditionem vniuersalitatis , quæ concomitatur obiectum in ipsa cognitione , hæc non præcedit actum intellectus , sed ex ipso resultat in obiecto , & sic definitio redditur vna vnitatem fundamentalis ex parte rei , positiua autem formaliter ex parte intellectus . Et similiter se habet obiectum in quantum vnum , & vniuersale .

Ad tert. instant. dicitur . Esse dispatem rationem inter aptitudinem materiæ , & aptitudinem vniuersalitatis , quia materia ex sua propria natura habet capacitatem ad plures formas , & eius aptitudo , & potentia ad illas est eius entitas . Vnde vbicumque saluatur entitas illius , saluatur & ista aptitudo , quia conuenit illi secundum se , at vero aptitudo ad essendum , & prædicandum de multis consequitur naturam ratione status , & vnitatis abstractæ : est enim aptitudo non quomodocumque , sed ad hoc vt vna natura multiplicetur in multis , quæ vnitas illi non conuenit ante operationem intellectus . Quod verò additur de natura Angelica intra latius discutiemus quæstione 8. Sed in præsentis sufficit dicere , quòd Angelo si perfectè , & adæquatè concipitur , repugnat aptitudo ad essendum in multis , quia repugnat concipi sine indiuiduatione ; si tamen semel sine illa concipiatur propter imperfectum , & inadæquatum conceptum Angeli , sicut ex tali imperfecto conceptu habet vnitatem abstractionis , ita & aptitudinem , & non repugnantiam ad essendum in multis quantum est ex parte naturæ sic imperfectè conceptæ .

Secundo arguitur. Actus huius aptitudinis est realis, ergo & ipsa aptitudo conuenit rei secundum se, seu à parte rei. Conseq. est nota. Quia potentia sumit suam specificationem ab actu, sic enim verificatur quòd potentia; & actus sunt in eodem genere, quando est per se specificatiuus potentiae, ergo si actus est realis, etiam & potentia. Anteced. verò consta, quia actus huius aptitudinis est existere in pluribus singularibus quod est aliquid reale, esse enim particulare, aliquid reale est, ergo & eius correlatiuum, quod est esse vniuersale.

Et confirm. Quia ista aptitudo est fundamentum vniuersalitatis, ergo non est secunda intentio, sed prima, secunda enim intentio fundatur in prima. *Quod si dicas.* Esse fundamentum proximum, quod debet esse eiusdem rationis cum intentione, & relatione in illo fundata. Contra est duplex instantia. *Prima.* Quia si ista aptitudo fit ab intellectu, ergo prius est cognitum obiectum, quàm resulet illa aptitudo, & sic non requiritur vniuersalitas etiam fundamentalis, vt aliquid sit obiectum intellectus. *Secunda.* Quia si fit ab intellectu, ergo est aliquid singulare, vtpote cum resulet ex actu singulari, ergo non potest formaliter constituere vniuersale.

Respond. Actum huius aptitudinis non esse aliquid reale, non enim actus aptitudinis vniuersalis est existentia plurium indiuiduorum, sed prædicatio, seu contractio vnius naturæ ad plura indiuidua, quod aliquid rationis est, existentia autem plurium indiuiduorum solum potest esse fundamentum vt abstrahatur vni-

tas vniuersalis, & reddatur apta ad istam prædicationem: Particulare autem non est correlatiuum vniuersalis nisi sumatur secundo intensionaliter: si autem sumatur pro particulari, ut inuenitur in re, seu primo intensionaliter, sic non est correlatiuum vniuersalis, sed fundamentum eius.

Ad Confirm. Respond. Quòd secunda intentio habet pro fundamento remoto primam intensionem, sed pro fundamento proximo dicit aliquid rationis, non quidem quod sit relatio secundæ intensionis, sed quod sit aliqua negatio, vel denominatio extrinseca: sicut vniuersalitas supponit rem esse cognitam, & abstractam ab indiuiduis, ex qua abstractione sequitur vnitas præcisionis, quæ est negatio, & non repugnantia ad plura, quæ est aptitudo, & inde sequitur relatio.

Ad primam replicam dicitur. Prius esse cognitum obiectum ab intellectu, quam aptitudo ista resultet, & ita vniuersalitas non requiritur ad obiectum intellectus quasi antecedenter, sed quasi concomitanter, quia non stat esse obiectum actu cognitum, nisi consequatur illa vniuersalitas, vel si intelligatur requiri vniuersalitatem antecedenter ad actum intellectus, intelligitur de vniuersali fundamentaliter, non formaliter.

Ad secund. replic. dicitur. Quòd illud, quod fit ab intellectu tanquam effectus, est aliquid singulare, quod verò resultat ut cognitum, vel ex cognitione consequutum, est vniuersale, seu intentio, & forma vniuersalitatis, quæ rursus formaliter, & ut quo est vniuersalis, id est, formaliter vniuersalem reddens naturā,

denominatiuè autem, & vt quod, est singularis in quantum attribuitur determinato obiecto per determinatam cognitionem.

ARTICVLVS V.

An consistat essentialiter vniuersalitas in relatione.

HÆc difficultas plenius declarabitur ex his, quæ dicenda sunt sequente quæst. agendo de actu per quem resultat vniuersalitas in obiecto ex apprehensione intellectus. Sed vt totum, quod pertinet ad vniuersale secundum se, in hac quæst. attingeremus, breuiter delibanda est.

Vniuersale ergo, vt supra adnotauimus. a. r. aliud est Logicum, aliud Metaphysicum, inter quæ illa est differentia, quod licet vtrumque respiciat, seu connotet inferiora, Metaphysicum tamen respicit illa, vt terminum à quo relictum, Logicum verò vt terminum ad quem comparatur, idest, Metaphysicum considerat naturas denudatas à conditionibus indiuidualibus, non verò pertinet ad ipsum considerare respectum earum ad easdem naturas, vt prædicetur de illis, sed ad Logicum.

Cæterum dissensio inter auctores orta est in assignanda forma, seu ratione, qua vniuersalitates istæ, seu denominationes earum constituuntur, & in qua præcisè ipsa vniuersalitatatis quidditas ponenda sit. Nam quidam, vt Martin. super prologo Porphyrii. disp. 1. q. 2. distinguunt constitutionē vniuersalitatatis, vt sit, à constitutione vniuersalitatatis, quatenus Meta-
phy-

physicum, vel Logicum. Vniuersale, vt sic, dicunt constitui vnitatem rationis resultante ex præscissione, quæ unitas est aptitudo radicalis ad plura. Metaphysicum autem dicunt constitui abstractione negatiua, quatenus sine differentiis, idest, per omissionem, aut negationem illarum consideratur; Logicum verò constitui abstractione positiua, quatenus non solum inferiora negatiuè omittuntur, sed positiuè considerantur vnum ab alio separando, & comparando. Et sic natura per abstractionem positiuam extra differentias inferiores est quasi positiuè ab illis distincta, & extra earum conceptum, sed manet in ipsis inferioribus per inclusionem in illis, hoc enim est esse in multis, scilicet includi in illis, nihil autem includitur in alio nisi tanquam in distincto saltem per rationem, in se enim nihil includitur. Vniuersale autem, v. g. animal, non abstrahitur ab inferioribus, scilicet equo, & homine etiam per rationem, sed ab aliquo illorum tantum, idest, à differentiis. Vt ergo extra differentias est, sed in inferioribus inclusum, dicitur Logicum vniuersale, quia tunc est vnum in multis. In summa dicit hæc sententia vniuersale, vt vniuersale præcise (nondum Logice, vel Metaphys.) dici, quatenus vnum unitatem rationis, quæ aptitudinem includit, non proximam, sed radicalem, proxima enim sine actu non apprehenditur. Vniuersale Metaphysicum, quia vniuersale, est vnum, quia Metaphysicum, sine multis. Vniuersale Logicum, quia vniuersale, est vnum, quia Logicum, in multis, non verò solum sine multis. Hoc autem esse in multis, respectus est ad illa multa,

sed iste respectus non potest esse nisi in illis includatur natura, siquidem non potest intelligi, quod respiciat alterum nisi ipsum alterum cogitetur. Hic autem, quod respicit, sunt inferiora, ergo debent inferiora cogitari, hæc sine inclusione superioris non cogitantur, igitur respectus ad inferiora inclusionem petit in illis. Alij dicunt absolute vniuersale Metaphysicum fieri abstractione, tam positua, quam negatiua, nihil in hoc distinguentes, ut tractat P. Mer. disp. 2. de vniu. qu. 3. contra Mart. Et communis sententia multorum, qui absolute docent vniuersale fieri per abstractionem, non distinguunt de positua, & negatiua. Et P. Suar. disp. 6. Met. sect. 6. nu. 8. & 11. vniuersale absolutum, quod est Metaphysicum, quacumque abstractione docet fieri, iuxta secundam sententiam à se relatam de vniuersali facto per abstractionem, respectuum verò, quod est Logicum, docet fieri per comparisonem.

Circa vniuersale Logicum, communis sensus est Authorum, quod consistit in respectu ad inferiora, sed est triplex respectus, primus aptitudinis ad essendum in inferioribus, secundus aptitudinis ad prædicandum, seu prædicabilitas ipsa posituè, & relatiuè accepta. Tertius est relatio ipsius prædicationis actualis, qua prædicatum est, & non solum prædicabile. Et secundum istos tres respectus diuiduntur tres sententiæ. Quidam essentiam vniuersalis ponunt in relatione aptitudinis ad essendum in multis, respectum verò prædicabilitatis esse passionem eius. Alij è contra prædicabilitatem esse priorem, relationem ad essendum

dum posteriorem. Alij denique relationem ætalis prædicationis esse vniuersalitatem, quia iudicatur vnum conuenire multis, de quibus vide P. Merin. disp. 2. de vniu. q. 2.

Nihilominus pro resolut. dico primò. In vniuersali solùm inueniuntur tria, quæ ad integram rationem eius pertinent, scilicet, vniuersale, materiale, fundamentale, & formale. Quod est dicere naturam, seu subiectum, quod denominatur vniuersale, & hoc dicitur vniuersale pro materiali, fundamentum proximum relationis vniuersalis, quod est vnitas præcisa ab inferioribus cum aptitudine, seu non repugnantia ad essendum in illis; formam ipsam relatiuam, qua comparatur, & respicit illa plura. Ratio est quia vniuersalitas consideratur à Logico, vt quædam secunda intentio, quæ est relatio rationis, in omni autem relatione hæc tria concurrunt, & sufficiunt, scilicet subiectum, fundamentum, & forma ipsa relationis, ergo hæc tantum sufficiunt, & concurrunt ad vniuersalitatem.

Dico secundò. Vniuersalitas pro fundamento (relinquimus vniuersale materiale, hoc enim est res denominata, non ratio denominans vniuersale) requiritur vt natura ipsa denominetur vniuersalis metaphysicè, & consistit in absoluta vnitate præcisionis, & aptitudine nondum relatiuè sumpta, sed pro non repugnantia ad essendum in multis. Ratio est quia vniuersale Metaphysicum non dicitur tale per additionem alicuius modi ad vniuersalitatem vt sic, ille enim modus, si est rationis, ad Metaphysicum non pertinet qui naturas considerat, sed ad Logicum qui modos, seu relationes

tiones rationis attingit. Si verò est modus realis, ad naturam ipsam pertinebit, non ad vniuersalitatē, inueniētur enim etiam in singularibus. Quare vniuersale metaphysicè acceptum nihil aliud est, quàm res ipsæ, seu naturæ (quas Metaphysicus considerat, qui reale obiectum respicit) cum separatione ab indiuiduis, quia nulla scientia considerat naturas in singularibus. Sola autem separatio, seu præcisio necessaria præbet fundamentum vniuersalitatis, quia præscindendo naturam ab indiuiduis reddit illam vnā vnitate abstractionis, seu præcisionis, eo quòd naturam per modum vnius considerat illa præcisio, & similiter reddit aptam ad essendum in multis, quia natura sic considerata conuenientiam habet cum illis à quibus abstracta est, & consequenter non repugnantiam vt in illis sit, ergò manet vna, & apta ad essendum in pluribus, & hoc ante relationem ad plura, quia talis præcisio non respicit illa plura, vt terminum ad quem tendit, & ordinatur natura, sed à quo separatur, terminus autem à quo non est terminus relationis in quantum exercet rationem termini à quo, ergò nondum accipitur relatiuè, sed præcisiuè, quod est fundamentum relationis.

Dico tertio. Hæc vniuersalitas fundamentalis, tam per abstractionem negatiuam, quàm positiuam habetur. De abstractione negatiua non est dubium, quia hæc consistit in pura negatione, seu omissione inferiorum accipiendo naturam, vt vnum. De positiua probatur, quia hæc non est aliud quàm abstractio facta cum cognitione positiua termini à quo qui relinquitur, & naturæ, quæ ab illa accipitur,

tur, hæc autem operatur eundem effectum quem abstractio negatiua, licet non eodem modo, quia tantum respicit inferiora, ut terminum à quo, nec in illa, ut in terminum ad quem, conuertit ipsam naturam, ergò nondum ponit relationem, sed tantum præcisionem, quod totum pertinet ad vniuersale metaphysicum. Itaque abstractio negatiua, & positiua relinquunt naturam tanquam nudam, aut nudatam, negatiua enim non considerat conditiones indiuiduas à quibus denudet, sed illas omittit, & purè negat, positiua autem illas considerat ut ab illis denudet naturam, sed vtraque eundem effectum facit, scilicet relinquere naturam sine illis.

Dico quarto. Vniuersale Logicum siuè pro secunda intentione non consistit in comparisonem attributionis, siuè prædicationis, sed simplicis relationis, seu ordinis, sine inclusione actuali in inferioribus. Itaque ipsa aptitudo ad prædicandum de multis, ut positiuè respiciens inferiora, vniuersale Logicum est. Hæc conclusio amplius constabit infra, ubi ostendemus ex D. Thom. & ratione quomodo fiat vniuersale Logicum per actum comparatum. Nunc sufficit fundamentum huius indicare, nam constans est quòd vniuersalitas Logica, seu secunda intentio est relatio rationis ad multa, id enim sumitur ex definitione vniuersalis, quod est *unum in multis, & de multis*, sed ante relationem actualis prædicationis inuenitur ista relatio vnius ad multa, siquidem ante actualement prædicationem inuenitur natura ipsa sine singularibus ut prædicabilis de multis, potentia enim qua potest præ-

prædicari præcedit actum prædicationis, ergo datur ratio prædicabilis ad multa, ergo ante actualem prædicationem datur relatio vnius ad multa per modum potentiae, & aptitudinis. Inò si datur vnitas, & aptitudo ad multa ante actualem prædicationem, vt constat in vniuersali metaphysico; hæc aptitudo considerari potest, vt respiciens illa multa in quæ potest, sicut omnis potentia potest considerari vt ordinata, & respiciens suum terminum in quem potest, ergo datur respectus aptitudinis ad multa ante actualem prædicationem, & hic est vniuersalis. Quin potius quando actu prædicatur potest non applicari nisi vni singulari tantum, vt Petrus est homo, Paulus est homo, & tunc ly homo est vniuersalis, & actualis applicatio prædicationis non est nisi ad vnum tantum, non ad plura, ergo relatio ad plura non coniungit ex prædicatione.

Nec obstat, quòd vniuersale tunc concipitur ad multa, cum iudicatur conuenire multis, quòd fit per prædicationem. Dicitur enim quòd potius tunc concipitur, cum apprehenditur aptitudo ordinata ad multa, vt potens prædicari de illis, quod fit ante actualem prædicationem. *Quòd verò actualis inclusio non exigatur constat*, quia inclusio ista est esse in multis, & identificari in multis, sed vniuersale prius est aptum ad essendum, & identificandum, quàm actu identificetur, quia aptitudo vniuersalis est ad vtrumque vt sit, & vt prædicetur in multis, & de multis, ergo ante actualem inclusionem datur vniuersalitas, quia datur aptitudo cum respectu, & ordine ad essendum

scendum in multis. Et præterea inclusio actualis in multis non potest intelligi sine contractione actuali in illis, siquidem non includitur actu in singularibus, nisi eo modo quo est in illis, est autem in illis ut contractum, & determinatum in quolibet singulari, cum quo identificetur, non autem est, ut indifferens ad plura in quolibet singulari; ergo identificatur, & includitur in illis mediante contractione, sed prius vniuersale est contrahibile in multis, quam contractum actu, ergo prius quam inclusum actu.

Non obstat fundamentum oppositum, quod scilicet ipsa inferiora non sunt nisi per inclusionem superioris in illis.

Respondetur enim, quod ante actualem inclusionem ipsa inferiora sunt ut potentia includere in quantum inferiora, sicut ipsum superius ut potens includi, & sic terminant relationem superius antequam consideretur actualis inclusio. Itaque sicut actu aliquid est superius quando actu ei conuenit aptitudo ut includatur, & sit in multis, non quando solum actu includitur, ita actu sunt inferiora sub formalitate inferiorum quando considerantur, quod actu eis conuenit posse includere, & contrahere superius suum, non quando actu includunt, tunc enim dissipatur distinctio superioris, & inferioris. In re tamen inferiora actu includunt superius, sed hoc identicè habent cum superiori, non formaliter quatenus inferiora.

Dico ult. Prædicabilitas, seu relatio ad plura in ratione prædicandi est quasi passio vniuersalitatis, quæ est relatio ad essendum in pluri.

pluribus. Est contra P. Mer. c. 1. de vniu. disp. 2. q. 2. Ratio est, quia fundamentum, & radix prædicabilitatis est identitas extremorum prædicabilium, vt dicemus qu. 5. & de se constat, quia quod non est idem alio, non verè prædicatur, sed remouetur ab illo, ergo aptitudo ad identificandum est fundamentum aptitudinis ad prædicandum, seu radix illius, & sic prædicabilitas se habet vt passio, & quid consecutum ad istam aptitudinem. Ergo & relatio ad multa in essendo, seu identificando est prior relatione ad multa in prædicando, & illa est vniuersalitas, hæc prædicabilitas.

Nec obstat, quòd aptitudo ad essendum est solum non repugnantia, non positiua relatio, vnde, in genere positiuæ relationis prima est prædicabilitas, quia positiua aptitudo est ad essendum per operationem intellectus quod sit per prædicationem, non ad essendum in re, & extra operationem intellectus.

Sed Resp. Quòd ista aptitudo ad essendum etiam positiuè consideratur ab intellectu, quatenus ante prædicationem ipsa natura abstracta consideratur vt contrahibilis, & identificabilis, sicut verè in re identificatur, & quia identificabilis, ideò prædicabilis. Vnde est apta, vt per operationem intellectus non solum prædicetur, sed etiam contracta, & identificata intelligatur per hoc quòd natura communis ante secundam operationem intellectus, in qua est prædicatio, intelligatur vt identificabilis cum singulari, & aliquanto per simplicem conceptum identificata intelligi potest ex vi prioris.

ARTICULVS VI.

*Utrum gradus Metaphysici in qualibet re distinguantur sola distinctione rationis;
an ex natura rei.*

Nomine. *Gradus Metaphysici* (vt supra dictum est) nihil aliud intelligimus, quam praedicta superiora, & inferiora, quae de aliquo praedicantur, quae idcirco *gradus* dicuntur, quia cum sit vnum vniuersalius, & superius altero in cognoscendis illis quasi ascendimus, & descendimus, sicut de Petro, v.g. praedica ut *homo*, & supra illud *animal*, & supra illud *corpus*, &c. Et inquirimus, an distinguantur ista praedicata, seu gradus ex natura rei, ante omnem operationem intellectus, an solum mediante eius operatione?

Et quia in hoc est controuersia satis celebris inter scholam D. Thomae, & Scoti, quae maximè pendet ex his, quae supra de distinctione, & identitate rationis dicta sunt, breuiter recolere oportet, quae ibi dicta sunt de triplici distinctione, quam agnoscit Scotus, scilicet reali absoluta, idest, quae admittit separationem ex remorum, formali ex natura rei, quae separationem non admittit, sed negationem identificationis formalis, ita quod vna ratio non sit de conceptu alterius ex propria natura, & denique distinctione rationis, quae ex sola ratione formante dependet, non in re fundatur. E contra verò D. Thom. solum duo genera distinctionis agnoscit, realis, & rationis, quia omnis ratio distinguendi, & cau-
sa,

sa, vel est in re, vel non est in re, sed in ratione? **E:** vtraque distinctio est duplex; Realis, alia rei à re, alia rei à modo. Rationis, alia rationis ratiocinatæ, alia rationis ratiocinantis, quæ præced. q. explicata sunt.

Inquirimus in præsentī: An prædicata essentialia, quæ in eodem subiecto reperiuntur, habeant distinctionem illam, quam Scotus vocat ex natura rei; An solum rationis. Nam quòd non sit realis distinctio tanquam inter duas res, seu entitates, in confesso est apud omnes, siquidem in vna, & eadem entitate conueniunt, v.g. in vno homine, & ab eadem forma proueniunt etiam in substantia composita, in qua tantum vna forma datur, vt in libris de Anima ex professo ostendendum est. In hac autem quæstione vniuersaliter procedimus, quia in reliquis prædicamentis præter substantiam, constat non dari entitatem compositam ex pluribus formis, sed esse formas simplices, in quibus tamen dantur gradus Metaphysici, seu prædicata superiora, & inferiora, & in ipso etiam prædicamento substantiæ dantur formæ simplices, vt Angeli, in quibus gradus isti ab eadem forma debent sumi, & consequenter in illis manifestè constat non posse gradus istos distinguī realiter tanquam res à re. Vnde tota difficultas deuoluitur ad distinctionem illam ex natura rei formalem, an sit admittenda in istis gradibus.

Sit vnica conclusio. Nulla datur distinctio ex natura rei formalis acta extra intellectum inter gradus istos Metaphysicos, sed solum datur distinctio virtualis, & fundamentalis, quæ actualis redditur per intellectum. Hæc

con.

conclusio sumitur ex Philosopho in 7. Metaphys. tex. 43. vbi videri potest D. Tho. lect. 12. & 13. Et cap. 3. de ent. & essent. & opusc. 42. cap. 9. & 1. p. q. 76. art. 3. Quibus locis ostendit quomodo genus non differat à differentia, & ab inferioribus secundum rem, sed solum per rationem. Et quæst. de spiritualibus creaturis art. 1. ad 9. vbi similiter dicit quod *formæ quibus species distinguuntur, non sunt aliud à forma generis secundum rem*. Et D. Thomam communiter sequuntur eius discipuli, ut videri potest in Caietano prædicto loco de ente, & essent. & cap. 6. q. 2. M. Sor. q. 3. vniu. & alij videri possunt in Cursu Carmel. disp. 3. de vniu. quæst. 4.

Fundamentum huius conclusionis sumitur ex duobus. *Primò* ex destructione illius distinctionis ex natura rei formalis generaliter loquendo. *Secundò* ex peculiari ratione prædicatorum essentialium, quæ ab eadem forma proueniunt.

Et quantum ad primum, supra q. præc. ar. 3. distinctionem illam reiecimus. Nunc solum addo, quod distinctio ista necessario debet actu, & in re tollere aliquam identitatem, si ante operationem intellectus, actu est distinctio, essentialiter enim distinctio habet tollere identitatem in eo, in quo est distinctio. Ista ergo distinctio formalis non tollit identitatem in ipsa entitate, & realitate, sic enim esset verè, & propriè distinctio realis, & non formalis, siquidem haberet effectum formalem distinctionis realis, qui est tollere identitatem realem, & sic nihil ei deesset quo minus realis distinctio esset. Solum ergo in sententia Scoti
tol-

colligit identitatem conceptus, seu formalis rationis, id est, quod vnum in re non sit de conceptu, & formali ratione alterius, seu de constitutione illius. Ad hoc autem non requiritur distinctio actualis, sed sufficit virtualis, & fundamentalis, quia scilicet præbet fundamentum ut vnum sub distinctione ab altero concipiatur, & sine illo repræsentetur, & sic ibi actu reluceat distinctio, vbi actu est ablata identitas. Cæterum in re solum inuenitur, quod vnum non sit formale constitutum alterius, atque adeo non habet connexionem essentiali cum alio modo formali, seu constitutiuo, licet habeat modo identico. Hoc autem non est actu habere distinctionem in re, sed solum non omni modo esse identificatum in re, & aliud est dicere, hoc non est actu idem cum illo, sed distinctum, aliud hoc non est tali modo idem cum illo, licet absolute sit idem; sufficit enim ad hoc secundum, quod inter aliqua extrema non sit habitudo, & connectio essentialis formaliter, & ideo essentiali modo non sunt idem, ut autem actu sit distinctio, requiritur quod absolute non maneant idem, & non solum tali modo, quod est secundum quid; sicut etiam dici potest, quod natura manet negatiue communis in singularibus ex se, non absolute, & in actu, & sicut manet vna formaliter negatiue, non positiue, sic datur distinctio formalis negatiue, non positiue, quasi dicas ex vi conceptus formalis, hoc non est idem, seu est distinctum ab alio, sicut ex principiis speciei est vnum seu non distinctum, & natura secundum se non est singularis, quod totum non est actu in re
pon-

ponere communitatem negatiuam , aut unitatem formalem, ergo neque distinctionem illam formalem actu est dare .

Et confirm. Quia tunc dicitur aliquid actu dari in re , quando actu existit in re , & enim actu non existit , solum est in potentia, & virtualiter , erit autem actu , cum cognoscetur, vel ponetur existens. Sed ut sic actu in re, non sufficit, quòd dicatur aliquid dari quantum est ex vna parte , si ex alia non detur , sed requiritur quòd absolutè, & simpliciter detur, ergo non sufficit dicere , quòd vnum non est idem cum alio ex vi conceptus formalis , ut dicatur simpliciter esse actu non idem, seu distinctum in re , sed solum secundum quid , & negatiuè, idest, quantum est ex vi constitutionis, & conceptus formalis non est idem , sicut res ex se non est singularis in re , sed non dicitur, quòd actu non est singularis .

Secundum principium ad non distinguendos istos gradus ex natura rei frequenter sumitur à D. Thom. ex eo , quia proueniunt ab eadem simplici forma, ut patet 1. p. q. 76. art. 3. ad 4. & 7. Met. lect. 12. §. *Soluit* in fine . Nam substantiæ separatae , & accidentia sunt simplices entitates , in vno autem composito substantiali est tantum vnica forma , ut modo supponimus , & in libris de Anima probabitur , ergo omnes gradus , seu prædicata , quæ ex tali forma conueniunt rei , non distinguuntur actu in re . Patet consequen. quia habent identitatem eiusdem formæ, ergò non distinguuntur in ipsa forma . Si autem ex eo quòd vnum prædicatum, seu vnus gradus non est de conceptu alterius, distinguuntur actu in re , cur non distin-

distinguentur tanquam diuersæ formæ? Siquidem sunt distinctæ rationes formales actu, & consequenter distincta principia quo, hoc autem est esse actu in re distinctas formas.

Solum de gradu indiuiduali posset aliquis hæsitare, neque enim videtur sumi à forma, sed à materia signata principijs materialibus, quæ sunt extra essentiam specificam, vt communiter dicitur in sententia D. Tho. Similiter genus dicitur sumi à materia, & differentia à forma, non ergo gradus omnes sumuntur ab eadem entitate.

Sed ad primum Respond. Quod indiuiduatio in his, quæ sunt composita ex materia, & forma, licet sumatur à materia signata, non tamen excludit formam, quia ipsa signatio materiæ ex quantitate prouenit, quæ à diuersis formis diuersa quantitas est, vt constat ex Diu. Th. 1. p. q. 7. art. 3. & in 2. dist. 3. q. 2. ar. 1. ibi. *Cum quantitates determinatæ, & omnia alia accidentia secundum exigentiam formæ in materia recipiantur.* Et hoc patet, quia licet quantitas habeat partes materiales ratione materiæ tantum, vt patet in homine, tamen quòd sit quantitas sic, vel sic formata, habet à forma. Vnde etiam ratio formæ ad gradum indiuidualem concurrit, licet dependenter ab incommunicabilitate materiæ, & illius designatione, & diuisione per quantitatem. In substantijs autem, quæ non sunt compositæ ex materia, & forma, constat indiuiduationem non sumi à materia, licet in accidentibus habitudinem ad subiectum dicat. De quibus latius dicemus infra agentes de indiuiduo, & in libris de Gener. tractando de principio indiuiduationis.

Ad secund. Respond. ex D. Tho. de ente, & essent. cap. 3. & 6. & opusc. 42. cap. 7. Quòd non sumitur genus à materia quatenus est pars physica distincta à forma, sed quia sumitur ab eo, quod materiale, & potentiale est in vnaquaque re, & quia in substantijs compositis, quæ magis nobis sunt notæ, materia est principium potentialius quàm forma, ideò sumpta est illa propositio, quòd genus sumitur à materia, & differentia à forma.

SOLVUNTUR ARGUMENTA.

PRæcipua argumenta Scoti ad probandam distinctionem illam formalem ex natura rei quæstione præcedenti art. 3. sunt proposita. Et reducitur præcipuum fundamentum ad hoc, quia ante omnem operationem intellectus dantur aliquæ formalitates, quarum una non includit aliam, & in quibus datur actualis oppositio, ergo & actualis distinctio. Conf. est bona. Quia omnis distinctio fundatur in aliqua oppositione, & exclusione unius ab alio, ergo si hæc datur actualiter ante operationem intellectus, etiam & distinctio. Anteced. verò probat. Nam rationale non est de conceptu animalis, nec definitur eadem definitione, siquidem inuenitur animal sine rationali, ergo unum non includitur in conceptu alterius. Similiter in animali, & rationali verificantur actu contradictoria, ergo reperitur actualis aliqua oppositio, nam formalitati animalis convenit esse id, in quo conveniunt homo, & brutum, non verò rationali; & formalitati rationalis convenit discurrere, seu intel-

ligere, formalitati animalis non conuenit discurrere, ergo ista contradictoria verificantur à parte rei de istis formalitatibus, ergo non sunt idem à parte rei, quia de eodem à parte rei contradictoria non verificantur. Idem processus argumentum fit de actione, & passione, de personis, & essentia diuina, quòd essentia est communicabilis, persona non est communicabilis, quæ sunt contradictoria.

Respond. Quòd ista omnia saluantur cum sola virtuali distinctione, nec requiritur quòd sit actualis diuisio inter extrema. Et si hæc argumenta aliquid probant, etiam probant distinctionem realem, & non solum formalem, quia etiam contradictoria non possunt conuenire eidem realitati. Et negatio inclusionis valet in conceptu, & definitione alterius, si actu facit diuisionem, non est cur actu non constituat diuersas realitates. Dicimus ergo, quòd vnum potest esse idem cum alio dupliciter; vno modo adæquatè, & ex omni parte idem, & sic vbi reperitur vnum reperitur aliud, & in conceptu vnius intrat alterum: alio modo aliqua sunt vnum, & idem inadæquatè, quia licet vnum identificetur cum alio simpliciter, non tamen omni modo, nec cum omni moda restrictione ad illud, sicut ens identificatur cum modo per se, & in alio, ita tamen quòd non quicquid est ens habet esse per se determinatè, aut in alio determinatè. Et essentia diuina identificatur cum paternitate realiter, & entitatiuè, vt etiam Scotus fatetur, non tamen cuiusque conuenit essentia diuina entitatiuè, conuenit paternitas entitatiuè, vt Filio. Quòd ergo admittere tenentur in identifica-

tificatione entitativa, & reali, nos dicimus de formali, quòd licet vnum non sit de conceptu alterius, adhuc tamen non distinguitur à parte rei ab illo, quia solum deest illi habitudo essentialis, quæ requiritur ad identificationem intrinsecam, non tamen datur actualis diuisio tollens actum identitatem, & vnitatem, quæ inuenitur à parte rei. Et ita manent vnum simpliciter, sed non omni modo, nec adæquatè, & sic possunt habere distinctas definitiones propter virtuales distinctionem, quæ concipi possunt tanquam distincta, & sic definiri, definitio enim fit per actum intellectus, qui actualiter distinguit conceptus, in re autem solum fundamentaliter differunt, ratione cuius virtualis distinctionis non sunt nomina synonyma *animal*, & *homo*, & alia quæ istas distinctas rationes formales significant: vt docet D. Tho. 1. p. q. 13. ar. 3. & q. 7. de Potentia, ar. 6.

Similiter Respondemus ad ea, quæ ex parte oppositionis & contradictionis opponuntur, dicimus enim quòd de eodem secundum diuersas rationes possunt contradictoria verificari, & oppositio exerceri, præsertim quando contradictio sit ratione alicuius reduplicationis, & appellationis, seu specialis modi concipiendi, quæ est expressa doctrina D. Thom. 1. p. q. 39. art. 1. ad 2. vbi inquit. *Quòd quia essentia & persona in diuinis differunt secundum intelligentie rationem, sequitur quod aliquid possit affirmari de vno, quod negatur de altero.* Nec argumentum oppositum aliquid probat contra hoc; Quia non negamus verificari contradictoria à parte rei, sed negamus requirere distinctionem actualem à parte rei, & suffi-

cere dicimus virtualem, ratione cuius aliqua non sunt idem omnino & adæquatè, & ita fit contradictio circa idem, non sub eadem ratione, nec sub eodem modo. Oppositio autem actualis causat distinctionem actualem in extremis inter quæ versantur, v.g. inter esse, & non esse, inter contraria, &c. sed non in subiecto, cui conuenit; sufficit enim quòd subiectum virtualiter sit diuersum, & sub diuersa ratione contradictoria admittat.

Secundo arguitur. Totum Metaphysicum, & gradus illius correspondent toti & partibus Physicis, ex quibus Metaphysicum desumitur, sed totum Physicum componitur ex partibus realiter distinctis, vt ex corpore & anima; ergo similiter totum Metaphysicum componetur ex gradibus ex natura rei distinctis. Antecedens constat, quia compositum Metaphysicum non est pura compositio rationis, alioquin conueniret Deo, ergo correspondet illi in re aliqua compositio. Conseq. patet. Tum quia totum Physicum & Metaphysicum in re sunt idem, ergo admittunt eandem distinctionem in suis componentibus. Tum quia D. Tho. in 3. cap. de ente & essentia dicit hominem componi ex corpore & anima, sicut ex duabus rebus tertia res: corpus autem non dicit solam materiam, sed gradum corporeitatis, ergo potest vnus gradus distingui realiter ab alio cum quo componit.

Et confirm. Quia si non distinguuntur isti gradus absolutè, prædicarentur genus, & differentia etiam in abstracto, & sic esset verum, quòd rationalitas est animalitas, & è contra, quòd tamen non est admittendum, ergo aliquam

quam habent distinctionem à parte rei.

Respond. Totum Metaphysicum non componi ex partibus, sed ex prædicatis, nec correspondere compositioni ipsi ex materia, & forma, cum inueniatur compositum Metaphysicum etiam in his, quæ non sunt composita ex materia, & forma, ut in Angelis, & in accidentibus, unde super ipsum totum Physicum cadit ipsa compositio Metaphysica assumens ipsum totum, ut magis, vel minus determinatum, & sic componens non ex partibus, sed ex conceptibus, unde ista compositio est rationis, sed cum fundamento in re, quod tamen fundamentum non inuenitur in Deo, quia cum sit actus purus, non habet aliquid minus determinatum, & actuabile, & aliquid magis determinatum, & actuans, seu contrahens. Unde licet totum Metaphysicum, & Physicum sint idem in re, non tamen eiusdem modi compositionis est verumque. Et quando dicit Sanctus Thomas hominem componi ex corpore, & anima, vel sumit corpus pro materia, & non pro corpore informato forma, sed solum pro materia disposita, & organizzata: & sic loquitur de compositione Physica, vel sumit corpus pro eo, quod antecedit infusionem animæ, & est sub forma embrionis, ex illo enim adueniente anima, sed excludente formam embrionis, fit homo, ut ex duabus rebus tertia res.

Ad confirm. Respond. Quod licet rationalitas, & animalitas sint à parte rei indistinctæ, propter modum tamen significandi non verificatur in sensu formali, quod rationalitas est animalitas, vel è contra, quia ista abstra-

Quæ significant ipsam solam formalitatem secundum quam non verificatur quod formaliter rationalitas est animalitas, cum vnum non includatur in conceptu alterius, nec respiciat illud, ut constitutum sui, sicut quando dicitur, humanitas est animalitas, quia animalitas est de conceptu humanitatis. Identice tamen verificatur quod rationalitas est res, quæ est animalitas, & è conuerso, sed de his amplius dicemus infra questione 5.

Q V Æ S T I O IV.

De Causa Vniuersalis.

A R T I C V L V S I.

Virum beneficio intellectus agentis in specie ab ipso producta representetur vniuersale Metaphysicum.



VT intelligatur quid nomine *Intellectus agentis* significetur supponendum est ex lib. 3. de Anima, & D. Thoma 1. par. qu. 79. art. 2. & 3. & pluribus alijs in locis esse in nobis duplicem intellectum, alterum agentem, alterum possibilem, seu passibilem. Dicitur intellectus agens, non ab agendo, & producendo cognitionem, sed ab agendo species, quæ recipiuntur in intellectu passibili, qui ideo nominatur passibilis, quia patitur, seu

seu recipit illas species, & illis receptis operatur cognitionem, eo quod omnis cognitio generatur à potentia, & obiecto, obiectum autem non potest per suam entitatem esse in potentia, sed per suam speciem, seu similitudinem, quæ in nostris potentijs est accidens quoddam gerens vices vices obiecti, & illud repræsentans. Et licet ab obiectis externis mittantur species istæ ad sensus exteriores, quibus sensus informati in cognitionem procedunt, & inde ad interiores sensus alias species transmittunt, quas dari ipsa experientia manifestat, cum cessantibus sensibus externis repræsentationes fiât in internis, sicut patet in somniantibus: Tamen istæ species non sunt proportionatæ intellectui, qui cum spiritualis sit, spiritualium repræsentationem postulat, & obiectum intelligibile, non sensibile; Ideo necesse fuit ponere quandam vim, seu potentiam, quæ ex istis speciebus sensibilibus spiritualem speciem eliceret, quam intellectui possibili tribueret. Et ista vis, seu potentia non potest intelligere, quia intellectio producitur à potentia & specie, ista autem potentia facit species, non supponit illas ut intelligat, vnde faciendo illas non intelligit.

Hoc breuiter supposito. Duo sunt quæ difficultatem in hac parte faciunt. *Primum est*, An illa species quam producit intellectus agens solum repræsentet naturam & non singularitatem, ita quod non detur in intellectu species directè repræsentans singulare sensibile, ut propria illius. Et de hac quæstione nihil dicemus in præsentî, quia pertinet ad libros de Anima, & ad initium Physicorum, ubi tractatur an singulare directè cognoscatur à no-

Pro intellectu. *Secundum est*, An supposito quod illa species intelligibilis producta ab intellectu agente repræsentet naturam, & non singularitatem, seu conditiones indiuiduas, hoc ipso repræsentet naturam cum vniuersalitate saltem Metaphysica, an solum repræsentet naturam secundum se omni statu remoto, tam vniuersalitaris, quàm singularitatis. Et loquimur de vniuersali Metaphysico, quia ad hoc sufficit exclusio singularium, & abstractio negatiua. Ad vniuersale autem Logicum requiritur etiam ordo ad inferiora, qui cum sit relatio rationis, non consequitur ex abstractione quomodocumque, sed ex abstractione, quæ est cognitio. Hic autem non loquimur de vniuersalitate cognita, sed repræsentata antecedenter ad omnem cognitionem: intellectus enim agens omnem cognitionem præcedit.

Negatiuam partem plures Authores sustinent, vel quia existimant species productas ab intellectu agente, licet entitatiuè spirituales sint, repræsentatiuè tamen à singularibus non abstractare, vt indicat P. Merin. disp. 2. de vniu. q. 1. num. 29. & ex Scoto referunt Coninb. q. 5. de vniu. art. 2. Alij, quia etiam si repræsentent naturam sine singularibus, adhuc tamen negant ibi repræsentari vniuersalitatem, quia hæc solam fit per cognitionem: illa autem species est principium cognoscendi naturam, non cognitam supponens, vel constituens, de quo vide P. Suarez disp. 6. met. sect. 6. num. 7. qui etiam addit non omnem vniuersalitatem fieri per intellectum agentem, v.g. proprij, differentia, vel accidentis, sed solum specificam.

Nihil.

Nihilominus sit unica conclusio. In sententia D. Thomæ, quod species producta ab intellectu agente repræsentat naturam sine singularitate; dicendum est repræsentari vniuersale fundamentaliter; quod est vniuersale metaphysicum, ita quod illa species non solum respicit naturam secundum se, & in statu solitudinis; sed sub vnitæte præcisionis. Hæc conclusio docetur expressè à Caierano in 4. cap. de ente, & essentia post quæst. 6. §. *Istis prælibatis*. Et sumitur ex D. Thoma non solum ex locis vbi docet per intellectum agentem formari speciem repræsentantem naturam, & non conditiones materiales, seu indiuiduantes, vt specialiter videri potest i. p. q. 14. ar. 11. ad 1. & q. 79. ar. 3. in fine corporis; & q. 85. art. 1. ad 3. & 4. & 2. contra Gent. cap. 77. Sed etiam in alijs locis, vbi docet naturam sic abstractam per intellectum agentem esse vniuersalem, vt patet in opusc. 55. vbi dicit: *Quod vna & eadem natura quæ singulariter erat, & indiuiduatur per materiam in singularibus hominibus, fit postea vniuersalis per actionem intellectus depurantis ipsam à conditionibus, quæ sunt hic, & nunc, &c.* Et opusc. 48. cap. 1. inquit: *Quod in nostra phantasia forma repræsentans hunc hominem agit virtute intellectus agentis in intellectum possibilem, & causatur tunc in intellectu possibili quadam forma, quæ dicitur species intelligibilis, vel secundum alias, actus intelligendi, vel verbum, quæ forma repræsentat hominem vt abstractum à conditionibus materialibus, & hoc dicitur esse vniuersale.* Ergo secundum D. Thom. non repræsentat naturam secundum se, quia ista nec est vniuersalis,

nec particularis, sed repræsentat vniuersale.

Fundamentum Conclusionis est. Quia species illa sic producta per intellectum agentem repræsentat naturam exclusis indiuiduis, vt nunc supponimus, & repræsentat illam tanquam vnā, ergo non repræsentat solum naturam secundum se, nec cum vnitāte singulari, sed cum vnitāte præcisionis, quam consequitur aptitudo, seu non repugnantia ad respiciendum illa, & essendum in illis, quod est vniuersale Metaphysicum, & fundamentum Logici. Conseq. manifesta est, quia natura secundum se, nec est vna, nec plures, vt quæstion. præced. ex D. Thoma satis ostensum est, ergo si ibi repræsentatur natura vt vna, debet repræsentari, vel cum vnitāte singulari, vel vniuersali, & non singulari vt supponimus, ergo vniuersali: Et hoc vocamus vniuersale Metaphysicum, quod in hoc distinguitur à Logico, quod vtrumque respicit singularia, sed Metaphysicum respicit illa vt terminum à quo, quia abstrahit ab illis, Logicum autem vt terminum ad quem, quia respicit illa vt dicatur de illis.

Totus iste discursus legitimus est, & solum restat probare illam minorem, quod in illa specie repræsentatur natura vt vna. Et hoc probatur. Quia intellectus informatus illa specie cognoscit naturam vt vnā, ergo in ipsa specie repræsentabatur vt vna, cognitio enim id attingit cognoscendo, quod species repræsentando. Quod autem intellectus cognoscat naturam vt vnā informatus illa specie, manifestè constat, quia si non cognosceret vt vnā, ex vi talis cognitionis natura

non redderetur vna vt cognita , ergo si reddi-
tur cognita vt vna , cognitio attingit illam vt
vnam .

Dices. Etiam quando intellectus cognoscit
naturam secundum se, cognoscit illam vt vnā,
qua vnico actu illam attingit, actus autem vnus
respicit obiectum vnum , & tamen ex hoc illa
natura non habet vnitatem vniuersalis , ergo
neque colligitur sufficienter , quod habeat il-
lam quando ex vi speciei ab intellectu agente
producta naturam cognoscit . Potest enim il-
lam cognoscere vt vnā secundum se .

Respondetur. Quod quando cognoscitur na-
tura secundum se , sub modo vnitatis cogno-
scitur , & ex illo consequitur in natura illa
aliqua vnitatis præcisionis , & ideò naturam
cognosci secundum se non tollit vnitatem con-
sequentiam ex modo cognitionis , sed solum
designantur quod ex parte rei cognita secun-
dum se non habet illam vnitatem . Vnde na-
tura secundum se solum significatur ex parte rei
cognita , si tamen cognoscitur per modum
vnus , hoc ipso ex ipso modo cognoscendi ha-
bet vnitatem præcisionis, & vniuersalitatis, ita-
que , vt cognita , est vna, ex modo cognos-
cendi , & secundum se , non est vna ipsa rei co-
gnita vt ex se .

Ad fundamentum oppositæ sententiæ Respond.
In illa specie non dari vniuersalitatem, & vni-
tatem præcisionis actu cognitam , sed virtute
cognitam , & actu representatam eo modo
quo representatio conuenit speciei impres-
sæ , sicut enim in memoria manent species
representantes vniuersale , non quod actu ibi
sit cognitum , sed quia ibi est representatum

repræsentatione speciei impressæ : sic dicimus de illa specie formata ab intellectu agente . Vnde consultò non proposuimus in titulo questionis , *An sit ibi vniuersale Metaphysicum* , sed *An repræsentetur* ? Agimus enim hic non tam de vniuersali in essendo , quàm in repræsentando , quia tamen ibi repræsentatur vniuersale , quod adueniente cognitione redditur actu cognitum , & vniuersale in essendo , ideo dicimus illam speciem repræsentare vniuersale Metaphysicum , licet ibi nondum existat actu aliquod ens rationis , quod pertinet ad vniuersale Logicum .

Instabis . In illa specie non repræsentatur vniuersale formaliter v. est ens rationis , sed fundamentaliter , ergo vel fundamentaliter proximè , vel remotè : Si remotè , sunt ipsæmet singularia à quibus sumitur vniuersale : si proximè ; hoc ipsum est ens rationis , quod non potest ante cognitionem intellectus possibilis haberi . Et præsertim hoc vrgetur de ipsa aptitudine vniuersalis , nam per intellectum agentem non potest haberi actus huius aptitudinis , ergo neque ipsa aptitudo , & potentia . Conseq. patet , quia ubi est impossibilis actus non potest dari potentia , quæ possibilitatem ponit ad actum . Anteced. verò constat , quia actus eius est prædicari de multis , sed non potest prædicari per intellectum agentem , ergo &c. De unitate etiam est difficultas , quia intellectus agens non format vnâ naturam ex pluribus indiuiduis , quia non habet actum conferendi , & comparandi vnâ alteri , cum non cognoscat , sed habet solam præcisionem negatiuam , quatenus sunt vnâ , scilicet naturam ,

turam, & relinquit alterum, scilicet singularitatem, ergo solum in vno individuo accipit id quod est naturæ relictæ eo quod est individui, hoc autem est solum accipere naturam secundum se, non verò secundum unitatem indifferentiæ, & aptitudinis ad plura, ergo non facit unitatem vniuersalitatis, quæ non est sola unitas sine vna indiuiduatione, sed cum indifferentia ad plura.

Respond. In illa specie repræsentari vniuersale fundamentaliter cum fundamento proximo nondum cognito, sed repræsentato. *Et ad instantiam Resp.* Quòd fundamentum proximum vniuersalitatis est quidem ens rationis, quod ante cognitionem intellectus non est in actu, & formaliter, potest tamen esse virtualiter, & repræsentatiuè, sicut in imaginatiua potest dari ens rationis, vt chymæra repræsentatiuè, vt diximus qu. 2. Quare ex vi intellectus agentis non habetur aliqua secunda intentio formaliter, potest tamen haberi fundamentaliter, quia ipsa præcisio, sub qua repræsentat naturam, realis non est, licet nondum sit actu cognita, sed repræsentata, vt cognoscatur eo modo, quo præcisio illa repræsentari potest non vt res, sed vt conditio rei repræsentatæ.

Ad replic. de aptitudine dicitur. Quòd vbi est impossibilis actus quasi ab intrinseco, deest potentia, si autem solum ab extrinseco, scilicet defectu applicationis, non deest potentia, sicut ignis habet potentiam ad comburendum lignum Romæ, sed non applicationem, sine qua non potest comburere; sic natura illa præcisa habet capacitatem, seu non repu-

repugnantiam, ut prædicetur de multis, deest tamen applicatio, quæ est cognitio.

Ad inq. ant. de unitate Resp. Quod intellectus agens non accipit vnâ naturam collatiuè, sed præcisiuè ex pluribus, vel ex vno indiuiduo, accipiendo id quod de se non repugnat esse in pluribus. Vnde ex hoc non redditur natura solum repræsentata intrinsecè quantum ad prædicata essentialia, sed repræsentata tali modo, scilicet per modum vnius, quod est accipere illam vnâ unitate præcisionis cum non repugnantia ad plura. Et quando dicitur quod est præcisio purè negatiua. *Resp.* Quod illa præcisio respectu inferiorum, quæ relinquit, negatiuè se habet, respectu autem naturæ, quæ accipit, repræsentando positiuè, per modum vnius illam repræsentat, sicut & postea quando cognoscitur ex informatione talis speciei, & hoc sufficit ad vniuersale Metaphysicum repræsentatum, quia dicit naturam cum conditione unitatis præcisionis, & non repugnantia ad plura.

Argumenta autem quæ afferri possent ad probandum quod species abstracta ab intellectu agente non repræsentat directè naturam sine indiuiduatione ex eo quod non possit intellectus agens illuminare phantasma, quod est corporeum, actione, & lumine spiritali, omittimus in præsentî, quia pertinent ad libros de anima; sufficit aduertere, quod phantasmata non illuminantur recipiendo in se aliquam lucem spiritalem, sed ut inquit D. Th. 1. p. q. 85. art. 1. ad 4. *Illuminantur phantasmata quia ex virtute intellectus agens redduntur habilia ut ab eis species intelligibiles ab-*

tra-

strahantur : Phantasma ergo quatenus est capax, & habile, ut determinet intellectam agentem ad producendum speciem huius obiecti potius quam illius, dicitur illuminari ab eo quasi extrinsecè, quia utitur illo quasi instrumento determinante, ipsa verò species producta ex determinatione phantasmatum, est illuminatio spiritualis, sed hæc ponitur in intellectu possibili. An verò recipiant aliquem modum, vel impressionem phantasmata ab intellectu agente, quæ non sit illuminatio, sed modus quidam habilitatis sicut instrumentum ab artifice, non abhorreo, sed de hoc in libris de Anima.

ARTICULVS II.

Verum vniuersale Metaphysicum in actu cognitum fiat per actum absolutum intellectus: Et vniuersale Logicum per comparatum.

Actus comparatiuus intellectus potest sumi dupliciter, vno modo ut pertinet ad secundam, & tertiam operationem intellectus, qua comparat vnum alteri componendo, vel diuidendo, vel etiam per illationem discurrendo: alio modo ut pertinet ad primam operationem per quam vnum non attribuitur alteri, vel deducitur ex alio, sed tamen cognoscitur vnum ut ordinatum ad aliud, & non in se absolutè, sicut relatio ipsa cognoscitur per simplicem operationem quando apprehenditur, vel definitur. Itaque per cognitionem secundæ operationis attribuitur ali-

quid

quid subiecto tanquam praedicatum, & sic per talem actum comparativum potest praedicari ipsa natura de inferioribus ad quae habet relationem, & potest etiam universalitas ipsa praedicari de natura, quam denominat tanquam forma, & consequenter praedicatur de illa. At verò per comparisonem primae operationis non attenditur attributio praedicati ad subiectum, sed cognoscitur natura ut respiciens terminum ad quem ordinatur, quae potest cognosci, vel in actu signato, & reflexo, vel quasi in actu exercito cognoscendo naturam cum ordine ad suum terminum. Et discerne quòd actus iste comparativus non dicitur talis nisi quia respicit terminum ad quem, qui propriè est terminus comparisonis seu relationis, non quia respicit terminum à quo, non enim ad illum comparatur, sed ab illo separatur.

Actus autem absolutus dicitur per oppositum ad comparativum, scilicet ille qui non comparat, neque ordinat unum ad aliud, sed rem ipsam cognoscit secundum se. Potest autem aliquis actus absolui ab ordine ad aliud dupliciter: vno modo pure negativè accipiendo unum omni alio suppresso, vel omisso, ad quod poterat ordinari, alio modo privativè, seu positivè, quia accipit unum separando ab alio cum cognitione utriusque termini. Hinc nasci ut duplex abstractio, alia negativa, alia positiva. Negativa concipit unam naturam omittis conditionibus individuans, & circa illas negativè se habendo. Abstractio positiva est illa, quae separat naturam à conditionibus non pure omitiendo, & relin-

relinquendo individua, seu differentias indiuiduales, sed cognoscendo id, quod relinquit, & id quod assumit, & consequenter cognoscendo distinctionem inter vnum, & aliud.

His suppositis loquendo de vniuersali cognito per intellectum possibilem non representatum tantum in specie, de quo praeced. artic. duplex est principalior sententia inter grauiorē Authores. Prima docet absolutè fieri vniuersale per actum abstractionis. Secunda fieri per actum comparatiuum, non distinguendo de vniuersali Metaphysico, vel Logico, de comparatione simplicis apprehensionis, vel praedicationis. Primam docuit Durandus in 1. dist. 3. qu. 15. num. 27. & in 2. dist. 3. qu. 7. num. 7. Toletus q. 2. de vniu. & alij. Secunda attribuitur Scoto in 1. dist. 3. q. 1. solut. ad 1. Soncinati 5. Met. q. 27. & 10. Met. qu. 15. & alij. Videatur Arauxo 3. Met. q. 3. ar. 5. Curs. Carmel. d. sp. 3. de vniu. q. 6.

Inter has sententias principales, quidam volentes eas concordare dixerunt primam sententiam esse veram de vniuersali Metaphysico, & absoluto, secundam de Logico, quod est relatiuum. Ita Pater Suarez disput. 6. Met. sect. 6. nu. 8. At verò Martinez disp. 1. de vniu. qu. 2. distinguit vniuersalitatē vt sic, & vniuersalitatē Metaphysicā, & Logicā. Et vniuersalitatē secundam se dicit fieri per abstractionem quatenus dat ei vnitatem praecisam. Vniuersalitatē autem vt Metaphysicā fieri per abstractionem negatiuā, quatenus relinquit, seu amittit inferiora, vniuersalitatē autem Logicā fieri per abstractionem positiuā, quae explicatur ab ipso sic, quod

quod ista abstractio cum fiat considerando positivè ipsa inferiora, & intelligitur natura inclusa in inferioribus, ut quid distinctum ratione ab ipsis, omne enim inclusum non in se, sed in alio includitur; & intelligitur à differentiis inferiorum separari, à quibus solis non autem ab ipsis inferioribus fit separatio universalis. Iam supra retulimus hanc sententiam q. præced.

Denique aliqui existimarunt naturam fieri universalem per actum comparativum non simplicis relationis, sed prædicationis, quod pertinet ad secundam operationem. Ita attribuit quibusdam Complutensibus P. Merlin. disp. 2. de univ. q. 2. & 3.

Dico primò. Universale Metaphysicum fit per actum absolutum abstrahentem naturam ab inferioribus, tam abstractione negativa, quam positiva. Itaque utraque abstractio est actus absolutus; & non deseruit ad universale Logicum formaliter constituendum, quod in relatione consistit. Hæc conclusio probatur quantum ad duo. *Primum*, quod ille actus præscindens naturam siue positivè, siue negativè, fit absolutus. *Secundum* quod universale Metaphysicum, tam ex præcisione negativa, quam positiva resultet. Et primum probatur sic: ille dicitur actus absolutus, qui attingit obiectum sine respectu, & ordine ad aliquid, ut ad terminum quem respiciat, sed actus præcisionis solum habet separare unum ab alio ut à termino à quo, ergo per talem actum non consideratur aliquid ut ordinatum, & ut respiciens terminum ad quem, sed potius ut relinquens; ergo repugnat quod aliquis actus abstra-

abstractionis, cuius officium sit tollere, & separare vnum ab alio, non sit actus absolutus, siquidem non comparat, neque ordinat ad illud, à quo separat. In summa repugnat quòd aliquis actus faciat respicere aliquid vt terminum à quo, & vt terminum ad quem, cum sit oppositio inter ista duo, sed actus præscindens, & abstrahens respicit id, à quo abstrahit, tanquam terminum à quo, ergo non potest respicere illud tanquam terminum ad quem, sed comparatio, & ordo est ad aliquid, & ad terminum ad quem, ergo actus præscindens non est comparatiuus in eo in quo præscindit, quia id à quo præscindit respicit vt terminum à quo, non ordinat ad illud vt ad terminum ad quem.

Secundum quod probandum est in hac conclusione, sic ostenditur. Non solum præcisio negatiua, sed etiam positiua relinquit inferiora, & ab illis separat naturam, vna per positiuam cognitionem, alia solum omittendo, seu non attingendo illa, ergo vtraque solum pertinet ad vniuersale Metaphysicum. Anteced. constat ex dictis, & conseq. prob. Quia negotiatur circa eundem effectum, scilicet, circa separationem naturæ ab inferioribus, siue à differentijs extra quas concipitur, ergo tantum habet respicere ista inferiora vt terminum à quo, ergo nondum ponit in illa respectum, qui requiritur ad vniuersale Logicum, quia iste respectus debet esse ordo ad essendum, & prædicandum de multis, vt dicit ipsa definitio vniuersalis, ergo oportet quòd sit ordinatio conuertens naturam ad respiciendum ipsa inferiora, vt terminum ad quem, quia

quia tendit ad illa ut in illis sit, & de illis prædicetur, ergo non sufficit ille respectus quod solum natura aueritur ab inferioribus, seu ab illis abstrahitur per cognitionem positivam, sed hoc totum pertinebit ad demutationem naturæ ab inferioribus, sub quo statu attingitur à Metaphysico, sicut à Logico sub statu quo convertitur ad inferiora, ut possit prædicari de illis.

Dices: Abstractio ista positiva solum ponit naturam extra differentias, non verò extra ipsa inferiora, aliud est enim abstrahi à differentiis, quia extra conceptum illarum est, aliud ab inferioribus, extra quorum essentiam non est uniuersale, non enim convenienter dicimus quod animal abstrahitur ab homine, & equo, quia in eis semper manet etiam per rationem, sed ab aliquo hominis, & equi nempe à differentiis eorum, illa ergo præcisio positiva licet respiciat differentias, ut terminum à quo, ipsa tamen inferiora non respicit ut terminum à quo, nec ab illis abstrahit, sed potius in illis includitur, quod sufficit ut dicatur illa respicere.

Sed contra est. Quod semotis differentiis quibus natura contrahitur, & determinatur, nihil manet in inferioribus in quo maneat inclusum, & ad quod compareretur ut ad terminum, nam in homine, v. g. tantum sunt duo ex quibus constituitur, scilicet animal ut genus, rationale ut differentia: abstractio ergo quæ remouet animal à rationali quid relinquit in inferioribus, in quo animal illud excludatur? Solum ergo manet inclusum in ipso animali, nam homo remota differentia destruitur.

struitur, ergo non stat præscindi à differentijs, & per eundem actum includi in inferioribus. Ac denique. Quia ille actus sic præscindens à differentijs, vel solum præscindit ab illis, vel etiam attingit aliquid aliud ad quod tanquam ad terminum referat naturam. Si primum, non est actus comparans, & respicere faciens ut terminum ad quem inferiora, sed solum remouens à differentijs. Si secundum. Ergo iste actus non habet solum officium abstrahendi, & remouendi differentias, sed etiam comparandi ad inferiora, & sic quatenus abstractiue est positiuè, adhuc non logicum vniuersale, sed Metaphysicum constituit, quatenus verò comparatiue idem faciet quòd in aliorum sententia actus comparatiue distinctus à præcisione, & solum differet ista sententia ab alijs, quòd ponit fieri vnico actu id, quòd alia ponit fieri duobus, scilicet abstractiue Metaphysicum vniuersale, comparatiue verò Logicum.

Dico secundò. Vnitas, & aptitudo, quæ sunt fundamentum proximum vniuersalitatis ex isto actu præcisionis, conuenire dicuntur, etiam ante vniuersale Logicum. Hæc constat ex dictis, quia vnitas illa non est prædicatum essenziale naturæ, siquidem natura, secundum se, nec est vna, nec plures, sed accidentale conueniens illi per intellectum, siquidem est vnitas rationis, sed hoc ipso, quòd præscinditur natura à differentijs inferioribus, siue positiuè, siue negatiue, cognoscitur vnico conceptu, ergo accipitur tanquam vna, quia vnus conceptus ad vnum obiectum terminatur, & in natura sic accepta, ut vna, non inuenitur repugnantia ut reddatur indiuidua, quia non
ha-

habet oppositionem, sed potius conformitatem cum illis differentiis, à quibus assumpta est per intellectum, ergo habet aptitudinem, quæ est non repugnantia, & unitatem. Quomodo verò ista unitas non constituat vniuersale nisi fundamentaliter tantum, quod pertinet ad vniuersale Metaphysicum, non ad vniuersale ut abstrahit à Logico, & Metaphys. dictum est q. præc. art. 5.

Dico ultimo. Vniuersale Logicum, seu relatiuum, & secunda eius intentio sit per actum comparatiuum, non per modum compositionis, vel iudicij, nec per modum inclusionis in inferioribus, sed per modum simplicis apprehensionis, qua cognoscitur natura cum ordine, & respectu ad inferiora. Hæc conclusio docetur à D. Thoma, & ab eius discipulis communiter, & in schola Scoti ut communis etiam acceptatur. Videatur D. Thom. 1. p. quest. 28. art. 1. ubi inquit: *Quod aliquando respectus significatus per se, quæ dicuntur ad aliquid, est tantum in ipsa apprehensione rationis conferentis unum alteri.* Et quest. 7. de potentia, artic. 11. inquit: *Quod respectus rationis ad inueniendum per hoc, quod consideratur ordo eius quod est intellectum ad res extra, aut quia consideratur ordo intellectuum ad inuicem.* Et denique v. Perihorin. lect. 10. loquens in specie de relatione vniuersalitatis inquit: *Quod intellectus attribuit has relationes nature intellectæ, secundum quod comparat eam ad res extra animam.* Et idem sumitur ex opus. 48. cap. 2. Et ponderandum est, quod actum istum comparatiuum quo inuenitur relatio vniuersalitatis non ponit Diuus Thom. in actu comparatiuo, quo

quo attribuitur aliquid alicui vt subiecto, sed quo ordinatur ad aliquid vt ad terminum, vt constat ex verbis allatis, sed præcipue ex loco citato r. p. solutione ad r. vbi inquit: *Quod propria ratio eius, quod ad aliquid dicitur, non accipitur per comparisonem ad illud cui inest relatio, sed per respectum ad alterum.*

Et hinc sumitur fundamentum pro conclusione posita. Nam ad inueniendum relationem per actum intellectus requiritur comparatio aliqua ad terminum, & non comparatio compositiua, & attribuens prædicatum subiecto, vel inclusionem faciens in illo, ergo relatio tantum ordinatiua ad terminum. Maior manifestè constat: quia relatio non est aliquid absolutum, sed cuius totum esse est ad aliud, ergo vt inueniatur per intellectum, necessario debet apprehendi in eo, in quo differt ab absoluto: differt autem ab absoluto in comparisonem ad aliud, ergo requirit actum comparatiuum, idest, comparisonem, & ordinationem facientem in natura cognita ad terminum. Min. probat. nam comparatio compositionis, & attributionis, vel attribuit naturam cognitam inferioribus, vel attribuit relationem ipsi naturæ cognitæ tanquam denominatæ per ipsam relationem: primum non est ad rem, tum quia actus compositiuis formaliter solum potest efficere relationem prædicati ad subiectum, quæ longè diuersa est à relatione vniuersalis ad inferiora, tum etiam, quia prædicatio naturæ de suis inferioribus, vt est in propositione facta per actum compositionis, solum facit actu prædicatum, ergo supponit prædicabile, quia prius aliquid dicitur

est prædicabile, quàm prædicatum, prædicabilitas autem est passio vniuersalitatis, vel ad illam pertinet, ergo relatio illius antecedit compositionem compositiuam, & formantem compositionem, sicut relatio prædicabilitatis antecedit relationem prædicati, vt potentia actum.

Et eodem modo probatur non consistere in acto faciente inclusionem. Quia vel ista inclusio est actualis inclusio in inferioribus, vel solum aptitudinalis: si primum est inclusio per prædicationem, vel contractionem in actu, quod necessario supponit contrahibile, & prædicabile, atque adeò relationem prædicabilitatis & contrahibilitatis. Si verò est inclusio aptitudinalis, ergò solum est aptum includi, non verò inclusum actu in inferioribus, & illa aptitudo vt includatur, est idem quòd aptitudo vt contrahatur & prædicetur: inclusio enim per contractionem fit, ergo ante inclusionem datur vniuersale Logicum, scilicet respectus aptitudinis vt includatur.

At verò si dicatur secundum. Constat quòd attribuere relationem ipsi naturæ cognitæ vt subiecto denominato per illam, non est formalis consideratio relationis ad terminum, sed ad subiectum, & in ratione *In*, non in ratione *Ad*, ergò est consideratio communis omni accidenti, etiam absoluto, quod habet subiectum, non verò est proprium relationis vt relatio est, & consequenter non constituit illam formaliter, sed supponit, quia in subiecto ponit, non ad terminum ordinat; vnde non est necesse non solum in relatione vniuersalitatis, sed etiam in alijs secundis intentioni-

tionibus, scilicet relatione syllogismi, & Propositionis, &c. in actu signato cognoscere illam relationem, & attribuere illam subiecto denominato; hoc enim iam supponit relationem formatam, sed sufficit, quod ipsa extrema relationis comparative cognoscantur vnum ad aliud in ipso exercitio. siue quando formatur propositio, vel iudicium, aut syllogismus, siue ea quæ pertinent ad primam apprehensionem, ipsa enim comparatione cognoscuntur istæ intentiones tanquam ordinatæ, & consequenter ad instar relationis, etiam si non apprehendantur tanquam obiectum, quod, per actum reflexum, ut quæst. 2. diximus art. 4.

SOLVUNTUR ARGUMENTA.

Primò arguitur ad prebandum quod non est necessarius actus comparatiuus ad vniuersalitatem formalem, quia posito fundamento proximo statim resultat relatio, ergo non indiget alio actu quam illo quo ponitur fundamentum proximum; hoc autem ponitur ante actum comparatiuum, quia est vnitatis, & aptitudo ad essendum in multis, quæ ex vi abstractionis habetur, ergo ex hoc actu resultat vniuersalitas, quæ est relatio; sicut enim sola contractio sufficit, ut natura fiat singularis, ita & abstractio, ut actu fiat vniuersalis.

Et confir. Quia ante actum comparatiuum natura abstracta actu denominatur vniuersalis, ergo actu habet formam vniuersalis quæ est relatio. Conseq. patet. Quia denominatio formæ non fit nisi ab ipsa forma, cum sit effectus eius formalis, ergo si denominatur

actu vniuersalis, actu habet formam vniuersalitatis. Antecedens constat. Quia ex vi abstractionis, ante actum comparatiuum natura non denominatur singularis, cum sit denudata à conditionibus singularibus, nec solum dicitur natura secundum se, quia illa secundum se nec est vna, nec plures, nec contracta, nec abstracta, ergo dicitur vniuersalis.

Respond. In relationibus rationis non resultare relationem posito fundamento, quia non habet esse illa relatio per resultantiam, sed per cognitionem: non autem cognoscitur nisi in ordine ad suum terminum, quod est comparari; nec abstractio dici potest virtualis comparatio, quia ea quæ per cognitionem habent esse, non sufficit virtualiter cognosci, vt actu dicantur habere esse, sed solum habebunt esse virtualiter, & in potentia. Vnde cum relatio non cognoscatur actu nisi per actum comparatiuum, quia debet cognosci in ordine ad suum terminum ad quem comparatur, siue ordinatur, virtualis comparatio solum erit virtualis cognitio relationis, quia nondum cognoscitur ordinari ad suum terminum, sed abstrahi. Contractio autem efficit singulare Metaphysicum, sicut abstractio vniuersale Metaphysicum, non Logicum, idest relatum ad suum superius.

Ad confirm. Respond. Quòd ante actum comparatiuum denominatur natura vniuersalis Metaphysicè, non Logicè, seu fundamentaliter proximè, non formaliter. Habere autem fundamentum proximum vniuersalitatis, neque est esse singularem, quia ab indiuiduis denudatur, nec accipi naturam solum secundum se,

se, quia hoc fundamentum non est prædicatum essentiale naturæ, sed est esse vniuersale Metaphysicè, quod licet non sit forma vniuersalitatis quantum ad ipsam secundum intentionem, est tamen forma quantum ad fundamentum proximum talis relationis, quæ fundatur in unitate, & aptitudine. Hæc autem aliquid rationis sunt. & ita hoc nomen, *vniuersalis*, indifferens est ad fundamentum vniuersalitatis, & ad ipsam formam relatiuam, sicut Deus denominatur dominus à potentia, quæ est fundamentum relationis dominij, & iudex, & Doctör, & signum ad placitum ex designatione, & impositione, & non solum à relatione rationis, quæ in tali impositione, & designatione fundantur. Vnde si daretur à parte rei vniuersale eo modo quo posuit Plato, esset vniuersale Metaphysicum, quod in unitate præcisa consisteret, fundaret tamen relationem ad ipsa inferiora, realem quidem, si inferiora existerent, vel secundum dici, si non existerent.

Secundo arguitur. Ad probandum quòd requiritur actus comparatiuus per modum inclusionis, quod aliqui vocant abstractionem positiuam, vel per modum prædicationis, & compositionis. Etenim vniuersale Logicum debet consistere in respectu naturæ abstractæ ad sua inferiora, ergo oportet quòd ipsa inferiora cognoscantur, respectus enim nequit sine termino cognosci; sed inferiora constituuntur per inclusionem sui superioris, ergo necessario requirit vniuersale Logicum inclusionem in suis inferioribus, alioquin inferiora non habebit, neque respiciet, siquidem

per hanc inclusionem constituuntur.

Et confirmatur. Quia iste actus comparatius, vel intelligit naturam esse in multis attribuendo, & prædicando eam de illis actu, vel solum intelligit esse aptam ad essendum in illis. Si primum, est comparatio prædicationis, neque enim actu intelligitur in multis, nisi prædicando naturam de multis. Si secundum, sufficit actus abstractionis ad constituendum istam relationem, quia ista relatio est relatio aptitudinis ad multa, ergo ille actus, qui sufficit ad ponendam aptitudinem, sufficit ad ponendam relationem aptitudinis; ponitur autem aptitudo per actum abstractionis, quæ virtualiter est comparatio, hoc ipso quod naturam relinquit aptam ad ipsa inferiora; sicut enim per aptitudinem virtualiter est in illis, ita virtualiter comparatur ad illa, ergo, &c. Et in sententia eorum qui censent iudicium solum consistere in respicientia duorum extremorum seu conceptuum, manifestè sequitur istam comparisonem fieri per actum iudicii, quia ista comparatio sine respicientia extremorum non est. Sed hoc fundamentum est omninò falsum, quia etiam ante omne iudicium potest aliquid relatiuè concipi, sicut per simplicem apprehensionem cognoscimus relationes, & definimus illas.

Respondetur ad principale argument. Quod est totum fundamentum Martinij, solutione superius data quaest. præcedentis artic. 5. Quod vniuersale respicit sua inferiora non per inclusionem formaliter, sed potius supponendo exclusionem, & abstractionem ab illis, vnde licet inferiora in re non constituentur nisi in-
cluden-

cludendo naturam superiorem: formaliter tamen non constituuntur in ratione inferioris per inclusionem, sed per subiectionem ad naturam superiorem: supponendo tamen quod in re illam includant. Vnde sicut superius, licet identificetur cum inferiori, cognoscitur in ratione superioris sine illo, ita inferius licet includat, & identificetur cum superiori, respicitur tamen à superiori non per inclusionem in illo, sed per subiectionem ad illud. Vnde in conceptu inferioris quatenus terminat respectum superioris non explicatur inclusio superioris, licet illam habeat in re, sed solum inferioritas, & subiectio.

Quod si instet. Ergo non potest dari formaliter intentio generis sine intentione speciei, nec species sine intentione individui, cum hæc sint correlatiua, & ita respectus generis stare non potest sine suo termino formali quod est species, nec species sine individuo quod est terminus speciei.

Respond. Probare argumentum, quod non potest dari intentio generis formaliter sine specie cognita ut subijcibili, & similiter species sine individuo, ut subijcibili, sic enim induunt rationem termini formalis relationum generis, & speciei, potest tamen dari intentio generis sine hoc quod cognoscatur intentio speciei, ut prædicabilis, & species quin cognoscatur intentio individui, ut prædicabilis de vno tantum.

Ad confirm. respond. Quod aptitudo dupliciter potest considerari, vel negatiue, vel positiue; negatiue est sola non repugnantia ad essendum in pluribus, & ista non cognoscitur

tur actu comparatiuo, sed ipso actu absoluto abstractionis consequitur: Positiuè dicit ordinem ad ea, ad quæ habet aptitudinem, & iste ordo, seu relatio formaliter non inuenitur nisi quando ipsa aptitudo concipitur cum aliqua comparatione, & ordine ad suum terminum. Quare actus comparatiuus constituens formaliter vniuersale non est ille quo actu attribuitur multis, sed quo concipitur aptum ad essendum in multis, non aptitudine sumpta pro sola capacitate, seu non repugnantia quæ est aliquid absolutum, sed sumpta pro aptitudine ordinata, & respiciente positiuè ipsa plura. Ad hoc autem non est necesse, quod ipsa relatio cognoscatur quasi in actu signato, & tanquam res cognita, *ut quod*, sed sufficit quod actu cognoscatur aliquod extremum, ut comparatum ad aliud, & ad instar relatiui, sic enim in ipso exercitio comparatio ipsa, & relatio cognoscitur,

Vltimo potest obijci, ad probandum quod abstractio non reddat naturam vniuersalem. Metaphysicè, & fundamentaliter. Quia per illam abstractionem solius cognoscitur natura secundum id quod ei conuenit in se, & in sua essentia remotis indiuiduis, ergo non fit natura vniuersalis, sed solum ponitur in statu solitudinis, seu secundum se. *Item*. Natura ab intellectu non cognoscitur nisi ut abstracta ab indiuiduis, in sententia D. Thomæ. Ergo ipsa præcisio non potest dare vniuersalitatem, quia hæc conuenit naturæ ut cognita, & consequenter, ut præcisa, ergo prius datur præcisio, seu cognitio naturæ, quam vniuersalitas. *Ac denique*. Quia vniuersalitas est relatio

zio secundum esse, ergo solum habetur per actum, quo apprehenditur ipse ordo, & relatio: actus autem abstractionis est actus absolutus, non comparans, neque ordinans unum ad aliud.

Respond. Hæc omnia probare, quod universalitas pro relatione formaliter non habetur nisi per actum comparativum, tamen fundamentum eius, quod est unitas præcisionis, & aptitudo habetur hoc ipso, quod natura cognoscitur ut præcisa per modum unius, neque hoc supponit naturam cognitam, sed ipsamet præcisio cognitam reddit. Quod si non cognoscatur per modum unius non loquimur in isto casu, neque in ista præcisione, quia talis cognitio non solum abstrahit ab indiuiduis, sed etiam ab omni modo uniuocis, & relinquit naturam in statu puræ solitudinis, & secundum se. Et fortasse non est possibile concipere naturam, ita quod ex modo intelligendi, nec unitatem habeat, nec pluralitatem, licet secundum se ex parte rei cognitæ nec una sit, nec plures quantum est ex vi essentialium prædicatorum. Quid tamen sit de hoc, saltem ille actus, qui abstractiue concipit naturam per modum unius, unitatem præbet ipsi naturæ ex modo cognoscendi, & tamen ille actus non est comparativus, sed absolutus, quia nondum respicit inferiora per modum termini ad quem comparetur, sed ut terminum à quo separetur.

*De Actu vniuersalis, qui est Prædicari
de multis.*

ARTICVLVS I.

*Quid sit in natura vniuersali esse in multis;
& Prædicari de multis.*



Vpponit hæc Difficultas naturam dum prædicatur actu de multis adhuc esse vniuersalem, saltem metaphysicè, quia si vniuersalitas per prædicationem amittitur, non habet locum quæstio, quia inquirimus quid in ipso vniuersali sit prædicari, & esse in multis? Et quidem aliqui de hoc dubitauerunt existimantes hoc ipso quòd actu prædicatur vniuersale de multis extraneari relationem vniuersalis à natura, quòd Scoto q. 9. in Pophyr. attribuūt Conimb. quæst. 6. Vniuers. num. 4. Tum quia natura non prædicatur vt indifferens, & indeterminata, sed vt applicata isti indiuiduo de quo prædicatur, & vt vnum cum illo, alioquin verè non prædicaretur, ergo non manet vniuersalis, quia remota indifferentia tota vniuersalitas ruit. Tum etiam quia natura non habet vniuersalem, nisi in suppositione simpliciter, nam quando dicitur, *homo est species, homo est vniuersalis*, ly, *homo* supponit simpliciter, ita quod non descendit ad supposita sub formalitate speciei & vniuersalis, sed quando actu prædicatur de indiuiduo

uiduis non habet suppositionem simplicem, sed personalem, verificatur enim de personis, & indiuiduis, ergo in actuali prædicatione non habet vniuersalitatem.

Nihilominus oppositum, vt dixi, supponendum est; proprium est enim naturæ vniuersalis esse prædicabilem de multis, ergo ipsa prædictio de multis non repugnat vniuersali, ergo quando prædicatur ipsa prædictio vniuersalitatem non tollit. Nec dici potest vniuersalitatem destrui per prædicationem, licet ipsa prædicabilis sit, sicut quantitas decem palmorum est diuisibilis in decem palmos, & tamen si actu diuidatur, non manet amplius diuisibilis in illos. Hoc, inquam, dici nequit, quia aliud est, quantitatem actu diuisam in factum esse non posse amplius diuidi in illas partes, aliud ipsum actum diuidendi tollere diuisibilitatem: hoc secundum est falsum, diuisio enim super diuisibilitatem cadit, illique non repugnat, licet facta diuisione illam diuisibilitatem destruat, sicut corruptio actualis non repugnat corruptibili, sed conuenit illi; posita autem corruptione in factum esse, iam non est corruptibile, sed corruptum. Sic prædictio de multis conuenit prædicabili, sed facta prædicatione, & contracta natura ad indiuidua iam non est diuisibilis, seu prædicabilis de multis, sed plurificata in illis. Itaque in hac prædicatione, *Petrus est homo*, ly *homo*, manet vniuersalis, quia non supponit suppositione singulari, sed communi, alias esset sensus, *Petrus est hic homo*, & sic nunquam prædicaretur de Petro aliquid quod est ipsi commune cum Paulo in natura. Vniuersaliter

tas autem pro secunda intentione non est necessesse, quod in actuali praedicatione consideretur, & sic actu non manet.

Ad opposita fundamenta dicitur. *Ad primum*: Quod natura quando praedicatur intrinsecè vniuersalis est, & indifferens: extrinsecè autem applicatur indiuiduo determinato, nam quando dico, *Petrus est homo*, ly *homo*, non amittit vniuersalitatem, quia vt eam amitteret necessarium erat, conceptum communem mutari in singularem, vnde non corrupto illo conceptu communi, intrinsecè non redditur singularis, licèt extrinsecè applicetur subiecto singulari formando illam propositionem, *Petrus est homo*.

Ad secundum. Dicitur quod terminus etiam in suppositione personali retinet vniuersalitatem, quia quamdiu representatio naturæ vniuersalis non tollitur, vniuersalitas metaphysica manet, licet quando fit applicatio, & praedicatio naturæ representatae, non autem quoad secundam intentionem vniuersalitatis, suppositio non est simplex, quæ tunc solum datur quando praedicatur de ipsa realiqua secunda intentio, quæ non potest interioribus ipsi communicari, & conuenire, sicut dictum est in capite de suppositione.

His suppositis inquiritur. Quid sit naturam esse in multis? An sit ipsamet relatio vniuersalitatis ad multa, vel aptitudo ad existendum in illis, vel contractio ad ipsa inferiora.

Respond. Aliquos existimare, naturam esse in multis non esse aliud, quàm includi in illis, quæ inclusio præcisionem requirit ab ipsis differentijs, vt enim aliquid includatur, in aliquo

aliquo oportet quod concipiatur, ut distinctum ab illo saltem per rationem, nihil enim in se ipso includitur, habet tamen identificationem cum ipso toto, quod est interius, solum enim à differentiis eius non ab ipso præscindit, & sic ista inclusio relatio est ad inferiora, in quibus includitur. Ita Martinez disp. 1. in Porph. quaest. 2.

Nihilominus dicendum est, quod naturam esse in multis non consistit in ipsa relatione vniuersalis ad multa, nec in ista inclusione, quam sententia relata requirit ad talem relationem, sed esse in multis, si sumatur potentialiter, pertinet ad ipsam aptitudinem, qua natura redditur potens, ut sit in multis per identificationem, & multiplicationem in illis. Si autem sumatur actualiter hoc, quod est actu esse in multis, non est relatio vniuersalis ad inferiora, sed identificatio, & contractio ad illa, non abstractio positiua, ut ponit ista sententia. Ratio conclusionis sumitur ex dictis in præcedenti quaest. Quia potentia ad essendum in multis antecedit ipsum actuale esse, seu actualiter conuenire multis, sicut potentia præcedit suum actum, ista autem potentia ad essendum in multis nihil aliud est quam aptitudo ipsius vniuersalis ad essendum in multis, ut sæpe dictum est. Non autem dicitur actu esse in multis per ipsam relationem vniuersalitatis, quia relatio ista est respectus ipsius aptitudinis, quatenus natura communis positiue per modum potentiae respicit inferiora, in quibus esse potest. Non ergo relatio ista reducit ipsam potentiam, seu aptitudinem in actum existendi; & consequenter non est actualitatis

is aptitudinis, sed respectus ipse, quo talis aptitudo respicit ea, in quibus esse potest. Esse autem in multis est reductio talis aptitudinis, seu potentiae in actum, & quando fit talis reductio dissolvitur illa aptitudo, quia dissolvitur abstr. actio per contractionem; respectus autem aptitudinis manet cum ipsa aptitudine, & abstractione, non eadem dissolvit.

Restat ergo. Quod esse in multis eo modo sit explicandum, quo ipsa potentia ad essendum in multis, sicut enim uniuersale dicitur potens, seu aptum esse in multis, quia habet non repugnantiam, ut identificetur cum multis. in quibus multiplicatur, sic diceretur esse actu in multis quando ista potentia, seu aptitudo reducitur in actum, unde fierat aptitudo ad essendum in multis per identificationem, seu multiplicationem essentialem, vel accidentalem, ipsa identificatio multiplicata in multis est actu esse in illis. Etsi hanc identificationem vocamus inclusionem, ita sit inclusio, quod non consistat formaliter in abstractione etiam positiua, sed in contractione, & coniunctione, quomodo enim formalis ratio inclusionis erit praecisio ab his, in quibus includitur?

Et si Queras. Quomodo differat talis contractio, seu inclusio, siue esse in multis ab hoc, quod est praedicari de multis?

Respondetur, Quod esse in multis explicatur per identificationem cum multis qualis fieri potest etiam per simplicem representationem, qua natura intelligatur identificari, & esse in inferiori cui conuenit; praedicatio autem fit per applicationem vnius ad alterum
in se-

in secunda operatione componente, & prædicante, ut seq. artic. dicitur. Vnde ista prædicabilitas se habet ut passio vniuersalitatis, ex eo enim quod vniuersale est in multis per identificationem quasi simplicem, sequitur quòd possit de illis verè prædicari.

Ad fundamentum. Oppositæ sententiæ sepius responsum est. Inclusionem superioris in inferiori requiri quidem ad constitutionem ipsius inferioris, cuius natura, & quidditas prædicata superiora includit. Cæterum hæc inclusio, & constitutio non fit per præcisionem positivam, sed per contractionem; contractio enim non est eiusdem ad seipsum, sed ad aliud, seu per aliud saltem ratione distinctum. Inferiora autem, quæ à superiori respiciuntur, includunt quidem in re ipsum superius, sed non sunt inferiora quatenus includentia, sed quatenus subiecta, & minora.

ARTICULVS II.

Quid sit Prædicatio. Et quid ad eius verificationem requiratur.

QUattuor in hoc articulo notanda sunt. *Primum*, quid sit prædicatio formaliter sumpta, & fundamentaliter? *Secundum*, Quid requiratur ad verificationem prædicationis? *Tertium*. Quomodo prædicatum superius debet esse totum respectu inferioris, ut de illo prædicetur. *Quartum*. Quotuplex sit prædicatio?

Circa Primum. Notandum est quòd prædicatio pertinet ad secundam operationem, in qua

qua enunciatur vnum de alio, & sic prædicationis est attributio vnius ad alterum negando, vel affirmando, unde dicit S. Thom. 4. cap. de ent. & essent. in fine. *Quod Prædicationis est quoddam quod completur per actionem intellectus componentis, & diuidentis, habens tamen fundamentum in re ipsam unitatem eorum, quorum vnum dicitur de alio.* Vbi explicat, & formalem rationem prædicationis, quæ est ipsa attributio, seu coniunctio extremorum per modum attributionis: coniunctio autem relatio est. Fundamentum autem huius relationis, seu attributionis est identitas, seu conuenientia extremorum, si prædicationis sit affirmatiua, vel disconuenientia si sit negatiua. Quod vberius explicat D. Thom. 1. par. quaest. 13. art. 12. Ibi ostendit. *Quod in qualibet propositione affirmatiua requiritur quod subiectum, & prædicatum significant quod aliquo modo est idem secundum rem, & diuersum secundum rationem, quod patet tam in prædicationibus accidentalibus, quam substantialibus; sicut cum dico, homo est albus, constat quod sunt idem subiecto, sed differunt secundum rationem, quia alia est ratio albi, alia hominis. Et similiter cum dico homo est animal, id ipsum quod est homo, verè est animal, unde prædicatum, & subiectum sunt idem supposito, sed diuersum ratione.* Quare identitatem extremorum significat intellectus per ipsam compositionem, & copulam. diuersitatem verò per distinctos conceptus prædicati, & subiecti. Et eadem doctrina sumitur ex 1. Periherm. lect. 3. Et sic constat quid sit prædicationis, & in quo fundetur. *Quomodo, & quomodo differat identitas extremorum*

rum, & connexio intrinseca, vel extrinseca, intra circa quantum notabile dicitur.

Circa secundum. Verificatio prædicationis ita fundatur in identitate, & convenientia extremorum, quòd non solum debet illa attendi ex parte rei significatæ, sed etiam ex parte modi significandi, quia intellectus cum natus sit diuisa componere, & vnita diuidere, solet vnā, & eandem rem tali modo aliquando apprehendere, & significare, vt ex ipso modo significandi non sit alteri applicabilis, & vnibilis, & alio modo sic concipere, vt applicabilis, & vnibilis sit. Vnde D. Thom. 1. p. q. 39. art. 4. & 5. monet in proprietatibus loquutionum, & ad veritatem earum non solum considerari deberes significatas, sed etiam modum significandi, qui modus præcipuè relucet in hoc quòd significetur aliquid in abstracto, vel in concreto, per modum totius, vel partis, cum enim omne totum sit maius sua parte non potest ex æquo pars, & totum adæquari, & attribui. Vnde D. Thom. opusc. 69. supra secundum text. Boetij, inquit: *Circa quodcumque abstractè consideratum hoc habet veritatem, quod non habet in se aliquid extraneum, quod scilicet sit præter essentiam suam sicut humanitas, & albedo, & quæcumque hoc modo dicuntur. Cuius ratio est, quia humanitas significatur, vt qua aliquid est homo, & albedo, quo aliquid est album; non est autem aliquid homo formaliter loquendo, nisi per id quod ad rationem hominis pertinet. Et similiter non est aliquid album formaliter, nisi per id quod pertinet ad rationem albi, & ideo huiusmodi abstracta nihil in se alienum habere possunt.*

Aliter.

Aliter autem se habet in iis, quæ significantur in concreto, nam homo significatur, ut qui habet humanitatem, & album, ut quod habet albedinem. Ex hoc autem quod homo habet humanitatem, vel albedinem, non prohibetur habere aliquid aliud, quod non pertinet ad rationem horum, nisi solum quod est oppositum his. Et ideo homo, & album possunt aliquid aliud habere quam humanitatem, vel albedinem. Et hæc est ratio quare albedo, vel humanitas significantur per modum partis, & non predicantur de concretis, sicut nec sua pars de suo toto. Ita D. Th. Ex qua doctrina colliges, quod abstractum respectu concreti abstrahit abstractione formali, non totali. Vocatur abstractio formalis, qua forma abstrahit à materia, actus à potentia, essenziale, & proprium ab extraneo, & alieno. Abstractio autem totalis est, qua superius abstrahit ab inferiori, & commune ab indiuiduis, quia habet se ut totum respectu inferioris includendo illa virtualiter, & implicite: abstractum autem non se habet ut totum respectu concreti, sed ut pars, & quasi forma, & actus respectu potentia, & subiecti,

Secundo sequitur. Quomodo verum sit illud, quod communiter dicitur, scilicet; Quod quando aliquid conuenit alicui per se, oppositum eius nec per accidens ei potest conuenire, idest, non potest in eodem subiecto reperiri, quia ut inquit D. Thom. subiectum habens aliquam formam non prohibetur habere aliquid aliud nisi solum, quod est oppositum illi, ergo oppositum formæ non potest reperiri in ipso subiecto habente formam, quod est non posse illi conuenire nec per accidens, idest,

idest, per aliud, & ratione subiecti.

Circa Terrium. Quomodo tale prædicatum superius sit totum respectu inferioris, eius explicatio sumitur ex D. Thom. loco supra citato, & in c. 3. de ent. & essent. & Caietano ibi explicante quomodo genus, & habeat rationem partis, & rationem totius, nam in prædicato generico (& idem est de specifico, & differentiali) & continetur aliquid quod explicat, & aliquid quod implicat seu includit, v.g. animal exprimit naturam sensitiuam, & corpus exprimit naturam corpoream, idest, exprimit id quod actu constituit sensitiuum, & corporeum, includit verò omne illud à quo talis ratio sensitiui, vel corporei prouenire potest, siue includat aliquid præter rationem sensitiui, siue non. Et quidem quantum ad id, quod exprimi non est dubium, quod genus, v.g. animal solum partem naturæ dicit, & non totum, vnde si nihil amplius includeret ly *animal*, quam id quod explicat, non posset prædicari de aliquo, in quo inuenitur aliquid amplius, quam ipsa ratio naturæ sensitiuæ, sed quia significat omnem formam, à qua ratio animalis prouenit, siue à tali forma sola illa ratio proueniat, siue aliquid aliud, inde est, quod animal in illo conceptu includit virtualiter quidquid habet rationem animalis, & homo quidquid habet rationem hominis.

Ex qua doctrina. Colligitur quod ut aliquid sit genus, & vniuersale, non debet significare suum significatum cum præcisione formali, sed solum cum præcisione totali, hoc est, non debet ita significare rationem aliquam seu formam, quod excludat ab ijs, quæ illi adiungi, &

con-

concerni possunt, sed significat omne illud in quo innenitur talis perfectio, etiamsi ulterio- rem aliam perfectionem inuoluat, licet illam non explicet. Atque ita significari per modum totius, & partis nō est idem quod esse partem, vel totum, nam etiam id quod est pars potest significari per modum totius respectu alterius partis, in qua includitur, sicut animalitas re- spectu humanitatis, de qua prædicatur, sed si- gnificari per modum totius consistit in hoc, quod significetur aliquid respectu alterius, ut includens illud. Significatur autem per mo- dum partis, quando per modum exclusionis significatur aliquid licet in re coniungatur cum illo, quod excludit, & quia in re non datur natura aliqua, vel forma ita constituens aliquē gradum, quod excludat ulteriorem perfectio- nem, vel gradum, sed ab eadem forma sub- stantiali plures gradus proueniunt, ideō dixi- mus supra ex D. Thom. non distingui gradus metaphysicorum in eadem, nisi per rationem.

Circa quartam. Multiplex est diuisio, & differentia prædicationis, quæ resultat ex di- uerso modo habendi identitatem, & diuersi- tatem rationis, in qua est totum fundamentum prædicationis, ut diximus ex D. Th. Et primò diuiditur in directam, & indirectam. Directa est, quando id quod se habet per modum forma tenet se ex parte prædicati, indirecta quando è conuerso id quod se habet per modum subie- cti ponitur ex parte prædicati. Vbi nomine su- biecti & formæ non solum intelligimus id, quod Physice se habet ut forma, & materia, sed quod habet se quomocumque, ut actiuans, & actuabile, vel superius, & inferius, dicitur enim

enim superius forma inferioris, non quia gradus superior sit actualior, sed quia contrahibilis, & omne quod contrahitur, quasi recipitur in eo, ad quod contrahitur. Si autem sint praedicata aequalia ut homo & rationale, vel risibile, tunc id quod actuatur se habet ut forma, & quod actuatur ut subiectum. Vnde haec est directa praedicatio homo est rationalis, homo est risibilis: indirecta verò rationale est homo.

Et si inquires: Quando praedicatur gradus superior individuatus, ut si dicas, homo est hoc animal, an sit praedicatio directa?

Respond. Quod ut fiat praedicatio directa debet poni ex parte subiecti genus individuatum, ut si dicas, hoc animal est homo, ly *hoc animal* demonstrante individuum hominis, vel illud animal quod est in homine. Etenim hoc ipso, quod gradus superior individuatur, ex modo significandi individualiter, se habet ut recipiens ipsam rationem speciei, quia supponit pro animali, quod est individuum hominis, ergo respicit hominem ut superius, & consequenter ut praedicatum formale, & ita haec est directa, hoc animal est homo, indirecta verò; homo est hoc animal: secus si dicas, homo est quoddam animal, si ly *quoddam* non demonstret individuum, sed rationem genericam animalis.

Praedicatio directa dividitur in essentialem & accidentalem. Essentialis est *Quando praedicatum est de intrinseca ratione subiecti*. Accidentalis, *Quando est extra illam*. Vbi oportet discernere identitatem extremorum, & connexionem. Identitas pertinet ad conjunctionem

nem, seu conuenientiam, & adæquationem extremorum, quæ ad omnem prædicationem requiritur; connexio ad habitudinem, qua extrema ordinantur vel essentialiter & intrinsecè, vel accidentaliter & extrinsecè.

Prædicatio disparata est illa, *Qua constat ex terminis disparatè se habentibus, qui non habent habitudinem conuenientiae inter se*; & bene nota. Quod aliud est prædicatio disparata, vel identica, aliud propositio disparata, vel identica. Propositio enim respicit veritatem & falsitatem, prædicatio habitudinem terminorum. Et potest esse prædicatio disparata, & propositio vera, & inter terminos identicos potest esse propositio falsa. Vt patet in negatiuis, *homo non est lapis*, est propositio vera, & prædicatio disparata, idest, inter terminos disparatos. Et ista propositio, *homo non est homo*, est falsa, sed prædicatio identica, idest, inter terminos identicos. In propositionibus tamen affirmatiuis si prædicatio est disparata, propositio semper est falsa, & si prædicatio est identica, propositio est vera.

Prædicatio identica, alia identica materialiter, alia formaliter. Formaliter identica est *quando ex vi significationis terminorum idem significat unus ac alter*: vt si dicatur, *homo est homo*. Materialiter identica est, *quando significationes quidem sunt diuersæ, sed realitas seu entitas est eadem*, vt cum dicitur, *actio est passio*, album est substantia, quæ ex parte formæ significatur disparata, ex parte autem materię seu subiecti est identica, si in eodem subiecto conueniant. Et similiter, quando duo accidentia prædicantur ratione
con-

conuenientia in eodem subiecto, ut album est dulce, & vnum attributum de alio in Deo, ut misericordia est iustitia: omnes istae praedicationes sunt identicae materialiter.

ARTICVLVS III.

Quomodo requirantur multa, ut aliquid dicatur vniuersale, vel commune.

Supponimus non esse Idem quod aliquis terminus, vel res significata per illum sic communis, & quod sit vniuersalis, ut expresse docet D. Tho. in 1. sentent. ad Annibaldum dist. 19. q. 4. art. 2. ad 2. vbi inquit. *Vniuersale non est idem quod commune, differunt enim quia commune de se non determinat, an id quod communicatur pluribus sit idem numero, vel non, sed vniuersale hoc determinat quia nunquam idem numero est in pluribus, Similiter 1. p. q. 30. art. 4. ad 3. dicit. Quod in Deo non est particulare, & vniuersale, genus & species, & tamen quaest. 13. art. 9. inter terminos communes numerat Deum. Et constat hoc in individuo vago, quod est terminus communis ut, aliquis homo, quod supponit non suppositione singulari, sed communi, & determinata, & tamen non est vniuersale, quia non potest distribui, & res ipsa significata non omnino praescindit a conditionibus indiuiduantibus, sed significat naturam communem cum modo indiuiduationis non perfecte singularizato ratione cuius impeditur ne sit vniuersale, licet sit commune. Vnde dicit S. Thom. q. 9. de Potent. art. 2. ac 1. *Quod sicut nomen, quod signifi-*
cat*

eat naturam est commune, & definibile. ita, & nomen quod significat naturam cum tali modo existendi, sicut ly aliquis homo,

Ad difficultatem ergo propositam respon-
deo. Quod ut aliquid sit commune multis nō
requiritur quod habeat multa individua in re
existentia, vel possibilia, sed sufficit, quod ex
modo concipiendi, concipiatur ut communi-
cabile pluribus, & terminus sic significans il-
lam naturam, dicetur terminus communis. Et
quidem quod non requiratur pluralitas indiui-
duorum a se existentium aperte docet Div.
Thom. 7. Metaphys. lect. 13. Exponens defi-
nitionem vniuersalis traditam à Philosoph.
Quod vniuersale est, quod pluribus natum est
in esse. Vbi notat ideo dici, quod pluribus in
esse natum est, non quod pluribus inest, quia
quadam vniuersalia sunt quæ non continent sub
se nisi vnum singulare, sicut Sol, & Luna. sed
hoc (inquit D. Thom.) non est, quia ipsa natura
speciei quantum est de se nata est in pluribus es-
se, sed est aliquid aliud prohibens, sicut quod
totæ natura speciei comprehendatur in vno in-
diuiduo. Quæ doctrina etiam deseruit pro
naturis, in quibus pluralitas indiuiduorum est
impossibilis, ut de Angelis communiter existi-
mant Thomistæ, & infra dicemus in quæst. de
specie.

Quod verò modus cognoscendi sufficiat ad
constituendum aliquid, ut commune sumitur
ex ipso D Thom. 1. p. q. 13. art. 9. vbi docet,
Quod si formas similes cognosceremus secun-
dum quod in se sunt nequere, neque ratione ap-
prehenderentur. ut communes, seu ut commu-
nificabiles, quia verò apprehenduntur ad modū

verum compositarum, & non adequatè, ut in se ipsa, apprehenduntur, ut communicabiles quantum est ex modo significandi, & cognoscendi, licet in re communicabiles non sint. Et hac ratione lib. 1. Summul. cap. 7. diximus; quod terminus communis est ille, qui significat plura diuisim, idest, communicabiliter est in pluribus, vel ratione rei significatæ, vel ex modo concipiendi. Et ita hoc nomen Deus est terminus communis ex modo significandi. Quando enim in ipsis rebus datur multiplicatio plurium, cum similitudine in aliqua ratione communi, tunc accipitur aliquid, ut commune ex parte rei significatæ: quando tamen in re non datur multiplicatio, nec similitudo multorum, ex parte ipsius rei significatæ directè, & per se non datur fundamentum ad concipiendam naturam communem: indirectè tamen, quia non repugnat talem naturam concipi inadæquatè, & imperfectè non apprehensa ratione singularitatis, sed solius naturæ ad instar eorum, in quibus natura multiplicatur ex tali modo concipiendi dicitur natura illa communis; & terminus illam significans, communis.

An verò hoc solum sufficiat, ut natura aliqua dicatur vniuersalis tanquam genus, vel species, præsertim vniuersalitate prædicabili, & Logica? Ad hoc dicemus infra in quaestione de specie, vbi hoc latius discutiètur loquendo de Angelis. Interim sufficit dicere, quòd ut aliquid sit vniuersale, & prædicabile de pluribus, non sufficit, quòd concipiatur, ut commune, remota singularitate, quasi negatiuè, sed requiritur, quòd ita abstrahat ab inferiori-

ferioribus, quòd etiam possit contrahi ad illa per additionem differentie inferioris ad superiorem naturam, quod non potest esse sine aliqua potentialitate eius, quòd concipitur ut contrahibile ad id quod concipitur, ut contrahens. Quod ergo natura creata cum potentialitate apprehendatur non est ei repugnans, sed maximè conuenit, & consequenter non repugnat vniuersalitas logica, diuina autem natura non potest cum aliqua potentialitate concipi, etiam si inadæquatè eius perfectiones concipiantur, & ideò sine singularitate potest concipi ut communis, sed non ut contrahibilis, & vniuersalis.

Et si dicas. Quia etiam repugnat actui puro concipi sine singularitate, & ut commune multis, siquidem conceptus repræsentans solam naturam, & non singularitatem concipitur, ut multiplicabilis ex modo significandi, ergo, & contrahibilis, & in potentia ad singularitatem.

Respond. Negand. anteced. quia ut natura diuina concipiat sine singularitate non requiritur, quod concipiat cum aliqua potentialitate, sed sufficit quòd non adæquatè concipiat à nobis, sed solum eius quidditas, & non ipse modus, seu singularitas, sicut concipitur natura sine personis, & vnum attributum sine alio, non quia concipitur, ut in potentia ad illud, sed ut actu includens, non tamen actu exprimens illud. Ut autem concipiat eadem natura, ut contrahibilis, & multiplicabilis ad plura singularia requiritur, quòd concipiat talis natura, ut non includens singularitatem ipsam, seu ut existens in poten-

entia ad illam, quod repugnat conceptui
is puri. Et licet concipiatur, ut communis
leis ex modo significandi, non tamen, ut
multiplicabilis per contractionem, & addi-
tionem differentiarum contrahentis, sed ita concipitur
communis ad multa ex modo significandi,
quod non explicat modum multiplicationis
nes potentialitatem.

Quod si infer, Ergo Analoga non dicentur
uniuersalia, quia non possunt perfecte abstra-
here à suis inferioribus, ita ut actu non inclu-
antur in differentiis, ut dicemus infra agen-
tes de Analogia.

Et Confirm. Quia iste terminus complexus
Petrus, & Paulus, habet vim termini com-
munis sumpto ly, & diuisione ut diximus in
summulis, & per modum vniuersalis distri-
buentis, quia confundit terminum sequentem
in propositione, ut cum dico, *Petrus, & Paulus*
est animal, & tamen non præscindit ab ipsis
indiuidualis, ergo hoc non requiritur ad ratio-
nem vniuersalis.

Respond. Quod analogia, si sint duorum con-
ceptuum, habent se sicut æquivoca, quæ vni-
uersalia non sunt, quia carent unitate con-
ceptus; si autem habeant vnum conceptum,
quia non perfecte abstrahunt ab inferioribus,
non sunt perfecte vniuersalia, sed reducuntur
ad vniuersale, cum enim vniuersale diuidatur
adæquatè in quinque prædicabilia, & analo-
gum non sit genus, nec species, vel aliquod
aliud prædicabile, non erit etiam per se vni-
uersale. Et tamen non eodem modo continet dif-
ferentias inferiores in actu, sicut Deus singu-
laritatem, & attributa, quia in confuso, & im-

perfectè, non in actu puro illas continet.

Ad Confirm. Dicitur. Quòd ille terminus complexus habet vim termini communis respectu suarum partium ex quibus componitur, quatenus illis diuisiuè, seu cuilibet illorum applicat prædicatum, quod de ipso dicitur. Et sic quia supponit pro quolibet illorum, dicitur habere rationem termini communi, & vniuersalis distributi, non tamen habet omnes condiciones termini vniuersalis, & multo minus rei vniuersaliter acceptæ, quæ per modum vnius naturæ abstrahit à pluribus, hanc enim naturam non significat ille terminus complexus, sed tamen suo modo abstrahit à pluribus complexuè, eo modo quo totum complexè significatum abstrahit à partibus, vt determinatè, & incomplexè significatis.

Vltimo instabis: Quia repugnat, quòd Deus verus sit communis multis etiam ex modo significandi, nam modus significandi, si est verus, debet conformari modo essendi, sed repugnat esse verum Deum, qui non sit vnus, & singularis, ergo repugnat ex modo significandi vero, quòd accipiatur vt communis.

Et confirm. Quia Petrus nunquam potest concipi vt communis, eo quod essentialiter, & intrinsecè est singularis, sed Deus multo magis intrinsecè est singularis quàm Petrus, ergo magis illi repugnat concipi vt communis; licet enim possit apprehendi in Deo vnum attributum sine alio, non tamen cum opposito attributo, sicut licet possit considerari sine misericordia, non tamen cum crudelitate, ergo licet possit considerari sine singularitate, non tamen cum communitate ad plura.

Resp.

Respond. Quod Deus verus, vt adæquatè cognitus, & eo modo, quo est in se, non potest concipi vt communis, cognitus autem inadæquate, & ad instar rei compositæ, ex modo cognoscendi concipitur, vt communis, licet non vt in re communicabilis; modus autem significandi, & cognoscendi conformatur quidem modo essendi quantum ad affirmationem, & negationem, vt sit verus, vel falsus, quantum ad modum autem repræsentationis non sequitur modum essendi, qui est in rebus, sed modum quo obijcitur ipsi cognitioni; vnde si intellectus concipiens modo communi iudicaret Deum esse communem, falleretur, repræsentando tamen, & apprehendendo illud sine singularitate ad instar rei communis, non fallitur. Vnde dicit D. Thom. 1. p. q. 13. art. 9. ad 2. *Quod omnia non sequuntur modum essendi qui est in rebus, sed modum essendi secundum quod in cognitione nostra est, & tamen secundum rei veritatem est incommunicabile illud nomen,* quia videlicet in repræsentando modus cognoscendi non semper conformatur modo essendi, nisi quando concipit rem, vt est in se: in iudicando autem semper conformatur modo essendi, si verè iudicat. Et ita Deus repræsentatur modo communi, sed non affirmatur esse communicabilis.

Ad confirm. respondetur. Quod singularitas magis est essentialis Deo quàm Petro ex parte ipsius rei cognitæ, non tamen ex parte modi significandi, quia Petrus significat solam singularitatem naturæ, vnde ex vialis nominis non potest concipi vt communis. Deus autem non significat directè singularitatem, sed

naturam diuinā, cui essentialiter conueniit singularitas sicut, & alia attributa, à quibus tamen ratione inadæquati conceptus præscindit. Vnde dicit D. Thom. 1. p. q. 13. art. 9. ad 2. quòd *ly Deus, est nomen appellatiuum; & non proprium*. Et art. 8. dici, *quod est nomen nature*, non ergo est nomen singularitatis, licet illa natura singularis sit in se. Neque hoc est apprehendere naturam cum opposito sibi, quia non attribuitur illi communitas, quæ est oppositum singularitatis, sed ex modo cognoscendi sine singularitate repræsentatur ad modum rei communis, non potest autem ex modo cognoscendi sequi in Deo crudelitas, sed si apprehenditur in Deo, est per attributionem talis formæ, quod semper est falsum.

ARTICVLVS IV.

Quomodo verificentur predicationes in Concretis, & Abstractis substantialibus.

IN præsentī tria sunt certa apud Authores. *Primum est*, quòd tam in concretis substantialibus, quàm accidentalibus concretum bene prædicatur de concreto, vt homo est animal, homo est albus. *Secundum est*. Quod abstracta non prædicantur verè de concretis, nec concreta de abstractis ex vi modi significandi, vt S. Thom. latè docet cap. 3. de ente, & essent. Et sumitur ex 1. p. q. 5. art. 3. licet aliquando identicè verificentur, vt in diuinis est idem Deitas & Deus, Paternitas & Pater, & in transcendentibus idem est vnitas, & vnum, entitas & ens; vnde dicit D. Tho. q. 21. de veritate

ritate art. 4. ad 4. Quod formæ generales non vno modo dicuntur, non enim dicitur ens solum id quod est, sed etiam id quo aliquid est, atque iam tam in abstracto quam in concreto prædicatur ens, & formæ transcendentes tam de concretis, quàm de abstractis.

Tertium est. Quòd in accidentibus prædicata superiora prædicantur de inferioribus in abstracto, vt albedo est color, est qualitas, &c. quia in accidentibus abstracta significant totam essentiam, & intrinsecam rationem: accidentia enim secundum se non sunt nisi formæ. Vnde dicit S. Thom. cap. 7. de ente, & essent. Quod accidentia concretivè dicta non ponuntur in prædicamento sicut species, vel genera, vt album, vel musicum, nisi per reductionem, sed solum secundum, quod abstractè significantur, vt albedo, & musica; & de eodem videri potest opusc. 42. cap. 19. & q. 3. de veritate art. 7. ad 2.

Et fundamentum. Omnium istorum ex hoc tantum pendet, quòd prædicatio debet fieri secundum applicationem totius ad totum, cum enim vnum affirmatur esse aliud, prædicatum non debet minus continere quàm subiectum, vel è contra quantum est ex modo significationis, & ideò quando vtrumque est concretum, vtrumque significatur vt totum, & ita rectè identificantur per prædicationem. E contra verò abstractum respectu concreti se habet vt pars, quia abstrahit ab illo non sicut superius ab inferiori, sed sicut formale à materiali, & forma à subiecto, vnde non potest inter abstractum, & concretum fieri adæquatio, quia omnis pars est minor toto, nisi

forte sit transcendens, quia tunc imbibitur in omni toto. & in omni parte, & ita non se habet ut pars respectu concreti. Solum in ista prædicatione excipitur quantitas, de qua in abstracto prædicatur quantum, dicitur enim quantitas quanta, seu extensa. Quod ideo est, quia quantitas etiam separata à subiecto habet partes, ut constat in Eucharistia, habens autem partes dicitur extensum & quantum, & sic de quantitate bene prædicatur, quod est quanta. Ac denique ex eodem fundamento constat quod abstracta accidentium rectè prædicantur de similibus abstractis, quia dicunt totam rationem, quæ in accidentibus invenitur, & sic per modum totius prædicantur.

Duo ergo solum supersunt dubia. *Primum.* An prædictio abstracti de concreto in substantialibus sit vera secundum se, & solum ex defectu modi significandi sit falsa? *Secundum.* Vtrum in abstractis substantialibus sit vera, & formalis prædictio superioris de inferiori, ut cum dicitur, *humanitas est animalitas*.

Ad primum. Quidam existimant prædicatum substantiale in abstracto verè prædicari de inferioribus, non tamen completè, & adæquate, & sic quantum est ex se verè prædicari de inferioribus in concreto, ita Martinez disput. 3. in Perphyr. quæst. 1. *Fundamentum est.* Quia abstractum licet significetur ut pars, re ipsa tamen est idem cum toto, sed veritas prædicationis solum habet pro obiecto unitatem, & identitatem à parte rei, quæ est in ipsis extremis, ergo ex vi terminorum talis prædictio vera est. Cæterum non prædicatur completè,

plete, & adæquatè, quia tunc completa, & adæquata est prædicatio; cum prædicatum dicit, vel non excludit quidquid est in subiecto. Abstractum autem non dicit totum, quod est in subiecto, cum significetur *ut* pars, concretum verò *ut* totum, ergo non completè prædicatur. Atque ita hæc prædicatio, *homo est humanitas*, non verificatur pro substituto, idest, pro ipso supposito, seu subiecto, quod est homo, sed pro constituto, idest, pro ipsa natura, quæ identificatur cum homine.

Oppositum tamen deducitur ex D. Thom. qui ad veritatem propositionum, non solum requirit identitatem ex parte rei significatæ, sed etiam ex parte modi significandi, ut patet in 1. p. q. 39. art. 4. & 5. Et expressè excludit hanc prædicationem humanitatis de homine 1. p. q. 3. art. 3. de ente, & essent c. 3. in fine, & opusc. 69. lect. 2. semper eadem utens ratione, quia scilicet concretum, *ut* homo, includit in suo conceptu, seu non excludit aliquid quod non includit humanitas, dicit enim humanitas id præcise, quo homo est homo, concretum autem, scilicet, homo, dicit id quod habet humanitatem, non est autem inconueniens, quod habens humanitatem habeat aliquid aliud, quod humanitas non sit, atque adeò de quo humanitas non prædicetur, & ideo non fundant veritatem, neque prædicationem ista extrema.

Sed dicunt S. Thom. solum negare prædicationem formalem, & quasi completam, non fundamentalem, & ex parte identitatis extremorum, hoc enim solum respicit iudicium verum, Sed contra urget ipsa ratio D. Thom.

qua ad fundamentum veritatis requiritur identitas cum omni illo de quo aliquid prædicatur, nam si habeat identitatem cum aliquo, & non cum alio, pro ea parte qua non habet, redditur disconueniens, & incongrua prædicatio, & consequenter falsa, nam ad falsitatem, cum sit malum, & defectus, sufficit ex vna parte deficere, & ideo S.Thom. dixit r.p.q.3.citata. quod homo, & humanitas non sunt omnino idem, atque adeò ex ea parte qua non sunt idem, prædicatio claudicat.

Et vt hoc amplius penetres. Aduerte, quod fundamentum veritatis non est identitas prout solum inueitur in re quomodocumque, sed quod etiam vt obijcitur intellectui sub ea ratione obijciatur, qua identificantur extrema, non sub illa sub qua non identificantur, alioquin variatur appellatio, & præcisio, videmus enim, quòd animal, & homo, identificantur in re, & tamen animal dicitur genus, & homo non dicitur genus, quia hoc prædicatum non conuenit illis quatenus identificantur, sed quatenus virtualiter præscinduntur, & sub præcissione obijciuntur intellectui; & similiter dicimus, quod Pater generat, & essentia diuina non generat, licet identificentur Pater & essentia. Ita ergo vt verificetur prædicatio humanitatis de homine, non sufficit quod humanitas, & homo identificentur quomodocumque, sed quod obijciantur prædicationi, vt, identificata, & non sub præcissione qua vnum præscindit ab alio. Vt autem significatur nomine humanitatis in abstracto, obijcitur sub abstractione, & præcissione ab homine in concreto, & vt pars illius, & non omni-
no

no idem cum omni eo quod includit concretum hominis, ergo non datur fundamentum ex parte rei ad veram prædicationem, sicut non datur fundamentum, ut verè dicatur essentia generat, licet sit idem cum Patre qui generat, & sicut non potest vlllo modo admitti, quod essentia generat explicando pro substituto, seu supposito, sed non pro constituto, idest, natura, licet in re suppositum essentia generet, quia ex modo significandi id non dicitur, ita non valet è contra, quod humanitas est homo pro constituto, idest, natura, licet non pro substituto, quia ex modo significandi homo non solam naturam significat.

Vnde soluitur fundamentum contrarium, licet enim humanitas & homo sint idem ex parte naturæ, præscindunt tamen, & distinguuntur secundum modum significandi, & concipiendi, & ideò non habent fundamentum ut prædicentur quatenus stant sub tali modo significandi, sicut de hac, essentia diuina generat, dictum est.

Ad secundum dubium. Aliqui sentiunt illas Prædicationes in quibus abstractum substantiale de abstracto substantiali prædicatur, esse falsas, quia existimant abstractum non solum abstrahere à concreto, sed ab omni alia ratione, quæ non sit formaliter ipsa forma abstracta. Humanitas enim dicit præcisè id, quo homo est homo, vnde non includit etiam implicitè aliud, quàm quod explicat sub ista abstractione, & sic non continet aliud abstractum de quo prædicetur, quia vbi est abstractio formalis, nullo modo includit id à quo abstrahit, sed facit quasi appellationem,

& reduplicationem formæ abstractæ.

Nihilominus Resp. Per distinctionem, quod formæ abstractæ possunt teneri, vel specificatiue, vel reduplicatiue, primo modo solum explicant naturam cum omni formali constitutiuo sub abstractione tanquam sub modo efficiendi. Secundo modo explicant, & reduplicant officium abstractionis formalis. Et primo modo potest vna forma abstracta communis prædicari de aliqua minus communi etiam in abstracto, vt dicendo: *Humanitas est animalitas*, vel in exemplo Philosophi 7. *Metaphys. lect. 12.* apud D. Thom. *Quod scissio pedis est quædam pedalitas*. Si verò sumatur secundo modo, non potest verificari prædicatio abstracti de abstracto.

Ratio primæ partis est. Quia istæ formæ in abstracto de aliquo prædicantur, hæc enim est vera, *Ipsa animalitas est animalitas, hæc humanitas est humanitas*, ergo etiam hæc erit vera, *humanitas est animalitas*. Anteced. constat. Quia Verbum diuinum assumpsit aliquam humanitatem in singulari, ergo est verum dicere, quod hæc humanitas Verbi est humanitas, & hæc animalitas, quâ assumpsit, est animalitas. Conseq. verò pset, quia si est verum dicere quædam animalitas est animalitas, ergo descendendo sub illa poterit ostendi aliqua animalitas, quæ est humanitas: nam vna ex animalitatibus est humanitas, & alia equinitas, ergo sicut aliqua animalitas est animalitas, ita & humanitas est animalitas, quia humanitas quædam animalitas est: animalitas enim, quæ est in homine, natura hominis est, & consequenter humanitas. Et idem dicimus de hac
Petrei.

Petreatas est quædam humanitas, dummodo nomine Petreatatis non suppositualitas intelligatur, sed singularitas humanitatis, suppositum enim à natura distinguitur.

Et confirmatur. Quia humanitas, & quælibet forma abstracta habet aliqua prædicata essentialia ex quibus constat, significat enim id, quo homo est homo, homo autem est homo per prædicata essentialia, ergo illa includit humanitas, ergo debent verificari de illa, & prædicari de illa, siquidem illi conueniunt, alioquin darentur aliqua prædicata verè conuenientia alicui, de quo prædicari non possent.

Secunda verò pars constat manifestè, quia ubi interuenit appellatio, & præcisio, quantumvis detur identitas in re, non sequitur prædicatio, sicut licet animal, & homo sint idem, tamen animal sub præcisione animalis est genus, & non homo, & licet iustitia in Deo sit misericordia, tamen non est verum dicere quod attributum iustitiæ reduplicatiuè est attributum misericordiæ, similiter ergo licet humanitas sit animalitas, tamen ratio vnius reduplicatiuè non est ratio alterius: falsum est enim dicere quod ratio, quia aliquid est homo, est animalitas, alioquin ubicumque esset animalitas, esset homo. Et idem potest inueniri in abstractis accidentium, si cum hac præcisione abstrahant.

Et per hoc patet ad fundamentum oppositum, quod confirmat hanc secundam partem. Et quando dicitur quod forma abstracta neque implicite includit id à quo abstrahit,

Respond. Id verum esse, sed tamen forma abstracta solum abstrahit à suo concreto, &

materiali subiecto, non à suis prædicatis essentialibus consideratis etiam in abstracto.

Et si insister: Hæc est bona consequentia: Humanitas est id quo homo est homo, & humanitas est animalitas, ergo animalitas est id quo homo est homo. Consequens est falsum, ergo aliqua ex præmissis: non maior, quia est definitio humanitatis, quæ solum dicit in quo homo est homo, ergo minor erit falsa.

Respond. Variari appellationem, quia minor verificatur specificatiuè solum, & sine vlla appellatione: maior autem verificatur sub appellatione, & præcisione, non quidem ipsius definitionis, sed ipsius definiti, quia quando dicitur id quo homo est homo, significatur humanitas sub conceptu, & reduplicatione suæ præcisionis, idest, sub ea ratione, qua præcise respicit suum constitutum formaliter, homo enim humanitate est homo, & humanitate non est animal, licet animal, & homo sint idem, & ita quando dicitur, humanitas est id quo homo est homo, facit hunc sensum, ratio humanitatis, vt distinguitur ab animalitate est id quo homo est homo, idest, vt respicit hominem sub formalitate constituentis illum in ratione hominis, sic licet includat animalitatem, non tamen sub illa ratione constituit ipsum hominem.

Quod si adhuc obijcias. Quia D.Th. essentiæ significatæ per modum partis, vt humanitas, negat quod conueniat ratio speciei, vel differentię, vt patet in 4. cap. de ente, & essent. Et vniuersaliter docet non esse in genere quasi directè, nisi quod habet naturam completam, & sic manus, aliæ partes non sunt in genere,

re, vt patet in 3. dist. 6. q. 1. art. 1. ad 1. constat autem quod humanitas, & reliqua abstracta significantur vt partes. Ac denique expresse dicit quod humanitas neque est genus, nec species in 1. dist. 23. q. 1, art. 1. in corpore. Ergo falso dicimus, quod prædicatur de aliquo, cum non sit vniuersale.

Respond. Sensem D. Thomæ in primo loco solum esse, quod abstracta non habent rationem generis, & speciei respectu suorum concretorum, de quibus non prædicantur, non tamen negauit D. Thom. quod abstracta de alijs abstractis prædicari non possint tanquam superius, & inferius. Et licet hoc etiam modo possemus explicare alia duo loca, addimus tamen solum velle D. Thom. quod partes, & reliqua entia incompleta non sunt directè in prædicamento, non tamen negat quod possint esse reductiue. Et eodem modo humanitas in quantum significatur per modum partis non est genus, vel species directè, sed reductiue. Vel etiam in tertio loco sumit humanitatem sub reduplicatione, & præcisione, sicut dictum est in secunda parte conclusionis, sic enim non est genus, vel species, quod prædicetur, vel de quo prædicetur aliquid.

ARTICVLVS V.

Quomodo verificentur prædicationes in Concretis de Abstractis accidentalibus.

PLura, quæ de accidentium concretorum definitione dicenda sunt, in q. 7. de genere disputabimus. Nunc solum quid concreta ista,

ista, & abstracta accidentium sint, & quomodo prædicentur, indicandum est.

In concretis ergo accidentium tria consideramus, scilicet, subiectum quod recipit formam, & ab ea denominatur, quod aliqui vocant *substitutum*, formam quæ in subiecto recipitur, illudque afficit, & denominat, & tandem compositum, seu conflatum illud tertium ex his resultans, quod aliqui vocant *constitutum*, v.g. in albo possumus accipere ipsum pro subiecto, quod denominatur, & pro conflato, seu composito ex subiecto, & forma, ubi etiam forma ipsa, quæ est albedo, includitur.

Aliqui ergo apprehendunt ista concreta accidentium longe diuerso, aut inuerso ordine à communi modo sentiendi. Communiter enim existimant Authores abstractam accidentium esse ipsam formam accidentalem sumptam sine aliqua connotatione, vel significatione subiecti habentis illam. Concretum verò esse ipsum accidens ut connotans subiectum habens illud. Similiter ex subiecto, & accidente non resultare vnum ens per se, seu quidditatem vnā, sed ens per accidens. Denique ipsum concretum accidentis, v.g. album non significare directè ipsam aggregatum, seu constitutum ex subiecto, & accidente, sed significare formaliter ipsammet formam connotando in obliquo subiectum, quod habet illam. Contra quod Authores isti dicunt ipsam formam accidentalem propriè non esse id quod est abstractum respectu subiecti, v.g. quod albo non est abstractum respectu habentis illam; sed in albedine illud esse abstractum

Etum quod est ratio qua albedo est albedo, v.g. albedinitas, vel quid simile, & sic distinguunt concretum Physicum, & Metaphysicum, & similiter abstractum, Physicum dicunt concernere subiectum in quo est forma; Metaphysicum concernere formam, & rationem formæ.

Secundò, censent accidens abstractum etiam præcise sumptum verè prædicari de concreto, quia identificatur cum illo, non tamen completè, & adæquate, sicut artic. præced. de abstractis substantialibus dictum est.

Tertiò, concretum accidentis posse sumi pro constituto, vel pro substituto. Et quidem constitutum, quod est resultans ex forma, & subiecto dicunt prædicari de suis inferioribus quidditatiuè, tanquam primum, vel secundum prædicabile: pro substituto autem, idest, pro subiecto habente formam, prædicari de his, quæ habent formam denominatiuè, & vt quintum prædicabile. Constitutum autem non prædicari de subiectis quibus inhæret forma, quia sic prædicaretur totum de parte, cum illud constitutum resultet ex forma, & subiecto. Et hoc constitutum dicunt esse definibile quando definitur concretum accidentale, neque esse ens per accidens, sed per se, vtpotè vnica definitione definibile. Et distinguuntur inter aggregatum, & compositum. Et aggregatum, inquit, est ens per accidens, quia non dicit aliud quam ipsas partes, scilicet, subiectum, & formam aggregatas, & coniunctas, compositum verò est illud, quod resultat ex coniunctione partium.

Nihilominus quod attinet ad rationem defi-

definibilem istorum concretorum dicemus in quest. 7. sequenti. Quod verò abstractum accidentium non possit verè prædicari de concreto, ex dictis in præcedenti articulo manifestè constat, cum abstractum significetur per modum partis respectu sui concreti, quod habet rationem totius; de illa verò distinctione inter concretum physicum, & metaphysicum non est multum curandum, nam reuera constat formam accidentalem significari in abstracto respectu sui subiecti, ut loquitur D. Thom. 1. 2. q. 53. art. 2. & 3. & in cap. 7. de ente, & essent. circa finem, & opus. 42. cap. 19. & 7. Metaph. lect. 1. Et apud Authores nihil est notius, quàm quod albedo dicatur abstractum respectu albi, quod est concretum, quia illud dicitur concretum, quod significat formam connotando id quod habet illam, quod propriissimè reperitur in subiecto physicè recipiente albedinem, vel aliam formam accidentalem. Quod verò dicatur concretum metaphysicum ipsa forma respectu rationis formæ, valde impropria locutio est, licet enim forma accidentalis dici possit composita ex genere, & differentia, quia ponitur in prædicamento, non tamen ipsa forma dicitur concretum, seu habens rationem formæ, siquidem id, quod constituitur in genere, seu prædicamento accidentis, forma quædam est accidentalis, non ergo est propriè concretum habens formam, vel rationem formæ, forma enim, ut forma concretum non dicit, quod propriè appellatur ipsum habens talem formam.

Restat ergo. Ut videamus in præsentì Duo.
Pri-

Primum est. An illud constitutum, seu resultans ex subiecto physico, & accidenti sit ens per accidens? *Secundum.* Quomodo praedicatio, accidentis concreti verificetur respectu sui subiecti, quod denominat, & respectu sui constituti, de quo essentialiter praedicatur, haec enim praedicatio est denominatiua, corpus est album, ista verò quidditatiua, album est coloratum, hoc album est album.

Et quantum ad primum: Sententia D. Tho. apertissima est, ex accidenti, & subiecto physico in quo recipitur, non resultare aliquam quidditatem per se, sed ens per accidens: ut constat ex cap. 7. de ente, & essent. circa principium. Ex accidente, inquit, & subiecto non fit unum per se, sed unum per accidens, & ideo ex eorum coniunctione non resultat essentia quaedam, sicut ex coniunctione formae cum materia. Et idem expressè habet in opusc. 2. quod est compendium Theologiae cap. 211. sed praecipue in 7. Metaphys. lect. 3. ponit S. Thomas ex Philosopho istammet quaestionem in terminis, inquit enim sic: Sicut quoddam compositum est ignis ex materia, & forma substantiali, ita est quaedam compositio ex substantiis, & accidentibus, & ideo perscrutandum est, cum aliqua sit definitio substantiarum compositarum ex formis, & materiis, si etiam cuiuscumque istorum compositorum ex accidentibus, & subiectis, est ratio quod quid id est, si habent definitionem, quae est ratio significans quod quid erat esse, & iterum si est in eis hoc ipsum, quod quid; quod significat definitio, id est, si habent aliquam quidditatem, siue aliquid quod potest respondere ad quid. Sicut hoc ipsum quod est
albus

albus homo, est quoddam compositum ex subiecto, & accidente, utrum scilicet albo homini sit quod quid erat esse ei in quantum huiusmodi. Et quia forte aliquis posset dicere, quod albus homo sunt due res, & non una, ideo subiungit, quod hoc ipsum, quod dico, homo albus, habeat unum nomen, quod causa exempli sit vestis, & tunc quaestio erit de isto uno, scilicet de veste, utrum habeat quod quid est, ut possimus dicere, quid est vestem esse. Tunc enim sicut hoc nomen homo significat aliquod compositum scilicet animal rationale, ita & vestis significat aliquod compositum, scilicet hominem album.

Ecce quaestionem à D. Thoma propositam ex Aristotele, quæ inquit de constituto, seu composito ex subiecto, & accidente. Soluit autem eam difficultatem D. Thom. ex verbis Philosophi sic. Dicit ergo primo, quod hoc ipsum quod dico, albus homo sine vestis, quæ hoc ponitur significare, non est aliquid eorum, quæ dicuntur secundum se, immo est aliquid eorum, quæ dicuntur secundum accidens, hoc enim, quod est homo albus, est unum per accidens, non per se. Quod ibi latè profumitur ostendens quod illud coniunctum ex subiecto, & accidente est unum per accidens, Quare in D. Thom. perspicuum est non esse unum per se, sed per accidens, neque definibile unica definitione tanquam una quidditas. Loqui autem de constituto, & non solum de aggregato, ut plures res, similiter de substituto, seu subiecto manifestum est ex ipsis verbis, ubi loquitur de composito ex accidente, & subiecto, non ut duæ res tantum, & hoc compositum dicit esse unum per accidens, de ipso autem subiecto,

*Et*o, seu substituto subdit D. Thomas: *Hoc quod est album, non habet quod quid erat esse sed solum hoc de quo dicitur, scilicet homo, vel homo albus.* Igitur secundum D. Thom. ipsum subiectum, seu substitutum significet aliquid, & habet quidditatem, non verò ipsum constitutum ex accidente, & subiecto.

Ratio autem huius non est difficilis, quia illud constitutum ex accidente, & subiecto constat ex rebus diuersorum prädicamentorum, scilicet substantia, & accidente, hæc autem non possunt conuenire in vnâ quidditatem, & definitionem, quia definitio, & quidditas constat ex genere, & differentia, vbi autem sunt plura prädicamenta, sunt plura genera, prädicamentum enim est series generum, & specierum, & diuersa prädicamenta diuersa genera, & differentias habent, & consequenter diuersas species, seu quidditates, ergo ex rebus diuersorum prädicamentorum non componitur vna quidditas, & vnum definibile constat ex vno genere, & differentia, ergo est ens per accidens. Plura vide inf. q. 7. artic. 3. quomodo accidens in concreto definiatur.

Quantum ad secundum, scilicet quomodo verificatur prædicatio accidentis in concreto? Tota difficultas est in explicando quomodo possit habere identitatem cum eo, de quo prædicatur, sine qua prædicatio vera non datur. Ad hoc ergo.

Respondet primò. Verum esse quod constitutum, seu compositum ex subiecto, & accidente non prædicatur de ipso subiecto, seu constituto, sed solum ipsum accidens intrinsecum,

secum, quod affirmat D. Thomas 7. Metaph. lect. 3. §. Excludit, &c. Vbi inquit: *Non solum hoc quod est esse album non est quod quid est superficie, sed neque ipsum compositum ex utrisque, scilicet superficie, & albedine, quod est esse superficiem albā, vel esse superficie alba, quidditas enim, seu essentia superficie alba non est quidditas, velessentia superficie. Et si quaeratur quare? Responderi potest, quia hoc adest ei, idest, quia cum dico superficiem albam, dicitur aliquid, quod adheret superficie tanquam extrinsecum, & non tanquam intrans essentiam eius. Vbi rationem insinuat quare non possit prædicari de ipso subiecto ipsum constitutum, quia scilicet in constituto importatur aliquid quod non potest intrare quidditatem, nec identificari cum subiecto, scilicet accidens, quod à subiecto distinguitur. Vbi autem non est identitas prædicati cum subiecto, prædicatio non est vera, etiam si utrumque significetur in concreto.*

Secundo Respondeo. Quod accidens in concreto, cum in recto importet formam, & in obliquo subiectum, potest prædicari de aliquo, vel quia habet identitatem cum illo ex parte formæ, vel quia habet identitatem ex parte subiecti connotati, & quando identificatio fit ratione formæ, prædicatio est essentialis, vt si dicas, *album est coloratum, album est disgregatum visus*: Quando verò identificatio fit ratione subiecti connotati, prædicatio est accidentalis, & denominatiua, vt si dicatur, *homo est albus*, ly *albus* identificatur cum homine ratione subiecti, quod connotat, importat enim habens albedinem, habens autem albe-

albedinem identificatur cum homine . Et hac ratione dicit D, Thom. 1. p. q. 13. art. 12. Quod in qualibet propositione affirmatiua vera oportet , quod praedicatum , & subiectum significant idem secundum rem aliquo modo , & aliquo modo diuersum . Et hoc patet , tam in propositionibus essentialibus , quam accidentalibus , manifestum est enim , quod homo , & albus sunt idem subiecto , & differunt ratione (idest essentia) alia est enim ratio hominis , alia ratio albi . Et 7. Metaph. lect. 5. secundum quod in albo intelligitur homo , homo & homo albus sunt idem , & ratione huius , inquit , quod praedicatur , seu dicitur vnum de alio . Praedicatio ergo accidentalis est quidem totius de toto , sed fundatur in identitate , seu vnitatem subiecti , quod de materiali , & connotato importatur in accidente concreto . Sic enim datur sufficiens identitas ad praedicationem accidentalem , & denominatiuam , in qua non datur identitas secundum quidditatem , seu rationem formae , sed secundum denominationem , & rationem subiecti .

At verò si de concreto accidentis praedicatur aliquid , quod habet connexionem , & identitatem cum ipsa forma , tunc praedicatio erit essentialis , quia enim albedo essentialiter est color , ideo cum dico , *album est coloratum* , essentialis praedicatio fit , quia fundatur in connexionem , & identitate ipsius praedicati cum forma , nam etiam in ipsis accidentibus inveniuntur praedicata quidditatiua , quidquid autem quidditatiuum est ipsi formae vniuersali in abstracto , etiam debet esse quidditatiuum ipsi formae in concreto , Quod si aliquando subie-

subiectum ponitur in definitione accidentis, non ponitur tanquam prædicatum quidditativum intrinsecum, sed ut quid extrinsecum, ad quod dicit habitudinem ipsum accidens. Et ideo vocatur definitio per additionem, ut dicitur 7. Metaphys. lect. 4. apud D. Thom. de quo amplius dicemus quæst. 7. de Genere.

SOLVUNTUR ARGUMENTA .

Primò obijciat. Concreta accidentium ponuntur à Philosopho in prædicamentis, ergo non important aliquod ens per accidens, sed per se, siquidem ens per accidens, cum non sit unum, non ponitur per se in prædicamento, ut diximus, sed non potest poni in prædicamento accidentium tale concretum pro substituto, siue subiecto, quia hoc est substantia affecta accidente, nec pro forma solum, quia sic esset abstractum, ergo pro tertio constituto ex accidente, & subiecto. Primum antecedens constat ex Philosopho 5. Metaph. cap. 4. *Secundum se* (inquit) *dicuntur quæcumque significant figuras prædicationum.* Numerans autem istas figuras, inquit: Quod alia significant quantum, alia quale, alia ad aliquid, &c. ergo secundum Philosophum compositum ex accidente, & subiecto sumitur tanquam ens per se positum in prædicamento.

Respond. Philosophum in illo textu sumere concretum ratione formæ, sicut ipse dicit in cap. de substantia, quod *album solam qualitatem significat.* Unde alia numerat ibi in concreto, ut quantum, quale, &c. Alia in abstracto,

Est, ut facere, pati, ubi, &c. Et in 7. Metaph. tex. 16. lect. 4. apud D. Thom. eadem prædicamenta numerat in abstracto dicens, *Quod ens, hoc quidem, hoc aliquid, aliud verò quantitatē, aut qualitatem significat.* Et in 3. topic. cap. 1. dicit quod iustum non ponitur in prædicamento, sed iustitia, & ita quod accidentia in abstracto ponuntur directè in prædicamento docet D. Tho. opusc. 42. c. 19. & c. 7. de ente, & essent. in fine. Non ergo constitutum ex subiecto, & accidente ponitur in prædicamento, sed si concretum ponitur, est ratione formæ.

Secundo obijcies : Forma accidentis, & denominat aliquid, & constituit, ergo ex illa, & resultat aliquid denominatum, & aliquid constitutum denominatum autem est ipsum subiectum, seu substitutum, hoc enim ab albedine denominatur album, sed non constituitur albedine, non enim est idem constitutio subiecti, v. g. hominis, & albi : id ergo quod denominatur, non constituitur forma accidentis, ergo debet designari aliquod tertium, quod constituatur tali forma, & hoc erit album pro constituto. Qui discursus videtur elici ex Philosopho 5. cap. Cathegoriarum, ubi inquit : *Quod eorum quæ sunt in subiecto, nomen quidem de subiecto nihil prohibet predicari, rationem vero impossibile est predicari, ergo subiectum denominatur, non constituitur accidente.* Et similiter 1. Physic. cap. 3. inquit : *Quod si id, quod propriè est, scilicet substantia, idem etiam sit album, albi autem essentia non est, ut propriè sit, ergo essentia albi aliud est à substantia quam denominat, scilicet illud*
con-

constitutum, quod ex albedine, & subiecto resultat.

Et confirm. Quia illud verè, & propriè prædicatur, quod non solum est vnum cum subiecto, sed explicat omne quod est in subiecto, sed concretum accidentis sumptum pro constituto explicat tam subiectum, quàm formam, ergo verè prædicatur de suo inferiori.

Respond. Formam accidentis constituere quidem aliquid, sed non quod sit ens per se, seu *quod quid*, vt dicit Philosophus, sed quod sit ens per accidens, seu *quale quid*, vt in 7. Met. tex. 12. lect. 3. apud D. Thom. dicitur. Quare respectu subiecti cui inhæret, tribuit denominationem, non verò rationem ipsam, seu quidditatem, & ideò dicit Philosophus prædicare nomen (idest, denominationem) non rationem (idest quidditatem) de subiecto. Constituit ergo cum subiecto non quidditatem, vel vnum esse, quod sit aliquid, sed esse quod sit aliquale; vnde non sequitur quod constituat vnum tertium per se, sed vnum tertium quod est qualequid, seu ens per accidens, vt dictum est.

Et ad Textum Philosophi ex 1. Physicorum.

Resp. Sensum esse planum, quod album non est id quod verè est, idest, quidditas eius non est substantia, quæ verè est id quod est, sed essentia eius est quale, quod est aliquale. Inde tamen non sequitur, quod album sit tertium constitutum per se ex subiecto, & albedine, sed sit ipsum subiectum aliquale, quod est ens per accidens.

Ad Confirmat. Respond. Quod illud totum constitutum ex subiecto, & accidente, cum sit
ens

ens per accidens poterit prædicari de alio ente per accidens, de qua prædicatione hic non loquitur. Quod si aliquando fit prædicatio per se inter concreta accidentium, per se ipsas illa attenditur ratione formæ, quæ prædicata quidditativa habet, non ratione tertij constituti.

Ultimo arguitur: Concreta accidentium rectè definiuntur per res diuersorum prædicamentorum, ut cum dicitur album est corpus disgregans visum, talis enim definitio rectè explicat suum definitum, ergo tale concretum est definibile, & ibi ponitur subiectum loco generis, & forma accidentis loco differentię, ut cum dicitur finum est nasus curnus, vel ergo est ens per accidens, vel per se: si ens per accidens, ergo illud est definibile vnica definitione: si ens per se, ergo iam datur ens per se compositum ex rebus diuersorum prædicamentorum, dummodo vnum se habeat ut subiectum, aliud ut actus, & forma. Imò ipsum accidens in abstracto, etiam definitur per res diuersorum prædicamentorum, scilicet, per subiectum in obliquo, & formam in recto, ut cum dicitur, finitas est nass curnitas, ut sæpè dicit D. Thomas locis citatis ex 7. Metaphys.

Et confirm. Quia ens per accidens est illud, quod non potest vnica generatione generari, sed pluribus: album autem vel calidum; aut aliud accidens in concreto possunt vnica generatione generari, ergo tale concretum non est ens per accidens. Consequens est bona. Mai. autem, & Min. sunt expressæ Philosophi 6. Met. tex. 4. lect. 2. apud D. Thom. solum ergo

erit ens per accidens, quod est aggregatum plurium, sicut aceruus lapidum.

Respond. Ex D. Thom. 7. Metaph. lect. 4. & de ente, & essent. cap. 7. in principio. Accidentia quando definiuntur per subiectum, siue in abstracto, siue in concreto, definiri per additionem, idest, per aliquid quod additur extra conceptum essentiae, quia ab illo dependent accidentia, sed talis definitio, quae includit res diuersorum praedicamentorum, non est per se vna, idest, explicatiua vnius quidditatis, sed est vna per-additionem, includens aliquid extra proprium genus. Et quando dicitur, quod perfecte explicat suum definitum.

Respond. Quod perfecte explicat per additionem, non per solam essentialem, & quidditativam definitionem. Et ita ens per accidens erit definibile vnica definitione per additionem, non vnica simpliciter.

Vel secundo dicitur. Quod tale concretum si per se definitur, erit ratione solius formae, & tunc subiectum secundum se, & absolute non intrat definitionem. Sed vt formatum ipsa forma accidentis secundum gradum genericum talis formae ad ipsammet secundum gradum specificum. Et sic cum dicitur album est corpus disaggregatum, non intelligitur corpus absolute, sed vt coloratum, ponitur autem ly corpus, vt sustentans, non vt intrans quidditatem albi.

Et proportionaliter dicendum est, & applicanda vtraque solutio definitioni accidentis in abstracto, quando in eius definitione ponitur subiectum in obliquo. Quare ex rebus diuersorum praedicamentorum non potest constare

stare vnica definitio quasi exintrinsicè componentibus, benè tamen vt extrinsicè terminantibus, sicut potentia, & actus definiuntur per ordinem ad obiectum, non tamen illud, quòd resultat ex accidente, & subiecto per se est definibile, vt dictum est.

Ad confirm. Respond. Ens per accidens dici multipliciter, vt dicitur apud D. Thom. in 5. Metaph. lect. 9. & 6. Metaphys. lect. 1. aliquando quidem per concursum accidentalem ex parte subiecti, seu causæ materialis, & formalis; aliquando per concursum per accidens ex parte agentis. Exemplum primi, vt homo albus, exemplum secundi, vt edificator medicus, quæ ergo sunt per accidens ex parte agentis, non sunt vnica generatione, sed pluribus, & de his ad literam loquitur Philosophus, quæ verò sunt per accidens ex parte subiecti, & formæ tantum, si sit vna forma, poterit vnica generatione fieri, sed accidentali, & secundum quid, non simpliciter vna, sicut cum sit album, vel musicum.



EXPLICATIO TEXTVS

ISAGOGIS PORPHYRII.

Liber Prædicabilium simpliciter appellatur Isagoges, idest introductio, quia deservit ad percipienda Prædicamenta, à quibus Logica Aristotelis incipit. Et quia Logica est prima inter ceteras scientias ordine acquisitionis, ideo introductio ad ipsam absolutè, & simpliciter nominatur (introductio).

In hac ergo introductione declarat Porphyrius quinque voces significantes quinque prædicabilia, idest, quinque modos quibus univèrsale prædicari potest, scilicet, Genus, Species, Differentia, Proprium, & Accidens, quibus ipsa prædicamentorum ordinatio, & series integratur, de qua diuisione, & quomodo ad prædicamenta ordinentur, seq. quæst. dicturi sumus, & aliquid in proœmio huius operis attigimus.

Distribuitur Libellus iste in tres partes. In prima ponit præfationem, in qua explicat intentionem suam. In secunda per singula capita singula prædicabilia tractat, & explicat. In tertia quæ ultimo cap. continetur, omnia inter se confert, & quomodo inter se conveniant, aut differant, discernit.

In Præfatione Porphyrius duo facit. Primò quid sit intentum, & scopus huius operis proponit. Secundò methodum, quam observaturus sit, ostendit. De primo, inquit, propositum sibi esse tractare de **Genere, Specie, Differentia**.

ferentia Proprio, & Accidente, eo quod huiusmodi rationum notitia maximè conducatur ad prædicamenta, & alia, quæ in Logica traduntur, abstinendo tamen à difficilioribus quæstionibus, quæ magis Metaphysicæ sunt. De secundo proponit se breviter ac facile tractaturum, & iuxta modum Peripateticum.

Tria facit Porphyrius in 1. cap. Proponit tres acceptiones generis. Secundò eam, quæ propria Philosophorum est explicat. Tertiò distinctionem eius à reliquis prædicabilibus declarat. Quo ad primum. Prima acceptio generis est pro multitudine hominum ab vno progenitore, vel communi Patria descendentium. Ut Genus Heraclidorum ab Hercule, Genus Romanorum à Romulo. Secunda acceptio est: pro naturali vi quam aliqui trahunt à Parente, vel Patria, sicut dicimus Pindarum genere esse Thebanum, Platonem Atheniensem, Orestem à Tantalo genus ducere; Genus enim dicitur principium generationis cuiusque. Tertia acceptio est pro genere prædicabili, & hoc est proprium Philosophorum.

Quo ad secundum, Describit genus prædicabile hoc modo: Genus est id quod de pluribus specie differentibus hoc ipso quid est prædicatur. Sicut animal prædicatur de equo, & homine.

Quo ad tertium Distinguit genus ab indiuiduis, quæ de vno dicuntur, quia genus de pluribus dicitur: à specie verò, quia genus dicitur de pluribus specie differentibus; species autem de pluribus numero differentibus tantum, ut homo de Petro, & Paulo. A proprio, quia proprium dicitur de vna specie, & eius indiui-

duis, vt risibile de homine, subintellige in quale, genus autem de pluribus specie in quid. A differentia verò & accidentibus communibus, quia prædicantur in quale, & non in quid.

Tres partes continet 2. caput; In prima ponit tres acceptiones speciei; In secunda docet quomodo prædicamentum ordinetur per genera, & species. In tertia definit indiuiduum.

Quo ad primum. Prima acceptio speciei est pro forma, seu pulchritudine externa. Secunda. Pro specie subiicibili, scilicet, de qua genus in eo quod quid prædicatur. Tertiò accipitur pro specie prædicabili, quæ sic definitur: species est quod de pluribus solùm numero differentibus, & in quæstione quid est prædicatur.

Quo ad secundum. Ordinatio cuiusque prædicamenti constat ex genere summo, specie infima, & generibus intermedijs. Genus summum est, supra quod nullum datur genus. Species infima, sub qua nulla datur species. Genera media, seu subalterna, quæ respectu superioris se habent vt species, & respectu inferioris vt genus.

Quo ad tertium. Assignat tres definitiones indiuidui. Prima est. Indiuiduum est id quod de vno solo prædicatur. Secunda ex nominis *Ethymologia*. Indiuiduum est quod diuidi non potest. Tertia est; Indiuiduum est cuius omnes simul proprietates alteri conuenire non possunt.

Caput 3. in duas partes diuiditur. In prima proponuntur quinque diuisiones differentiarum. In secunda totidem definitiones assignantur. Pri-

ma Diuifio. Differentiæ est in communem, propriam, & maximè propriam. Differentia communis est forma qua aliquid à se in alio, atque alio tempore, vel ab alia re differt, vt moueri, ægrotare. Propria differentiæ est forma accidentalis re ipsa inseparabilis, qua vnum differt ab alio, vt risibile facit hominem differre propriè ab hinnibili. Maxime propria est forma, qua essentialiter vnum differt ab alio, vt rationale est differentiæ, qua homo differt ab equo. **Secunda Diuifio.** Differentiarum quædam faciunt differre per accidens vt communis, & propria, quædam per se vt maximè propria. **Tertia Diuifio.** Quædam differentiæ sunt separabiles, vt communes; Aliæ inseparabiles, videlicet propria, & maximè propria. **Quarta Diuifio** est solum differentiæ inseparabilis, quæ alia est per se, vt risibile & mortale, alia per accidens, vt esse finem, vel aquilinum. **Vltima Diuifio.** Differentia essentialis alia est diuifua generis, vel constitutiva speciei, quæ sunt duo officia eiusdem differentiæ.

Quoad secundam partem. Prima definitio sic habet: Differentia est qua species suum genus excedit. Secunda. Differentia est quæ prædicatur de pluribus specie differentiibus in quale essentialiter. Tertia. Differentia est, quæ diuidit ea quæ sub eodem genere collocantur. Quarta. Differentia est qua differunt à se singula. Quinta. Differentia est, qua distinguitur vna species ab alia, itaut sit pars illius essentialis.

Consumitur caput 4. in explicando quatuor acceptiones Proprij, quarum vltima omnibus

alijs præfertur. Proprium primo modo est id quod conuenit alicui speciei, sed non omni, sicut homini esse grammaticum. Proprium secundo modo è conuerso, quod omni speciei conuenit, sed non soli, ut homini esse bipedem. Proprium tertio modo, quod conuenit omni & soli, & semper, ut homini esse risibile, & hoc est maximè proprium, quia conuertitur cum specie.

In capite 5. proponit Porphyrius tres definitiones Accidentis, & vnā diuisionem. Prima definitio est: Accidentis est id quod adest, & abest sine subiecti corruptione. Secunda est: Accidentis est, quod potest eidem inesse & non inesse. Tertia. Accidentis est, quod neque est genus, nec species, neque differentia, neque proprium; semper autem est in subiecto. Diuisio est. Accidentis aliud est separabile, ut dormire, ambulare. Aliud inseparabile, ut nigredo Corui, vel Echyopis; quæ tamen per intellectum separari possunt à subiectis sine eorum destructione.

In 6. capite longo sermone Porphyrius comparat ista quinque prædicabilia inter se, & in quo conueniant, & differant perspicuè explicat. Ex dictis tamen sufficienter cognoscitur, quomodo differant inter se ista prædicabilia, & in quo possint conuenire.

643.42.43.44.45.46

643.43.44.45.46.47

Q V Æ S T I O VI.

*De Diuisione Vniuersalis in quinque
Prædicabilia.*

A R T I C V L V S I.

Utrum hæc Diuisiō sit bona & adequata.



Elebri omnium consensu diuisiō ista in scholis acceptata est, qua diuiduntur quinque Prædicabilia, scilicet Genus, Species, Differentia, Proprium, & Accidens. Duo autem possunt inquiri ad eius explicationem. Primum est quodnam est diuisum huius diuisionis. Secundum. An membra diuidentia exhaustant diuisum, quod est diuisionem esse adequatam.

Quantum ad primum. Dico duo. *Primum.* Quod diuisum huius diuisionis est vniuersale vniuocè prædicabile. *Secundum.* Quod diuiditur vniuersale pro formali, idest, ratione vniuersalitatis, & prædicabilitatis (nec enim hæc ponunt in numero ad præsens.) non ratione naturæ, quæ vniuersalitati subternitur. *Et ratio primi est.* Quia omnia membra diuidentia sunt prædicabilia de multis, & non de vno tantum, prædicabile enim de vno tantum, vel est indiuiduum, vel prædicatur identicè, non formaliter: in præsentia autem neque agimus de indiuiduis, neque de prædicatione identica, sed formali, quia agitur de prædicatione

tione artificiali; idem autem prædicari de se ipso non est modus artificialis. Similiter debet esse prædicabile vniucum, quia licet analogum prædicetur de pluribus, non tamen simpliciter, & vno modo, sed partim vno, partim diuerso, unde non est vniuersale simpliciter, sed secundum quid, idest, modo proportionali, & ita excluditur ab vniuersali simpliciter, de quo hic agimus. Et præterea. Hic solum tractantur prædicabilia vt conducunt ad constituenda prædicamenta, quæ vtique constant ex genere & differentia, quibus constituitur species, cui conuenit propria passio, & prædicata accidentalia: Analogum autem nihil horum constituit, & sic non pertinet per se ad prædicabilia, sicut neque ad prædicamenta.

Ratio secundi est. Quia esse prædicabile & vniuersale accidit naturæ, ergo diuersus modus prædicandi non est diuisio ipsius naturæ vt natura est, sed ipsius prædicabilis vt aptitudinem dicit ad prædicandum, ergo diuisio in varios modos prædicabilitatis debet respicere pro formali diuiso ipsam formalem rationem ipsius vniuersalitatis, seu prædicabilitatis, non verò naturam quæ illi subternitur. Præterquamquod natura, quæ subternitur vniuersalitati non est aliquid certum, & determinatum; potest enim esse aliquid reale vel rationis, substantia, vel accidens. Ipsa autem intentio vniuersalitatis est aliquid certum, & determinatum, tanquam accidens rationis respectu naturæ, ergo ratione illius diuisio ista super certum, ac determinatum diuisum cadit.

Est inquiras. An diuisum sit solum vniuersale

sale Logicum pro relatione vniuersalis, vel etiam vniuersale Metaphysicum pro fundamento istius relationis? *Respondetur*. Vtrumque diuidi proportionali modo; neque enim diuiditur relatio, nisi diuidatur suum fundamentum: imò relatio per fundamenta diuiditur. Quare si modus prædicandi est diuersus, oportet quòd etiam detur diuersus modus identificationis cum illis, de quibus prædicatur, ergo oportet quòd iste diuersus modus non solum accipiatur penes ipsam comparisonem, & relationem ad inferiora, vt ad terminum ad quem, sed etiam penes aptitudinem ad essendum, idest, identificandum in inferioribus, & consequenter penes abstractionem, quæ istam aptitudinem fundat in vnitæte sic abstracta, & tali vel tali modo identificabili cum inferioribus.

Circa Secundum. Diuisio ista exacta & adæquata est, & exhaurit omnem rationem prædicabilitatis. Ratio est. Quia ipsa formalis ratio prædicationis consistit in identitate, & connexionione vnius extremi cum alio, ergo illa erit adæquata diuisio prædicabilitatis, quæ est adæquata diuisio connexionis & identificationis extremorum. Omnis autem identitas, seu connexio extremorum, vel est essentialis, vel accidentalis, intrinseca, vel extrinseca, necessaria, vel contingens. Si essentialis, vel explicat totam & integram essentiam, idest, omnia, quæ ad definitionem concurrunt, vel solum partem. Si integram rationem essentiae, seu quidditatis, est species. Si partem, vel partem potentialem & contrahibilem, vel actua-lem & contrahentem. Si potentialem & con-

trahibilem est Genus, & dicitur in *quid* incomplete, quia dicit partem quidditativam, idest, primam, & substantialem, seu determinabilem per alias, non determinantem, & quasi qualificantem. Si partem actualem, est Differentia, quia est prædicatum quasi actus determinans & qualificans. Si vero non convenit essentialiter, sed accidentaliter, idest non ingrediens constitutiva essentia, vel est prædicatum proveniens ex proprijs principijs, & necessariam habens connexionem cum illis, & sic est Proprium, vel convenit ex extraneis & communibus, & sic est Accidens. Quæ divisiones cum tradantur per membra immediate & contradictorie opposita, recte & adæquate dividunt ipsum divisum.

Quidam tamen, ut Torrejon. disput. unica de Com. Prædic. q. 1. in secundo prædicabili, quod est species, dicunt non prædicari totam quidditatem, sed partem, quia species est pars individui, & non totum individuum, & sic prædicatur eo modo quo genus, scilicet ut pars.

Sed hoc inconuenienter dicitur. Quia species explicat totam definitionem, seu totum quod in definitione includitur, idest, constans ex genere & differentia, ergo explicat totam essentiam rei, vale respectu essentialium cuiuscunque individui non explicat partem, sed totum, licet non explicet totum ex parte modi, qui est singularitas; individuatione enim non addit aliquid pertinens ad naturam seu essentiam, sed ad modum naturæ, unde species est tota quidditas individui, neque enim duo individua differunt essentia, sed numero & modo

do ostendi; inconuenienter ergo negatur, quòd species prædicet totum, idest, quid, quid pertinet ad constitutiuu essentialia integre & completè in ratione quidditatis.

SOLVUNTUR ARGVMENTA.

Primo potest obijci. Quia multa sunt quæ prædicantur de pluribus, & non continentur in ista diuisione, ergo non est adæquata. Ant. patet in primis in analogo, quod prædicatur de multis analogatis, & tamen nec est genus, nec species, & multo minus differentia, &c. Similiter indiuiduum vagum, ut aliquis homo, persona, suppositum, prædicantur de multis, sicut Petrus dicitur indiuiduum, dicitur persona, & Paulus similiter, &c. & tamen nec est genus, nec species, quia ista abstrahunt ab indiuiduis, & solum prædicant naturam. Denique existentia, & mors, & similia neque prædicantur essentialiter, quia non pertinent ad quidditatem rei, neque ut proprium, quia non dimanant à principijs intrinsecis, neque ut accidens, quia non adiungunt & absunt sine subiecti corruptione, ergo in nullo istorum prædicabilium comprehenduntur.

Confirmatur specialiter in modo quo prædicatur natura humana, & eius prædicata superiora de Verbo Diuino, neque enim prædicantur de Deo essentialiter, quia in tempore illi coeperunt conuenire: neque contingenter ut accidens, quia unio illa hominis ad Deum est substantialis, facitque Deum verè & uniuocè esse hominem, sicut Petrus & Paulus, quibus non conueniunt contingentes natura
humana

humana; neque ut proprium, quia non dimanat naturaliter ex principiis intinsecis Dei, alioquin ab æterno ei conueniret, ergo datur modus prædicandi non pertinens ad ista quinque prædicabilia.

Respond. neg. anteced. Et ad instantiam de analogo dictum est supra, quod analogum non est simpliciter vniuersale, sed reductiuè, quia non dicit prædicatum simpliciter vnum, sed partim vnum, partim diuersum; definitio autem vniuersalis est, quod sit *unum in multis*, ergo sicut deficit à ratione vnitatis, ita à ratione vniuersalitatis simpliciter.

Ad secund. Instant. de individuo vago; dicimus ex eodem fere principio excludi à ratione vniuersalis simpliciter, quia non dicit solam naturam, sed etiam modum essendi, qui est individuatio, seu personalitas, ut docet S. Thom. 1. par. q. 30. art. 4. vnde non habet vnum simplicem modum prædicandi, sed prædicatur in quid, & in quale; in quid, quatenus dicit naturam; in quale, quatenus dicit modum individuationis, qui extra conceptum naturæ est, & à conditionibus accidentalibus dependet, quæ pertinent ad hic & nunc; & ita non reducitur ad vnum tantum prædicabile, sed ad plura, scilicet accidentale & essenziale. Et similiter definitio excluditur à ratione prædicabilis simpliciter, quia est terminus complexus & non simplex; reducitur autem ad secundum prædicabile, quia reducitur ad suum definitum; propriè enim sola species definitur, ut dicitur in 7. Metaph. quia sola constat ex genere & differentia.

Ad tertiam Instant. dicetur in quest. 12. de Acci-

Accidenti. Sufficit nunc insinuare, quòd adesse & abesse sine subiecti corruptione est idem, quòd sine destructione conceptus quidditativus, & sic intelligitur definitio accidentis, & ita mors, & existentia sunt accidentia, quia licet non adsint, vel absint sine corruptione physica, benè tamen sine metaphysica, quæ pertinet ad quidditatem subiecti cui conveniunt. Quod se-
cus accidit in propria passione, cuius conve-
nientia ad subiectum si destruitur, destruitur
essentia ex consequenti.

Ad Confirmas. Respond. Aliquos existimare ex unione naturæ humanæ ad Verbum resul-
tasse nova prædicabilia, quæ vocant assumpti-
va, quia neque essentialiter, neque accidenta-
liter dicuntur de Deo, sed substantialiter. Cæ-
terum evidenter S. Thom. 3. par. q. 16. art. 1.
sentit eodem modo prædicari naturam huma-
nam facta incarnatione, atque de quolibet alio
individuo talis naturæ, alioquin illa persona
non esset uniuocè homo, si essentialiter non
prædicaretur homo de illo, sicut de alijs indi-
viduis. De quo videatur ibi Caietanus. Et
quando dicitur, quòd Deo accidentaliter, &
ex tempore convenit esse hominem.

Respondet. Quòd Deo ut subsistenti in na-
tura divina accidentaliter convenit esse homi-
nem, & in tempore Deus factus est homo: Deo
autem ut subsistenti in natura humana, &
supposita incarnatione, essentielle est esse ho-
minem, quia sic est individuum hominis. Et
cum inflatur. Ergo ab æterno est homo, quia
essentiales propositi ones sunt æternæ. Nega-
tur consequentia propter variationem appella-
tionis, quia quando dicitur Deus est homo
ab

ab æterno ly *Non* tenetur absolutè, & facit sensum absolutum, applicatur enim Deo sine aliqua restrictione. & sic inuoluit Deum p. o. ut subsistit in natura diuina; de Deo autem ut subsistenti in natura diuina temporaliter dicitur quòd est homo, & non ab æterno. Si autem restrictiue sumatur pro Deo ut subsistenti in natura humana, seu Deo incarnato, sic est propositio æternæ veritatis sumendo ly *est*, quantum ad connexionem & convenientiam, non quantum ad existentiam: In his autem propositionibus propter periculum errandi, non debet ita absolutè concedi propositio, sed cum restrictione.

Secundo arguit. Sufficiunt duo prædicabilia, in quæ omnia alia conueniunt, scilicet, prædicabile essentialiter, & accidentaliter, ergo superfluum quinque. Si dicas illa duo esse genera prædicabilium, non species ultimas, in quas illa necesse est quòd diuidantur. Contra, quia si quinque prædicabilia sunt infimæ species, plura debent poni quàm quinque, nam sicut prædicatio in quid diuiditur in prædicationem de pluribus specie differentiibus, quæ est genus, & de pluribus numero differentiibus, quæ est species, ita prædicatio in quale essentialiter potest diuidi in illud, quod prædicatur de pluribus specie differentiibus, scilicet, differentia generica, & quæ de pluribus numero differentiibus, ut specifica. Similiter genus potest diuidi in supremum & subalternum. Et sicut diuiditur prædicabile penes prædicationem in quid, & in quale essentialiter, & accidentale, cur non etiam penes prædicari separabiliter & inseparabiliter.

inquin.

intrinsecè, & extrinsecè, possibiliter, & impossibiliter, & alios similes modos, qui diuersas species prædicabilitatis constituent.

Confirm. Quia Philos. 1. Topic. c. 3. nominat solum quatuor prædicata, scilicet genus, definitionem, proprium, & accidens, ergo totidem erunt prædicabilia, quia sic se habent sicut prædicata. Quòd si per ordinem ad prædicamenta sumatur numerus prædicabilium, cum sint decem modi essendi, scilicet, decem prædicamenta, totidem erunt prædicabilia, quia modus prædicandi sequitur modum essendi.

Respond. solutione data ad argumentum. Et ad primam replicam dicitur, quòd prædicari de pluribus specie differentibus, & numero differentibus, si præcise sumatur non distinguit formaliter prædicabilia, cum idem genus prædicetur de speciebus & indiuiduis diuersis, & eadem differentia, & proprietas generica similiter. Sed formalis distinctio inter genus & speciem est quòd genus prædicatur in quid incomplete, idest, non integram quidditatem, sed eius partem, species autem in quid complete, idest, integram quidditatem, integra autem ratio quidditatis non nisi de pluribus indiuiduis prædicari potest. Et dicimus prædicare integram quidditatem, non quia explicet totum, quod est in indiuiduo etiam modum singularitatis, sed totum quod pertinet ad quidditatem in indiuiduis. Differentia autem siue sit generica, siue specifica semper prædicat partem essentialem, non totum, vnde in modo prædicandi non differt, sed in re materiali, quam prædicat. Et similiter genus supremum, & subalternum habens
eua.

eundem modum prædicandi scilicet partem quidditativam, non totam quidditatem, licet una pars quidditatiuè sit vniuersatior, & superior altera; hoc enim per accidens se habet in formali modo prædicandi per modum partis in quid, de quo fufius dicemus in q. de Genere, & de Differentia.

Ad ultimam instantiam dicitur non omnes modos variare per se rationem prædicabilitatis, nisi illos, qui per se variant modum identificationis, & connexionis extremorum secundum rationem vnus in multis, sicut essentialiter, & accidentaliter se habere, per modum quid, vel quale. Reliqui verò qui modum istum connexionis, & identitatis per se non variant, neque diuersa prædicabilia constituunt, nisi ad istos modos *essentialiter, & accidentaliter* reducuntur, sicut reducuntur ly *intrinsece, & extrinsece*, & in aliquibus *separabiliter, & inseparabiliter*, quando tamen inueniuntur intra genus accidentale tantum, per se non variant rationem prædicabilitatis vnus de multis.

Ad Confirm. Respond. in illo loco Aristot. non numerare modos prædicandi vniuersalium de inferioribus, cum etiam numeret definitionem, quæ est quid complexum, sed numerat prædicata, ex quibus loci arguendi deducuntur ad varias quæstiones. Et quia idem argumentum sumitur ex specie, & ex differentia vltima illa est genus enim rationem importat magis indeterminatam, ideo Aristoteles compendio tradidit speciem & differentiam vno nomine definitionis. *Et ad instantiam* quæ additur de numero prædicamentorum. Respondetur,

ur., quòd modi prædicabilium non sequuntur nodum essendi absolutè, & secundum participationem entis, sed comparatiuum, quo connectuntur inferiora cum superioribus; in summa, prædicamenta distinguuntur in accidentibus penes diuersum modum participandi substantiam; ipsa autem substantia per hoc quod habet esse per se. Prædicabilia verò penes diuersum ordinem vniuersalis ad inferiora.

ARTICVLVS II.

*Verum hæc diuisio sit generis in species,
& immediata.*

Circa primam partem difficultatis propositæ, scilicet, an sit diuisio generis in species, Notandum est ex duplici cap. provenire difficultatem. Primò, quia inter ipsa prædicabilia, quædam accidentaliter prædicantur, vt duo vltima, *Proprium & Accidentis*; quædam essentialiter, vt tria prima; non videtur autem aliquid vniuocè se habere ad hoc, quod est accidentaliter, & essentialiter dici.

Secundò provenit difficultas ex ipsa complicatione diuisionis, quia si vniuersale est genus ad quinque prædicabilia, & vnum ex membris diuidentibus est genus, coincidet diuisum cum membro diuidente. Nec sufficit dicere, quòd vniuersale, quod est hic diuisum, formaliter in se est vniuersale; denominatiuè autem genus, quod non est formaliter coincidere cum membro diuidente. Contra enim est,

est, quia sic eidem intentioni vniuersalitatis conueniret esse vniuersale formaliter & denominatiuè, essentialiter & accidentaliter. Nam in se essentialiter vniuersalitas est, & cum denominatiuè sit genus; genus autem quædam vniuersalitas sit, accidentaliter habebit vniuersalitatem, quæ est in genere; cum tamen essentialiter sit ipsa vniuersalitas in communi, quæ in ipsum genus ingreditur.

Prima difficultas aliquos compulit vt dicerent hanc diuisionem esse analogam, licet respectu trium primorum prædicabilium vniuoca sit. *Alij* autem vniuocam esse putant & generis in species. *Alij* mediant inter vtrosque dicendo, quod vniuersale metaphysicum, seu pro vnitæte; & aptitudine ad multa, est analogum, pro relatione autem rationis, quæ est secunda intentio, est vniuocum. Apud omnes tamen certum est, quod vniuersale sumptum materialiter & pro substrato, non est vniuocum ad omnia prædicabilia, imò nec respectu vniustantum, nam genus, verbi gratia, potest habere pro materiali, quod denominat, & ens reale, & ens rationis, substantiam & accidens. Quare non loquimur nisi pro vniuersali formaliter accepto.

Secunda verò difficultas non minus aliquorum torfit ingenia, qui diuidunt duas vniuersalitates, aliam per se, & intrinsecam, aliam per accidens, & extrinsecam. Prima est, quæ conuenit naturis & in eis exercetur, eisque denominat, resultat enim ex abstractione naturarum. Secunda est, quæ super ipsam vniuersalitate n reflectit, & diuersas intentiones, seu modos vniuersalitatis in vnum
adu-

denans, eis tribuit iterum aliam denominā-
tionem vniuersalis accidentaliter & denomi-
natiuè, ita quòd sicut prima vniuersalitas re-
spectu naturarum denominatiuè se habebat,
licet in se vniuersalitas esset, ita secunda vni-
uersalitas respectu primæ denominatiuè, &
accidentaliter se habet. Vnde non repugnat
in his secundis intentionibus vnum, & idem
prædicatum essentialiter & accidentaliter ei-
dem inesse, & quòd eadem intentio possit esse
superior & inferior respectu eiusdem, non ea-
dem intentio & prædicatum numerice sum-
ptum, sed specificè, seu vniuersaliter, quia
intentio vniuersalitatis, quæ essentialiter &
formaliter est talis, rursus potest denomina-
tiuè induere vniuersalitatem per reflexam co-
gnitionem, qua illi attribuitur alia vniuersa-
litas, v.gr. Animal per vniuersalitatem & ab-
stractionem dicitur genus; rursus illa intentio
generis vt conuenit cum alia intentione gene-
ris reflexe cognoscitur & abstrahitur, ab illa-
que abstractione denominatur species quæ-
dam vniuersalium, hoc enim est genus. Quod
totum non continet aliud mysterium, quàm
vulgarem illam doctrinam, quòd potest ali-
quid formaliter esse genus & denominatiuè
species, formaliter vniuersale in communi, &
denominatiuè tale vniuersale quod est genus.
Ita Martinez disput. 1. super Porphy. q. 4.

Dicendum nihilominus est diuisionem hanc
vniuersalis in quinque vniuersalia, seu prædi-
cabilia esse vniuocam, & per modum generis
in species. Hanc communiter sequuntur Au-
thores, præsertim Thomistæ, & etiam schola
Scoti, Et fundamentum est, quia ista quin-
que

que prædicabilia quantumcumque accidentaliter prædicentur, ut *Proprium* & *Accidens*, verè & vniuocè prædicantur de multis, ergo vniuocè sunt vniuersalia. Antec. est D. Thom. 1. contra Gentil. c. 33. vbi dicit, *Quod omne quod vniuocè prædicatur, vel est genus, vel species, vel differentia, vel proprium, vel accidens*: ergo omnia ista quinque prædicabilia fundant vniuocam prædicationem: Prædictio autem vniuoca in omnibus, quæ vniuocè prædicantur, simpliciter est eadem, saluatur enim vna ratio, quæ prædicatur de multis, siquidem vniuoca prædicantur secundum eandem rationem, ergo quidquid vniuocè prædicatur simpliciter saluat veram, & propriam vniuersalitatem, quæ solum consistit in hoc, quod sit vnum in multis. Vnde aliud est, quod prædictio aliqua sit secundum quid quantum ad entitatem, quam prædicat, aliud quod sit secundum quid quantum ad vniuersalitatem secundum quam prædicatur. Ad primum enim sufficit identitas accidentaliter inter prædicatum & subiectum, ad secundum verò requiritur quod id quod prædicatur simpliciter non sit vnum in multis, ad quod necesse est, vel quod non habeat vnitatem simpliciter, vel quod ea de quibus dicitur non sint plura simpliciter. Quidquid autem vniuocè prædicatur vnum simpliciter est, & de pluribus dicitur, ergo habet vniuersalitatem vniuocè. Vnde bene stat aliqua analogari in ratione entis, & non in modo prædicationis.

Quod verò per modum generis se habeat, constat, quia diuiditur in illas quinque intentiones prædicabilium, quæ non differunt inter se lo.

se solo numero, sicut duæ intentiones generis, vel speciei, vel differentiz, ergo differunt specie in genere intentionis, habet ergo se ad illa ut genus.

Ad primam ergo difficultatem à principio dicitur, quòd vltima duo prædicabilia dicuntur accidentaliter, quod est dici secundum quid ex parte rei, quæ prædicatur, non tamen dicuntur secundum quid, quantum ad modum vniuersalitatis, quia in hoc retinent rationem vnitatis, quæ dicitur de multis.

Instabis. Quartum & quintum prædicabile solum dicuntur denominatiue; denominatiua autem non sunt vniuoca, tum quia distinguuntur ab vniuocis & æquiuocis à Philosopho in Antepredicamentis; tum quia dicunt concretum accidentis, quod est ens per accidens, & consequenter non habent rationem prædicabilis. Tum denique, quia accidens vnitur quidem subiecto quod denominat, sed non identificatur cum illo, neque ex pluribus subiectis potest abstrahi vnum accidens, nisi eo modo, quo forma abstrahitur à materia, quæ est abstractio formalis; non autem abstractione totali, sicut requiritur ad vniuersale.

Respondetur. Prædicationem quarti & quinti prædicabilis esse quidem denominatiuam, sed non tollere quod possit etiam esse vniuoca, vel æquiuoca, quando enim distinguitur à Philosopho ab æquiuocis, & vniuocis, non ita distinguitur, quasi non possit eadem vtrumque conuenire, sed quia non conuenit sub eadem ratione. Quomodo autem conducebat ad doctrinam Philosophi distinguere ab æqui-
uocis

uocis & vniuocis denominatiua, dicemus in Antepredicamentis. Quod verò dicitur denominatum esse ens per accidens.

Respond. Formaliter non esse ens per accidens, seu ex parte formæ; album enim solam qualitatem significat, vt dicit Aristot. capite de Substantia, & D. Tho. 5. Metaph. lectione 9. Sed constitutum ex subiecto & accidente est ens per accidens, at hoc non prædicatur denominatiuè, solum enim de substituto, seu subiecto fit prædicatio denominatiua.

Et ad tertiam instantiam dicitur, quòd inter accidens & subiectum non est identitas quidditatiua & intrinseca, sed denominatiua, & omnia inferiora conueniunt in accidente, sicut in denominante, non sicut in constituyente, & sic resultat vniuersale prædicationis denominatiuæ, & hoc simpliciter est vniuersale, licet secundum quid identificetur cum subiecto ex parte entitatis, prædicatur autem abususè ex parte vniuersalitatis, & modi sub quo identificatur.

Ad secund. difficult. Respondetur ex doctrina data, quod in istis intentionibus aliud est esse formaliter vniuersale, vel genus, vel speciem, aliud denominatiuè. Et potest contingere, quod aliqua intentio sit formaliter genus, & denominatiuè species, & formaliter vniuersale, & denominatiue genus. Neque hoc est idem esse essentialiter, & accidentaliter tale sub eadem ratione, sed secundum diuersa, vt statim dicemus, quod contingit propter reflexionem intellectus supra suos actus, & denominationes; cum enim resultat aliqua intentio ex abstractione alicuius naturæ, rur-

sus

sus supra istam intentionem reflectit intellectus, & intentionem sic de nouo cognitam, tanquam rem quandam, vel naturam, noua illa abstractione, & intentione afficit, & denominat. Et sic de alijs intentionibus in infinitum, quod non consistit in alio, quàm in hoc quod est vnā intentionem, quæ denominat naturam, in qua fundatur, posse iterum cognosci tanquam rem, & naturam quandam, sicque de nouo fundare aliam intentionem, quæ denominet ipsam. Et sic respectu naturæ, in qua fundatur, est forma denominans, quod est formaliter esse vniuersalitatem, ipsa verò conceptu vt natura, est fundans, & denominata ab alia secunda intentione inde resultante.

Dicimus ergo. Quod vniuersale in communi non coincidit cum membro diuidente, quod est genus formaliter, & vt *qui*, sed denominatiue, & vt *quod*, idest, vniuersale in communi non est forma, qua aliquid est genus, sed qua est vniuersale; illa tamen forma concepta, vt res quædam, suscipit in se denominationem generis respectu quinque prædicabilium, & sic denominatur à suo membro diuidente. Et eadem ratione vnum membrum diuidens potest à suo opposito denominari, sicut genus potest dici species, idest, intentio generis denominatur esse quædam species vniuersalis; & indiuiduum est species, idest, intentio indiuidui quædam species est intentionis. Et specietas in abstracto etiam potest denominari species, quia formæ rationis per omnia transcendent, quia in omnibus fundantur.

Si Insuper. Vniuersale includitur in differentiis
Art. Log. Pars II. N tjs

rijs contrahentibus ipsum, tum quia differentiarum contrahentes etiam vniuersaliter prædicantur. Tum quia vnum ex prædicabilibus est differentia, ergo vniuersale non est genus ad illa, quia genus extra differentias est.

Respond. Negan. antecedens. Nam differentiarum, quibus diuiditur vniuersale in quinque prædicabilia, non sunt relationes vniuersalitatis, sed modi differentiales, quibus relatio ista contrahitur, & ideo formaliter non sunt vniuersalitas, possunt tamen esse denominatiue, sed hoc non est includi in illis formaliter, & essentialiter genus, sed ipsa posse esse fundamentum vniuersalitatis, hoc enim conuenire potest omni enti abstrahibili, siue sit reale, siue rationis. Quod autem vnum ex prædicabilibus sit differentia, non arguit, quod vniuersale includatur formaliter in differentiis, id est, in modis se contrahentibus, sed in intentione differentiarum, quæ est species vniuersalitatis ex tali modo contrahente resultans.

Circa Secundum, quod in titulo articuli quæritur. An diuisio ista in quinque prædicabilia sit immediata.

Respondetur. Parum referre sic, vel aliter loqui. Potest enim dici, quod vniuersale immediatè diuiditur in vniuersale essentiale, & accidentale, non quidem sumendo essentiale, & accidentale absolutè, sed prout inuenitur in ratione vniuersalis, quatenus scilicet vnum existens respicit multa modo essentiali, vel modo accidentali. Deinde verò modus respiciens plura essentialiter, alius est in quid per modum generis, vel in quid per modum speciei, vel in quale per modum differentiarum.

Et

Et similiter modus respiciendi plura accidentaliter, alius est accidentaliter propriè, vel accidentaliter communiter, & sic potest dici, quod est diuisio immediatè in illa duo membra tanquam generica, & mediatè in ista quinque tanquam in species infimas.

Potest etiam dici, quod vniuersale immediatè diuiditur in illas quinque species, quia prædicatio essentialis, & accidentalis, vt sic, non per se diuidunt rationem vniuersalitatis, nisi quatenus pertinent ad ipsam rationem generis, vel speciei, &c. Absolutè enim essentialis, vel accidentale potest inueniri etiam extra prædicationem vniuersalem, sicut cum dico, Petrus est hic homo, est prædicatio essentialis, Petrus est hoc album, est prædicatio accidentalis, non ergo essentialis, & accidentale, vt sic, sunt per se, & propriè differentiae vniuersalis, cum extra prædicationem vniuersalem inueniantur, sed solum
accidentale, & essentialis quatenus
constituunt, vel imbi-
buntur in ipsa ra-
tione gene-
ris,
vel speciei, vel
proprij,
&c.

De Genere.

ARTICVLVS I.

*Primum Definitio Generis tradita à Porphyrio sit
bona.*



Genus Logicum definitur à Porphyrio, *id quod prædicatur de pluribus specie differentibus in eo quod quid*: In qua definitione tria explicantur. Primum est ratio communis omni prædicabili, in illis verbis, *Quod prædicatur de pluribus*: hoc enim omni prædicabili commune est. Vnde intelliges non definiri hic vniuersale pro materiali, seu substrato, sed pro ipsa ratione vniuersalis, quia illud prædicatum commune, scilicet prædicari de pluribus, non est naturæ, sed vniuersalitatis. Secundum quod explicatur in definitione est id quod specialiter pertinet ad rationem generis ex parte termini quem respicit, à termino enim relationes specificantur. Et sic ponitur illa particula, *de pluribus specie distinctis*; hæc enim respicit pro termino vniuersalitas generica.

Tertium denique quod explicatur in hac definitione est modus, seu ratio prædicandi, scilicet *in quid*.

Quantum ad primam particulam: Quid sit *prædicari de pluribus*, satis in superioribus explicatum est, id enim pertinet ad rationem
vni-

Vniuersalitatis. Quid sit autem id quod de pluribus prædicatur tanquam essentialiter definitum, cui ista definitio essentialiter conuenit, dicemus in sequenti articulo. Vnde ad exactam explicationem huius definitionis sufficit explicare in præsentia illas duas particulas *de pluribus specie differentibus*, & *in quid*.

Igitur quoad priorem particulam, *de pluribus specie differentibus*, dicendum est, quod licet alia prædicabilia possint dici de pluribus specie differentibus, sicut aliquæ differentiæ genericæ, & proprietates etiam genericæ dicuntur de subiectis specie differentibus; tamen hoc materialiter se habet in talibus prædicabilibus. Solum autem generi formaliter, & per se conuenit prædicari de pluribus specie differentibus, alia enim prædicabilia, licet possint prædicari de pluribus specie differentibus; tamen etiam saluantur sine hoc, quod prædicentur de pluribus differentibus specie, ut patet in differentiis, & proprietatibus specificis, unde non habent specie differre ea, quæ sunt inferiora talium prædicabilium, ex eo præcisè, quod inferiora illorum sint; Genus autem ex eo præcisè, quod genus est, habet quod ea, quæ sunt ipsi inferiora, specie differant, quia ex intrinseca ratione genus dicit aliquid contrahibile, & diuisibile per differentias specie diuersas, quæ differentiæ continentur in ipso genere potentialiter, & ex illo originantur, ut benè notauit Caietan. super istud caput de Genere ex Alberto Magno, unde ex ipsa formali ratione genus petit habere inferiora specie distincta.

Secunda particula, Scilicet *Prædicari in quid*,

quid, explicat modum, & rationem formalem prædicationis generis quatenus genus est. Ad quod intelligendum oportet aduertere, quod illa particula *in quid*, ut sæpè docet S. Thom. potest quærere, vel de supposito, vel de natura, sicut quærenti quid natet in mari? Respondemus, quod piscis: & quærenti quid est homo? Respondemus, quod animal rationale; & in præsentī cum dicitur, quod genus prædicatur *in quid*, intelligitur hoc secundo modo, non primo. Rursus secundo oportet videre quomodo prædictio *in quid* differat à prædicatione *in quale*, non solum quando accidentalis est, id enim est manifestum, sed etiam quando essentialis, sicut prædicatur differentia. Non enim debemus dicere absolute, quod differentia prædicatur *in quid*, ut admittunt quidam Recentiores, sed genus prædicatur *in quid*, & differentia *in quale*, idest, genus prædicatur modo substantiuo quidditatio, differentia autem modo adiectiuo essentialiter etiam, ut notat Sanctus Thomas opusculo 48. capite de Genere in fine, & ideo dicitur differentia prædicari in quale quid, idest, in quale essentialē, seu quidditatio, differentia enim, licet essentialis sit, munus tamen, & prædicationem differentię exercet per modum adiacentię, non per modum substantiuī, quod pertinet ad quid. Et ratio est. Quia differentię munus est non probare primum fundamentum quidditatis, sed aduenire generi, illudq; determinare, ut constituatur species, vnde nunquam se habet ut primum fundamentum, & prima ratio quidditatis, sed tanquam ratio contrahens, & adueniens

niens alteri, illudque determinans, unde modus eius est determinare, & actuare aliquid prius præsuppositum, & contrahibile, ut genus, & ideò ad genus pertinet modus substantius, ad differentiam autem modus qualificatus, seu adiacentiæ, & illud dicitur *quid*, hoc *quale*. Et quando Philosophus dixit in 7. Topic. cap. 2. utramque partem definitionis prædicari in quod quid, sensus est, quod utraque pars prædicatur essentialiter, diuerso tamen modo genus in quid, & differentia in quale.

Tertio consideratur adhuc in ipso modo prædicandi in quid differentia, quia prædicatur genus in quid, & qua prædicatur species, prædicatur enim species in quid completè, quia prædicat integram, & completam rationem quidditatis, & genus prædicatur in quid incompletè, quia prædicat partem constitutiuam essentiae, quæ potentialis est, & prima, & tanquam fundamentum differentiae contrahentis. Vterque autem modus significandi dicit modum substantium, & in quid. Cuius ratio est. Quia substantia significatur, ut totum, & completum ens, pertinet enim ad substantiam habere rationem totius, & suppositi. Similiter pertinet ad modum substantiae esse quasi substantans, seu fundamentum aliorum, & id quod habet rationem primi in aliquo genere. Inde tracta est similitudo, ut modo substantiuo dicantur significare, vel ea quæ significantur per modum totius, vel quæ significantur per modum fundamenti, & primi in aliquo ordine, & species quidem significat per modum quid, seu per modum substantium,

quia significat integrum, & completum in ratione quidditatis. Genus autem significat per modum quid, & modo etiam substantiuo, quia significat per modum primi prædicati, quod est fundamentum, & radix aliorum. Et hoc totum explicat ipsa definitio dicendo in definitione generis, quod *prædicatur in quid de pluribus specie differentibus*, idest, quasi contrahibile per differentias específicas, id autem, quod est contrahibile; est primum prædicatum continens illas in potentia. In definitione autem speciei dicitur, *in quid de pluribus numero differentibus*, per quod designatur integra ratio quidditatis non amplius contrahibilis per differentias específicas, sed multiplicabilis per singulares.

Si inquiras. Vtrum ista definitio generis sit essentialis, vel descriptiua? *Respondetur*, Vt traditur à Porphyrio, descriptiuam esse, vt ipse significat, & D. Thom. sic eam vocat opusculo 48. cap. 2. Essentia enim generis consistit in ratione vniuersalitatis, quæ tali modo respicit inferiora, quod sunt specie distincta, & per modum quid. Definitio autem eius traditur per prædicabilitatem, quæ est passio vniuersalis, ergo explicat naturam generis per proprietatem, quod est esse descriptiuam; potest tamen reduci ad essentialem dicendo, *Genus est vniuersale respiciens* (vel aptum respicere, si fundamentaliter tradatur) *plura specie distincta in quid*. Vbi traditur definitio per prædicatum superius, seu genericum, quod est ly *vniuersale*. Et per differentiam intrinsecam, scilicet tali modo respicere, idest, *in quid*, & talem terminum habere, scilicet

scilicet *plura* specie distincta.

SOLVUNTUR ARGUMENTA.

Contra particulam, *in quid*, arguitur. Nam conuenit alijs à definito, etiam si sumatur prædicatio in quid de pluribus specie distinctis; & prædicari in quale potest conuenire generi, ergo male ponitur illa particula. Anteced. quo ad prim. part. prob. Nam ens prædicatur in quid de pluribus specie distinctis; est enim prædicatum quidditatiuū, utpote in ipsis quidditatibus imbibitum, & tamen non est genus, cum sit analogum. Ipsa etiam definitio prædicatur in quid de definito, quærenti enim quid est homo? rectè respondetur, animal rationale. Et ipsa etiam differentia, cum sit nobilior genere, nobiliori etiam modo debet prædicari, est autem nobilior modus prædicari in quid, hoc est prædicari substantiuè, quàm prædicari in quale, quod est prædicari adiectiuè, & per modum accidentis, ergo debet illi conuenire, & non solum generi. Quo ad secund. part. prob. Quia in prædicamento substantiæ genera, & species vocantur secundæ substantiæ; has autem dicit Philosoph. in cap. de Substantia tex. 7, significare quale quid, & addit quod genus, & species circa substantiam qualitatem determinant, ergo genus prædicatur in quale. Deinde hæc prædicatio, album est coloratum, est prædicatio generis, sicut hæc, albedo est color; & tamen coloratum prædicatur per modum adiacentis, & consequenter in quale, ergo non est de ratione generis prædicari in quid.

Respond.neg.antec. Ad prim.part.*Respond.* Quod ens non est prædicatum quidditativum, sed transcendens, & in omni re imbitum, siue ad quidditatem pertineat, siue non, unde quod est commune quidditati, & non quidditati non potest quidditativum conceptum constituere. Et ita præsupponitur conceptus transcendens ad conceptum quidditatis, non illum constituit, nec minus pertinet ad quid, quam ad quale: Sicut enim quando dicimus quid est homo, & respondetur, quod ens, sic etiam quando dicimus qualis est homo, responderi potest, quod ens. Et ulterius, quia ens analogum est, non prædicatur in quid simpliciter, & secundum unam rationem, sed secundum plures, & solum proportionaliter unum.

Ad id quod dicitur de definitione. *Respon.* Quod definitio est quid complexum, & continet non solum rationem in quid, sed etiam rationem in quale: constat enim ex genere, & differentia, nec prædicatur in quid sicut genus, sed ad modum speciei per modum integræ quidditatis quam explicat.

Ad id, quod dicitur de differentia. *Respon.* Quod licet sit nobilior quam genus ex parte rei significatæ, ex parte tamen modi prædicandi non prædicatur in quid, quia modus prædicandi non sequitur præcise modum essendi in re, sed modum concipiendi. Quod S.Th. docet 7.Metaph.lect.1.& opus.42.c.19. Differentia autem concipitur ad modum determinantis, & actuantis, genus autem, ut terminabile, & contrahibile, & ideò hoc fundat in quid modo explicato. illa verò in quale.

Ad

Ad secundam partem argumenti. *Respond.* Quod Philosophus vocat secundas substantias quale quid, & quod determinant qualitatem, non respectu naturæ, & quidditatis, sed comparatione ad primas substantias, quæ significant suppositum sustentans, respectu enim suppositi, tam species, quam genus, & reliqui gradus superiores habent rationem prædicati, & rationem formæ sustentatæ à supposito, comparatiuè autem ad naturam, & essentiam quam constituunt, vna pars constituens, scilicet genus, dicitur in quid, & alia, scilicet differentia, dicitur in quale. De qua solutione videndus est Caiet. super cap. 5. categoriar. Vnde etiam soluitur alia instantia, quia genus se habet, vt forma respectu inferioris de quo prædicatur, ergo non prædicatur in quid, sed vt informans. *Resp. enim*, quod genus se habet, vt forma, non ex parte rei, quam explicat, neque comparatiuè ad naturam, quam constituit, sed ex parte modi se habendi, vt prædicatum, quod respectu subiecti induit modum formæ, & comparatiuè ad primam substantiam, à qua sustentatur.

Ad ultimam prob. Resp. Quod in illa prædicatione, album est coloratum, ly *coloratum*, tenetur substantiuè respectu albi, licet sit adiectiuum respectu corporis, seu subiecti coloris; vnde respectu subiecti erit prædicatio denominatiua, & adiectiua, respectu tamen albi, quod est suum inferius, est prædicatio quidditatiua ratione formæ importatæ.

Secundo arguitur. Contra particulam, *de pluribus specie differentibus*: Nam genus etiam prædicatur de pluribus numero differentibus,

sicut animal de Petro, & Paulo, ergo non explicatur in definitione adequatus terminus generis. *Si dicar* solum explicari immediatam, qui est species. *Instatur* in prædicatione generis de indiuiduis genericis, vt quando prædicatur animal de hoc animali, & de illo animali, tunc enim immediatè prædicatur de indiuiduis, & non de speciebus, ergo definitio est diminuta. Item genus potest prædicari de pluribus, non solum specie, sed etiam genere differentibus, sicut genus supremum, quod prædicatur de pluribus generibus medijs, quæ sunt species subalternæ, ergo illa particula, *de pluribus specie differentibus*, non sufficienter explicat intentionem generis in communi.

Resp. Quod genus prædicatur de pluribus numero differentibus mediatè, scilicet hoc ipso, quod prædicatur de pluribus specie differentibus. Cum enim sub specie contineantur indiuidua, & quicquid prædicatur vniuersaliter de aliquo prædicatur de omni contento sub illo, per principium. *Dici de omni*, consequenter genus prædicatur etiam de pluribus numero differentibus, non tamen sicut species infima, quæ immediatè de illis prædicatur.

Et ad replic. De indiuiduis genericis. *Resp.* Quod etiam prædicatur de illis mediatè siue sint contenta in eadem specie infima, siue in diuersis. Exprimunt enim indiuidua generica gradum genericum indiuiduatum, non exprimendo gradum specificum, mediante quo sub generico continetur. Et quia non exprimant ipsum gradum specificum, illum tamen includunt, & mediante eo pertinent

ad genericum, ideo dicuntur mediate contenta, licet non repugnent talia individua generica ad diuersas species pertinere ratione inclusionis earum, semper tamen de illis, quatenus individua sunt, gradus genericus, non nisi mediatè prædicatur, quia mediate contrahitur, & conuenit indiuiduis, licet aliquando solus gradus genericus exprimaturs omisso specifico.

Ad secundam partem argum. dicitur. Genus supremum prædicari de pluribus genere differentibus, non quatenus genera sunt, sed quatenus subalterna, genus autem quod subalternatur alteri superiori, subiicitur illi quatenus species quædam est, quia subiicitur illi quatenus constat ex illo, & ex differentia, quod est esse speciem. Vnde genus prædicatur de pluribus quatenus specie differunt, quia, quatenus species, ei subiiciuntur. Et ideo non dicuntur differre genere, nisi quæ differunt prædicamento, nam quæ sunt intra idem prædicamentum, differunt penes differentias contrahentes, & consequenter constituentes aliquam speciem, omnis enim differentia speciem constituit.

Ultimo arguitur. Probando quod ista definitio est essentialis. Quia intentio prædicabilitatis includitur in ratione huius intentionis quæ est genus, vt S. Thom. dicit in 4. cap. de ent. & essent. in fine. Vbi etiam addit quod prædicare conuenit generi per se, cum in eius definitione ponatur, ergo sentit prædicabilitatem essentialiter pertinet ad essentiam generis, & præsertim, quia iste tractatus agit per se de prædicabilibus, ergo res quatenus per-

tinent

inent ad istum tractatum essentialiter definiuntur, quando per prædicabilitatem definiuntur.

Respond. Sensum D. Thomæ planum esse, quod prædicabilitas est de ratione generis, & per se illi conuenit, siuè essentialiter sumendo prædicabilitatem pro radice, non pro ipsa formali intentione prædicabilitatis. Radix autem prædicabilitatis vniuersalitas est. Vel si prædicabilitas sumatur formaliter, intelligitur conuenire per se generi, & in eius intentione claudi perfectate secundi modi, & tanquam passio, non perfectate primi modi, & tanquam prædicatum essentialiale. In hoc autem tractatu agit Porphyrius de prædicabilibus, non prout distinguuntur ab vniuersali, sed prout in illo radicanur, & includendo ipsam rationem vniuersalis non excludendo. Vnde oportet quod definitiones essentialiales etiam per ipsam rationem vniuersalis tradantur.

ARTICVLVS II.

Quodnam sit definitum in definitione generis: intentio ipsa, vel subiectum, vel ex utroque compositum.

PVNCTUS huius difficultatis sæpè à nobis tractus est, & pendet ex illa communi difficultate definiendi accidentia in concreto, cum enim inueniatur in concreto accidentis subiectum denominatum à forma, & forma denominans ipsum, & constitutum, seu compositum ex utroque, difficile est assignare pro-

proprium, & per se definitum, cui essentialiter definitio conueniat. Nam si dicamus v.g. in hac definitione generis, quod definitum est ipsum subiectum, seu natura cui conuenit intentio generis illi, non conuenit essentialiter definitio, nam, v.g. animal non habet pro essentiali ratione prædicari de multis, licet sit id quod prædicatur de multis; neque definitum potest esse ipsa intentio, seu forma generica, hæc enim non est id quod prædicatur, sed quo natura aliqua prædicatur de pluribus: neque ipsum constitutum ex natura, & intentione, hoc enim constitutum non prædicatur de pluribus specie differentibus, quia non descendit ad ipsas species conflatum illud ex natura reali, & rationis, sed solum natura.

Hæc difficultas multorum ingenia torfit, & in varias sententias diuisit, quibusdam dicentibus definitum in istis definitionibus esse subiectum prout dicit ordinem ad formam, alijs è contra, quòd est forma prout dicit ordinem ad subiectum alijs denique, præsertim inter recentiores, dicentibus definiri, ipsum constitutum ex subiecto, & forma accidentali, tanquam id cui essentialiter conuenit definitio; ipsi autem subiecto, seu substituto solum denominatiue.

In hoc puncto sæpe à nobis reiectum est tanquam contrarium Aristot. & D. Thomæ, quod possit aliquod conflatum ex subiecto, & accidente definiri tanquam aliquid per se vnum, in hoc enim oppositi Authores conueniunt: Quod nomine illius constituti, seu compositi, ex subiecto, & accidente intelligunt

gunt quidditatem aliquam resultantem ex subiecto, & accidente tanquam ex constitutivis unius tertij, quod habet subiectum tanquam partem sui, unde non prædicatur de illo, quia totum non prædicatur de parte. Et cum dicitur, homo est albus, verificatur adiective de ipso substituto, non essentialiter, & substantiue pro ipso tertio constituto. Dicimus ergo quod ex istis duobus subiecto, & accidente non resultat aliquid unum per se, & unica definitione definibile, sed ut ens per accidens de quo etiam late supra diximus quæst. 5. ex mente D. Thom.

Et ultra ibi dicta explicatur, quia ex substantia, & accidente non potest resultare aliqua quidditas per se una, quæ nec sit substantia, nec accidens, nam inter substantiam, & accidens non cadit aliquod medium, diuiduntur enim modis explicantibus contradictionem, scilicet esse per se, & esse in alio, illud ergo tertium, quod resultat, cum habeat substantiam partem sui, & similiter accidens, non potest esse aliqua quidditas, quæ sit sola substantia, vel solum accidens, media autem inter istas duas est impossibilis; ergo non est aliqua quidditas per se, sed ens per accidens: Si dicas, quod non est una quidditas, quæ non sit substantia, nec accidens, sed una quidditas, quæ sit utrumque. Hoc est quod nos intendimus, quia illa quidditas, seu conflatum, si est simul substantia, & accidens, non potest esse per hoc quod transeat in unam quidditatem per se ab utroque distinctum, quæ nec sit per se accidens, nec per se substantia, cum hæc non detur. Ego solum est substantia, & accidens
 acci-

accidentali vnione coniuncta, non essentiali; & per se, accidentaliter autem vnita sunt ens per accidens, licet conueniant in eodem subiecto, & non sunt vnum constitutivae, sed denominativae.

Respondent aliqui. Quod concreta accidentium sumi possunt, vel adiectivae, vel substantivae, & adiectivae quidem subordinantur pluribus conceptibus, & non sunt ens per se, substantivae autem acceptae dicuntur vnum per se, quia concipiuntur, & obijciuntur vt vnum, adiectivae autem obijciunt subiectum, & formam, vt plura. Vnde quod sit ens per accidens, vel per se, dependet ex modo concipiendi. Alij dicunt non resultare vnum per accidens ex accidente, & subiecto, quia veram vnionem habent inter se, & aliquid verum componunt. Alij quod etiam si sit ens per accidens, definiri potest, sicut definitur respublica, & exercitus, populus, & alia similia, quae minorem unitatem habent.

Sed prima solutio inconuenienter distinguit inter nomen adiectivae, & substantivae tantum, quantum ad hoc quod sit ens per accidens, vel per se; etenim quod nomen adiectivae teneatur, dependet ex eo quod significetur vt applicans suam adiacentiam alteri; substantivae vero vnum significatur vt importans secum suppositum cui in re adiacet, & inhæret. Cæterum quod sit ens per accidens, vel per se, dependet ex unitate, & identitate illius rei, quae resultat ex vtriusque combinatione, hæc autem quidditas, seu unitas quae resultat, non est per se vna, siue significetur, vt applicans adiacentium alteri, siue significetur vt ferens

secum

secum suppositum, quia quocumque modo significetur, quidditas ex illa forma, & subiecto resultans oritur ex coniunctione accidentali extremorum, & non facit aliquam quidditatem mediam inter substantiam, & accidens, quia hæc est impossibilis, nec quidditatem, quæ sit sola substantia, vel solum accidens, ergo non facit aliquid per se constitutum, sed accidentaliter denominatum, siue adiectiuè teneatur, siue substantiuè.

Secunda solutio. In eo deficit, quòd ex vnione accidentali putat resultare ens vnum per se, licet enim sit vera vnio, non tamen est vnio per se, sed secundum quid, & accidentalis, ergo id quod resultat ex illa est vnum solum secundum quid, qualis enim fuerit vnio extremorum, talis erit vnitas resultans ex illa.

Denique. Tertia solutio in eo manifeste peccat, quia definitio solum versatur circa quidditatem, ergo intantum definitio est vna, in quantum vnā quidditatem attingit, & definit, eas autem per accidens non dicit quidditatem vnā simpliciter, & per se, sed plures, quæ solum per accidens sunt vnum, ergo non est vnica definitione definibile, definitio enim definit per genus, & differentiam, vbi autem sunt plures quidditates, sunt plura genera, & differentia, ergo plures definitiones, quæ ratio sumitur ex Philosoph. 7. Metaph. lect. 12. apud D. Thom.

Ex his ergo resoluo difficultatem propositam. *Et dico primò.* Definitum generis non est constitutum ex subiecto, & intentione generis, nec illi potest essentialiter conuenire definitio. Ita Caiet. super cap. de genere, & com.

communiter Thomistæ. Relinquitur manifestum ex dictis, cum intentio generis sit accidentale prædicatum respectu subiecti, & consequenter ex illo, & subiecto non resultet natura aliqua, seu quidditas per se definibilis.

Dico secundo. Non potest definitum formale in hac definitione, & cæterorum accidentium, esse ipsa natura, seu subiectum prout vestitum, & subditum intentioni. Ratio est quia formale definitum debet esse, quod ipso nomine formaliter, & per se designatur, sed album, v.g. non significat subiectum formaliter, & per se, sed in connotato, & ex consequenti, ergo. Min. prob. ex D. Thom. 5. Met. lect. 9. ubi inquit: *Nec verum est, quod Avicenna dicit, quod prædicata, quæ sunt in generibus accidentis, principaliter significant substantiam, & per posterius accidens, sicut hoc, quod dico album, nam album, ut in prædicamentis dicitur, solam qualitatem significat, hoc autem nomen album significat subiectum ex consequenti, in quantum significat albedinem per modum accidentis.* Ita D. Thom. Ratio autem est, quia concretum accidentis convenit cum suo abstracto in formali, & per se significato, ab illo enim desumit formam qua denominatur, & quam concernit, ergo concretum significat idem quod abstractum ex parte formæ denominantis, licet applicatam subiecto denominato, formale autem significatum abstracti est forma, ergo & formale significatum concreti est forma, licet addat modum existendi eius in subiecto denominato. Subiectum autem solum importatur, ut sustentans, & recipiens formam, non ut pertinens ad quidditatem

tem formæ, definitio autem intendit nobis explicare, quidditatem formæ receptæ, & significatæ in concreto, nō subiectum recipiens, multo minus naturam ipsam recipientis subiecti declarare intendit, cum enim definitio album, non naturam corporis, sed albi definitio rationem.

Dico ultimo Definitum formale, & quidditativum in hac definitione (idem est in ceteris concretis accidentalibus) est secunda intentio generis. Id autem quod reddit suppositum definito, seu denominatum ab illo, est subiectum huius intentionis, & ita ex consequenti, & de connotato importatur in ipso definito. Hæc Conclusio est Caiet. in cap. de genere, & cap. 4. de ente, & essen. sequunturque communiter Thomistæ. Itaque in his definitionibus illud est definitum formale ab eo, quod reddit suppositum definito, quia in hoc distinguitur accidens à substantia, quod definitum in substantia à se habet suppositum, & rationem quod, accidens verò illud extra se emendicat. Constat etiam conclusio ex Div. Thom. qui dicit concretum accidentis significare solam formam, ut album qualitatem, non autem habere subiectum tanquam partem significationis suæ, ut patet 5. Metaph. lect. 9. & lib. 8. lect. 4. §. *Determinat*, &c. Et lib. 7. lect. 1.

Nec sufficit respondere, quod Aristot. & D. Thom. solum voluerunt, quod concretum accidentis non significat determinate subiectum hoc, vel illud, sed in confuso, formam autem determinatè significat, nec enim negari potest, quod concretum accidentis subiectum

Etum nobis repræsentet, & non solum formant
Sed hæc solutio stare non potest, quia non ne-
 gat D. Thom. per nomen concretum significari
 subiectum, sed dicit non significari illud prin-
 cipaliter, sed ex consequenti, ut patet in 5. Me-
 taph. lect. 9. contra Auicennam, & quod non
 non significat illud ex æquo, & ut partem si-
 gnificationis, in 7. Met, sec. 1. ergo siue signi-
 ficet subiectum in communi, siue non, tamen
 apud D. Thom. id quod in nomine albi impor-
 tatur ut subiectum (quod certum est in con-
 fuso, & non determinate hoc, vel illud subie-
 ctum significari) non principaliter, sed ex con-
 sequenti significatur, & ut subiectum substan-
 tans formam, ergo non est principale, & per
 se definitum, sed reddens suppositum definito,
 & ex consequenti importatum.

Denique videri potest quàm luculenter
 hanc doceat concl. S. Thom. 7. cap. de ente, &
 essent. ubi inquit: *Quia essentia per definitio-*
nem significatur, oportet quòd eo modo acciden-
tia habeant essentiam, quo habent definitionem.
Definitionem autem habent incompletam, quia
non possunt definiri, nisi ponatur subiectum in
eorum definitione & hoc ideo est, quia non habent
in se esse absolutum per se à subiecto. Ponit
 deinde Sanctus Thom. differentiam inter for-
 mam substantialem, & accidentalem, quòd illa
 adueniens materie constituit essentiam quan-
 dam, & ideo forma est pars essentie completa,
 forma autem accidentalis cum subiecto non fa-
 cit unum per se, sed per accidens, & ideo ex eo-
 rum coniunctione non resultat essentia quædam
 sicut ex materia, & forma, & ideo accidens ne-
 que rationem completæ essentie habet, neque
 pars

pars completa essentia, sed sicut est ens secundum quid, ita essentiam habent secundum quid. Igitur apud D. Tho. definitio accidentis semper incompleta est, sicut & eius essentia, quia est essentia dependens ab aliquo extra se, scilicet à subiecto, quod reddit suppositum ipsi definito, non autem pertinet, nec intrat quidditatem definiti. Et hæc est ratio quare dicuntur accidentia definiri per additionem, ut loquitur Philos. 7. Met. tex. 17. lect. 4. apud D. Thom. quia definiuntur per aliquid quod est extra essentiam definiti, scilicet per subiectum, distinguitur enim in accidentibus *quod quid*, ab eo *cuius est*, ut ibidem tex. 20. dicit Aristoteles, & lect. 5. D. Thom. Aliud est ergo definitum formale, & quidditativum in accidentibus concretis, aliud suppositum definiti.

Et ex hoc sumitur fundamentum conclusionis, quia prædicata quidditativa, & formalia accidentis sistunt in ipsa forma accidentali, nec subiectum ad quidditativum prædicatum pertinet, licet ea sustentet, & recipiat. Ergo definitum quidditativum, & formale in his definitionibus ad subiectum non transit, sed in ipsa forma sistit, definitum enim formale, & quidditativum est illud in quo prædicata formalia, & quidditativa includuntur. Sed quia talis forma, & talia eius prædicata quidditativa non definiuntur in statu separationis, & abstractionis à subiecto, sed cum modo existendi in subiecto, ideo subiectum ex consequenti in eorum definitione panitur, ut redens suppositum definito, non ut prædicatum eius quidditativum. Et ita aliud est definitum quidditativum, & formale, aliud in quo invenitur

nitur hoc definitum, illique reddit suppositum.
Hoc est subiectum, seu natura, illud forma,
seu intentio in hac definitione generis.

SOLV VNTVR ARGVMENTA.

Primò arguitur argumentum supra positum
in introductione difficultatis, quia inten-
tio generis non est id quod prædica-ur de plu-
ribus speciebus essentialiter, cum non descen-
dat ad illas, sed est id quo natura prædicatur,
ergo non convenit ei definitio data. Vnde
etiam quando dico in concreto, Petrus est al-
bus, non prædico de illo albedinem, sed præ-
dico habens albedinem, hoc autem, quod est
habens albedinem, non est sola qualitas, sed
subiectum affectum qualitate, ergo illud est
definitum, sicut illud est significatum per ly
album.

Resp. Intentionem non esse id quod prædi-
catur, ut suppositum talis intentionis, & res
prædicata, & ideò neque convenit illi defi-
nitio, ut supposito definitionis, sed solum ut
rationi, seu formæ prædicandi de multis.
Vnde in definitionibus accidentium concre-
torum non inuenitur definitum, ut quod es-
sentialiter, sed denominatiue, cum redditur
suppositum definito per aliquod extrinsecum,
nec etiam ferunt ex se suppositum acciden-
tia, & ideò definitiones eorum dantur per
additionem, quia in eis aliud est quod quid
aliud, cuius est, ut ex Philosopho, & D. Tho.
supra diximus. Cur autem definitiones istæ
tradantur per id quod denominatur tale, non
per id quo est tale, cum huic soli essentialiter

conueniat definitio, & solum sit formale definitum? Ratio est, quia accidentia habent esse incompletum, & dependens à subiecto denominato, non in se subsistens, vnde melius exprimitur ista dependentia, & imperfectio accidentis definiendo illa per subiectum, quod denominatiue est tale, quàm per se ipsum significatum vt quo, de qua ratione videatur S. Thom. 7. Met. lect. 4. & c. 7. de ente, & essent. Et deinde vt congrueret hoc ipsi modo significandi, cum enim accidens definiatur in concreto, vbi significatur subiectum, vt redens suppositum definito, inconuenientius diceretur tale significatum esse id quo aliquid est tale, vbi solum significatur ratio abstracta, quam id quod est tale, licet solum denominatiue ei conueniat definitio. Et quando dicitur Petrus albus, ly albus, significat quidem habens albedinem, & non albedinem in abstracto, sed non ex æquo vtrumque, sed albedinem de formali, subiectum, quod est habens, de connotato, & pro materiali, ratione cuius verificatur accidentaliter de subiecto cui applicatur, quia identificatur in supposito cum illo, vnde similiter habens albedinem est definitum, sed non ex æquo, albedo, formaliter, ly habens, denominatiue, & intrans per additionem in definitione.

Secundo arguitur argumento supra facto q. 5. art. 5. quo aliqui hic vtuntur, quia, scilicet album, bene definitur sic, *est corpus disgregatum visus*, vel *est habens albedinem*, ergo non sola qualitas, sed constitutum ex qualitate, & subiecto est definibile. Huius solutionem vide præfate loco argumen. ult.

Terzio

Tertiò arguitur. In definitione generis non potest importari subiectum vnum, ergo neque principaliter, neque ex consequenti illud importat. Consequentia patet quia subiectum intentionis generis si non importatur vt vnum, sed vt plura, hoc ipso non benè definitur per modum vnius dicendo, *id quod prædicatur*, sed erunt plura quæ prædicantur. Ant. verò manifestum est, quia id, quod substernitur naturæ generis, non est vnum, nec potest vnico conceptu concipi, substernitur enim intentioni generis tam ens reale, quam rationis, tam accidens, quam substantia, ergo non est vnum subiectum.

Respond. Multos torqueri isto argumento. Sed tamen meo videri in omnium sententia soluendum est, siue subiectum importetur ex parte principalis definiti, siue vt denominatiue definitum, & ex consequenti importatum. Et eadem difficultas inueniri potest in quocunque concreto importante subiectum valde amplum, vt verum, bonum, intelligibile, &c. quorum subiectum tam in ente reali inuenitur, quam in ente rationis. Dico ergo, quòd in illo concreto non importatur subiectum vnum vnitatem naturæ, vel esse, sed vnitatem capacitatis, & receptibilitatis illius formæ, leu intentionis quicquid enim habet capacitatem illius formæ per modum vnius subiecti, hoc est vnius receptibilis, significatur, licet sint diuersissimæ naturæ, sicut dicunt Theologi, quòd in illis verbis, *Hoc est corpus meum*, per *ly hoc*, intelligitur contentum sub speciebus, id est, quicquid sub illis speciebus esse potest, siue sit corpus viuum, siue mortuum,

tium, siue panis, siue homo, sic nomine substrati generis intelligimus quicquid est capax generalitatis, siue sit reale, siue non, dummodo conueniat in hac ratione capacitatis, etsi non conueniat in quidditate naturæ, & vnitae.

Quarto arguitur. Si intelligamus definiri hic constitutum ipsum ex subiecto & forma, essentialiter explicatur omne quod pertinet ad rationem generis, explicatur enim & res prædicata denominatiue, & forma qua redditur prædicabilis, ergo melius quadrat toti ipsi definitioni tale conflatum pro definito.

Et confirmat. quia totum illud constitutum subordinatur vnico conceptui ultimo, ergo est vnicum definibile. Consequentia patet, quia ideò ens per accidens non est definibile, quia non est vna quidditas, sed plures, ergo à contrario sensu, si est vnum, vtpotè vnico conceptui subordinatum, definibile est per se. Antecedens verò probatur, tum quia concretum hoc, album, v. g. est vnus conceptus, ergo & constitutum ipsum ex albedine, & corpore, nec enim plura inueniuntur in concreto quam in constituto, tum etiam quia tam illud concretum accidentale, quam constitutum potest ordinari ad vnicam operationem, scilicet album ad disgregandum, calidum ad calefaciendum, ergo vnico conceptui subordinari potest.

Respond. Quòd in illo constituto explicatur quidem totum quod est in genere, sed non ex æquo, & tanquam pertinens essentialiter ad ipsum genus, sed subiectum vt denominatum, & intentio vt forma qua formaliter constituitur genus; quòd verò ex illis duobus resultet

vna

vna tertia quidditas, quæ essentialiter fit definitio huius generis, hoc est impossibile, ut vidimus, neque melius explicat definitum generis, aut definitio illi quadrat, quia neque est id quod prædicatur, quia intentio non descendit cum natura ad inferiora, neque est id quo prædicatur, quia natura non pertinet ad formam qua aliquid redditur prædicabile, sed ad rem prædicatam, unde ex natura & intentione, neque fit quidditas quæ sit genus, ut *quod*, neque ut *quo*. Explicatur autem utrumque quando non sumitur pro constituto, sed formaliter pro forma, & denominatiue pro subiecto.

Ad confirm. Resp. Quod concretum accidentis subordinatur vnico conceptui importando subiectum, & formam, non æque principaliter, sed formam essentialiter, & formaliter, subiectum verò materialiter, & ut denominatum, & sic sub isto conceptu definiri potest nec se habebit ut ens per accidens, sed definietur eo modo quo subordinatur illi conceptui, scilicet, ut forma sit ipsum definitum formale, & subiectum denominatum. Ac verò constitutum ex albedine & corpore, & forma & accidenti, includit utrumque æque essentialiter, & ut constituens vnum tertium, & hoc modo est ens per accidens, quia resultat ex extremis accidentaliter unitis, nec quidditas vna resultare potest, quæ non sit substantia, neque accidens, sed utrumque simul. Concretum verò non dicit quidditatem aliquam resultantem, sed ipsam formalem quidditatem accidentis habentem subiectum, non ut partem, seu extremum componens, sed ut materiale

riale à se denominatum, & in quo habet statum essendi, non abstractè, sed concretè.

Plt. arguit Sola natura est, quæ prædicatur de inferioribus, seu natura secundum se, ut dicit S. Thom. 4. c. de ent. & essent. ergo licet talis natura habeat relationem, & intentionem generis, tamen definitum directè erit ipsum substratum intentionis, quia huic soli essentialiter conuenit definitio, scilicet prædicari de pluribus. Nec potest dici quòd illi conuenit prædicari denominatiuè, non formaliter, & essentialiter, natura enim generica, v. g. animal, non denominatiue, sed essentialiter de inferioribus prædicatur.

Respon. Verissimum esse quod natura est id quod prædicatur essentialiter de inferioribus ex parte rei prædicatæ, ipsa tamen prædicabilitas, & status vniuersalitatis, quo prædicatur de pluribus, denominatiuè conuenit naturæ. Variatur autem appellatio cum dicitur non prædicatur denominatiue, sed essentialiter, ergo non conuenit illi denominatiue prædicari de pluribus, aliud est enim quomodo prædicabilitas conueniat naturæ, aliud quomodo natura de inferioribus prædicetur eisque conueniat. Natura non continet inferioribus denominatiue, ipsi tamen naturæ denominatiuè conuenit prædicabilitas, seu vniuersalitas ut de inferioribus essentialiter prædicetur, per modum vniuersalis, & superioris, sine qua tamen vniuersalitate inuenitur essentia. Ratione autem rei quæ prædicatur, dicit D. Thom. naturam secundum se prædicari de inferioribus.

ARTICVLVS III.

*Quomodo genus dicatur totum potentiale,
& à materia desumi.*

VT aliqua natura sit genus aliquas requiritur conditiones, quæ in hoc articulo explicandæ à nobis sunt. Prima, quòd se habeat vt totum respectu inferiorum. Secunda, quòd non dicat totam naturam actualiter, & explicitè, sed partem. Tertia, quòd dicat partem naturæ magis potentialem, ratione cuius dicitur genus totum potentiale. Quarta, quòd desumatur à materia, differentia vero à forma.

Quomodo genus sit totum, & pars.

DVo oportet aduertere. Primum est, quòd in vniuersalibus ratio totius, & partis duplici ratione consideratur. Primum ex modo concipiendi: secundo ex parte rei conceptæ, & significatæ. Ex parte modi concipiendi, omne vniuersale dicitur rationem totius, & non partis respectu suorum inferiorum, siquidem tali modo concipi debet, quod possit prædicari de quolibet inferiori, si autem conciperetur per modum partis respectu illorum, non posset de illis prædicari, quia omne totum est maius sua parte, & omnis pars minor suo toto. Vnde si significatur per modum partis respectu alicuius, hoc ipso ex modo significandi significatur vt minus illo, & consequenter non est ipsum totum, atque adeo non prædicatur de illo, prædicatio enim significatur

per verbum est, quatenus hoc est illud. Talis ergo ratio totius, ex modo concipiendi omni vniuersali, & omni prædicabili communis esse debet, & sic non pertinet specialiter ad rationem generis.

Ex parte autem rei significatae, seu conceptae, ratio totius, & ratio partis consideratur secundum, quod constituunt ipsam quidditatem, vel ipsa quidditas consideratur ut constituta, & hoc modo solum in tribus primis prædicabilibus inuenitur ratio totius, & partis, quia genus, & differentia concurrunt ad componendam speciem, & ideo designant partes illius, species autem est ipsa quidditas totalis & integra ex genere, & differentia constituta. Vnde licet genus, & differentia, ex modo concipiendi, tanquam vniuersalia habeant rationem totius, ex parte tamen rei quam explicant, non totam quidditatem explicant, sed partem.

Secundum, quod aduertimus est, quod in metaphysica compositione proprie non sunt partes, sicut in physica, sed gradus. In compositione enim physica coniunguntur duæ partes separabiles, sicut patet quod materia modo est sub vna forma, modo sub alia, & forma rationalis etiam est sine materia, vnde ex illis partibus ita componitur totum, quod vna pars non includitur in alia, nec prædicatur de alia, nec de toto, non enim dicimus, quod anima est corpus, vel homo, vel è contra. At verò partes metaphysicæ non sunt res distinctæ componentes vnum totum, sed diuersæ designationes eiusdem rei penes magis, & minus determinatum, ut Sanctus Thomas docet

Vocet in tertio capite de ente, & essentia. Quare cum isti gradus metaphysici solum differant penes designationem magis, vel minus determinatam eiusdem rei, non possunt propriè importare partes, quæ realiter inter se sint distinctæ, sed idem totum magis, vel minus designatum, & magis, vel minus determinatum, vnde eadem res, seu idem totum vt exprimens, seu designans rationem animalis, quæ est minus determinata, & idem totum vt designat rationale, quæ est ratio magis determinata, componunt hominem, qui exprimit integram rationem quidditatis humanæ. Qua ratione venit intelligendus idem S. Doct. in 1. dist. 25. quæst. 1. art. 1. ad 2. vbi dicit quod homo non est ex animali, & rationali, sed animal rationale, quia scilicet non est ex illis, vt ex partibus distinctis, benè tamen vt ex gradibus diuersimodè designantibus eandem rem.

Ex quo colligitur quòd genus non dicitur pars physica, sed metaphysica, quæ simul potest esse totum, pars quidem in quantum explicat, & designat vnum tantum constitutum quidditatis specificæ, totum vero in quantum implicite ex ipso modo significandi, & concipiendi, dicit totum quod est in inferiori de quo prædicatur, v.g. animal ex parte rei significatæ solum designat, & explicat rationem sensitivam, vbi non explicatur omne quod pertinet ad essentiam hominis, vel equi, aut cæterarum specierum, sed tamen implicite dicit quicquid est in homine, vel in equo, quia ita dicit formam sensitivam explicando solam rationem sensitiui, quod non excludit omne aliud, quod tali formæ sensitiuæ con-

iungi potest, & sic dicitur quamcumque formam quæ sensitiva est, siue solum sit sensitiva, siue aliquid amplius habeat. Et hoc quod est non excludere omne aliud quod tali formæ sensitivæ coniungi potest, est illud implicite continere, quod si significaretur forma illa animalis vel generica cum tali præcisione, quod excluderet quodcumque aliud quod non est forma sensitiva, sicut quando significatur nomine abstracto animalitatis; tunc non posset prædicari de inferioribus in concreto, ut supra quæst. 5. latè diximus.

Vnde soluitur illa quæstio, An genus prædicetur ut totum, vel ut pars de inferioribus. Constat enim ex dictis, quod genus prædicatur ut totum ex parte modi concipiendi, sed ex parte rei prædicatæ non explicat nisi partem quidditatis illius rei de qua prædicatur, quando enim prædico animal de homine, id quod explicatur nomine animalis, est ratio formæ sensitivæ; modus autem quo prædicatur est, absolute dicendo totum quod est in homine, quatenus implicite inuoluit non solum formam sensitivam cum exclusionem ulterioris perfectionis, sed dicit quicquid est sensitivum, etiamsi aliud ulterius habeat, & hac ratione est simpliciter ipsum totum. Et sic conciliantur sententiæ, quæ in hac parte videntur esse oppositæ, nec rationes unius, & alterius amplius probant.

Quomodo genus sit totum potentiale.

VT non oriatur confusio in nomine totius potentialis, oportet advertere non acci-

ocipi hic totum potentiale ut distinguitur à toto essentiali, quomodo dici solet quòd totum potentiale diuiditur in partes potestatiuas de quibus non prædicatur: totum autem essentialiter diuiditur in partes subiectiuas de quibus dicitur. Sed genus dicitur totum potentiale ut opponitur toti actuali, quia non explicat totum actualiter constitutum, sed partem illius alterius actuabilem, & contrahibilem, atque deo potentialiter se habentem.

De hoc ergo toto potenciali duo restant explicanda. *Primum.* Respectu quorum dicatur genus esse potentiale, & implicitum, & consequenter, utrum ista potentialitas illi conueniat in quantum totum, vel in quantum pars? *Secundum.* Quid sit illud actuale comparatione cuius, genus dicitur potentiale?

Ad primum. Respond. Primò, genus dici potentiale in quantum importat aliquam rationem communem contrahibilem per additionem alicuius differentiae, quæ actu non includitur in illa ratione superiori, sed in potentia. Et hoc commune est omni uniuoco, etiam si speciei ad differentiam transcendentium, & analogorum, quæ in ipsis differentiis imbutur. Vnde transcendentibus non additur aliquid quasi extraneum, quia in omni re includuntur, eo quod transcendentia sunt. Et ac ratione non perfectè abstrahunt à suis inferioribus, ut dicemus quæst. 13. Vniuocum autem, quia perfectè abstrahitur ab inferioribus, & quæ includitur in ipsis differentiis, dicitur potentia manere ad illas.

Secundò dicitur speciali modo genus esse id potentiale respectu compositionis metaphy.

taphysicæ, quia in ipsa quidditate specifica genus designat partem contrahibilem per differentiam, & sic magis indeterminatam, & potentialem, differentia autem dicit partem contrahentem, & determinantem, & ideo prædicatur per modum qualis, licet essentialiter, quia quod determinat, & afficit alterum, quasi qualificat illud, & ita genus potentialiter se habet respectu differentiae contrahentis, sicut materia respectu formæ, & respectu totius constituti tanquam incompletum respectu completi.

Ex quo patet, An genus sit dicendum totum potentiale, vel pars potentialis. Vtrumque enim debet dici secundum diuersas considerationes. Nam cum partes metaphysicæ non sint propriè partes, sed gradus, reuera autem sunt ipsum totum implicite, & non totaliter explicatum quo ad quidditatem, sicut explicat species, ideo genus, quando consideratur ut pars, etiam est totum, sed de illo toto non explicat totum, sed partem, seu gradum designabilem, & compleibilem ulteriori actualitate, quæ est differentia. Vnde ex parte quidditatis quam explicat, comparatiuè ad differentiam, pars potentialis est, respectu autem speciei inferioris, totum potentiale est, idest, totum quid est in specie non totaliter designatum, & explicatum, sed indeterminatè acceptum.

Ad secundum verò quod proposuimus explicandum Respond. Prædicatum actuale, in ordine ad quod sumitur maior, vel minor potentialitas generis, esse ultimam differentiam specificam, quæ reddit quidditatem aliquam

ita

formatam, & determinatam, quod non est
nplius contrahibilis nisi per differentias indi-
iduales, quæ non faciunt differre formaliter,
quidditatiuè, sed materialiter, & numeri-
è, vt amplius explicabitur quaest. 9.

*Quid sit genus desumi à materia, & differen-
tiam à forma.*

Vulgare est hoc Axioma, licet non eodem
modo applicari possit omnibus naturis,
næ generis intentionem fubeunt. Quædam
nim naturæ sunt compositæ ex forma, & ma-
teria, quædam sunt formæ tantum, licet de-
pendentes à materia, sicut accidentia. Quædam
neque compositionem habent ex materia, ne-
que ordinem ad illam, sicut Angeli. Et de
istis omnibus quomodo genus sumant à mate-
ria, & differentiam à forma agit D. Tho. 6. &
cap. de ente, & essent. & opusc. 41. c. 4. &
& 1. p. q. 50. art. 2. ad 1. & quaest. de spiri-
tualibus creaturis art. 1. ad 24. & 7. Metaphys.
2. 9. & lib. 8. lect. 3. & alibi frequenter.

Est ergo considerandum. Quòd quando di-
mus genus sumi à materia, differentiam à for-
ma, non est sensus, quòd genus dicat solam
materiam, & differentia solam formam, sed
quia forma est principium differentia à qua
illa desumitur, sicut cum dicimus principium
indiuuationis esse materiam signatam, non
est sensus, quòd indiuuatio consistat forma-
liter in materia signata, sed quòd inde tanquam
ex radice sumatur, vt notat S. Thom. 5. cap. de
ente, & essent. Et hoc constat manifestè, quia
genus, vt sæpè probatum est, dicit totam es-

sentiam eius de quo prædicatur, ergo non dicit solam materiam, nec differentia solam formam. Sic enim non differrent partes Physicæ, & Metaphysicæ.

In gradibus ergo genericis, & specificis, seu differentialibus distinguendum est id quod habent de potentialitate, & id quod explicant de actualitate, sicut animal, v. g. actualiter explicat formam sensitivam, potentialiter inuoluit ea quæ tali formæ coniunguntur.

Dico ergo quod in ipso gradu generico non importatur pura potentialitas, sicut in materia prima, sed aliquid etiam determinatæ actualitatis, & quidditatis, licet non omnino completæ, & determinatæ, & ideo non debet desumi proximè ratio generica à sola materia quæ est pars Physica, sed ab eo quod materiale est, seu potentiale in vnaquaque re, siue sit composita, siue simplex. Vnde etiam in rebus compositis diximus quod ab eadem forma sumuntur omnes gradus, materia verò non dat gradum, sed recipit, & informatur ab illo; remote tamen potest sumi in rebus compositis genus à materia, quatenus est principium omnis potentialitatis, & ita forma secundum gradum perfectum informans materiam, illamque relinquens informabilem ab ulteriori gradu dicetur radix, & principium generis, etiam ex parte ipsius materiæ sic informabilis. Ita sumitur ex D. Thom. loco citato de spirit. creat. ubi inquit: *Quod genus sumitur à materia*; ita tamen quod per materiam non intelligatur materia prima, sed secundum quod per formam recipit quoddam esse imperfectum, & materiale respectu esse specifici sicut esse animalis.

alis est imperfectum & materiale respectu ho-
minis. Et similiter in cap. 6. de ent. & essen.
& sensibilibus (inquit) genus sumitur ab eo
quod est materiale in re; differentia vero ab eo
quod est formale in ipsa. Unde dicit Avicenna,
quod forma in rebus compositis ex materia, &
forma, est differentia simplex, non autem ita
quod ipsa forma sit differentia, sed quia est prin-
cipium differentiae. Itaque genus non sumitur
sola materia prima nuda, sed à materia ut
abente esse imperfectum à forma, & materia
ut habens esse imperfectum, dicitur materia-
le respectu gradus perfectioris, genus enim
indicit naturam aliquam determinatam, licet
secundum perfectam omni perfectione; ma-
teria autem secundum se nullum determina-
tum gradum dicit, nec determinatam actuali-
tatem, est enim in potentia ad omnem actuali-
tatem substantialem, ut in physicis latius pro-
babitur: Et dato quod ipsa habeat aliquam
actualitatem substantialem, tamen manifestè
constat, quod à forma recipit non tantum
ultimam actualitatem, & gradum, sed diuersos
gradus, & perfectiones magis, vel minus de-
terminatas; Unde genera illa, quae istis imper-
fectioribus gradibus correspondent, non pos-
sunt à materia nuda desumi, sed à materia in-
formata secundum rationem, & gradum im-
perfectiorem ad ipsam ut perfectiori gradu,
& ratione informabilem.

Quando autem dicit D. Thom. opus. 42. c. 2.
quod potentialitas totius compositi in rebus
materialibus est à materia, ideo sumitur genus
ab ea, perfectio vero totius est à forma, ideo à
forma sumitur differentia. Et 1. p. q. 50. art. 2.
ad 1.

ad 1. inquit: *Quid in rebus materialibus aliud est quod determinat specialem gradum, scilicet forma, & aliud quod determinatur, scilicet materia; atque adeò videtur affirmare, quòd genus à sola materia sumatur, differentia à sola forma.*

Respondi. Sensum D. Tho. ex eius verbis perspicuum esse, videlicet materiam in compositis esse primam radicem potentialitatis, & sic licet gradus genericus sumatur à forma pro ea parte, qua gradus dicit actualitatem, tamen potentialitas generis ad materiam, ut ad radicem deuoluitur, licet proximè desumatur non à materia nuda, sed ab eo quod materiale est, respectu eius quod formalius & perfectius, & hoc materiale vocat D. Thom. materiam, illud formalius formam, non materiam nudam, à qua sumatur genus.

At verò in rebus non compositis, scilicet in Angelis, qui non conueniunt in materia cum corporibus (ideòque aliquando dicuntur differre genere ab illis, idest, materia, quæ est genus physicum) non verificatur, quòd genus sumatur à materia etiam remote, quia carent illa, sed sumitur ab eo quod potentialius est, & quasi materiale in talibus substantijs. Hoc autem ut dicit S. Thom. 6. cap. de ente, & essent. & 1. p. q. 50. art. 2. ad 1. est ipsa intellectualitas, seu immaterialitas præcisè vel indeterminatè accepta, idest, quatenus intellectualitas finita & limitata, & in potentia, ut per maiorem vel minorem accessum, & participationem actus puri sit perfectior vel imperfectior: hoc enim præbet rationem differentia, & gradualis perfectionis quatenus uni-
for-

formius vnus intellectus intelligit, quam alius, & sic similior est Deo, magisque ad illum accedit. Denique in accidentibus, genus etiam non sumitur à materia sibi intrinseca, quia ea caret, sed ex diuersa habitudine ad substantiam, vt dicemus in Antepædimentis, sicut quantitas dicitur ex eo quod respicit substantiam mensurando per modum extensionis, qualitas afficiendo per modum virtutis, vel ornatus, & sic de alijs. Differentiæ verò sumuntur, vel ex proprijs subiectis à quibus accidentia propria oriuntur, vel ex effectibus talium accidentium eas desumimus, quasi à posteriori, quia proprias differentias ignoramus. Videatur D. Thom. 7. cap. de ente, & essentia.

Dices. Non potest ex eodem principio & radice desumi genus, & desumi indiuiduatio, cum genus sit maxime indeterminatum, indiuiduum vltimo determinatum, ergo inconuenienter dicetur genus sumi à materia, cum in sententia Diu. Thom. ab ea sumatur indiuiduatio.

Respondetur. Vtrūque conuenire materiæ secundum diuersos respectus, & considerationes. Nam materia respicit formam tanquam subiectum primum & potentiale, quod scilicet est in potentia ad formam, eiusque gradus recipiendos, non habet autem ipsa materia vltcrius aliud subiectum in quo recipiatur. Vnde respectu formæ habendo potentialitatem relinquit indeterminationem, & indifferentiam ad recipiendum gradum imperfectum vnius formæ, & vltcrius alium perfectiorem vsque ad vltimum, quod est esse radicem, & prin-

principium generis. Quia verò recipiendo formam ita est subiectum ultimum, quod est ulterius incommunicabile alij subiecto, ratione huius ultimæ incommunicabilitatis est principium individuationis, quod non est amplius commune pluribus, nec communicabile.

Quæ naturæ sint capaces generis.

Respondeo. Omnes illæ, quæ directè possunt esse in prædicamento siue reali, siue rationis, siue sint accidens, siue modi, vel substantiæ. Itaque omne ens, quod habet modum, seu rationem totius constans ex metaphysica compositione, est capax habendi genus & differentiam, quod per modum totius prædicet de illo partem quidditativam, quæ autem solum sunt partes simplices, siue physicae, ut materia & forma, siue integrantes, & similiter differentiæ non habent per se rationem generis, sed solum reductivè. Quæ est sententia S. Thomæ in 3. dist. 6. quæst. 1. ar. 1. ad 1. & opusc. 42. cap. 10. Caietani in cap. de Specie & Aliorum.

Ratio ad excludendum partes physicas & integrantes ea est, quia istæ partes non possunt habere genus supremum, ergo neque subalternum, quia cum in generibus non sit procedere in infinitum, oportet sistere in vno, & illud erit supremum. Antec. probat. Quia si haberent supremum genus, vel illud est substantia completa, quæ est genus supremum prædicamentale, vel incompleta: completa esse non potest, quia hæc non prædicatur verè de partibus, ergo neque genericè. Incompleta

pleta esse non potest, quia hæc imbibitur in quacunque differentia, & sic etiam in ipsis differentiis partium imbibetur, nam etiam sunt aliquid incompletum, atque ita transcendentia- liter se habet, non vero per modum generis, quod debet esse extra conceptum differentiarum. Et simile argumentum potest fieri de corpore & viuento, &c. In accidentibus autem non est necesse facere hoc argumentum, quia non habent partes, sed sunt formæ simplices, si tamen haberent, idem argumentum fieret.

Ratio verò ad excludendum differentias à ratione generis ea est, quia sequeretur processus in infinitum; nam si rationale, v. g. habet genus, debet contrahere illud per aliam differentiam, omne enim genus per differentiam contrahibile est. Rursus illa differentia sic contrahens haberet etiam suum genus, non enim est maior ratio de vna, quam de alia, ergo contraheretur per aliam differentiam: & illa rursus haberet aliud genus, & differentiam, & sic in infinitum, non ergo differentie habent directè genus, sed reducuntur tanquam ad latus.

Ex hoc tamen non inferas abstracta substantiarum non esse genera, & species, quia licet significantur per modum partis, sunt tamen formæ totales, habentque compositionem ex genere & differentia, sicut humanitas respectu animalitatis, & rationalitatis. Vnde non sequitur idem inconueniens, quod in alijs partibus.

Quod si obijcias, Nam partes istæ, & differentie habent aliqua prædicata superiora quidditatiua præter ens, habent enim conuenien-

uenientiam magis cum vna parte , quàm cum alia , sicut forma leonis magis conuenit cum forma bouis , quàm cum forma lapidis , ergo possunt habere genus , quod est prædicatum superius tanquam id , in quo conueniunt , & similiter suam differentiam .

Ec confirm. Nam materia coelestis , & sublu-
naris differunt specie secundum sententiam S.
Thom. 1. p. q. 66. art. 2. ergo vnaquæque ha-
bet suam speciem distinctam , & consequenter
habent genus in quo conueniunt , & differen-
tiam qua diuiduntur .

Respond. Quòd partes istæ habent prædica-
ta superiora quidditatiua , sed quia per se non
sunt aliquod totum , & completum , non con-
stituunt directè speciem . Et consequenter
neque directè habent genus , sed totum hoc
habent reductiuè , sicut incompletum reduci-
tur ad completum ; imò magis istæ prædica-
tiones in talibus partibus & incompletis en-
tibus sunt transcendentales , quàm genericæ ,
quia includuntur in ipsis differentiis , quod
non conuenit generi . Et ita non sufficit ha-
bere prædicata superiora quidditatiuè ad hoc ,
vt sint genericæ , sed oportet quòd transcen-
dentales non sint , sed extra differentias se ha-
beant .

Et si quæras de hac prædicatione , *Hæc for-
ma est forma , Hæc manus est manus , &c.* An
sit speciei de individuo . *Resp.* Hoc non esse
nisi secundum quid , & reductiuè sicut cum di-
citur , *Hæc persona est persona : Hoc individuum
est individuum* , quia ibi non prædicatur natu-
ra , sed aliquid naturæ , & licet sit prædicatio
essentialis , est tamen incompleta , & conse-
quen-

quenter reductiue pertinens ad completam :

Ad confirm. Respond. Materiam coelestem, & sublunarem esse diuersæ speciei modo incompleto, quia scilicet non dicunt ordinem & capacitatem ad easdem formas, & ita vna materia non transit de vna forma ad aliam. Ista tamen diuersitas capacitarum non addit aliquā differentiam, quæ per modum actualitatis determinet & constituat materiam, cum vtræque sit pura potentia, atque ita in ipsismet differentijs vtriusque materiæ includitur potentialitas ipsa, quæ constituit materiam in comuni, & substantia, quæ de illis prædicatur, est substantia incompleta, quæ prædicatur magis transcendentaliter, quàm genericè, vt dictum est. Et eodem modo intelligitur materiam habere rationem naturæ, & alia prædicata quidditatiua, scilicet modo incompleto transcendentali, non generico.

QVÆSTIO VIII.

De Specie prædicabili, & subijcibili.



Correlatiuum generis est Species, de qua genus prædicatur, ipsa autem vterius de indiuiduis prædicabilis est, & ideò includit duplicem respectum, subijcibilitatis

ad genus, superioritatis ad indiuidua. Et ideò ad explicandum exactè hoc secundum prædicabile vterque respectus explicandus est.

ARTI

ARTICVLVS I.

*Virum species constituatur in ratione speciei
per rationem subijcibilis, vel
pradicabilis.*

SUppono utroque modo definiri speciem à Porphyrio, quatenus subijcibilis dicitur illa, quæ sub assignato genere collocatur, & de qua genus prædicatur in quid. Definitur autem quatenus prædicabilis, quæ de pluribus differentibus numero in eo quodquid prædicatur. Vbi explicatur vnica habitudo eius non ad sibi superius, sed ad sua inferiora respectu quorum superius est. Et obiter nota. Quòd non est vitiosus circulus in definitionibus Porphyrij cum definit genus per respectum ad speciem, de qua prædicatur, & speciem per respectum ad genus cui subijcitur. Tum quia inter correlatiua mutua, quia sunt genus, & species, necessario interuenire debet iste mutuis respectus sine vitio circuli hoc ipso quod mutua sunt, & consequenter mutuo in definitione vtriusque includi debet alterum, vt dicemus infra quæst. 17. art. 6. Tum quia species non illa tantum definitione definitur, scilicet per respectum subijcibilitatis ad genus, sed etiam alia, scilicet prædicabilitatis ad inferiora, & sic non præcisè notificatur per genus, sed alia via. Vbicumque autem aliquid supponitur notificatum, & definitum alia definitione, & alia via, quam per illud, cum quo circulariter definitur, non committitur circulus formalis, sed materialis

tan-

tantum, qui viciosus non est, eo quod non idem per idem tantum notificatur, sed aliunde notificatum, aliter suum notificans, & definiens manifestat, vt in lib. Posterior. quæst. 25. amplius dicemus.

Cum ergo in hoc secundo prædicabili concurrat duplex ista intentio prædicabilis, & subiçibilis, difficultas est in duobus. *Primum*. Quænam ex istis intentionibus constituat formaliter secundum prædicabile? *Secundum*. Quomodo vna se habeat erga aliam; an omninò disparate: an vt propria passio, & quid consequens vel modificans aliam. Est autem certum istos respectus, seu intentiones esse diuersas relationes, nam habent distinctos terminos & fundamenta; terminus enim subiçibilitatis est ipsum superius cui subiçitur; fundamentum verò, inferioritas, seu dependentia ab illo; at verò terminus prædicabilitatis, seu vniuersalitatis sunt ipsa inferiora, de quibus prædicantur; fundamentum verò ipsius sumitur ex ipsa communitate naturæ, in qua conueniunt illa inferiora, quæ communicabilis, & superior est illis. Sunt ergo diuersa fundamenta, & termini istarum relationum, à fundamento autem & termino sumit relatio suam vnitatem vel diuersitatem. Et licet ipsa ratio, seu intentio speciei non pluribus relationibus, sed vnicâ constituatur, potest tamen plures habere vt proprietates, vel condiciones requisitas, sicut etiam prædicabilitas est passio vniuersalitatis. Et inquirimus quænam relatio sit essentialis, & constitutiua speciei.

Ad hanc ergo difficultatem aliqui censent
spe.

speciem prædicabilem non conuenire speciei, ut species est, sed in ratione speciei constituti per subijcibilitatem ad genus ad quam sequitur prædicabilitas, & vniuersalitas eius. Et hoc ideo, quia propria ratio speciei est esse correlatiuum generis, & hanc rationem correlatiui non habet per ordinem ad inferiora, de quibus dicitur, sed per ordinem ad genus sub quo ponitur: ita sumitur ex Caiet. in cap. de Specie. Alij autem per aliud extremum existimant speciem ita constitui per vniuersalitatem, quòd etiam ipsa subijcibilitas ad genus ei, inquantum vniuersalis est, & ratione vniuersalitatis conueniat: attribuitur Toleto quæst. vnica de Specie. Alij autem dicunt subijcibilitatem, & prædicabilitatem se habere ut disparatas relationes, neque vnum oriri ex alio tanquam passionem ab essentia, de quo videatur Curs. Carmel. hic disput. 6. quæst. 3. M. Cabero disp. 3. dub. 1. & Merinero, disp. 3. dub. 1.

Circa secundum etiam variant Authores; quidam enim, ut Caietanus capit. de Specie existimant subijcibilitatem ad genus esse primam rationem speciei, & ex illa oriri prædicabilitatem ad individua, & hoc loquendo de specie athoma, in qua vna istarum intentionum pullulat ex alia, ex eo enim quòd species ponitur sub genere immediate, & directe, nascitur quod species sit prædicabilis, in specie autem subalterna, ratio speciei, quæ inuenitur, propriè est species subijcibilis, nam prædicabilitas illius non est de pluribus solum numero differentibus, sed etiam specie. Alij verò è contra existimant intentionem prædicabi-

cabilitatis, & vniuersalitatis ita esse primam in specie, quòd ex ea oriatur subijcibilitas.

Nihilominus dico primò, constitutum intrinsecum, & essenziale speciei, vt est secundum prædicabile conuiusum ab alijs prædicabilibus, est vniuersalitas talis, quæ dicit respectum, & prædicabilitatem ad plura solo numero differentia. Ratio est. Quia species in tantum est vnum de quinque prædicabilibus in quantum participat rationem vniuersalis, siquidem ista quinque prædicabilia sunt species quædam vniuersalis, vt supra probatum est, ergo constitutum eius debet esse intra latitudinem, & rationem vniuersalis, ergo non per subijcibilitatem, sed per superioritatem debet constitui. Conseq. patet, quia implicat quòd aliqua relatio in communi importet tendentiam ad aliquem terminum, & relatio, quæ est eius species, & sub ea contenta, tendat ad oppositum. Sicut si relatio Patris in communi respicit filium, relatio talis patris in particulari non potest respicere auum, sed etiam respicere debet filium talem in particulari. Constat autem quòd relatio vniuersalitatis in communi, quæ est genus ad quinque prædicabilia respicit vt proprium terminum, inferiora, ergo relatio talis vniuersalis, scilicet speciei non potest respicere formaliter loquendo, & constitui per respectum ad superiora, sed ad inferiora, ergo non potest constitui formaliter per subijcibilitatem in ratione secundi prædicabilis, sed per vniuersalitem, seu prædicabilitatem talem, id est, quæ talia inferiora respiciat. Quam rationem ita difficile existimauit Caiet. in c. de Specie, quia eam insolutam reliquit.

Dico

Dico secundò. Non possunt concurrere per accidens, & disparate se habere in secundo prædicabili prædicabilitas, & subiycibilitas, sed vel secundum se, vel per sua fundamenta vna determinat, & modificat alteram. Ratio est. Quia secundum prædicabile non habet esse vniuersale quomodocumque, sed vniuersale subordinatum, & minus altero, scilicet genere, ergo id quod conducit ad hoc vt sit vniuersale minus amplum altero, non potest disparate se habere ad constitutionem talis vniuersalis, siquidem de intrinseca ratione eius est, quod sit vniuersale subordinatum & inferius, sicut non disparate se habet ad constituendam causam secundam hoc quod est subordinari causæ primæ: & in ordine politico, ministro inferiori non est per accidens & disparatum quòd subordinetur superiori, & superior minister Regi, cum hoc sit de ratione ministri talis ex subordinatione agentis; ita species essentialiter habet prædicari de inferioribus, sed non est ei per accidens & disparatum, sed per se requiritur subordinari superiori vniuersali sub quo continetur inquantum minus vniuersale est.

Nec sufficit dicere, quòd hoc quod est subijci generi competit ipsi naturæ specificæ. Cæterum intentioni per accidens coniungitur alia intentio subiycibilitatis; non enim eadem relatio & intentio est subiycibilitas, & prædicabilitas. Hoc, inquam, non sufficit, nam licet sit duplex relatio prædicabilitas, & subiycibilitas, tamen hoc ipso quòd prædicabilitas, quæ pertinet ad rationem speciei, non est prædicabilitas suprema, sed inferior per se, & non dispa-

disparate petit fundare relationem subijcibilitatis, sine qua ratio inferioritatis nequit intelligi, omne enim inferius subijcibile est. Ergo ex parte fundamenti uniuntur per se prædicabilitas, & subijcibilitas, & inter se etiã connexionem habent, nec per accidens concurrunt in ratione speciei, sicut etiam vniuersalitas, & prædicabilitas sunt duæ intentiones, seu relationes distinctæ, & tamen vna sequitur ad aliam, & per se connectitur cum alia, licet verum sit quod quia earum esse consistit in cognosci, non repugnet vnã cognosci sine altera, & actu esse sine altera in ipsa ratione cognoscente: ista enim connexio intentionum non est, quo ad existentiam actua-lem, ita quod vna sequatur ad aliam in esse, cum esse non conueniat eis per consequutionem, sed per cognitionem, est autem connexio ratione fundamenti, quia fundamentum ita fundat vnã, quod etiam petit ex vi illius fundare aliam.

Dico ultimo, subijcibilitas non dimanat ab vniuersalitate præcisè accepta, multo minus prædicabilitas ex subijcibilitate: sed prior & essentialior intentio in secundo prædicabili est vniuersalitas limitata, & coarctata, & ex ipsa quatenus sic limitata, & modificata, oritur subijcibilitas immediata ad genus. Ratio huius sumitur ex dictis, quia secundum prædicabile per se, & essentialiter est quoddam vniuersale, cum vniuersale diuidatur tanquã genus in ista quinque prædicabilia: essentialiter ergo ad ipsum debet pertinere intentio vniuersalitatis sic determinatæ, scilicet, quæ solum respiciat inferiora numero distincta.

Ex vniuersalitate autem in linea, & respectu vniuersalitatis respicientis inferiora solum sequi potest id, quod superioritatis, non quod inferioritatis, & subiectionis est, ergo ex vi vniuersalitatis non sequitur intentio subijcibilitatis. Sed quia vniuersalitas limitata est, & coarctata, ratione illius vt limitatæ subijcibilitas sequi potest: sicut in creatura, aliæ passionēs sequuntur ex eo quod ens creatum est, vel quia tale ens est, v. g. substantia, vel corpus, aliæ ex eo quod ex nihilo est, v. g. quod sit defectibilis, peccabilis, annihilabilis, &c. Similiter in causa, ex eo quod causatum est, seu ex linea causalitatis non sequitur subiectio ad aliam causam, sed ex eo quod causa limitata, & dependens, & coarctata in causando. Eodem ergo modo ex vi vniuersalitatis, & ex respectu, & linea eius etiā vniuersalitatis specificæ, non sequitur vt passio propria, subijcibilitas, sed ex vniuersalitate dependente, & limitata, & subordinata alteri, seu minori illa, sequitur subijcibilitas ad superius vniuersale, quod est genus.

Ex qua conclusione intelligitur, quomodo connexæ sint in secundo prædicabili istæ duæ intentiones subijcibilitas, & prædicabilitas in vna forma vniuersalitatis, quia cum per accidens non concurrant in hoc secundo prædicabili, necesse est quod per se ex aliqua forma consequantur, & ratione illius per se conueniant. Sic ergo consequuntur ad vniuersalitatem limitatam, & subordinatam; ex parte subordinationis, & limitationis, subijcibilitas; ex parte vniuersalitatis, prædicabilitas, sicut ad hominem quatenus rationalis, sequitur inclin-

clinatio ad virtutem, quatenus defectibilis, & ex nihilo, peccabilitas. Et similiter constat quomodo species intrinsecè, essentialiter sit correlatiuum generis, quatenus illi subiectum & inferius; hoc autem habet quatenus limitatum, & subordinatum vniuersale est.

Ex quo patet diuisionem speciei in prædicabilem, & subiicibilem non esse diuisionem in diuersas res, sed in diuersas passiones seu modos eiusdem, quibus habet diuersos respectus ad superiora, scilicet, & inferiora.

SOLVUNTUR ARGUMENTA.

Primo arguitur, species formalissimè quatenus species solum habet esse correlatiuum generis, sed in quantum correlatiuum non est prædicabilis, sed subiicibilis, ergo formaliter in quantum species non est prædicabilis. Maior est certa, quia genus per se definitur relatiuè ad speciem, vt ad proprium correlatiuum, ergo species, vt species formaliter est correlatiuum generis. Minor constat, quia vt correlatiuum respicit id cuius correlatiuum est, sed est formaliter correlatiuum generis, ergo formaliter vt species respicit illud, vt autem respicit genus non est prædicabilis, sed subiicibilis, ergo essentialiter constituitur per subiicibilitatem potius; quàm per prædicabilitatem.

Confirmatur genus subalternum vniuersalius est, quàm species intima, cum de illa prædicetur, sed non constituitur in ratione generis subalterni per prædicabilitatem, ergo multo minus species intima, vt infima. Minor

P a proba-

probat: genus subalternum non constituitur in esse talis, nec per prædicabilitatem de pluribus specie differentibus, nec per prædicabilitatem de pluribus differentibus numero, ergo per nullam. Non per prædicabilitatem de pluribus specie differentibus, quia hoc etiam conuenit generi supremo, & sic non est propria ratio subalterni. Non per prædicabilitatem de pluribus numero differentibus, quia hoc etiam conuenit speciei infimæ, ergo per nullam prædicabilitatem, sed per subijcibilitatem constituitur.

Respond. Varias esse opiniones de proprio, & per se correlatiuo generis, quas videre poteris apud Conimbr. quæst. 2. de Specie, art. 1. nam quidam existimant genus, ut genus solum, & adæquatè referri ad speciem, ad indiuidua verò non referri per modum generis. *Alij dicunt*, adæquatum correlatiuum generis esse aliquid abstrahens ab indiuiduo, & specie, quod vocant *subijcibile in quid incomplete*, eo quod in hac ratione conueniunt, tam indiuiduum, quàm species. *Alij denique, & melius censent*, immediatum ac formale correlatiuum generis esse speciem, sed non omni modo, nec adæquate, nam etiam indiuiduum ei subijcitur, sed non formaliter sicut species, nec enim contrahit genus formali diuisione, sicut species, sed materiali per condiciones, scilicet materiales, & indiuiduatiuas, in quibus sustentatur species, & mediante specie genus. Dicimus ergo quod species est quidem correlatiuum generis, sed formale, idest, formaliter contrahens, & per differentiam, quæ formaliter, & specificè facit differre, non numerice,
ex quo

ex quo habet non solum esse correlatiuum; & subijcibile generis, sed etiam relatiuum propriè, & per se ad indiuidua, quia non est correlatiuum generis formale, & immediatum, nisi sit etiam vniuersale in se, limitatum tamen & coarctatum seu dependens, quia generi subiectum. Et sic esse correlatiuum generis non est tota essentia speciei, sed potius est conditio eius, directè autem, & per se species vniuersale est, & prædicabile de indiuiduo, cum dependentia tamen subijcibilitatis ad genus.

Ad confirmationem respondetur esse disparitatem inter speciem infimam, & subalternam, quia subalterna non habet esse vniuersalis in ratione speciei, sed in ratione generis, habet enim vniuersalitatem, & prædicabilitatem solum *in quid complete*, subalternationem autem habet in ratione speciei subijcibilis, quatenus, scilicet superiori generi subijcitur, & per differentiam contrahit illud, & facit quandam speciem non infimam, sed subalternam, quæ etiam genus subalternum dicitur; re vera tamen subalternatio conuenit ei in quantum species quædam est, & ita secundum aliam rationem habet vniuersalitatem, scilicet ut genus, secundum aliam subijcibilitatem, scilicet ut species. An verò species infima non habet vniuersalitatem in ratione generis, sed in ratione secundi prædicabilis *in quid complete*; & idè vniuersalitas per prius est in illa, ut constituatur secundum prædicabile, quàm subijcibilitas in eadem ratione speciei infimæ.

Secundò arguitur. Dari potest subijcibilis species, quæ non sit prædicabilis, ut species Angelica in opinione, quæ tantum habet vnum

indiuuiduum, quod infra probabimus. Datur etiam è contra species prædicabilis, quæ non est subiçibilis, vt substantia quando prædicatur de hac, & illa substantia tanquam de indiuuiduis, quæ tamen alteri superiori non subiçitur, cum supra substantiam non sit alius gradus, ergo quod aliqua species sit subiçibilis, & prædicabilis per accidens concurrunt. Et confirmatur, quia subiçibilitas ad genus non conducit, aut proportionat speciem ad hoc, vt prædicetur de indiuuiduis, nec è contra prædicabilitas de indiuuiduis, vt generi subiçatur; vna enim relatio istarum non deriuatur ex alia, nec fundat aliam, ergo per accidens se habent, & purè concomitanter.

Respondetur negando antecedens, si loquamur de specie propriè, quæ est secundum prædicabile. Et quod attinet ad speciem Angelicam, infra ostendimus non solum esse subiçibilem, sed etiam prædicabilem, est enim vniuersalis, & non vt genus, sed vt dicens totam quidditatem complecti. De substantia verò dicimus quod etiam respectu huius, & illius substantiæ indiuiduatæ, non est species secundum prædicabile cum prædicetur in quid incomplete, sed est prædicatio generica, mediata tamen, quia genus mediatè prædicatur de indiuuiduis, sicut præcedenti quæstione ostendimus, quomodo genus de indiuuiduis genericis prædicetur, & sequenti quæstione amplius dicetur.

Ad confirmat. Respond. Quod subiçibilitas ad genus non conducit ad prædicabilitatem de indiuuiduis absolutè consideratam; bene tamen ad prædicabilitatem vt limitatam, &
depen-

dependentem, & in quantum infima prædicabilitas est, hæc enim esse non potest sine tali subijcibilibitate, sicut obscuritas per se non conducit ad cognitionem, benè tamen ad cognitionem talem, scilicet ad fidem, quæ est imperfecta, & limitata cognitio, petens illam modificationem obscuritatis.

Primo arguitur ad probandum, quod in specie prius inuenitur subijcibilibitas, quam prædicabilitas, quia subijcibilibitas speciei est, quæ redditur immediatè subijcibilis generi, sed immediata subijcibilibitas est prior vniuersalitate, ergo. Minor probatur. Prius est naturam specificam esse naturam contractam respectu generis, quàm contrahibilem respectu individuum, per hoc enim quod contrahit genus, constituitur in se, prius est autem constitui, quàm ab alijs contrahi, sed per hoc quod contrahit genus subijcitur generi, per hoc quod est contrahibilis ad individua, est vniuersalis ad illa, ergo prior est subijcibilibitas, quàm prædicabilitas.

Respond. negando maiorem. Ad probationem dicitur quod contractio generis, prout pertinet ad ipsam constitutionem naturæ, quæ fit per genus, & differentiam, non est subijcibilibitas, quia constitutio naturæ pertinet ad naturam secundum se, & primo intentionaliter, subijcibilibitas autem dicit relationem, quæ coordinatur speciei generi, & sic pertinet ad secundam intentionem naturæ, non ad constitutionem. Et in hoc genere intentionis prior est vniuersalitas, & prædicabilitas in ordine ad constituendum secundum prædicabile, quod est species, quàm subijcibilibitas, licet respectu naturæ secundum se prius intelligatur

contractio generis, quæ est fundamentum subijcibilitatis, quam contrahibilitas ad indiuidua, quæ est fundamentum vniuersalitatæ, sed ad constituendam speciem hoc est prius illo,

ARTICVLVS II.

Explicantur definitiones Speciei.

DVo hic notanda sunt. Primum circa definitum harum definitionum, quibus species prædicabilis, & subijcibilis definiuntur (definitiones posuimus in initio præcedentis art.) Secundum circa ipsarum definitionum particulas explicandas.

Circa primum idem dicendum est de definito harum definitionum, quod de definito generis dictum est q. præced. eadem enim est ratio de vno, & de altero.

Circa secundum ad explicandas particulas definitionis, illa videtur communis difficultas, quia definitiones istæ conueniunt alijs a definito. Species enim subijcibilis dicitur, quæ sub assignato genere collocatur, vel de quo genus prædicatur in quid: vtrumque autem non minus conuenit indiuiduo, quia etiam indiuiduum sub genere collocatur, & de illo prædicatur genus in quid. Si dicas speciem collocari immediatè sub genere, non indiuiduum: hoc est addere nouam particulam definitioni, scilicet *ly immediatè*, quam definitio non p. nit; & præterea imitatur in indiuiduis genericis, vt hoc animal, hoc corpus, &c. de quibus genera immediatè prædicantur. Similiter definitio speciei prædicabilis conue-

nit

nit alijs à definito, tum quia conuenit generi, prædicatur enim genus etiam de indiuiduis in quid, & licet prædicetur incomplete, & alio modo quàm species, tamen hoc non explicatur in definitione speciei, & sic est diminuta; tum etiam quia plura prædicantur de pluribus numero differentibus, & non sunt species, vt entia incompleta, v.g. motus, anima, materia, punctum, & similia, & Deus prædicatur de tribus personis, & non est species: tum quia tertium prædicabile etiam prædicatur in quid, idest, essentialiter, & de pluribus numero differentibus, vt species athomæ: ac denique species Angelorum sunt verè species, & non prædicantur de pluribus numero differentibus, quia illa plura sunt impossibilia, vt dicemus seq. artic.

Respond. nihilominus rectè tradi has definitiones. Et vtrum essentielles an descriptiue sint non oportet immorari. Sicut enim diximus de generis definitione, quod est descriptiua, quæ traditur per propriam passionem vniuersalitatis, quæ est prædicabilitas. Ita definitiones speciei censendæ sunt descriptiue, quia traduntur per proprietates; prædicabilis quidem per ipsam prædicabilitatem, quæ est passio vniuersalitatis, subijcibilis autem per proprietatem vniuersalitatis specificæ, quatenus vniuersalitas imperfecta est, & dependens ab vniuersalitate generis.

Ad primam ergo instantiam contra speciem subijcibilem.

Respond. Quod in omnibus istis definitionibus prædicabilium debet subintelligi proprium earum genus, quod est vniuersale, &

ita sensus definitionis est, quod species est vniuersale, quod sub genere collocatur, & differentia vniuersale, quod prædicatur de pluribus in quale, &c. & sic de alijs. Neque hoc est addere aliquam particulam extraneam definitioni, sed necessario præsuppositam, nam vniuersale est genus ad quinque prædicabilia, debet ergo in omni prædicabili necessario subintelligi, & consequenter debet etiam subintelligi particula *immediatè*, scilicet quod species est, quæ immediatè subiicitur generi, quia hic solum agimus de eo, quod tanquam vniuersale, seu vnum ex quinque prædicabilibus subiicitur, indiuiduum enim non tanquam vniuersale subiicitur, & ideò neque immediatè,

Et ad instantiam de indiuiduis genericis. *Respondetur.* Quod non subiiciuntur tanquam vniuersale, neque immediatè simpliciter loquendo, sed solum secundum quid, & quoad explicationem, quia quando dico, *hoc animal, hoc corpus*, licet explicem gradum genericum cum indiuiduatione, tamen aliquid supponitur mediate inter indiuiduationem, & genus, quod non explicatur in illo indiuiduo generico, neque enim in re inuenitur, animal, aut corpus singularizatum, nisi mediante aliqua specie. At verò species ita plenè, & simpliciter subiicitur generi, quod non solum explicatur nihil mediate, sed neque in re aliquid mediate potest inter ipsam, & genus, quod est immediatè subiici simpliciter, & absolute loquendo.

Ad secund. instans. Contra definitionem speciei prædicabilis. *Respondetur.* Quod vt dixi-

diximus quæstione præcedenti, generi non conuenit prædicari de pluribus numero differentibus formaliter, & immediatè, sed materialiter, scilicet quia continetur sub specie, de qua per se formaliter, & directè prædicatur, & ita debet intelligi prædicatio generis, quod sit in quid incompletè, neque hoc est addere aliquid definitioni, sed in ipso imbibitum explicare, nam si prædicatur de pluribus specie differentibus, non potest totam quidditatem prædicare, sed partem, scilicet id quod contrahibile est per differentiam, & cum differentia constitutum speciei.

Ad secundum respondet. Entia incompleta reductiue, & non per se pertinere ad speciem vel genus, sicut ad prædicamentum, unde non habent plura numero distincta, nisi reductiue, & secundum quid. Deus autem non prædicatur de tribus personis tanquam multiplicabilis, & contrahibilis in illis, sed tanquam natura vna singularis, quæ prædicatur de pluribus suppositis eiusdem singularis naturæ, & ideò nec diuina natura se habet ut vniuersalis, nec ipsæ personæ, ut inferiora contrahentia naturam superiorè, & numericè illam distinguunt, quia ita multiplicantur supposita, quod non multiplicatur natura, sed sunt tria supposita eiusdem singularis naturæ.

Ad tertium iam supra diximus quæstione præcedenti, quod differentia prædicatur quiddem essentialiter, sed non in quid, quia non substantiue, sed adiectiue, seu qualificatiue, vnde licet prædicetur in quid quantum ad essentiam, non tamen quantum ad modum, id est, essentialiter substantiue,

tialitate aliqua ad indiuiduationem, & vt contrahibilis per singularitatem, quia est actus purus, & sic in essendo non potest esse vniuersalis, licet possit concipi ipsa natura non explicata indiuiduatione, & sic significari potest per modum termini communis, & non termini singularis, sicut hoc nomen, *Deus*, est terminus communis in significando.

De prima natura non est difficultas in presenti, quia constat illam naturam posse prædicari de multis, in qua multa indiuidua possible sunt, de quibus prædicatur. Similiter de tertia natura non est quæst. præsens, de illa enim egimus super quæst. 5. art. 3. Sed tota difficultas est de secunda natura. Circa quam non disputamus modò, an sint possibile, vel non possibile plures Angeli solum numero distincti. De quo agitur 1. par. q. 6. si enim sunt possibile plures numero distincti, quæstio difficultate vacat. Dicendum est enim de natura Angelica, sicut dicitur de Sole, & Luna, & alijs naturis, in quibus plura indiuidua sunt possible. Sed admissio, quod sint impossible plura indiuidua in natura Angelica, tunc præsens consurgit difficultas: An quia ex modo concipiendi illa natura concipitur, vt indifferens ad indiuiduationem sufficiat, vt sit species prædicabilis de multis, non quæ de facto habet, vel habere potest in re, sed quæ ex modo concipiendi illi naturæ sic indifferenti non repugnant.

Secundo aduerte, Quòd habere plura indiuidua contingit dupliciter, vel posituè, vel per non repugnantiam saltem ex parte alicuius principij. Quæ distinctio sumitur ex D. Tho-
ma

ma quaestione de spiritualib. creaturis artic. 8. ad quartum. Prædicari de multis positivè est, quando datur positivum fundamentum in ipsa re, ut fiat prædicatio de multis, scilicet quia talis multiplicatio in re inuenitur. Et inde sumitur fundamentum ad concipiendam vnam naturam prædicabilem de illis. Per non repugnantiam dicitur prædicari de multis, quando non inuenitur quidem in multis à parte rei, sed in vno tantum, ita tamen se habet natura ad illud vnum individuum, quod potest abstrahi ab illo eodem prorsus modo, quo abstrahitur à pluribus, scilicet manente natura cum indifferentia, & potentialitate ad illam individuationem. Et ita ex vi talis abstractionis non habet natura repugnantiam ad plura individua, licet in re ex alio capite repugnet, scilicet propter carentiam materiæ, sine cuius divisione non fit multiplicatio individuum.

In hac ergo difficultate communiter extra scholam D. Thomæ tenetur, quod supposita sententia D. Thomæ de impossibilitate plurium individuum in eadem specie Angelica, talis species erit subijcibilis, & non prædicabilis, videtur enim contra omnem rationem, quod aliquid sit prædicabile de multis, cui repugnat actualis ipsa prædicatio de multis. Hanc autem repugnare manifestum est, quia repugnat dari ipsa multa: Non tamen negant isti Authores posse concipi naturam Angelicam, ut vniuersalem negativè, & metaphysicè, quia potest concipi sine aliqua singularitate, & differentia individuali, quod est remanere præcisam ab individuatione.

Nihil.

Nihilominus oppositam sententiam communiter defendunt Thomistæ, & existimant hoc ipso quod datur fundamentum in tali natura, ut concipiatur præcisa ab illa vnica indiuiduatione, & cum indifferentia, & potentialitate ad ipsam, posse concipi ut vniuersalem, & ut speciem prædicabilem, ad hoc tamen necesse est, quod non concipiatur natura Angelica adæquatè, & plenè secundum quod est in se, sed inadæquatè, & ad instar rerum compositarum ex materia, & forma. Et sumitur apertè hæc sententia ex doctrina S. Thomæ in quaest. de Spiritual. creatur. art. 8. ad quartum, ubi sic inquit: *Sicut hæc albedo non prohibetur habere sub se multa indiuidua ex hoc quod est albedo, sed ex hoc quod est in hoc, quod pertinet ad rationem indiuidui, ita natura huius Angeli non prohibetur esse in multis ex hoc, quod est natura in tali ordine rerum, quod pertinet ad rationem speciei, sed ex hoc quod non est nata recipi in aliquo subiecto, quod pertinet ad rationem indiuidui.* Ita D. Thom. Quæ verba clariora sunt, quàm vlla ponderatione indigeant. Idem affirmat in opusc. 42. cap. 5. & 1. par. quaest. 23. art. 9. & ibi Caietan. & 5. cap. de ente, & essentia, quaest. 9. ad secundum, & super caput de Specie in Logica.

Totum autem fundamentum huius sententia est. Quia licet non possit in tali natura concipi respectus positivè tendens ad plura indiuidua, nec vnitas naturæ collecta à pluribus indiuiduis, quia in rei veritate non datur: potest tamen concipi indifferentia naturæ, & potentialitas ad vnum indiuiduum talis, quod ex se sufficeret ad plura, si aliunde in re

in re ponerentur. I aque indifferentia naturæ ex proprio modo suo communicabilis est ad plura, ex parte autem eorum quibus facienda est communicatio, talis communicabilitas exerceri non potest. Ratio huius est. Quia non potest negari quod detur indiuiduum naturæ Angelicæ positum in prædicamento, cum Angelus, qui in re inuenitur, sit substantia prædicamentalis. Et non ponitur immediatè sub genere, ergo immediatè positum sub aliqua specie atomica. Sed species atomica, sub qua continetur indiuiduum, est superior respectu illius, ergo vniuersalis, & prædicabilis respectu illius, talis enim species non prædicatur de indiuiduo tanquam æqualis, alioquin de indiuiduo Gabriels non prædicaretur species prædicatione superioris de inferiori, sed esset quasi prædicatio identica, sicut quando indiuiduum prædicatur de indiuiduo, est ergo prædicatio superioris de inferiori, alioquin non posset species conseruari in vno solum indiuiduo, vt dicemus articulo sequenti, si habendo tantum vnum indiuiduum non posset concipi, vt superior. Ex hoc autem manifestè sequitur, quod illa natura, & species sic concepta vt superior respectu illius indiuidui, habeat indifferentiam, quæ de se sufficit ad plura indiuidua; licet de facto non possit exerceri multiplicatio ob defectum conditionis requisitæ, scilicet diuisionis ex parte materię. Etenim illa species sic abstracta ab indiuiduatione non includit actu illam, sed in potentia, & consequenter sicut nec includit vnitatem, aut pluralitatem indiuidualem, ita neque ex vi illius conceptus excludit pluralitatem

tatem indiuiduorum , ergo si ex vi illius non excludit , habet ex vi indifferentiæ ordinem ad plura , non positiuè , sed non repugnanter .

Et confirm. Quia repugnantia ad plura indiuidua in natura Angelica non est secundum omnia prædicata naturæ , sed secundum præcisam rationem irreceptibilitatis in materia , quia scilicet non indiuiduatur per designationem materiæ , sed per carentiam illius . Vnde repugnantia ad pluralitatem non est ex natura , sed ex modo indiuiduandi naturam , quia non est aliud principium indiuiduandi , quàm ipsa irreceptio formæ , inde enim , & non aliunde habet incommunicabilitatem , quæ est ratio indiuiduationis . Igitur si concipiatur natura inadæquatè , idest , quantum ad rationem speciei , & non modus ipse indiuiduandi naturam , non accipitur natura , vt repugnans multiplicationi indiuiduorum , & consequenter , vt habens plura indiuidua non repugnanter , licet positiuè non respiciat multa , non defectu sui , sed quia illa multa non sunt .

Quod autem quidam dicunt naturam Angelicam esse communem positiuè ad vnum indiuiduum reale , & ad plura ficta , futile est , quia respicere plura ficta , est non respicere plura in quibus possit esse , & de quibus possit prædicari . De pluribus enim fictis non nisi fictè prædicatur , fictè autem prædicari , est non prædicari verè , nec verè concipi , vt prædicabilem .

Dices. Ergo nulla est differentia inter Deum , & naturam Angelicam , nam etiam Deus potest concipi , vt res communis sine singularitate , & significari , vt terminus communis , si-
cut

cut supra diximus quæst. 5. Ergo ex modo concipiendi habebit vniuersalitatē, & consequenter gradum superioris, & inferioris quod in Deo admitti nequit.

Respond. Esse disparē rationem, quia Deus etsi possit concipi sine singularitate, & consequenter modo communi significari, tamen ipsa natura sic concepta non manet cum indifferentia, & potentialitate ad indiuiduationem, siquidem concipitur ut actus purus, qui quidem etsi ex modo nostri conceptus imperfecti non explicet singularitatem, tamen ex parte sua non manet indifferens ad illam, & consequenter solum vno titulo est communis, scilicet ratione nostri imperfecti conceptus, non tamen ratione indifferentiæ, & potentialitatis ex parte naturæ. Natura autem composita triplici titulo est vniuersalis, scilicet ex modo concipiendi abstrahendo à singularibus, & ex indifferentia naturæ secundum se, & ex pluralitate indiuiduorum ad quæ potest terminari respectus vniuersalis. Natura autem Angelica solum duplici titulo, scilicet ex modo concipiendi, & ex ipsa indifferentia naturæ secundum se, licet ex defectu multorum indiuiduorum exerceri non possit ista communicabilitas ad plura, & ita est vniuersalitas sine exercitio. Ut autem diuina natura termino communi significetur, sufficit quod ex modo significandi sine singularitate concipiatur, ut autem sit genus, vel species requiritur, quod concipiatur, ut contrahibilis, & determinabilis, & consequenter, quod ratio contrahens sit magis determinata, & magis actuans, quod sine potentialitate in ipso contrahibili,
& ma-

& maiori actualitate in contrahente concipi non potest. Quod totum repugnat actui puro.

SOLVUNTUR ARGUMENTA.

Primo arguitur. Argumento insinuato referendo oppositam sententiam. Nam species Angelica habet repugnantiam, ut prædicetur de pluribus, & hoc ab intrinseco ipsius naturæ, quia ab intrinseco impossibilis est multiplicatio talis naturæ in singularibus, ergo repugnat quod sit species prædicabilis de multis, cui enim prædicatio ipsa repugnat, prædicabilitas non conuenit, sicut cui repugnat visio, potentia videndi non conuenit.

Et confirm. Quia unitas formalis, quæ inuenitur in specie prædicabili, desumitur ab intellectu ex similitudine, & dissimilitudine indiuiduorum, & conuenientia eorum inter se, neque enim aliud est fundamentum istius unitatis formalis, ergo deficiente conuenientia plurium indiuiduorum, non restat unde sumatur unitas formalis speciei, quæ est unitas conuenientiarum plurium in aliquo gradu.

Respon. Disting. anteced. Natura Angelica habet repugnantiam, ut prædicetur de multis ex modo indiuiduationis, & incommunicabilitatis ipsius formæ, *conced.* Ex vi naturæ, & indifferentia eius, *neg.* Et licet ipse modus indiuiduationis sit intrinsecus naturæ Angelicæ, non tamen secundum conceptum naturæ, ut natura est, sed ut irreceptibilis, & includens modum naturæ, quo ipsa indiuiduatur. Vnde licet concepta adæquate natura cum modo, præ-

prædicari non possit de multis, si tamen inædiquatè concipiatur sine illo modo, & cum potentia ad ipsum, concipitur ut prædicabilis de multis, non positiuè, quia non sunt multa quæ terminent respectum prædicabilitatis, sed non repugnanter, quantum est ex parte conceptus naturæ. Et multa sunt quæ absolutè, & simpliciter non possunt in re poni, & tamen quia ex vi alicuius principij non repugnant, sub conceptu talis principij dicuntur non repugnare. Sicut aduertit D. Thom. quæst. de spirituali creat. art. ultimo ad 7. Quod substantia potest intelligi sine aliquo accidente, sed in re non potest creari aliqua substantia sine aliquo accidentali prædicato, saltem sine ipsa existentia. Ita stante natura Angelica cum suo modo indiuiduationis, quem habet in re, idest, sine illa receptione, & diuisione materiæ, non stat multiplicari indiuidua, & tamen ex vi naturæ, non ut induit modum indiuiduationis, sed sub præciso conceptu naturæ, ut in potentia ad istam indiuiduationem, non repugnanter se habet ad plura. Et cui repugnat visio repugnat potentia videndi, si ab intrinseco visio ipsa repugnat, si autem ab aliquo extrinseco modo, vel impedimento, non continuo potentia videndi repugnat.

Et quando instatur. Quod non potest esse vniuersalis nisi ad multa indiuidua ficta, cum in re sint impossibilia.

Respond. Quod ex vi conceptus naturæ, illa multa indiuidua impossibilia non sunt, nec tamen ex vi illius sunt absolutè possibilia, & in re, quia ad hoc ut aliquid sit in re possibile, oportet quod attentis omnibus, quæ in re concurrunt

cūrrunt, possibile sit: in re autem concurrere modus indiuiduandi, ex quo habent esse impossibilia. Vt autem dicatur non impossibile quantum est ex vi naturæ, sufficit quod ex illa parte non habeat impossibilitatem. Et ideo solum dicitur non repugnanter respicere illa plura, & quantum est ex vi naturæ, non positivè, & absolutè.

Ad confirmat. Respondetur. Vnitatem formalem in naturis compositis sumi ex convenientia positiva plurium indiuiduorum, in naturis autem simplicibus non sumitur ex convenientia positiva plurium, sed ex ipsa unitate naturæ conceptæ sine indiuiduatione, & cum indifferentia, quæ de se non repugnat communicari multis quando concipitur sine modo indiuiduationis, & ad instar rei compositæ. Melius est autem sumi unitatem formalem ex indiuiduatione naturæ specificæ, quam ex convenientia plurium indiuiduorum.

Secundo arguitur. Modus ille irreceptionis in materia essentialiter conuenit Angelo, siquidem per hoc distinguitur ab anima rationali, quæ est forma recepta, ergo non potest abstrahi natura specificæ Angeli ab illo modo indiuiduationis, qui est per irreceptionem in materia. Conseq. patet, quia quantumcunque abstrahatur natura Angelica, non potest abstrahi ab eo quod sibi essentialiter est, sic enim non abstraheretur, sed destrueretur, sicut si homo conciperetur sine animali, quod est essentialiter aliquam concipi sine eo quod est sibi essentialiter. Nec obstat quod inadæquate concipiatur, vel ad instar rei compositæ, & sic concipi potest modo communicabili ad plura.

Contra

Contra primum enim instatur. Quia alias Petrus posset concipi, ut vniuersalis, & similiter natura diuina, quia Petrus inadæquatè conceptus solum explicat naturam non indiuiduationem, & consequenter si inadæquatus conceptus rei intrinsecè singularis, qualis est Angelus, sufficit ut possit denominari vniuersalis, cur etiam Petrus, qui intrinsecè est singularis, si inadæquatè concipiatur, idest, quantum ad naturam, non quantum ad indiuiduationem, non poterit concipi, ut vniuersalis. Et idem est de natura diuina, quæ essentialiter singularis est:

Contra secundum verò instatur, quia etsi Angelos concipiamus ad instar rei corporeæ, non tamen illis attribuimus proprietates rei corporeæ, sed remouemus ab eis, quia illis repugnant, ergo cum multiplicatio numerica, quæ conuenit rebus corporeis, repugnet spiritualibus, non possumus id eis tribuere.

Resp. Aduertendo quod natura Angelica essentialiter est irreceptibilis in materia, & carens illa, & ab ista carentia materiæ nunquam potest præscindi. Negamus tamen quod non possit præscindi à sua singularitate, quia carentia materiæ, & irreceptibilitas non est ipsa indiuiduatio Angeli, sed radix illius. Indiuiduatio enim in Angelo non dicit solum principium incommunicabilitatis, sed etiam designationem, & determinationem certam indiuidui, quæ etiam in Angelis dependet, seu dicit ordinem ad extrinseca prædicata, puta ad subsistentiam, & accidentia, constat enim posse separari in Angelo personalitatem propriam, ut si natura Angelica assumeretur à Deo, persona-

sonalitas autem est terminus singularitatis. Vnde singularitas, & indiuiduatio dicit ordinem ad aliqua extrinseca, nec pure pertinet ad constitutionem essentialem Angeli. Sicut autem in rebus corporeis materia habet duplicem considerationem, scilicet componere, seu constituere ipsam naturam, & radicaliter esse principium indiuiduationis, & multiplicationis numericae, secundum se quidem, remote, ut autem signata est quantitate, proxime, & tamen quando consideratur natura in communi, consideratur ratio materiae, ut constitutivae, non ut principium indiuiduandi est. Ita in suo opposito, quod est carentia materiae, & irreceptibilitas in ea, qualis invenitur in Angelo, duplex consideratio potest attendi, & secundum quod pertinet ad ipsam constitutionem formae simplicis, & pure spiritualis, & secundum quod pertinet ad modum indiuiduationis, quatenus talem naturam spirituales reddit incommunicabilem, & immultiplicabilem, & una consideratio secernitur ab alia, ita quod ipsa carentia materiae, ut requiritur ad constitutionem talis naturae, non est aliud quam ipsa ratio simplicis formae, & ut sic nondum fundat repugnantiam multiplicationis. Ipsa autem carentia formae, ut praebet modum incommunicabilitatis, & fundat subsistentiam, & singularitatem completam, sic praebet modum indiuiduationis, & repugnat multiplicationi. Vnde quando abstrahimus naturam specificam Angeli à modo indiuiduandi, non praescindimus in tali natura id quod essentiale est quantum ad constitutionem quidditatis, sed id quod in natura illa

illa pertinet ad modum indiuiduationis, qui radicaliter quidem originatur in ipsa natura specifica, non tamen formaliter in ea consistit cum dependeat in sui designatione à prædicatis extrinsecis.

Ad instantias autem allatas. Respond. Ad primam, quòd Petrus non solum radicaliter, sed etiam formaliter explicat ipsam indiuiduationem, unde non potest concipi sine differentia indiuiduali, etiam inadæquatè, nisi destructo conceptu Petri, & accipiendo conceptum naturæ. Natura autem Angelica non explicat formaliter ipsam indiuiduationem, licet radicem eius includat. Diuina autem natura potest quidem concipi per modum naturæ sine singularitate, non tamen ut vniuersalis, quia non potest concipi ut contrahibilis per differentias, cum sit actus purus, & nullo modo in potentia.

Ad secundam instant. Dicitur quòd quando concipimus Angelum ad modum rei corporeæ, non attribuimus illi conditiones rei corporeæ per modum attributionis, & iudicii, sed per modum simplicis repræsentationis ad instar rei corporeæ apprehendimus ipsam sine indiuiduatione non explicando totum, quod est in natura Angelica, non quidem ex parte prædicatorum constituentium quidditatem, sed in quantum est radix indiuiduationis. Si enim plenè, & adæquatè concipiatur explicando id quod radicaliter & implicite continetur in natura, non posset concipi ut vniuersalis, quia explicaret modum naturæ, qui est singularitas, & immultiplicabilitas. Quod etiam affirmat Sanct. Thom. 1. p. q. 13. art. 9.

Ad huc

Adhuc tamen instabis. Quia natura Angelica non solum ut concipitur ad instar rei corporeæ, sed etiam secundum se, est in prædicamento, cum sit ens finitum, & creatum, ergo secundum se, etiam si ad instar rei corporeæ non concipiatur, habet rationem generis, & speciei prædicabilis, quia sine hoc non ponitur in prædicamento.

Item instatur. Quia natura corporea posita radice indiuiduationis, quæ est natura signate, non potest concipi ut vniuersalis, quia natura vniuersalis abstrahit ab ista radice, ergo si ipsa species naturæ Angelicæ est radix indiuiduationis ratione incommunicabilitatis, & irreceptibilitatis in materia, non potest etiam inadæquatè concipi ut vniuersalis. Præsertim quia quod conuenit alicui per se, non potest oppositum etiam per accidens rei conuenire. Ergo cum conueniat ei ex ipsa ratione naturæ immultiplicabilitas, non potest etiam per accidens, & ratione inadæquati conceptus multiplicabilitas in plura ei conuenire sicut requiritur ad speciem prædicabilem de multis.

Respond. Naturam Angelicam secundum se esse in prædicamento quantum ad coordinationem graduum superiorum, & inferiorum, secundum se enim est quidditas composita ex genere, & differentia: sed quod species ista habeat vniuersalitatem prædicabilem de multis, non pertinet ad rationem ponendi in prædicamento, sed ad conditionem seu modum rei, quæ ponitur in prædicamento. Et talem modum non repugnat quod natura Angelica habeat per hoc quod concipiatur inadæquatè.

tè, & ad instar rei corporeæ, ad quod tamèn, fundamentum præbet ipsa natura.

Ad secund. instant. *Resp.* Quod materia signata est principium indiuiduationis determinatum, & signatum, non remotum, à qua signatura debet abstrahi natura vniuersalis: ab ipsa autem materia, quæ est principium remotum indiuiduationis, non abstrahit natura vniuersalis. Sic in Angelo carentia materię, & irreceptibilitas in ea vt conducit ad rationem spiritualitatis, & formæ simplicis, in Angelo non est proximum principium indiuiduationis, sed remotum. Vt autem fundat substantiam, & ordinem ad accidentia extrinseca designantia ipsam naturam in singulari, sic est principium proximum indiuiduationis, & ab ista abstrahit natura Angelica in vniuersali concepta. Et quando dicitur quod si aliquid conuenit per se, non potest oppositum conuenire etiam per accidens. *Resp.* Aliud esse non conuenire, aliud non repugnare ex aliqua parte: multiplicatio quidem in pluribus nullo modo conuenit naturæ Angelicæ positiuè, & simpliciter. Cæterum non repugnat illi ex vi naturæ indifferenter conceptæ, & ideò ex vi huius, vt sic, potest esse prædicabilis de multis, non quidem positiuè, sed non repugnanter.

Quod si dicas. Ergo talis natura non est vniuersalis Logicè, sed Metaphysicè, quia Logica vniuersalitas fit per comparisonem positiuam, ad plura, species autem Angelica non est positiuè vniuersalis, nec potest comparari ad plura nisi ficta, ergo non est vniuersalis Logicè.

Resp.

Respon. Naturam Angelicam habere intentionem Logicam, non quæ actu comparetur ad plura positivè, ea attingendo, siquidem non sunt nisi ficta, sed actu attingendo vnum individuum positivè, & plura non repugnanter. Ex hoc sufficit ad relationem intentionis Logicæ; sicut in sententia S. Tho. 3. p. q. 35. art. 5. vna relatio patris respicit plures filios, si sint actu, si autem non sit nisi tantum vnus filius, de facto non attingit plures, sed illa relatio quæ attingit vnum positivè, non repugnanter attingit plures, quia ita se habet, vt si plures darentur, illos attingeret. Ita relatio illa naturæ specificæ taliter respicit vnum individuum positivè; quòd de se posset plura attingere si darentur.

ARTICVLVS IV.

Verùm species possit conservari in vno tantum individuo, & genus in vna tantum specie.

Difficultas hæc affinis est præcedenti, & ex illa plenius intelligitur quomodo species possit esse prædicabilis de multis, licet illa non sint possibiliæ ex modo individuationis. Cum autem tam in genere, quàm in specie duo considerentur, scilicet & natura quam explicant actualiter, & plura ad quæ sunt in potentia; certum est quod tam genus, quàm species, quantum ad naturam quam actualiter dicunt, in vna specie, & individuo conservari possunt, quia genus totam suam essentiam communicat cuilibet inferiori, ergo in vnoquoque saluatur tota natura generis, & speciei.

Vnde dicit Si Thom. I. p. q. 77. art. 1. ad 1. *Quod totum vniuersale adest cuilibet parti secundum totam suam essentia & virtutem, sicut animal homini, & equo; Igitur tota essentia generis in qualibet specie saluatur.*

Reducitur ergo tota difficultas ad hoc, an genus quo ad potentialitatem, & ordinem quem habet ad plura possit respectu vnius speciei saluari, etiam si aliæ essent impossibiles, nam si possibiles sunt, licet de facto non existant, certum est saluari potentiam generis ad illas, quia ab existentia earum non dependet, & de facto post diem iudicij in toto genere animalis non erit nisi vnica species hominis, idque etiam potuisset fieri ab initio. Et similiter loquimur de specie secundum potentiam, & aptitudinem ad existendum in pluribus. Et non est sermo de ipsis intentionibus, sed de aptitudine, & potentia ad plura, quæ est earum fundamentum. Intentio enim est relatio, quæ sequitur naturam fundamenti.

Quidam, ergo absolutè censent genus in vna specie posse conseruari, & speciem in vno individuo, eadem enim est ratio vtriusque, quia æque vniuersalia sunt; vniuersale autem est vnum in multis, ergo si ad speciem sufficit multitudo solum ex parte modi concipiendi, licet non ex parte rei conceptæ, vt præcedenti articulo diximus, similiter sufficiet ad genus. Alij è contra, neque genus, neque speciem in vno tantum inferiori saluari posse existimant, quia essenziale est vnicuique vniuersali diuidi per multas differentias, cum sit vnum de multis, ergo deficientibus multis, deficit vniuersale. Alij denique distinguunt inter genus, & spe-

speciem, & ad conservandum genus in ratione totius potentialis, existimant requiri plures species: ad saluandum verò speciem, non requiri plura individua. De quibus sententijs vide Chrsf. Carmel. hic disp. 6. q. 2.

Hæc ultima sententia communior est, & sine dubio D. Thom. in 1. Poster. lect. 12. ubi inquit: *Quod non est possibile inuenire aliquod genus, cuius una tantum sit species, genus enim diuiditur in species per oppositas differentias, oportet autem, si unum contrarium inuenitur in natura, & reliquum inueniri, ut patet per Philosophum in 2. de Cæl., & ideo si una species inuenitur, inuenitur & alia. Una autem species diuiditur in diuersa individua per diuisionem materiae, contingit autem totam materiam alicui speciei proportionatam, ab uno individuo comprehendi, & tunc non est nisi unum individuum sub una specie.* Idem docet S. Doct. in 1. dist. 19. q. 4. art. 2. in corpore.

Et sumitur fundamentum huius sententiæ ex duabus propositionibus à Diu. Thom. positis. *Prima.* Quod genus diuiditur per oppositas differentias. *Secunda.* Quod si unum oppositum, seu contrarium inuenitur in rerum natura, etiam & reliquum. Et prima propositio constat: Quia genus contrahitur per differentias formaliter diuersas, seu formas incompatibiles, & distantes in eodem genere. In hoc autem consistit oppositio, seu contrarietas, quod sint aliquæ formæ distantes in eodem genere, & si maximè distent, est perfecta contrarietas. Diuidi autem genus per differentias formaliter diuersas constat. Quia genus diuiditur per differentias, quæ ipsum contra-

hunt ad constituendam speciem, ergo oportet quòd dicat naturam actuabilem, & contrahibilem per differentias, quæ compleant actualitatem eius. Vnde si plures habeat differentias, formaliter debent esse diuersæ, & non solum materialiter, idest, in ipsa formali ratione quidditatis, atque adeò oportet quòd sint oppositæ, utpotè formaliter incompatibiles.

Secunda verò propositio. Probaturs ab eodem D. Tho. 2. de Cœlo lect. 4. Quia contrariorum eadem est materia, & subiectum, alioquin non se inuicem expellerent, si circa idem subiectum non versarenur, ergo oportet quòd materia; seu subiectum vnius contrarij habeat potentiam ad alterum contrarium, ergo si vnum contrariorum est in rerum natura, aliud etiam est possibile, quia datur potentia susceptiua illius, quòd si esset impossibile, hoc ipso destrueretur potentialitas susceptiua illius, quæ est in materia, vel in genere, quia solum esset potentialitas receptiua vnius. Et sic destrueretur potentialitas generis ad multa, quia est ad multa ut contraria, & formaliter opposita.

Ex quibus propositionibus apertè deducitur differentia inter genus, & speciem, quia genus habet se ad differentias específicas quasi materia potentialis ad formas actuales, & formaliter oppositas, seu incompatibiles, species autem dicit ordinem ad plura solum materialiter diuersa, & ita non se habet ad differentias indiuiduantes, sicut materia ad formam, sed potius sicut forma ad materiale diuisionem. Quod autem se habet ut materia si est communicabilis pluribus, debet supponere possibilitatem eorum, quibus communicabilis est, id au-

id autem quod se habet ut forma, ex ipsa ratione, & conceptu formæ communicabilis est pluribus, licet ex defectu materiæ recipientis possit impediri communicatio. Et huius ratio est. Quia materia, & id quod ex parte materiæ se tenet, potius de se est principium incommunicabilitatis, sicut & limitationis, & restrictionis: cum sit ultimum subiectum ultra quod non datur communicatio; sed si materia communicabilis est pluribus, ex eo est, quia illa plura sunt possibilia circa talem materiam. Unde ex possibilitate formarum circa aliquod subiectum, seu materiam, sumitur potentialitas materiæ ad plura. Quod si materia communicatur formæ, potius est ut perficiatur in se à forma, quam ut ipsa se communique, quia communicare se est proprium boni. Materia autem non est bona in actu, quia non est perfecta, neque in actu, & ut dicit D. Tho. 1. p. q. 5. art. 3. ad 3. materia prima non est appetibilis, sed appetens. Unde forma non tam appetit materiam, quam esse in materia.

Quare esse materiam communicabilem pluribus nihil aliud est, quam posse recipere, & perfici à pluribus. Ergo potentialitas materiæ, seu generis ad plura ex ipsa pluralitate formarum, quæ possunt ipsam perficere, oritur. At verò forma ex ipsa ratione formæ, quæ est actus, & perfectio, est communicabilis pluribus quantum est ex se, quia bonum ut bonum est communicativum sui; unde non ex pluralitate recipientium dependet, quod de se sit communicabilis, sed id habet ex ratione formæ, & actus. Unde 1. Periherm. lect. 10. inquit D. Thom. *Quod omnis forma, quæ nata est re-*

elipi in materia quantum est de se communicabilis est multis materijs. Et 1. par. q. 3. art. 2. ad 3. & 1. Metaphys. lect. 5. §. Ponit aliam rationem, vniuersaliter dicit quod qualibet forma quantum est de se, nata est in pluribus esse. Cum ergo species sumatur à forma, & dicat essentiam formaliter completam, ex ipso modo concipiendi illam, non repugnat concipi vt communicabilem pluribus; licet ex defectu materiæ recipientis, & materialiter diuidentis, non semper possit in exercitio communicari, vt diximus artic. præced. de speciebus Angelicis. De se ergo quælibet species, etiam quantum ad communicabilitatem ad plura, non dependet à pluribus indiuiduis, genus autem dependet à pluribus speciebus.

SOLVUNTUR ARGUMENTA.

Primò arguitur. Ad probandum quod genus potest saluari in vna tantum specie. Quia in vna tantum specie potest accipi gradus, seu ratio indeterminata, & potentialis, & ratio, seu gradus actualis, & determinatus, ergo potest accipi genus, & differentia. Anteced. patet: quia illa species esset in prædicamento, cum esset res creata, ergo haberet gradum superiorem, & inferiorem, & consequenter determinabile, & determinatum, siquidem non omnia prædicata illius essent æqualis actualitatis, & determinationis.

Respond. Quod illa species esset quidem in prædicamento ratione naturæ limitæ, & haberet gradum superiorem, & inferiorem, non quidem superioritate magis extensa, & ampla, sed

sed minus determinata, & actuali, seu magis potentiali ex parte quidditatis quàm differentia contrahens. Vnde non esset vniuersalis genericè, licet haberet naturam magis potentialem quàm differentia, sicut habet genus. Esset ergo potentialitas respiciens tantum vnā formam, non ad plures indifferenter se habens, sicut potentia animæ; & Angeli ad insciendum intellectum, quæ non est potentialitas ad contraria, & ad multa, sed tantum ad vnum.

Et quando instatur quòd illud prædicatum genericum non esset æquale cum prædicato specifico, & differentiali, ergo esset superius tanquam genus. *Respondet.* Quod non esset æquale in actualitate, quia differentia actuaret illud, sed esset æquale in extensione, quia non ad plura se extenderet, quàm species, & differentia. Vniuersalitas autem generica extensionem petit ad multa quantum ad rationem totius potentialis, licet natura, quam explicat imperfectior sit, & potentialior differentia contrahente in ratione quidditatis.

Secundo arguitur. Si tota potentialitas generis non posset saluari in vnicā specie, ergo neque in duabus, vel decem, vel in aliquo alio numero certo, quia non est maior ratio quòd illa potentialitas exhaustiatur per duas species quàm per viginti, vel centum, & ita quodlibet genus requiret infinitas species, nec posset de potentia absoluta saluari tota potentialitas generis in vna specie, vel duabus, cum tamen possit tota potentialitas materiæ satiari vnicā forma incorruptibili. Imò ex hac ratione sequeretur quòd nec species posset in vnicō individuo saluari, quia est in potentia ad plu-

res conditiones indiuiduantes, quæ in vno solo indiuiduo saluari non possunt, ergo sicut genus non saluatur in vna tantum specie, quia est in potentia ad plures differentias, neque species in vno indiuiduo, quia non possunt omnes conditiones indiuiduantes in vno colligi.

Respond. Quod potentialitas generis sufficienter saluatur hoc ipso quod habeat plures species, siue sint in numero determinato, siue infinito, de hoc enim non disputamus. Requiritur ergo ad minus, & sufficiunt duæ species sub vno genere, nec potest eius potentialitas extensiuæ saluari etiam de potentia absoluta respectu vnius tantum speciei ob rationem dictam. Et ad exemplum allatum de materia, dicimus quod, vel illa materia est capax plurium formarum corruptibilium, vel solum est capax vnius formæ incorruptibilis, sicut multi existimant de materia Coeli. Si hoc secundo modo se habeat, non saluatur in illa materia potentialitas contrarietatis, & extensionis ad plura, sed solum potentialitas actuationis, & informationis, quod fit per vnum. Si primo modo, semper materia illa manet cū potentialitate ad plura à quibus potens est informari, licet de facto non sit in statu transmutationis ad illa, si habeat formam incorruptibilem à qua satiatur quantum ad transmutationem ad alias, non quantum ad capacitatem illarum.

Et ad exemplum de specie respectu plurium indiuiduorum. *Resp.* Verum esse quod in vnicō indiuiduo non potest habere species omnes proprietates, & differentias indiuiduantes, sed

sed habet in vno individuo naturam, quæ ex conceptu formæ, & actus quo constituitur, non repugnat esse communicabilem pluribus differentiis individuantibus, licet ob defectum materiæ illæ sint impossibiles. At verò genus, ex eo quod sit in vna specie, non est communicabile pluribus speciebus, si illæ sunt impossibiles, quia materia de se non est principium communicandi pluribus, sed recipiendi plura. Vnde si illa sint impossibilia, non remanet potentialitas ad recipiendum illa. Et idem est de genere, cuius potentialitas materiæ assimilatur in ordine ad formas, seu formales differentias.

Ultimo arguitur. Si aliqua species conseruetur in vnico individuo, vel habet essentialiter annexam repugnantiam ad plura, vel non habet, si non habet, ergo illa plura sunt possibilia, & sic tollitur casus quod tantum vnum individuum sit possibile. Si habet intrinsecam repugnantiam, ergo neque ex modo concipiendi potest accipi, vt vniuersalis, & communicabilis pluribus, & sic non erit differentia inter ipsam & genus.

Et confirm. Quia in illo casu species & individuum non distinguuntur, quia non est possibile nisi vnum individuum, ergo non saluatur in illo indifferentia ad plura, sicut requiritur ad vniuersalitatem speciei, vel si reperitur indifferentia, quia est prædicatum superius, idem dicemus de prædicato generico in vna tantum specie.

Respondetur. Quod etiam si species habeat essentialiter annexam repugnantiam ad plura individua, potest saluari ratio vniuersalitatis

eius si illam repugnantiam habeat non ex conceptu naturæ ut natura est, sed ex modo individuationis, qui radicaliter continetur in ipsa specifica naturâ, ut diximus articulo præcedenti. Vnde non repugnat ex modo concipiendi talem naturam inadæquatè, & sub præciso conceptu naturæ, & formæ, concipi ut communicabilem pluribus, non repugnanter ex vi talis præcisionis, & conceptus inadæquati, licet in re repugnet ex alio principio etiam ad ipsam essentiam pertinente, scilicet quia caret materia in cuius diuersis partibus recipiatur diuersa natura individualis.

Ad confirm. Respond. Illam naturam specificam distingui solum ratione ab illo unico individuo, sed tamen dicitur fundamentaliter manere indifferentia, & potentialitas ad plura in tali specie, non verò in genere, non solum quia est prædicatum superius, sed quia est tale prædicatum superius, scilicet per modum quidditatis formalis, quæ secundum proprietates formæ ex ipso conceptu formæ, & naturæ est communibilis ad plura, licet ea quibus communicari posset, non dentur. Genus autem ex vi sui conceptus præcisi non dicit communicabilitatem ad plura, sicut forma, sed sicut materia, quæ nisi sint plures formæ possibiles, potentialitatem ad recipiendum illas non habet.

Ex quo etiam soluitur alia instantia, quomodo scilicet species, cum sit totum potentiale respectu individuorum, saluetur in unico tantum individuo, quod est pars illius, cum omne totum sit maius sua parte.

Resp. en im. Quòd species in vno tantum indi-

diuiduo existens est totum potentiale, non respectu illius tantum, sed respectu plurium, ad quæ ex vi sui conceptus formalis non repugnat communicari, licet in re non sint possibilia multa quibus communicetur. Vnde non dicimus respectu vnius tantum indiuidui saluari speciem, sed in vno indiuiduo existentem non repugnare, quod concipiatur ut communicabilis pluribus, quantum est ex modo concipiendi illam formam, seu naturam.

Q V Æ S T I O IX.

De Indiuiduo.



Dplex est indiuiduum, aliud designatum & determinatum, ut Petrus, Paulus, &c. Aliud vagum, seu in communi, ut aliquis homo. De priori agemus in hoc articulo, de secundo in sequenti.

A R T I C V L V S I.

Utrum definitiones Indiuidui rectè explicentur.

VT indiuidui rationem, quæ satis perplexa est, inuestigare possimus, eiusque definitiones explicare, duo prænotanda sunt. Primum, vel posse nos loqui de indiuiduatione generaliter accepta, prout in omnibus generibus inuenitur, tam substantiæ, quàm accident-

identis : vel specialiter prout in genere substantiæ inuenitur , speciali enim modo indiuiduatur , eo quod subsistit in se , & per se ipsam indiuiduari debet . Vnde licet in omni indiuiduo inquiri possit , & de principio , seu fundamento indiuiduationis , & de ipsa indiuiduatione , in substantia tamen non solum inuenitur principium indiuiduationis , & ipsa indiuiduatio ex tali principio causata , sed etiam terminus , seu complementum ipsius singularitatis , quo natura illa redditur completa , & subsistens , potestque inueniri natura sine tali termino , & propria subsistentia , vt patet in natura humana assumpta à persona diuina . Et ita dixit D. Thom. quæst. 9. de Potent. art. 2. *Quod in substantia particulari est tria considerare , quarum vnum est natura in singularibus existens . Secundum est modus existendi talis naturæ , quæ existit vt propria huic indiuiduo . Tertium est principium ex quo causatur talis modus existendi . Vbi singularitatem modum vocat naturæ .*

Secundò est prænotandum quòd indiuiduum , seu singulare , quod communiter in omnibus generibus inuenitur , potest considerari , vel primo intentionaliter , vel secundo intentionaliter . Indiuiduum quantum ad primam intentionem , dicit ipsam singularitatem prout à parte rei inuenitur , quæ singularitas , seu indiuiduatio realis non est aliud physicè & in re , quàm ipsa vnitas numerica , qua aliquid ita est vnum , quod est indiuisum in se , & diuisum à quolibet alio , vt S. Tho. docet 1. p. q. 29. ar. 4. Et hæc vnitas numerica in re est sicut modus naturæ , & reddit unitatem simpliciter , quia
spe

specificæ & genericæ sunt unitates per rationem, in re autem convenientiæ, seu similitudines, & possunt ulterius diuidi in inferiora, quod non potest numerica. Quantum ad secundam intentionem, indiuiduum constat duplici relatione rationis. Prima est subiocabilitatis ad prædicata superiora, siue ad prædicatum immediatum, quod est species athoma, siue ad prædicata mediata, quæ sunt genera, ut constat in indiuiduis genericis, ut *hæc animal*, *hæc corpus*, &c. hæc enim indiuidua ex parte subiocabilitatis accipiuntur. Secunda relatio rationis, est prædicabilitatis, qua indiuiduum prædicatur, non de aliquo inferiori, sed de se ipso.

Iuxta ista tria, triplex Porphyrij definitio de indiuiduo procedit. Prima de indiuiduo primo intentionaliter accepto, *Indiuidua ex eo dicuntur quod ex proprietatibus consistit unumquodque eorum, quarum collectio nunquam in alio eadem erit.* Quæ sint autem istæ proprietates indiuiduantes, communiter admittitur dictum Alberti Magni, quod sunt septem, & illo vulgari versu continentur.

Forma, Figura, Locus, Tempus cum nomine Sanguis.

Patria, sunt septem, quæ non habet unus, & aliter.

Ex quarum proprietatum numeratione satis constat explicari hanc definitionem primo intentionaliter, quia numerantur hic proprietates, quæ realiter inueniuntur, ut patet de forma, & figura, &c. Imò in ista definitione solum definitur indiuiduum substantiæ, quia soli substantiæ conuenit habere collectionem ista-

istarum proprietatum. Et adhuc restrictius, non quodlibet indiuiduum substantię, sed completum, & subsistens, quod vocatur suppositum, seu persona, definitur ista definitione, quia aliqua proprietates sunt, quę soli supposito conueniunt & non partibus, vt nomen quod toti personę imponitur, sanguis, idest, genus seu generatio, quę solis personis conuenit, & similiter patria, &c. neque enim manus, vel pes dicitur habere patriam, vel genus suum ducere à tali sanguine, sed totus homo.

Aliter tradit D. Tho. definitiones indiuidui primo intentionaliter accepti, nam in 1. p. q. 29. art. 4. inquit: *Quod indiuiduum est indistinctum in se, & distinctum ab alijs*, vel melius in 10. Metaph. lect. 11. *Indiuiduum est quod non diuiditur ulterius, nec formali, nec materiali differentia*. Quę definitiones non solum conueniunt indiuiduis substantialibus, sed etiā accidentibus, & explicari potest prima definitio sic, quod indiuiduum est in se indistinctum, idest vnum, & indiuisum, & distinctum ab alijs, idest, vltimate distinctum, nec amplius distinguibile per alias differentias, quod ipsa secunda definitio explicat, quando dicit, quod indiuiduum est quod ulterius non diuiditur. Sicut autem veritas, licet dicat aliquid positium cum negatione diuisionis, non tamen addit super ens aliquid positium, sed negationem illam, quę tamen non intrat constitutionem entitatis, sed ad eius pertinet passionem, ita indiuiduatio non dicit aliquid pertinens ad quidditatem rei, sed extra quasi modificationem, aut determinationem eius per modum negationis explicatam.

Si en.

*Si autem inquiras . An ista definitio tradita à Porphyrio essentialis sit , vel descriptiva ; Respond. Descriptiuam esse , quia traditur per proprietates , quarum collectio , seu aggregatio ita inuenitur in vno quòd non in alio , ergo supponit ipsam essentiam individui constitutiuam , quia proprietates supponunt id cuius proprietates sunt . Nec sufficit dicere , quòd supponunt naturam specificam , quia respectu eius non sunt proprietates , sed accidentia , alioquin omnibus conuenirent , quibus conuenit natura specifica . Vel potius dicendum , & fortasse magis ad mentem Porphyrij , quòd non definitur individuum per proprietates consequutas , & posteriores ipsa individuacione . Fortassis enim in individuo propriae passionis quæ fundantur in connexionè necessaria ad naturam non conueniunt , sed quæ sunt principium , & ratio individuacionis , quatenus designant materiam vt ex ipsa materia signata nascatur individuatio , vt in libris de Generatione probabitur ex sententia Diu. Tho. Et ad hoc videntur inclinare verba Porphyrij , dum inquit : *Indiuidua ex eo dici , quòd ex proprietatibus consistit unumquodque , &c.* Vbi non dicit consistere in hoc individuum , sed *ex eo dici* , quia scilicet inde originatur individuatio , quia talibus proprietatibus designatur materia , quæ est principium individuacionis . Vnde aduertit optimè Diu. Thom. 7. Metaph. lect. 15. *Quòd collectio accidentium non est principium individuacionis , sed materia signata ; quia quolibet forma de se nata est in pluribus esse . Vnde quantumcumque aggregentur formæ , seu accidentia , non indiuiduant**

que predicabilia quantum
 licet predicentur, ut Prop
 verè & uniuocè predicantur
 uniuocè sunt uniuersalia. A

1. contra Gentil. c. 33. ubi
 quod uniuocè predicatur,
 species, vel differentia, vel
 eiciens: ergo omnia ista qui
 fundant uniuocam predicat
 tio autem uniuoca in omni
 predicantur, simpliciter est
 enim una ratio, quæ predicat
 quidem uniuoca predicant
 dem rationem, ergo quidq
 conuenientiam, quæ solu
 quod sit uniuoca in multis. V
 predicatio aliqua sit secund
 ad eandem, quam predicat
 terminum quam predicatur.
 hinc identitas accidentalis
 & substantia, ad secundum
 quod ad eandem predicatur
 uniuoca in multis, ad quod n
 non habent uniuocam simpli
 de quibus dicitur non sunt
 Quamuis autem uniuocè
 predicantur, & de plur
 habet uniuocam uniuocam
 de quibus dicitur non sunt
 Quod uero per modum
 conuenientiam, quæ solu
 una predicatio, quæ

le dicetur.

genere sub-
indivuationo-

. q. 29. art. 1.

indivuantur,

se, sed sub-

stantijs aliud

o, quæ inue-

ind subsisten-

humanitate

naturam fin-

, non tamen

Est ergo sup-

indivuationo-

us complens

etiam naturæ.

ali modo no-

a *persona*, &

natura subsi-

um prout est

n genere sub-

prædicatis es-

entialibus. Et

atem naturæ,

e subsistentem

Phyl. q. 7. Alia

is accidentis,

rtiali, siue sit

indivuum;

ina designati-

ea, vt optimè

ad Anibaldum

alijs. sententia,

st. 1. art. 1. Vbi

una aliquan-

do

res conditiones indiuiduantes, quæ in vno solo indiuiduo saluari non possunt, ergo sicut genus non saluatur in vna tantum specie, quia est in potentia ad plures differentias, neque species in vno indiuiduo, quia non possunt omnes conditiones indiuiduantes in vno colligi.

Respond. Quòd potentialitas generis sufficienter saluatur hoc ipso quod habeat plures species, siue sint in numero determinato, siue infinito, de hoc enim non disputamus. Requiritur ergo ad minus, & sufficiunt duæ species sub vno genere, nec potest eius potentialitas extensiuæ saluari etiam de potentia absoluta respectu vnius tantum speciei ob rationem dictam. Et ad exemplum allatum de materia, dicimus quod, vel illa materia est capax plurium formarum corruptibilium, vel solum est capax vnius formæ incorruptibilis, sicut multi existimant de materia Coeli. Si hoc secundo modo se habeat, non saluatur in illa materia potentialitas contrarietatis, & extensionis ad plura, sed solum potentialitas actuationis, & informationis, quod fit per vnum. Si primo modo, semper materia illa manet cū potentialitate ad plura à quibus potens est informari, licet de facto non sit in statu transmutationis ad illa, si habeat formam incorruptibilem à qua satiatur quantum ad transmutationem ad alias, non quantum ad capacitatem illarum.

Et ad exemplum de specie respectu plurium indiuiduorum. *Resp.* Verum esse quòd in vnicò indiuiduo non potest habere species omnes proprietates, & differentias indiuiduantes, sed

sed habet in vno individuo naturam, quæ ex conceptu formæ, & actus quo constituitur, non repugnat esse communicabilem pluribus differentiis individuantibus, licet ob defectum materiæ illæ sint impossibiles. At verò genus, ex eo quod sit in vna specie, non est communicabile pluribus speciebus, si illæ sunt impossibiles, quia materia de se non est principium communicandi pluribus, sed recipiendi plura. Vnde si illa sint impossibilia, non remanet potentialitas ad recipiendum illa. Et idem est de genere, cuius potentialitas materiæ assimilatur in ordine ad formas, seu formales differentias.

Ultimo arguitur. Si aliqua species conseruetur in vnico individuo, vel habet essentialiter annexam repugnantiam ad plura, vel non habet, si non habet, ergo illa plura sunt possibilia, & sic tollitur casus quod tantum vnum individuum sit possibile. Si habet intrinsecam repugnantiam, ergo neque ex modo concipiendi potest accipi, ut vniuersalis, & communicabilis pluribus, & sic non erit differentia inter ipsam & genus.

Et confirm. Quia in illo casu species & individuum non distinguuntur, quia non est possibile nisi vnum individuum, ergo non saluatur in illo indifferentia ad plura, sicut requiritur ad vniuersalitatem speciei, vel si reperitur indifferentia, quia est prædicatum superius, idem dicemus de prædicato generico in vna tantum specie.

Respondetur. Quod etiamsi species habeat essentialiter annexam repugnantiam ad plura individua, potest saluari ratio vniuersalitatis

eius si illam repugnantiam habeat non ex conceptu naturæ ut natura est, sed ex modo individuationis, qui radicaliter continetur in ipsa specifica natura, ut diximus articulo præcedenti. Vnde non repugnat ex modo concipiendi talem naturam inadæquatè, & sub præciso conceptu naturæ, & formæ, concipi ut communicabilem pluribus, non repugnanter ex vi talis præcisionis, & conceptus inadæquati, licet in re repugnet ex alio principio etiam ad ipsam essentiam pertinente, scilicet quia caret materia in cuius diuersis partibus recipiatur diuersa natura individualis.

Ad confirm. Respond. Illam naturam specificam distingui solum ratione ab illo vnico individuo, sed tamen dicitur fundamentaliter manere indifferentia, & potentialitas ad plura in tali specie, non verò in genere, non solum quia est prædicatum superius, sed quia est tale prædicatum superius, scilicet per modum quidditatis formalis, quæ secundum proprietates formæ ex ipso conceptu formæ, & naturæ est communibilis ad plura, licet ea quibus communicari posset, non dentur. Genus autem ex vi sui conceptus præcisi non dicit communicabilitatem ad plura, sicut forma, sed sicut materia, quæ nisi sint plures formæ possibiles, potentialitatem ad recipiendum illas non habet.

Ex quo etiam soluitur alia instantia, quomodo scilicet species, cum sit totum potentiale respectu individuorum, saluetur in vnico tantum individuo, quod est pars illius, cum omne totum sit maius sua parte.

Resp. en im. Quòd species in vno tantum indi-

diuiduo existens est totum potentiale, non respectu illius tantum, sed respectu plurium, ad quæ ex vi sui conceptus formalis non repugnat communicari, licet in re non sint possibilia multa quibus communicetur. Vnde non dicimus respectu vnius tantum indiuidui saluari speciem, sed in vno indiuiduo existentem non repugnare, quod concipiatur vt communicabilis pluribus, quantum est ex modo concipiendi illam formam, seu naturam.

Q V Æ S T I O · I X.

De Indiuiduo.



Vplex est indiuiduum, aliud designatum & determinatum, vt Petrus, Paulus, &c. Aliud vagum, seu in communi, vt aliquis homo. De priori agemus in hoc articulo, de secundo in sequenti.

A R T I C V L V S · I.

Utrum definitiones indiuidui rectè explicentur.

VT indiuidui rationem, quæ satis perplexa est, inuestigare possimus, eiusque definitiones explicare, duo prænotanda sunt. Primum, vel posse nos loqui de indiuiduatione generaliter accepta, prout in omnibus generibus inuenitur, tam substantiæ, quàm accidentis.

cientis : vel specialiter prout in genere substantiæ inuenitur , speciali enim modo indiuiduatur , eo quod subsistit in se , & per se ipsam indiuiduari debet . Vnde licet in omni indiuiduo inquiri possit , & de principio , seu fundamento indiuiduationis , & de ipsa indiuiduatione , in substantia tamen non solum inuenitur principium indiuiduationis , & ipsa indiuiduatio ex tali principio causata , sed etiam terminus , seu complementum ipsius singularitatis , quo natura illa redditur completa , & subsistens , potestque inueniri natura sine tali termino , & propria subsistentia , vt patet in natura humana assumpta à persona diuina . Et ita dixit D. Thom. quæst. 9. de Potent. art. 2. *Quod in substantia particulari est tria considerare , quorum vnum est natura in singularibus existens . Secundum est modus existendi talis naturæ , quæ existit vt propria huic indiuiduo . Tertium est principium ex quo causatur talis modus existendi . Vbi singularitatem modum vocat naturæ .*

Secundò est prænotandum quòd indiuiduum , seu singulare , quod communiter in omnibus generibus inuenitur , potest considerari , vel primo intentionaliter , vel secundo intentionaliter . Indiuiduum quantum ad primam intentionem , dicit ipsam singularitatem prout à parte rei inuenitur , quæ singularitas , seu indiuiduatio realis non est aliud physicè & in re , quàm ipsa vnitas numerica , qua aliquid ita est vnum , quod est indiuisum in se , & diuisum à quolibet alio , vt S. Tho. docet 1. p. q. 29. ar. 4. Et hæc vnitas numerica in re est sicut modus naturæ , & reddit vnitatem simpliciter , quia
spe

specificæ & genericæ sunt unitates per rationem, in re autem convenientiæ, seu similitudines, & possunt ulterius diuidi in inferiora, quod non potest numerica. Quantum ad secundam intentionem, indiuiduum constat duplici relatione rationis. Prima est subijcibilitatis ad prædicata superiora, siue ad prædicatum immediatum, quod est species atomica, siue ad prædicata mediata, quæ sunt genera, ut constat in indiuiduis genericis, ut *hæc animal*, *hæc corpus*, &c. hæc enim indiuidua ex parte subijcibilitatis accipiuntur. Secunda relatio rationis, est prædicabilitatis, qua indiuiduum prædicatur, non de aliquo inferiori, sed de se ipso.

Iuxta ista tria, triplex Porphyrij definitio de indiuiduo procedit. Prima de indiuiduo primo intentionaliter accepto, *Indiuidua ex eo dicuntur quod ex proprietatibus consistit unumquodque eorum, quarum collectio nunquam in alio eadem erit.* Quæ sint autem istæ proprietates indiuiduantes, communiter admittitur dictum Alberti Magni, quod sunt septem, & illo vulgari versu continentur.

Forma, Figura, Locus, Tempus cum nomine Sanguis.

Patria, sunt septem, quæ non habet unus, & aliter.

Ex quarum proprietatum numeratione satis constat explicari hanc definitionem primo intentionaliter, quia numerantur hic proprietates, quæ realiter inueniuntur, ut patet de forma, & figura, &c. Imò in ista definitione solum definitur indiuiduum substantiæ, quia soli substantiæ conuenit habere collectionem ista-

istarum proprietatum. Et adhuc restrictius, non quodlibet indiuiduum substantię, sed completum, & subsistens, quod vocatur suppositum, seu persona, definitur ista definitione, quia aliqua proprietates sunt, quę soli supposito conueniunt & non partibus, vt nomen quod toti personę imponitur, sanguis, idest, genus seu generatio, quę solis personis conuenit, & similiter patria, &c. neque enim manus, vel pes dicitur habere patriam, vel genus suum ducere à tali sanguine, sed totus homo.

Aliter tradit D. Tho. definitiones indiuidui primo intentionaliter accepti, nam in 1. p. q. 29. art. 4. inquit: *Quod indiuiduum est indistinctum in se, & distinctum ab alijs*, vel melius in 10. Metaph. lect. 11. *Indiuiduum est quod non diuiditur ulterius, nec formali, nec materiali differentia*. Quę definitiones non solum conueniunt indiuiduis substantialibus, sed etiā accidentibus, & explicari potest prima definitio sic, quod indiuiduum est in se indistinctum, idest vnum, & indiuisum, & distinctum ab alijs, idest, vltimate distinctum, nec amplius distinguibile per alias differentias, quod ipsa secunda definitio explicat, quando dicit, quod indiuiduum est quod ulterius non diuiditur. Sicut autem vnitatis, licet dicat aliquid positium cum negatione diuisionis, non tamen addit super ens aliquid positium, sed negationem illam, quę tamen non intrat constitutionem entitatis, sed ad eius pertinet passionem, ita indiuiduatio non dicit aliquid pertinens ad quidditatem rei, sed extra quasi modificationem, aut determinationem eius per modum negationis explicatam.

Si en.

*Si autem inquiras . An ista definitio tradita
i Porphyrio essentialis sit , vel descriptiva ;
Respond. Descriptivam esse , quia traditur per
proprietas , quarum collectio , seu aggrega-
tio ita inuenitur in vno quod non in alio , er-
go supponit ipsam essentiam individui consti-
tutivam , quia proprietates supponunt id cuius
proprietas sunt . Nec sufficit dicere , quod
supponunt naturam specificam , quia respectu
eius non sunt proprietates , sed accidentia ,
alioquin omnibus convenirent , quibus con-
venit natura specifica . Vel potius dicendum ,
& fortasse magis ad mentem Porphyrij , quod
non definitur individuum per proprietates
consequutas , & posteriores ipsa individuatio-
ne . Fortassis enim in individuo propriæ pas-
siones quæ fundantur in connexionē necessaria
ad naturam non conveniunt , sed quæ sunt
principium , & ratio individuationis , quate-
nus designant materiam ut ex ipsa materia si-
gnata nascatur individuationis , ut in libris de
Generatione probabitur ex sententia Div. Tho.
Et ad hoc videntur inclinare verba Porphy-
rij , dum inquit : *Individua ex eo dici , quod
ex proprietatibus consistit unumquodque , &c.*
Vbi non dicit consistere in hoc individuum ,
sed *ex eo dici* , quia scilicet inde originatur in-
dividuatio , quia talibus proprietatibus desi-
gnatur materia , quæ est principium indivi-
duationis . Vnde advertit optimè Div. Thom.
7. Metaph. lect. 15. *Quod collectio accidentium
non est principium individuationis , sed mate-
ria signata ; quia quælibet forma de se nata est
in pluribus esse . Undè quantumcumque aggreg-
gentur forma , seu accidentia , non individuant ,**

Requiritur ergo materia, quia ipsa est principium incommunicabilitatis, eo quod est ultimum subiectum, ultra quod non datur communicatio. Signatur autem proprietatibus, vel recipiendo illas, vel dicendo ordinem ad illas, præsertim ad quantitatem, unde resultat designatio, seu diuisio materię, vt suo loco dicetur.

Si iterum inquiras. Quid sit ista indiuiduatio formaliter? *Respond.* Aliud esse principium indiuiduationis, aliud indiuiduationem ipsam, quæ à tali principio causatur. Principium indiuiduationis sumit Diu. Thom. in rebus compositis ex natura designata per quantitatem, & accidentia, vel per ordinem ad illam; in rebus autem à materia separatis ipsamet forma vt incommunicabilis est materię, docet esse principium indiuiduationis. Et in hoc est varietas opinionum, & inter D. Thom. & Scotum, & alios contrarietas. Quia Scot. docet provenire istam indiuiduationem ex aliquo modo superaddito naturę, quem vocat hæc-
ceitatem, quo scilicet redditur natura formaliter hæc, & designabilis. Alij verò docent vnumquodque ens se ipso indiuiduari, & non ex alio principio, sicut se ipso vnum est. De qua controuersia in præsentī non est agendum, sed in libris de generatione q. 9. Et videri potest. Caiet. de ente, & essent. cap. 2. circa finem. At vero indiuiduatio ipsa formalis, quæ à principio indiuiduationis causatur, metaphysicè est ipsa differentia indiuidualis; physicè aut est ipsa vnitas numeralis, & indiuidua qua aliquod ens taliter est vnum, quia non est amplius diuisibile, seu communicabile per alias differentias contrahentes, vt iam supra explicatum est, & am-

& amplius in d. loco de generatione dicetur.

Specialiter autem loquendo, in genere substantiæ inuenitur peculiaris ratio indiuiduationis, vt benè notat S. Thom. 1. par. q. 29. art. 1. eo quod substantiæ per se ipsas indiuiduantur, idest, sine ordine ad aliquid extra se, sed subsistendo in se. Et ideo in ipsis substantijs aliud est singularitas, seu indiuiduatio, quæ inuenitur etiam in accidentibus, aliud subsistentia, vel suppositalitas, nam in humanitate Christi constat assumptam esse naturam singularem, idest, non vniuersalem, non tamen subsistentem, & suppositatam. Est ergo suppositalitas distinctum quid ab indiuiduatione, & habet se tanquam terminus complens ipsam singularitatem, & existentiam naturæ. Vnde indiuidua substantiæ speciali modo nominantur, dicuntur enim *supposita persone, & hypostasis, prima substantia, res natura substantia*. Quæ significant indiuiduum prout est quoddam totum, & completum in genere substantiæ, quod substat alijs tam prædicatis essentialibus naturæ, quàm accidentalibus. Et sic non solum dicunt singularitatem naturæ, sed singularitatem completam, & subsistentem de quo infra q. 15. agemus, & 1. Phys. q. 7. Alia nomina sunt communia indiuiduis accidentis, & substantiæ siue totali, siue partiali, siue sit subsistens, siue non, vt *singulare, indiuiduum, particulare*, & similiter pronomina designatiua, vt *hoc, istud, illud*, & similia, vt optime declarat Diu. Thom. in 3. sent. ad Anibaldum dist. 6. quæst. vnica, art. 1. & in alijs sententarijs ibidem, & in 1. dist. 26. quæst. 1. art. 1. Vbi etiam explicat quomodo ista nomina aliquan-

do accipiuntur primo intentionaliter, aliquando secundo intentionaliter, sicut indiuiduum, particulare singulare, aliquando realitatē singularitatis designant, aliquando habitudinem secundæ intentionis ad prædicata superiora, & promiscuè tam istis nominibus utimur ad significandam indiuiduationem, tam primo-intentionaliter, quam secundo intentionaliter.

Hucusque definitionem Porphyrij de indiuiduo primo intentionaliter explicauimus. De indiuiduo autem secundo intentionaliter duas definitiones tradit Porphyrius. Prima ex parte prædicabilitatis, dicens: *Quod indiuiduum est illud quod de vno solo prædicatur*. Secunda ex parte subiycibilitatis dicens: *Quod indiuiduum continetur sub specie, species autem sub genere*. Ostendens per hoc quod conuenit illi esse vltimum subiycibile, utpote sub genere, & specie contentum. Vbi aduerte subiycibilitatem, quæ est relatio indiuidui vt inferioris ad sua superiora, esse præcipuum, quod in indiuiduo importatur, quia principalis ratio indiuidui est ratio inferioritatis ad vniuersale, opponitur enim indiuiduum vniuersali, sicut inferius superiori. At verò prædicabilitas, quæ conuenit indiuiduo, cum sit tantum prædicabilitas de vno, vel de se ipso, non tam artificialis prædicatio, quam identica. Sed tamen quia prædicatio identica etiam conuenit rebus in vniuersali acceptis, vt cum dicitur, *homo est homo, animal est animal*, addendum est, vt hæc definitio soli indiuiduo applicetur, quod id quod solum identicè, & non alio modo prædicari potest de vno, illud est indiuiduum, res enim in communi, etsi identicè

icè prædicari possint, tamen etiam alio modo prædicari eis conuenit, scilicet formaliter de suis inferioribus.

SOLVUNTUR ARGUMENTA.

Primo arguitur: illo communi argumento. Quia singulare neque est definibile, nec scibile, de singularibus enim non est scientia, ergo frustra hic traditur definitio indiuidui. Si dicatur definiri ipsam indiuiduationem in communi. *Contra est.* Quia hæc non est indiuiduum, sed vniuersale, prædicatur enim de pluribus, & non de vno tantum, pluribus enim conuenit ratio indiuidui, & illa indiuiduatio communis, vel est secunda intentio, vel prima. Si secunda intentio, non saluat primam definitionem Porphyrij, quæ est de singulari pro prima intentione. Si prima intentio, non est aliquid vniuocum, neque vna definitione definibile, quia differentie indiuiduales sunt primo diuersæ, & sic nihil habent vniuocum, siue commune.

Respond. Hoc argumento tangi difficultatem sequenti articulo discutiendam de indiuiduo in communi, seu de indiuiduo vago, quod potest concipi in communi. Videatur ibi solutio ad primum, vbi ostendemus indiuiduum in communi esse denominatiue vniuersale, non formaliter.

Ad aliam partem argumenti. *Respond.* Indiuiduationem primo intentionaliter acceptam posse concipi in communi analogicè, & sic definiri, vt seq. artic. dicetur. Sed secundo intentionaliter pro relatione rationis subijcibilitatis

litatis vel predicabilitatis, etiam vniuocè potest concipi in communi.

Secundo arguit. Quando dicitur in definitione indiuidui, *cuius tota collectio proprietatum non est in alio*, vel intelligitur de proprietatibus illis in communi acceptis, vel de singularibus, & determinatis. Si in communi, falsum est totam collectionem earum non posse esse in alio, constat enim eandem patriam, eundem sanguinem, &c. posse conuenire pluribus indiuiduis, similiter figura, & forma communiter accepta pluribus conuenit, si in singulari, v. g. de hac forma, de hac figura, &c. in primis petitur principium, quia definimus indiuiduum per proprietatem indiuiduam, cum tamen ab ipso subiecto sit proprietas ista indiuidua, & singularis. Et deinde quia tunc frustra diceretur, quòd tota collectio proprietatum non est in alio, siquidem non solum tota collectio, sed neque vna sola proprietas indiuiduata, & singularis potest esse in alio, v. g. hac figura, hac forma, hic locus, &c. nam licet vnica denominatio extrinseca possit conuenire multis, vt eadem patria denominare multa indiuidua, & vnum accidens reale possit diuinitus poni in multis subiectis, tamen conaturali modo non potest esse, nisi in vno tantum subiecto, hoc ipso quòd est accidens indiuiduum & singulare.

Respond. Definitionem intelligi de collectione proprietatum non in communi, sed in singulari, nam quodcumque accidens in communi potest multis conuenire. Et ad replicam dicitur non committi petitionem principij, quia non definitur indiuiduum per proprietates,

ates, quatenus indiuiduatæ, & singulares sunt, sed quatenus sunt principium indiuiduationis, quia scilicet ita designant, & determinant hoc indiuiduum, quod in aliis reperiri non possunt. Et licet hoc non possint præstare, nisi in se sint singulares, & indiuiduæ: tamen non quatenus in se indiuiduatæ, sed quatenus sunt principium indiuiduandi, & reddendi ipsum indiuiduum incommunicabile alteri, ponatur in definitione indiuidui, quia ab ipsis ut à conditionibus dependet designatio, & determinatio indiuidui. Vnde obiter intelligitur, quam vera sit sententia Diu. Thom. quod principium indiuiduationis est materia signata quantitate & accidentibus, non quia accidentia formaliter constituent indiuiduationem, sed quia à materia ut à principio per se dependet indiuiduationis, ab accidentibus autem ut à conditionibus designationis, aliàs frustra indiuiduum definiretur per collectionem proprietatum, &c.

Et ad vltim. Replic. dicitur. Quod inter istas proprietates indiuiduationis, aliqua conueniunt pluribus indiuiduis, scilicet quæ extrinsecè denominant, ut Patria, Nomen, Sanguis, Locus, &c. Alia verò solum vni, ut hæc Forma, hæc Figura, &c. Vnde oportuit de tota collectione, non autem de aliqua proprietate seorsum dicere, quod non potest esse in aliquo alio indiuiduo.

Vltimo arguitur. Contra definitionem indiuidui prædicabilis. Nam aliqua indiuidua prædicantur de pluribus, ergo falsa est definitio. Antecedens probatur, nam eadem numero materia est in vno indiuiduo, postea in alio, ut in

ut in Petro & in eius cadavere; eadem numero actio denominat causam primam & secundam: eadem cognitio plura cognita, idem locus plura locata saltem successivè. Denique eadem numero aqua potest dividi in plures aquas, quarum quælibet est vnum individuum, ergo male dicitur quod individuum est indivisum in se, & non divisibile in alia.

Respond. Non repugnare quod aliquod accidens extrinsecè denominans contineat pluribus tanquam inadæquatis, & particularibus subiectis, vel quod vna materia, seu subiectum possit recipere diuersas formas, siue simul, siue successivè: sed hoc non est prædicari individuum de pluribus numero distinctis, tanquam de inferioribus, vel vnam formam esse in pluribus subiectis individuis adæquatis, quod requiritur ut individuum de pluribus simpliciter, & adæquatè prædicetur. Quare accidens seu forma denominans plura subiecta habet illa quasi partialia & inadæquata, non quasi totalia respectu suæ denominationis, licet verum sit quod non possit forma inherens esse in pluribus realiter distinctis & separatis. Quando autem aqua dividitur in plures aquas, non hoc fit per multiplicationem, & prædicationem sui, sed potius per corruptionem & divisionem, quia desinit esse vnum individuum aquæ, & ex illo fiunt plura per divisionem. Sed de hoc modo dividendi non loquimur in presenti.

ARTICVLVS II.

uid sit indiuiduum in communi, seu indiuiduum vagum.

Divus Thomas 1. p. q. 30. art. 4. agens de indiuiduo in communi, seu de indiuiduo ergo, inquit, quod indiuiduum vagum, ut *aliquis homo*, significat naturam communem determinato modo essendi, qui competit singularibus, scilicet, ut sit per se subsistens distinctum ab alijs. De hoc autem indiuiduo tria possunt contouerri. *Primo*, an indiuiduum conceptum importet aliquam rationem communem indiuidui, quæ sit realis, vel rationis. *Secundo*, an ista ratio communis sit inuoca, vel analoga. *Tertio*, ad quam prædicationem pertineat ex quinque prædicabilibus.

Circa primum, aliqui existimant indiuidua solum habere communitatem negationis, vel intentionis, quia omnia indiuidua in aliqua negatione, vel intentione conueniunt, in negatione quidem, quia omnia indiuidua non sunt vniuersalia, neque habent proprietates communes. In intentione autem, quia omnia indiuidua contrahunt speciem, & constituunt indiuiduum, quod habet relationem subijcibilitatis ad superiora. Negant autem hi Authores conuenire indiuidua in aliquo reali, quod sit illis commune, eo quod differentie indiuiduales sunt primo diuersæ, vnde in nullo conueniunt, ut Petrus, & Paulus non habent infra speciem hominis aliquid, in quo conue-

niant. In Martinez sup. cap. de Specie q. 3.

Authores isti ex diametro pugnant cum sententia D. Thomæ, qui in 1. par. loco citato referens aliquorum sententiam, qui dicebant hoc nomen *persona*, solum habere communitatem negationis, vel intentionis, vtrumque horum excludit, quia hoc nomen *persona*, neque est nomen negationis, neque intentionis, sed nomen rei. *Et idè (inquit) dicendum est, quòd etiam in rebus humanis hoc nomen. Persona, est commune communitate rationis, non sicut genus, aut species, sed sicut indiuiduum vagum;* ergo sentit D. Thom. idem iudicium dari de communitate personæ, & indiuidui, sed *persona* dicit aliquid commune per modum rei, ergo, & indiuiduum. Idem docet quæst. 9. de Potentia art. 2. ad 1. & q. 8. de Potent. art. 3. ad 11. & in 1. distin. 25. q. 1. art. 3. vbi videri potest, præsertim ad certum.

Et ratio est. Quia indiuiduatio est modus, quo natura ipsa redditur singularis, & indiuidua; hic autem modus potest significari in communi, sicut etiam ipsa subsistentia, & personalitas, licet non inueniatur nisi in singularibus determinatè, & signatè, ergo non repugnat dari conceptum communem ipsius indiuidui non solum ex parte naturæ, sed etiam ex parte indiuiduationis. Minor prob. Nam audito hoc nomine indiuiduum, vel persona, aliquid tali nomine significatum concipio, non naturam, ut de se constat, quia indiuiduum non significat naturam in vniuersali, sed significat indiuiduationem naturæ, & non significat ipsam in particulari determinatam, & signatam, non est enim idem dicere indiuiduum
ut sic,

ut sic, & dicere Petrum, vel Paulum determinatè, nam ratio indiuiduationis conuenit multis, esse autem Petrum, vel Paulum, solum uni.

Es confirm. Quia quando dico aliquis homo, ly *homo*, non redditur singularis, sed est terminus communis, alioquin idem esset dicere, *aliquis homo*, & *hic homo*, nec posset, ly *aliquis homo*, deferuice ad constituendam contradictionem cum ly *nullus homo*, si vtraque non esset de termino communi, sed ly *aliquis homo*, est indiuiduum vagum, & non significat tantum naturam, sed naturam cum modo indiuiduationis, ergo modus indiuiduationis concipitur in communi; si enim significaretur in singulari, ly *homo*, singularizaretur, sicut quando dicimus, *hic homo*.

Dices: concipi quidem modum indiuiduationis in communi, sed non tanquam aliquid reale, sed rationis, scilicet, vel negationem aliquam, v. g. incommunicabilitatem in persona, vel negationem collectionis omnium proprietatum vnius indiuidui in alio, vel aliquam secundam intentionem prædicabilitatis, vel subijcibilitatis.

Sed contra hoc vrget Diu. Thom. Quia persona non est nomen negationis, vel intentionis, sed nomen rei, & idem dicere possumus de singularitate, & particularitate. Et in q. 9. de Potent. art. 2. ad 2. & 5. expressè distinguit S. Thom. rationem intentionis in persona, à ratione modi essendi indiuidualiter, qui aliquando nomine intentionis designatur, & constat quod ipse modus singularitatis inuenitur in re, & est aliquid positium, habet enim positium effectum, qui est reddere naturam

perfectè vnā indiuisā in se, & diuisā ab alijs. Et similiter reddit naturā capācem effectus positiui, scilicet existentiæ, & accidentium, quæ illi inhærent inquantum singularis est, & exercitium omnium actionum realium, vel passionum conuenit soli singulari, vnitas autem illa numerica non est pura negatio, sed aliquid positium includit, alioquin multitudo, quæ ex vnitatibus numericis componitur, non esset aliquid positium. Quod Verò personalitas, seu subsistentia sint aliquid positium, & non pura negatio, in capite de substantia, & in Metaphysica probandum est.

Circa secundam Difficultatem. An scilicet indiuiduum in communi sit vniuocum, vel analogum. Videtur quod cum ipsæ differentię indiuiduales sint primò diuersæ, nihil illis vniuocum dari possit in ratione differentię indiuidualis. Neque enim in differentijs simplicibus potest considerari aliquid commune, vt contrahibile per differentias, vt optimè S. Thom. deduxit 1. p. q. 3. art. 8. ad 3. & q. 90. art. 1. ad 3. Et sic responderi posset non improbabiler, quod conceptus indiuidui sit analogus ad omnes differentias indiuiduales, & quod contrahitur, & abstrahitur eo modo, quo analogia à suis analogatis, scilicet non per resolutionem duorum conceptuum, quorum vnus abstrahat ab alio, sed per eundem magis, vel minus explicitum, atque adeò per transcendentiam in ipsis differentijs determinatis. Quod insinuare videtur D. Thom. 1. p. q. 30. art. 4. dum inquit. *Quod indiuiduum vagum significat naturam communem cum determinato modo essendi, qui competit singularibus,*

ut scilicet sit per se subsistens distinctum ab alijs, sed in nomine singularis designati, significatur determinatum distinguens: Igitur secundum D. Thomam indiuiduum in communi, & indiuiduum determinatum, solum differunt penes determinatum distinguens, & nondeterminatum.

Nihilominus. In hac parte tria mihi dicenda videntur. *Primum est.* Quod si abstrahamus conceptum indiuiduationis ab ipsis differentijs indiuidualibus; talis conceptus incompletus differentiae indiuidualis in communi ad omnes differentias indiuiduales non est vniuocus, sed analogus. Ratio est, quia est transcendens, & imbibitus in ipsis differentijs; neque enim per alias differentias contrahitur, alioquin esset processus in infinitum. Et cum illae differentiae indiuiduales sint primo diuersae, non sunt resolvable in duos conceptus, quorum vnus abstrahat ab alio, & includatur in ipso. Ergo est ratio analoga, siquidem includitur in differentijs.

Secundum est. Quod si vnoquoque genere, & praedicamento abstrahamus in communi, non differentiam ipsam indiuiduationis, quae est aliquid incompletum, sed ipsum indiuiduum constitutum ex differentia, & natura per modum totius, & entis completi, sic non est propriè vniuersale, & vniuocum, sed reductiue, & secundum quid, simpliciter autem analogum. Et ratio est. Quia ille conceptus indiuidui conflatur ex natura, & modo indiuiduationis in communi accepto, qui modus non est vniuocus, sed analogus respectu huius, & illius differentiae indiuidualis. Ergo licet ex

parte conceptus naturæ, in potentia contineat differentias individuales, & vniuocationem fundare possit ad illas, tamen ex parte conceptus indiuiduationis, non se habet vniuocè respectu differentiarum in singulari. Ergo simpliciter ille conceptus, non manet vniuocus, nisi secundum quid, & simpliciter analogus, quia non ex omni parte abstrahit à differentijs, ita quod in illis non imbibatur: ad vniuocationem autem requiritur, quod conceptus simpliciter sit vnus; si autem solum ex vna parte sit vnus, ex alia autem non præsciudat simpliciter à differentijs, sed illas actu includat, manet partim vnus, & partim diuersus, quod est esse analogum. Sicut si animal constitueretur, non per ipsam rationem sensibilis, sed per rationalem, & irrationalem in communi concepta, non posset animal esse simpliciter vniuocum homini, & equo, siquidem includeret actu differentias illorum, & non abstraheret ab illis. Sic cum indiuiduum in communi includat differentiam indiuidualem, quæ non abstrahit perfectè à differentijs ipsis indiuidualibus, consequenter indiuiduum in communi non poterit abstrahere ab eis, & sic non manet simpliciter vnum. Aliud est de differentia constituyente ipsam naturam secundum quidditatem, & conceptum naturæ, v. g. rationale. Natura enim quæ componitur ex illa, & ex genere, simpliciter continet differentias inferiores in potentia. At verò differentia indiuidualis in communi non constituit naturam in esse naturæ, sed in statu indiuiduationis, respectu cuius non potest indiuiduatio in communi constituere naturam abstrahentem

hentem perfectè à differentiis singularibus, sed modum naturæ includentem illas. Quod si indiuiduum vagum, *ut aliquis homo*, sumatur tanquam aliquid complexum in vi duorum conceptuum, sic propriè non est analogum, nec vniuocum, quia non est vnus conceptus, sed plures, quorum vnus significat naturam scilicet *ly homo*, alter significat modum indiuiduationis in communi, scilicet *ly aliquis*.

Tertiò Dico. Quod si sumatur indiuiduationis pro secunda intentione indiuidui, scilicet pro relatione rationis, est simpliciter vniuoca ad omnes relationes indiuiduationis. Relatio enim indiuiduationis est quædam species relationis rationis, scilicet subijcibilitas infima, quæ potest diuidi vniuocè in hanc, & illam relationem, quæ insistentur in hoc, & illo indiuiduo per modum subijcibilitatis conceptu. Vnde habet distinctum fundamentum à reliquis relationibus, & distinctam speciem, quæ diuiditur in sua indiuidua, sicut aliæ relationes.

Circa tertiam quæstionem, scilicet, ad quam prædicationem pertineat. Indiuiduum vagum. Caietanus in præsentia docet prædicari indiuiduum non in quid, sed in quale, quia prædicatur *ut modus*, qui propriè dici potest, quod prædicatur *in cuiusmodi*, non *in quid*, & hoc prædicabile, inquit, esse distinctum à reliquis, sicut etiam Definitio prædicatur de suis inferioribus, nec tamen est aliquod ex quinque prædicabilibus. Sic Indiuiduum vagum non est aliquod ex quinque prædicabilibus. Cæterum Definitio, *ut supra diximus*, nō est aliquod ex his quinque prædicabilibus, quia est quid complexum, prædicabilia autem sunt simpli-

cia. Si ergo Individuum vagum est quid complexum, excludetur etiam à quinque prædicabilibus, sicut Definitio. Si vero sumatur in ut termini incomplexi, restat explicare, cur individuum vagum non pertineat ad aliquod ex quinque prædicabilibus, sed prædicetur distincto modo ab omnibus. Si enim est prædicabile uniuocum, & constituit alium modum prædicandi istis quinque, diminutus fuit Porphyrius omitendo illud, & tantum quinque ponendo.

Nos verò facile ab hac difficultate expedi-mur, *dicendo*. Quod individuum vagum non est uniuocum, sed analogum, & ideo non continetur in his prædicabilibus, in quibus tantum prædicata uniuoca continentur. Vel certe solum in eis continentur ea, quæ sunt uniuersalia in prædicando, siquidem uniuersale est id, quod diuiditis in quinque prædicabilia. Individuum autem, etsi in communi concipiatur, non tamen uniuersale redditur, quia individuum est, uniuersale autem ab omni indiuiduatione abstrahit, etiam in communi sumpta, eo quod abstractio uniuersalis reddit naturam contrahibilem per differentias, indiuiduatio autem in communi non est contrahibilis per differentias, sed est ipsa differentia indiuidualis in communi sumota. Reducitur tamen ista prædicatio individui ad prædicationem speciei, non quia prædicetur in quid, sicut ipsa species, sed quia prædicat modum naturæ specificæ, qui est indiuiduatio; modus autem complens reducitur ad rem cuius est modus, sicut substantia ad substantiam. Non tamen individuum significat passionem propriam

priam entis, ut dicit Vasq. i. p. q. 31. art. 4. disp. 2130. c. 2. quia propria passio sequitur ad aliquam naturam per necessariam connexionem, fundatque praedicationem aeternae veritatis cum illa, ideoque toti specie conuenit, modus autem indiuiduationis non ita se habet ad naturam speciei. Et licet vnitas, ut transcendentalis sit passio entis, quia abstrahit ab vnitate formali, vel indiuiduali, tamen ipsa indiuiduatio vnitatis, non est propria passio naturae, seu species respectu verò indiuidui non est propria passio, esset enim passio suimet. Est ergo complementum naturae per modum vltimae determinationis, & indiuiduationis eius.

SOLVUNTUR ARGUMENTA.

Primò arguitur. Repugnat Indiuiduum concipi in communi, quia repugnat ei communicabilitas, & diuisio in plura multo magis quam naturae Angelicae, siquidem ex suo intrinseco conceptu indiuiduum est praedicabile solum de vno, ergo non datur indiuiduum vagum.

Nec potest dici, quod denominatiue est commune; formaliter autem indiuiduum, & ut quo. Quia denominatio illa vniuersalitatis contrariatur, & repugnat formali rationi indiuidui: opponuntur enim esse in vno, & esse in pluribus, ergo non potest suscipere illam denominationem. Quomodo enim aliquod subiectum repugnantiam habet cum aliqua intentione, non potest denominari ab illa, sicut homo non potest denominari ab intentione generis. Ergo si indiuiduum formaliter repugnat huic,

R 5

quod

quod est esse in pluribus, non poterit suscipere denominationem prædicandi de pluribus.

Et confirm. Quia Philosophus dicit in cap. de Substantia, quod prima substantia de nullo prædicatur, quia nec de subiecto aliquo dicitur, neque in subiecto aliquo est: Sed prima substantia est singulare in genere substantiæ, ergo non potest concipi in communi, ita ut de pluribus dicatur. Ac denique. Quia, ut dicebamus, differentię indiuiduales sunt primò diuersæ, ergo non possunt habere aliquod commune in quo conueniant, quia si haberent, resolverentur in illud cōceptus differentiarum indiuidualium, & consequenter non essent primo diuersæ, sed in aliquo conuenirent, & per aliquod additum differrent.

Resp. Quod indiuiduo signato, & determinato repugnat communicabilitas, non tamen indiuiduo vago, & in communi accepto, sicut *ly Petrus*, vel *hic homo* non possunt pluribus communicari, quia sunt indiuidua determinata: at verò *aliquis homo* potest concipi, ut communicabilis pluribus, licet non vniuersalis, & ita non est subiectum, cui repugnat talis communicatio.

Vel secundò dicitur. Quod indiuiduum est, quod prædicatur de vno tantum *ut quo*, seu forma talis prædicabilitatis; hæc autem forma concepta, ut res quædam, & in actu signato, potest denominatiuè, & *ut quod* recipere intentionem prædicandi de pluribus. Vnde talis indiuiduatio, licet habeat repugnantiam prædicandi de pluribus formaliter, & in exercitio, quia non potest esse forma, & ratio prædicationis de pluribus; tamen concepta materia-

terialiter, ut quædam res, non habet repugnā-
tiam ad talem denominationem. Homo autem
etiam materialiter, & ut quædam res conce-
ptus, non potest recipere intentionem generis,
quia non abstrahit à pluribus speciebus.

Ad confirmat. Similiter respond. Quod pri-
ma substantia determinatè, & designatè ac-
cepta, non prædicatur de aliquo subiecto, be-
nè tamen concepta in communi respectu huius,
& illius substantiæ primæ. Vel id habet for-
maliter, & ut *quo*, denominatiuè autem, &
ut *quod*, potest dici de pluribus.

Ad aliam partem argumenti Respond. Pro-
bare, quod differentiæ individuales non habent
aliquem conceptum communem vniucum, qui
sit simpliciter vnus, & abstractus; non tamen
quod non possint habere aliquem conceptum
communem saltem analogum, & per modum
transcendentis imbibiti in differentiis, ut di-
ctum est.

Secundò arguitur. Omnes differentiæ indi-
viduales, & omnia individua significantur in
communi sub vnica, & eadem ratione, scili-
cet, secundum quod conueniunt in officio sin-
gularizandi, ergo ratio illis communis est vni-
uoca, & eadem. Antecedens probat. Quia non
repugnat modum seu officium singularizandi
concipere per modum vnus in communi, & in
confuso, ergo saltem sub illa indeterminatio-
ne ille conceptus vniucus est.

Respond. Illud officium, seu modum singu-
larizandi non posse præscindere actu à diffe-
rentiis determinatis, & individualibus, quia
illæ sunt primo diuersæ, & non resolubiles in
duos conceptus, quorum alter sit contrahens,

alter contrahibilis, ut dictum est, & quælibet differentia contrahens officium illud singularizandi participat. Et licet concipiatur in confuso, & in communi, tamen concipitur ut non perfectè præscindens ab ipsis differentiis, sed ut actu in eis inclusa, licet non actu illas explicet quando in communi concipitur, & sic præscindit ab illis eo modo, quo analogum, & transcendentalia à suis inferioribus; ut in tractatu de Analogia plenius dicetur.

QVÆSTIO X.

De differentia communiter dicta, & ut tertium prædicabile est.



Via Porphyrius tractaturus de differentia, quæ est tertium prædicabile, præmisit diuisiones Differentiæ in propriam, communem, & propriissimam; consueuerunt. Interpretes hic multa agere de ipsa ratione Differentiæ in communi, eiusque diuisionibus, quæ tamen propriè tractantur in 5. & 10. Metaphys. Ideò breuiter ab illis nos expediemus. Illud ad mouentes de ratione Differentiæ, eiusque relatione debere nos agere conformiter ad rationem, & relationem similitudinis, vel conuenientiæ, quæ rationi, & relationi differentiæ opponitur.

ARTICVLVS I.

Utrum benè diuidatur Differentia in communem, propriam, & propriissimam.

Differentia in communi sumpta nihil aliud esse videtur, quam *forma faciens differre*, seu quatenus habet officium faciendi differre. Et ita dicit Porphy. in cap. de Differentia, quod vniuersaliter omnis differentia addita alteratum facit. Vnde in quacumque forma faciente differre nascitur duplex respectus seu ordo, scilicet, ad subiectum seu rem, quam facit differre, & ad terminum seu extrema, à quibus facit differre. Est enim differentia, quasi segregatio, & separatio quædam, & ita habet subiectum, quod segregat, & terminum à quo separat. Et necessario debet intelligi in ipsa ratione differentia relatione aliqua, sicut in ratione conuenientia, quæ est eius oppositum, intelligitur relatio aliqua respectu terminorum conuenientium, & similium. Respectus ergo differentia ad subiecta, quibus conuenit constituit differentiam prædicabilem de illis, & sic conducit ad Differentiam logicè, seu prædicabiliter acceptam. Respectus autem Differentia ad ea, à quibus differt, constituit rationem differentia quantum ad officium segregandi, & separandi ab alio, quod pertinet ad quidditatem differentia metaphysicè consideratam, seu communiter dictam.

Et quia dicitur, quod differentia est *formā faciens differre*. Oportet notare, quod aliud est differre, aliud diuersum esse, & aliud est diuersū

Uersitas, aliud differentia. Ea enim dicuntur diuersas, quæ non per aliud superadditum, sed se ipsis differunt, sicut ea quæ sunt primò diuersa, Ea autem dicuntur differre, quæ per aliquod superadditum differunt ab alio, & ita non se totis differunt, sed conueniunt in aliquo, & differunt in alio. Vnde omnis differentia supponit aliquam conuenientiam, & quæ nullam conuenientiam habent, sunt primò diuersa, iuxta doctrinam Aristot. 10. Metaphys. tex. 12. & D. Thom. ibidem lect. 4. & 1. p. q. 3. art. 8. ad 3. & quest. 90. art. 1. ad 3. Et dicuntur esse primò diuersa Genera generalissima, seu Prædicamenta, & ipsæ differentię, quæ propriè non differunt, sed sunt rationes differendi, & se ipsis differunt sine aliquo superiori vniuoco, in quo conueniant.

Hic positis, circa diuisionem propositam tria explicanda sunt. *Primum*. An diuisio ita adæquata. *Secundum*. Quodnam sit diuisum, & quæ sint membra diuidentia. *Tertium*. An diuisio sit analoga, vel vniuoca.

Circa primum. Fere apud omnes constat diuisionem esse adæquatam, valde paucis exceptis. Et ratio est manifesta. Quia ista diuisio fit per membra exhaustientia, & adæquantia totum diuisum, nam omnis forma, faciens differre, vel est essentialis, & intrinseca, vel accidentalis: Si essentialis, est maxime propria: Si accidentalis; vel illud accidens est separabile, vel inseparabile: Si inseparabile est proprium, & facit differre propriè. Si separabile, est commune etiam alijs, & facit differre communiter. Ideò enim dicitur differentia communis, quia non ita est affixa vni, & propria eius,

eius, quod non possit inueniri in alio; vel quia communiter differentiam apprehendimus per accidentia sensibilia, quæ sunt communia, vt motus, color, figura, &c. Dicitur autem differentia propria accidentis inseparabilis, intelligendo per illam, non solum proprietatem, quæ dimanat à principijs intrinsecis, & quidditatiuis, sed etiam de accidente immobiliter inhxerente, licet non dimanet à principijs essentia, imò de illis Porphyrius attulit exemplum explicando differentiam propriam; sicut, inquit, cicatrix vulneri, finitas nasi, &c.

Vnde facile soluitur, quod aliqui quærun de propria passione, quæ facit differre, & tamen neque essentialiter, cum non sit differentia essentialis, & constitutiva, neque accidentaliter, cum ea quæ habent diuersas passiones essentialiter differant. Item differentia indiuiduales in substantia faciunt differre vnum ab alio, & non essentialiter, quia alijs differrent specificè, neque accidentaliter, quia duo indiuidua substantialiter differunt, ergo non est adæquata diuissio in essentialē, & accidentalē.

Sed respondet. Ad primum. Quod propria passio formaliter solum facit differre propriè, virtualiter autem, seu illatiuè facit differre propriissimè, vt benè notat Caiet. in hoc cap. de Differentia, quia est effectus consequutus ad differentiam propriissimam, & ex differentia per propriam passionem benè infertur differentia essentialis, formaliter tamen solum facit differre accidentaliter propriè.

Ad secund. vñ dicitur. Quod Porphyrius inter exempla, quæ affert pro differentia communi, ponit differentiam inter Socratem, & Plato.

Platonem, quæ est differentia individualis. Et S. Thom. 5. Metaph. lect. 12. Ex (inquit) quæ conveniunt in specie, non distinguuntur nisi per accidentales differentias, ut Socrates albus, vel iustus, Plato niger, vel musicus. Nihilominus tamen licet aliquæ differentię communes intercedant inter duo individua, sicut illæ quas D. Thom. assignat, negandum non est individua substantię differre per differentias proprias, quia inseparabiliter differunt, non quidem per differentias, proprias, quæ dicant proprias passionem naturæ, cum eiusdem naturæ, & speciei sint duo individua, sed per differentias proprias, hoc est inseparabiles. Et benè stat quod differant substantialiter, & tamen non essentialiter, sed accidentaliter, non accidentalitate prædicamentali, sed accidentalitate quinti prædicabilis. Differentia enim individualis, etsi substantiam diuidat, non tamen formaliter, & essentialiter diuidit, sed materialiter. Et licet hæc diuisio fiat in substantia, est tamen dependens ab accidentibus, per quorum conuocationem, & respectum, materia redditur signata, à qua tanquam à principio sumitur indiuiduatio. Vnde, & individuum postulat, ut collectio suarum proprietatum (quæ vtiq; accidentia sunt) in alio non possit inueniri.

Circa secundam difficultat. In primis certum est differentiam, quæ est diuisum in hac diuisione, non esse differentiam, quæ est tertium prædicabile, hæc enim est vnum ex membris diuidentibus scilicet, differentia maximè propria, quæ sola prædicatur in quale essentialiter, vnde etiam sequitur non esse, id, quod diuiditur, aliquam secundam intentionem aliquis

cuius ex quinque prædicabilibus, siue tertij, siue quarti, aut quinti: quia intentio tertij prædicabilis, est intentio differendi essentialiter: quarti, & quinti, est intentio differendi accidentaliter, ergo nulla illarum est diuisum complectens omnia ista membra diuidentia.

Difficultas ergo est, An diuisum huius diuisionis sit aliquid reale, vel rationis, seu forma aliqua, vel intentio. Quod est idem, ac quærere, quod sit hoc munus faciendi differre. Nam vt bene notat Caietanus in hoc capite, non sumitur differentia in hac diuisione materialiter pro ipsa forma, quæ facit differre, sed pro ipsa formaliter, seu munere faciendi differre, quod aliqui vocant intentionem differentiarum, quia sicut conuenientia plurium in vno est notio, seu intentio, ita & differentia quatenus talis. Ne tamen inuoluamus intentiones logicas cum formalitatibus metaphysicis, nos non vocamus intentionem, sed formalitatem, seu munus faciendi differre, quod consistit in aliquo respectu ad ea, à quibus fit separatio, seu differentia, sicut è contra, conuenientia consistit in respectu ad ea, quæ similitudinem habent, seu conuenientiam. *Existent ergo aliqui*, hoc munus faciendi differre esse aliquid rationis, eo fundamento innixi, quia differre supponit conuenientiam, nam quæ se totis distinguuntur, diuersa sunt, non differentia: conuenientia autem inter duo indiuidua, vel inter duas species relatio rationis est, conueniunt enim in aliquo communi, quod solum per rationem commune est, ergo etiam actualis differentia, quæ talem conuenientiam necessario supponit, non potest

est esse respectus realis, sed rationis.

Addunt ulterius aliqui, quod etiam differentia communis, & propria, licet fiat per accidentia, quæ distinguuntur à subiecto, quia tamen faciunt differre, non ratione sui generis in quo conveniunt, sed ratione suarum differentiarum, quæ necessario supponunt convenientiam in genere, ideò etiam formalis ratio differentiae, quæ fit mediantibus talibus accidentibus, aliquid rationis est, sicut v.g. albedo, & nigredo faciunt accidentaliter differre Petrum, & Paulum, non per ipsam rationem colorati, quæ est genus albi, & nigri, sed per disgregatum, & congregatum, quæ sunt differentiae ipsorum, ergo faciunt differre, quatenus supponunt convenientiam genericam, & per intellectum præcisè accipiuntur in ratione differentiae, quod totum aliquid rationis est.

Nihilominus dicendum est, quod in formis realibus, & quæ realiter faciunt differre, hæc formalitas, seu munus faciendi differre non est sola in. entio, seu relatio rationis, sed vera, & realis formalitas, nec video posse aliquem de hoc dubitare, nisi qui negaverit dari relationes reales dissimilitudinis, & diversitatis, similitudinis, & convenientiae, seu æqualitatis. Quis autem neget duo alba habere à parte rei relationem realem similitudinis, quam amittunt, altero albo amisso? Relatio autem similitudinis, relatio & formalitas convenientiae realis est in formis realibus. Et non repugnat eandem entitatem respectu diversorum fundare similitudinis relationem, & dissimilitudinis, ut album respectu albi, similitudinem, respectu nigri, dissimilitudinem.

Et

Et fundamentum est manifestum. Quia effectus differentie facientis differre realis est, & relationem realem fundat, si terminus existat à parte rei, ergo non est aliquid rationis. Atcedens constat. Quia à parte rei datur distinctio, & segregatio inter ea, quæ non sunt omninò diuersa, sed aliquam retinent convenientiam, & similitudinē, sicut Petrus, & Paulus retenta similitudine in natura, realiter sunt distincti, & separati, ergo sicut convenientia, & similitudo, quam retinent realis est, ita differentia, & distinctio, quam in re habent, realis est, siquidem vnum realiter non est aliud. Quare benè potest supponi convenientia, & similitudo realis, & dari distinctio, seu differentia realis. Et licet hæc differentia, & convenientia fiat secundum diuersas formalitates, tamen aliquæ formalitates etiam dantur in re, vt relationes reales, secundum quas dicitur aliquid formaliter simile, vel conueniens cum alio, aut dissimile, & diuersum, & similiter fundamenta proxima harum relationum dantur in re.

Ex quo patet. Quam debile sit fundamentum oppositum. Primo enim deficit, quia dicit convenientiam actuaalem inter Petrum, & Paulum, equum, & hominem, esse aliquid rationis, cum à parte rei sint similes, & ratione similitudinis conueniant, similitudo autem realis relatio est. Sed æquiuocati sunt illi Authores non discernendo inter convenientiam, & unitatem, Petrus enim, & Paulus sunt vnum per rationem, sed convenientiam, & similitudinem habent in re. Et deinde deficit, quia licet formalitas differentie supponat convenientiam, non tamen requiritur, quod supponat convenientiam.

nientiam per modum relationis actualis, seu fundetur in tali relatione, sed sufficit quod supponat conuenientiam fundamentalem, & ea supposita, differentia formalis exerceatur, siue alias exerceatur etiam relatio conuenientiae; siue non.

Ex hoc autem explicatur, quodnam sit diuisum huius diuisionis, diuiditur enim ipsa formalitas, seu ratio faciens differre, in modum faciendi differre essentialiter, & accidentaliter (haec enim sunt membra immediatè opposita) & rursus accidentalis differentia, in modum differendi separabiliter, quæ est differentia cõmunis, & inseparabiliter, quæ est propria, ubi etiam differentia penes propriam passionem includitur, quæ est differentia accidentalis, licet inferat, vel præsupponat essentialem à qua derivatur. Et includitur etiam differentia indiuidualis, quia impossibile est quia differentia indiuidualis sit essentialis, vel accidentalis, cum ista membra sint immediatè opposita. Et licet quidam eam reducant ad essentialem, quia substantialis est, alij ad accidentalem, quia materialis, & dependens ab accidentibus signantibus materiam; tamen certum est sub aliquo istorum membrorum contineri, sicut certum est esse differentiam essentialem, vel non essentialem. Undè negari non potest, quod ista diuisio sit adæquata, quod perperam aliqui negant.

Circa tertiam controuersiam, seu difficultatem, scilicet, an ista diuisio sit analoga, vel vniuoca, duplex est opinio. Quidam existimant hanc diuisionem esse vniuocam, quando sumitur penes ipsum munus faciendi differre,

ut videri potest apud Magistrum Cabero tractat. 3. disput. 4. dub. 2. quia hoc munus uniuocè, & simpliciter exercetur à quacumque differentia fiat, siue essentiali, siue accidentali, si autem sumatur differentia pro ipsa re, seu forma faciente differre, sicerit diuisio accidentis in subiecta, quia modus ipse faciendi differre, quasi intentio quædam est, & notio, quæ accidit rebus, non eas constituit.

Et vrgetur hoc amplius, quia si aliqua ratione hæc diuisio esset analoga maximè, quia una differentia facit differre essentialiter, alia accidentaliter: hoc non obstat ergo. Minor probatur, nam etiam hoc non obstante, prædicabile essentialiter, & accidentale uniuoce conueniunt in ratione prædicabilis ut sic, & similiter, conuenientia, seu similitudo accidentalis, & essentialis uniuocè conueniunt in ratione assimilandi, & sub eodem relationis genere; ergo similiter differentia essentialis, & accidentalis uniuocè conueniunt.

Nihilominus oppositam sententiam communiter defendunt Thomistæ, de quo videatur Caietan. & Soto in commen. capituli de Different. & Cursus Carmelit. hic disputatione 7. quaest. 1. Et sine dubio fundamentum est solidius, nam quatuor possumus considerare in ipsa differentia. Primum, est forma, quæ facit differre. Secundum, ipsa segregatio, seu diuisio, quæ ex tali forma faciente differre resultat. Tertium, ipsa relatio differentiae, seu dissimilitudinis, Quartum, ipsa ratio tertij prædicabilis. Et tria prima pertinent ad differentiam primò intentionaliter, seu physicè acceptam; Quartum verò ad differentiam logicam, & se.

& secundo intentionaliter. Si attendamus primum, constat quod forma essentialiter, vel accidentaliter constituens, aut differre faciens, non est vniuoca; forma enim essentialis simpliciter constituit esse rei, accidentalis autem secundum quid. Eodem autem modo, quo constituit, facit differre, ergo sicut in constituendo non conueniunt vniuocè forma essentialis, & accidentalis, simpliciter constituens, & secundum quid, ita similiter, neque in faciendo differre.

Si verò secundum consideremus, similiter constat, quod segregatio, seu diuisio essentialis, est simpliciter diuisio; accidentalis autem secundum quid; ea enim quæ solum accidentaliter differunt, & essentialiter conueniunt, differunt secundum quid, & simpliciter conueniunt, ergo ratio faciendi differre non simpliciter illis conuenit, sed secundum quid. Et quicquid sit, an aliquæ differentię accidentales faciant aliqua duo differre realiter, & simpliciter, sicut differunt duo indiuidua sub eadem specie, tamen constat multas differentias accidentales non facere simpliciter differre, quia non faciunt simpliciter aliud, & aliud, sed alterum, & alterum, etiam si maneat idem subiectum numero, sicut in exemplis, quæ Porphyrius affert, in quibus idem à se ipso aliter, atque aliter differt, vt Petrus sanus à se ipso aegroto.

Si autem tertium consideremus, scilicet, relationem differentię, illa quidem vniuocè conueniet in prædicamento, & genere relationis, siue sit relatio differentię essentialis, siue accidentalis, Sed hic non loquimur de diuisione diffe-

differentiae pro relatione praedicamentali, sed pro ipso effectu differendi, & ratione faciendi differre, quae simpliciter sit in differentia essentiali, secundum quid in differentia accidentali.

Denique si quantum attendamus, multo magis constat non posse uniuocè conuenire differentiae accidentali, & essentiali, nam essentialis sola constituit tertium praedicabile, quod praedicatur in quale essentialiter. Reliquae non constituunt illud, quia praedicantur in quale accidentaliter. Ergo in ratione constituendi tertium praedicabile non possunt uniuocè conuenire.

Ad fundamenta oppositae sententiae respondetur. Ad primum dicitur munus faciendi differre non eodem modo inueniri in essentiali differentia, & accidentali, ut ostensum est, quia essentialis tollit identitatem, quod est oppositum differentiae simpliciter, accidentalis autem, secundum quid, quia in eodem subiecto exerceri potest secundum alium, & alium statum. vel accidens ipsius.

Ad secundum Respondetur negam. minor. Ad probat. Dicitur esse disparem rationem inter praedicari essentialiter, & accidentaliter, & facere differre, quia praedicabilitas non consequitur rem ipsam secundum quod est in se, sed ut est in intellectu. Intellectus autem uniuocè, & simpliciter applicat praedicatum ad subiectum, siue sit praedicatum essentialiter, siue accidentale, in qua applicatione consistit praedicatio. Similiter eodem modo abstrahis unum à multis, siue essentialiter conueniant, siue accidentaliter. In hac autem unitate segregata à multis fundatur uniuersalitas. In
omni-

omnibus autem quinque prædicabilibus inuenitur vniuocè hoc, quod est esse vnum in multis, vt supra diximus quæstione sexta. At verò facere differre non est effectus conueniens per intellectum, sed in re distinguens, & faciens differre vnum ab alio, quia metaphysicè hic loquimur de illo; forma autem quæ essentialiter facit differre, tollit identitatem simpliciter, quæ est in essentia; differentia autem accidentalis non tollit illam, sed relinquit.

Ad illud quod assertur de relatione similitudinis, & conuenientiæ. *Respond.* Quod relatio similitudinis, & conuenientiæ in genere relationis prædicamentalis vniuoca est, siue conuenientia sit accidentalis, siue essentialis, sicut de relatione differentię dictum est. Cæterum ratio ipsa, seu forma faciens conuenientiam in ratione conueniendi, non est vniuoca in essentiali, & accidentali conuenientia, sicut de differentia dictum est.

ARTICVLVS II.

*Primum definitiones Differentię tertij prædicabilis
sint bonæ.*

Explicata ratione differentię communiter dictæ, & prout pertinet ad Metaphysicum restat specialiter descendere ad Differentiam Logicam, quæ constituit tertium prædicabile, quod solum conuenit differentię propriissimæ, quæ essentialis est; reliquæ enim differentię non prædicantur in quale essentialiter, nec constituunt prædicabile sub ratione differentię, sed sub ratione proprij, vel accidentis

ad

ad quod sequitur differentia accidentalis.

Huius autem differentia quæ est tertium prædicabile quinque definitiones tradidit Porphyrius. Prima, *Differentia est id, quo species genus excedit*. Secunda, *Differentia est id, quod de pluribus, & differentibus specie hoc ipso quale quid prædicatur*. Tertia, *Differentia est, quæ suapte natura, ea, quæ sunt sub eodem genere, separat*. Quarta, *Differentia est id, quo singula differunt, scilicet secundum quidditatem*. Quinta, *Differentia est quæ non solum separat ea quæ sub eodem genere collocantur, sed ad substantiam rationemque confert, & pars eius est cuius differentia dicitur esse*. Ex quibus definitionibus colligimus tres respectus ad logicalem differentiam constituendam concurrere, scilicet respectus ad genus quod contrahit differentia, & super quod aliquid addit. Secundus ad speciem quam constituit contrahendo genus, & segregando speciem à reliquis. Tertius ad inferiora de quibus prædicatur in qualequid, quæ sunt ipsamet inferiora speciei, solum enim de illis prædicatur in quale. Et quia illa definitio, qua differentia dicitur prædicari de pluribus, &c. magis ipsam rationem prædicabilis, & vniuersalis explicat communiter, utimur illa in explicatione tertij prædicabilis. Et in his definitionibus non agitur de differentiis individualibus, quia istæ non sunt vniuersales, sed individuales, & ideò ad tertium prædicabile, quod vniuersale est, non pertinent. Et licet in communi concipiatur differentia individualis ut sic, tamen non prædicatur in quale essentialiter, quia individualis est, & totam naturam constitutam supponit.

Art. Log. Pars II.

S

Igitur

Igitur circa istos tres respectus, qui concurrunt ad rationem tertij prædicabilis, suæ difficultates occurrunt, quæ in isto & sequentibus articulis examinandæ sunt. Circa respectum enim ad inferiora, occurrit difficultas quomodo in definitione tertij prædicabilis dicatur, quod prædicatur de pluribus specie differentiibus, quod solum conuenit differentiæ subalternæ, non autem de differentiibus numero, quod conuenit differentiæ athomæ. Circa respectum ad speciem est difficultas, an differentia sit vniuersalis respectu speciei quam constiuit, an respectu inferiorum, quæ sub specie continentur. Circa respectum ad genus, difficultas est, an differentia contineantur sub genere, ita quod differentia inferiores contineantur sub differentiis superioribus. Et primam difficultatem expediemus in hoc articulo. Secundam in sequenti. Tertiam in ultimo.

Circa primum, in quo explicatur illa particula, *de pluribus specie differentiibus*, occurrit communis difficultas, quare ponatur in definitione differentiæ in communi, quæ comprehendit tam differentiam athomam, quam subalternam, cum prædicari de pluribus differentiibus specie solis subalternis conueniat. Nec potest dici Porphyrium, & Aristotelem, aliosque antiquos ignorasse, aut negasse differentias athomas; cum enim definitiones, & species athomas non ignorauerint, cum tam multæ in scientijs definiantur, quomodo differentias athomas, sine quibus quidditates specificæ nec constituuntur, nec intelliguntur, ignorare potuerunt?

Sane Aristoteles expresse inquit, quomodo
do

do definitio tradenda sit per genus, & differentiam, & quæ sit differentia ultima, ut patet in 2. Posteriorum lect. 13. apud D. Thom. & lect. 14. & 15. in fine, & 7. Metaphys. lect. 12. & lib. 8. lect. 2. Cur autem in ista definitioe, in qua explicauit differentiam, quæ est tertium prædicabile, solum egerit de differentia, quæ prædicatur de pluribus specie differentibus, quæ est differentia subalterna, quæstionem censeo non tanti momenti, quantum anxietudinis in aliquibus parit, præsertim cum ipse Porphyrius in alijs definitionibus differentie athomæ explicationem non prætermiserit, ut quando dicit: *Differentia est qua species excedit genus, qua singula differunt, quæ separat ea quæ sub eodem genere continentur*, & cætera quæ in differentiam athomam optimè quadrant.

Et quidem Caiet. super hoc 3. cap. Porphyrii, existimauit illam definitionem adaptari posse differentijs athomis, explicando illam, non positiuè, sed per non repugnantiam, seu negatiuè, quia videlicet ex ipsa ratione differentie non repugnat prædicari de pluribus specie differentibus, sicut quantitati ex ipsa ratione quantitatis non repugnat diuidi in infinitum sincathegorematicè, & tamen quantitati naturali, scilicet ut subest formæ alicuius rei naturalis, id repugnat, quia destruitur forma, & res naturalis si sic diuidatur. Sic differentie athomæ non repugnat de se prædicari de multis specie differentibus, licet repugnet ratione speciei athomæ, quam constituit. Quod amplius intelligi potest, si consideremus quod differentia quæcumque in ratione prædicabilis in quale de multis, non habet alia multa, nec

alia inferiora, quam illa quæ habet species per talem differentiam constituta : vnde de se nec dicit prædicari de pluribus specie vel numero differentibus, sed ad id determinatur ratione eius quod constituit, si enim quidditas, quam constituit, fuerit species athoma habens sub se inferiora solo numero differentia, eadem habebit differentia, quæ talem speciem constituit : si autem id quod constituit fuerit species subalterna habens sub se inferiora specie athoma diuersa, de eisdem specie differentibus prædicabitur differentia. Si tamen species constituta per differentiam non habeat plura inferiora specie distincta sed numero, tunc repugnabit ei non ratione sui, sed ratione speciei ab ea constitutæ, quæ non præbet ei alia inferiora.

Adhuc tamen emollienda amplius mihi videtur Caietan. explicatio, & ipsi literæ Porphyrij inhærendo, Dico verba Porphyrij bene attendenda esse, dixit enim differentiam esse, quæ prædicatur de pluribus, & specie differentibus in quale. Vbi pondero non diuise Porphyrium, quæ prædicatur de pluribus specie differentibus, sed de pluribus, & specie differentibus. Ut quid enim interposuit illam particulam, &, nisi vt distingueret inter prædicari de pluribus absolutè, & prædicari de specie differentibus, & sic in illa particula de pluribus, omnes differentias prædicabiles inclusit siue athomas, siue subalternas, in illa verò additione & specie differentibus, specialiter subalternas indicauit, quasi diceret, differentia est, quæ de pluribus prædicatur in quale, etiam si illa plura sint specie differentia, &
ita

ita particula, & , æquivalens partiçulæ *etiam*. Et fuit hoc neceffarium ad explicandum perfectè naturam differentia in quantum prædicatur in quale; cum enim differentia ideò prædicetur in quale, quia prædicatur per modum actualitatis, & formæ determinantis, hoc enim pertinet ad modum qualificationis, oportuit explicare, quòd etiamfi differentia genericæ sint, feu subalternæ, ideòque non videantur habere rationem actus, fed potius potentialitatis respectu fuarum specierum; adhuc tamen prædicantur in quale, quia prædicantur ratione formæ genericæ, quam important, ac proinde sensus Porphyrij est, differentia est, quæ de pluribus prædicatur in quale quid, etiamfi talia plura sint specie differentia. Hanc enim vim habet illa particula, & , in definitione interposita, cum dicitur, de pluribus, & specie differentibus; id est *etiam* specie differentibus.

Sic intellecta mente Caietani, quæm plures, & insignes sequuntur Authores nihil asperitatis, aut difficultatis habet, sed plurimum subtilitatis, & maximè ad Porphyrij mentem se accommodat. Atque facilius, neque improbabilius dicunt, Porphyrium tantum definisse subalternas differentias, quia sunt communiores, & notiores, athomæ autem multiplices, & vix cognitæ; definitis autem subalternis, virtualiter athomæ definitæ manent, loco illius partiçulæ, *specie differentibus*, subrogando, *numero differentibus*. Et præsertim, quia in alijs definitionibus de differentia traditis etiam species athomas incluserat, ut supra notauimus. Ac denique ea videtur sufficiens causa omit-

§ 3

tendi

sendi differentias athomas, quia illæ in definitionibus specierum explicantur; cum quibus conuertuntur. Vnde sicut in tractatu prædicabilem non agit de definitione, sed de ipsa specie definibili, ita nec de differentia athoma, quæ cum ipsa definitione conuertitur, & propria illius est, bene tamen de differentia subalterna, quæ genus constituit, quod non conuertitur cum definitione speciei.

Omitto aliorum solutionem qui dicunt in illa definitione de pluribus differentibus specie, debere intelligi de pluribus specie differentibus, non inter se; sed ab alijs, à quibus specificè distinguuntur. Qua ratione etiam ista diffinitio conuenit differentijs athomis, nam rationale, v. g. prædicatur de Petro, & Paulo, ut differunt specie, non inter se, sed ab equo, & bove, à quibus rationale specificè distinguit Petrum, & Paulum. Hæc tamen solutio extorta videtur, nec enim absolutè dicuntur plura differre specie, si non differunt specie inter se, sed ab alijs, alioquin etiam dici potest quòd genericè differunt, quia, sicut differunt specie ab alijs à quibus specie distinguuntur, ita differunt genericè Petrus, & Paulus ab his, à quibus genere distinguuntur. Vnde inciditur in simile inconueniens quare solum Porphyrius posuerit in definitione differentiarum de pluribus specie differentibus, & non addiderit de pluribus genere differentibus secundum hanc explicationem.

Sed obijciat. Contra primam solutionem. Nam inconueniens est quòd definitio aliqua eradatur solum per id quod se habet non repugnanter ad aliud, tum quia definitio posi-

tivè

ritur debet explicare rationem definiti, & non solum per non repugnantiam: Tum quia aliis posset tradi per terminos sibi repugnantes, ut si homo diffiniretur, quod est animal irrationale, quia licet irrationale repugnet homini quatenus homo, sed non quatenus animal, & una species infima posset definiri per aliam, quia licet sibi repugnet secundum specialem rationem, non tamen secundum communem, & genericam, ergo similiter est inconueniens quod differentia definiatur per id quod sibi non repugnat comprehendendo tam a hominem, quam subalternam, solum quia non repugnat differentie in communi esse subalternam.

Es confir. Quia si illa particula, *de pluribus*, significat tam de pluribus specie, quam numero, cur quando Porphyrius definiuit speciem, expressit de pluribus numero differentibus, & quando definit differentiam specificam, id non exprimit, sed solum de pluribus. Item in hoc quod est prædicari de pluribus omnia prædicabilia conueniunt, non ergo per illam explicatur specialiter hoc tertium prædicabile.

Respond. Hoc argumentum non militare contra nostram expositionem, quia ostendimus iuxta Porphyrij textum illam particulam, *differentibus specie*, solum subalternis differentiis conuenire, in illa autem particula, *de pluribus*, absolutè includi tam a hominem, quam subalternam, quæ prædicantur de pluribus siue numero, siue specie distinctis. Additur tamen illa particula, *& specie differentibus*, ut ostendatur quomodo etiam differentie genericæ conueniat prædicari in quale. Stando autem in rigoroso Caietani sensu dicitur quod

definitio data de aliqua specie per non repugnantiā alterius sibi oppositæ, vitiosa est, quando verè tale oppositum datur in illa specie vt in exemplis allatis constat. Quando autem aliqua natura, seu species ex se habet non repugnantiā ad aliquid, sed quòd de facto habeat, vel impediatur habere, pendet ex aliquo extrinseco, non est vitiosum definire per non repugnantiā, sicut definitur quantitas, quod est diuisibilis in infinitum, licet naturali quantitati repugnet. Sic cum differentia, & proprium, & accidens, quæ prædicantur in quale, non habeant alia inferiora, quam quæ permittuntur habere à suis subiectis, quæ constituent, vel efficiunt, oportet quod prædicari de pluribus specie, vel numero differentibus, in his intelligatur permissiuè, seu non repugnanter, & quantum est ex se, licet differentia, vt affectæ, & alligatæ speciei athomæ, quam constituit, id repugnet, sicut quantitati, vt est in subiecto naturali, repugnat diuidi in infinitum. Vnde in hac solutione debet dici, quod differentia athomæ, & subalterna non sunt species differentia vt sic, neque ipsa differentia est genus ad illas. Sed hæc diuersitas athomæ, & subalternæ prouenit ipsi differentia ex ipsa re, quam constituit, nam si est natura generica, erit subalterna, & prædicabitur de pluribus specie differentibus: Si specifica, non nisi de differentibus numero.

Si autem inquiras. Si differentia permissiuè se habet ad vtrumque, scilicet vt de pluribus specie vel numero differentibus prædicetur, cur Porphyrius posuit solum de differentibus specie?

Resp.

Resp. Id fieri quia, quando aliquid per non repugnantiam, & permissionem definitur, semper debet poni id quod maius, & principalius est, quia per hoc quod sibi principalius non repugnat, melius innotescit quod non repugnat minus principale. Sicut melius definitur quantitas per hoc quod sibi non repugnat diuisio in infinitum, quam per hoc quod sibi non repugnat oppositum.

Ad confirm. Dicitur, quod in illa particula, *de pluribus*, non intelligitur solum de pluribus numero, se absolute de pluribus numero, vel specie differentibus, quod tamen incongrue in specie secundo predicabili diceretur, quia secundum predicabile solum de numero differentibus predicatur, tertium autem vtrumque compatitur, & de pluribus numero, & de pluribus specie differentibus, prout fuerit species, quam constituit.

Ad aliam partem confirm. dicitur. Quod predicari de pluribus omni predicabili commune est, sed predicari de pluribus in qualequid soli tertio predicabili est proprium. Quod deinde diuidi potest in predicari de pluribus numero, vel specie distinctis. Et Porphyrius non solum posuit primam particulam, sed etiam addidit secundam.

Circa ultimam. Particulam, *in qualequid*. Aduerte duo, *Primum* est, quod cum dicitur in quale quid, *ly quid* est idem quod essentialiter, seu quidditative, non idem quod substantiue, nam illa particula, *quid*, vtrumque designat, ex parte rei significata rationem essentialem, & quidditativam, ex parte modi quod substantiue, & non adiectiue se habeat, ut

In quaestione de Genere explicauimus.

Secundum est. Quòd sicut in naturalibus forma, seu actus, & comparatur ad materiam tanquam ad potentialem ex qua educitur, & ad totum quod ex materia & forma constat, sic etiam differentia primò respicit genus tanquam potentiale quod actuat, & de cuius potestate educitur, non educatione physica, sicut forma à materia, sed educatione metaphysica, sicut ratio determinata, & actuans ab indeterminata, & confusa, & actuabili: Deinde respicit speciem tanquam totum quoddam constitutum, & formatum per ipsam differentiam, vnde respectu generis differentia se habet in quale, quia determinat confusionem, & potentialitatem eius, respectu autem speciei non dicitur in quale quia determinat potentialitatem eius, sed quia est pars constitutiva illius actualior, & magis determinata. Quam doctrinam inuenies in Diu. Thom. 1. p. q. 50. art. 4. ad 1. & quaest. de spiritualibus creaturis art. 8. ad 9. & ex illa constat differentiam semper debere esse perfectiorem suo genere, sicut actus potentia, & determinatum indeterminato, & qualitas qualificabili.

A R T I C V L V S III.

*Verum differentia dicatur vniuersalis respectu
sua speciei, an respectu inferiorum
salis speciei.*

CUm differentia conuertatur cum specie, quam constituit, & mediante ipsa de indiuiduis praedicetur; species autem vniuersalis
lis

fit, & ex hoc ipso, quod differentia dicitur
e specie aequaliter, & ad conuertentiam, op-
ortet quod sit vniuersalis, sicut ipsa species,
tamen difficultas est, an ex hoc formaliter,
quia respicit speciem, vniuersalis sit; an verò
ex formali respectu, quo respicit indiuidua ta-
s speciei.

Ex parte etiam inferiorum differentiarum, po-
est esse dubium, quæ sint directè, & per se
inferiora differentiarum, quædam enim sunt infe-
iora, quasi immediata ipsius differentiarum, alia
autem inferiora immediata ipsius speciei, & me-
iatè sunt etiam inferiora differentiarum, v.g. ra-
ionale, & potest prædicari de Petro & Paulo
tanquam de inferioribus hominis, & potest præ-
dicari de hoc, & illo rationali tanquam de in-
ferioribus sibi immediatè. Inquirimus ergo re-
spectu quorum inferiorum constituatur diffe-
rentia in ratione tertiæ prædicabilis.

Respondeo, & dico primo. Differentia non
habet rationem vniuersalis logici formaliter
per respectum ad speciem, sed ad inferiora,
scilicet concomitanter habeat ordinem ad spe-
ciem tanquam ad vniuersale cum quo conuer-
titur. Ratio est manifesta, quia formalitas
vniuersalitatis sumitur per ordinem ad suum
correlatiuum; correlatiuum autem vniuersa-
lis formaliter sunt inferiora, nam vniuersale
se habet ut superius ad multa, & ut contrahi-
bile ad inferiora. Constat autem quod diffe-
rentia respectu speciei non est superior, ne-
que contrahibilis ab ipsa, cum sit illi æqua-
lis, ergo non potest habere vniuersalitatem
formaliter respectu illius, & esse superior ad
illam.

Est confirmat. Quia illud est vniuersale, & superius respectu alicuius, quod quando illi communicatur, contrahitur ab illo; illud autem contrahitur ad aliquid, quod per contractionem amittit vniuersalitatem, & abstractionem. At verò differentia, per hoc quod communicetur speciei, non redditur singularis, neque amittit vniuersalitatem, sed potius conseruat eam, ergo respectu illius non est contrahibilis, neque superior. Vnde non potest dici, quòd prædicetur de specie tanquam vniuersale logicum, quia non prædicatur tanquam quid superius de illa, sed tanquam æquale de æquali. Quare ista æqualitas supponit vniuersalitatem concomitanter, vt dicit secunda pars conclusionis, non formaliter vniuersalitatem constituit, sicut ex hoc quod aliquis sit æqualis Regi formaliter non dicitur Rex, sed ex hoc quod habet Regnum, & imperat alijs, ratione cuius æqualis est Regi.

Si dicatur. Quòd per ordinem ad speciem non est formaliter vniuersale, quia species non est inferior, est tamen radicaliter, quia ex hoc quod respicit speciem, & conuertitur cum illa, consequenter respicit individua contenta sub specie.

Contra est. Quia radix vniuersalitatis idem est, quod fundamentum vniuersalitatis, quod est vnitas abstractionis, & aptitudo ad multa, sed vnitas abstracta à multis, & aptitudo ad illa non habet pro radice respectum ad speciem, quia hic respectus est conuertentia, & æqualitatis, non superioritatis ad ipsa multa, ergo ex hoc quod respiciat speciem, non est radicaliter vniuersalis differentia; sed ex ab-
stra-

tractione, & aptitudine ad ipsa multa, quae sunt inferiora.

Dico secundo. Differentia non respicit pro inferioribus tertij prædicabilis, hanc, & illam differentiam, v.g. rationale, hoc, & illud rationale, sed inferiora contenta sub specie, quam constituit, v.g. rationale, Petrum, & Paulum. Ratio est manifesta: Quia prædicabilitas tertij prædicabilis est *in qualequid*, ergo solum illa sunt constituenda ut eius inferiora, respectu quorum differentia se habet in quale, & prædicari potest in quale. Sed respectu huius, & illius differentiae, non se habet in quale, sed benè respectu indiuiduorum speciei, quando enim dico, hoc rationale est rationale, non est prædicatio in quale, quia non prædicatur de hoc rationali aliqua differentia eius, sed tota & integra eius natura, qualiscumque illa sit completa, vel incompleta, ergo non qualiter prædicat de illa, sed quidditatem, licet non sit per se genus, aut species, ut supra diximus in quaest. de Genere, quia non contrahitur per alias differentias; alioquin esset processus in infinitum. Respectu autem inferiorum suae speciei, quam constituit, prædicatur in quale, quia prædicatur ut ratio qualificans naturam eorum, ergo illa sunt inferiora differentiae, ut tertium prædicabile est.

SOLVUNTUR ARGUMENTA:

Primò arguitur contra primam conclusionem. Hæc prædicatio, *Homo est rationalis*, est prædicatio tertij prædicabilis, ergo respectu hominis datur uniuersalitas tertij prædicabilis.

dicabilis, sicut datur prædicabilitas: Homo autem non concipitur ibi ut indiuiduum, sed ut species. Anteced. est certum. Quia illa prædicatio non potest pertinere ad aliud prædicabile, quàm ad tertium.

Ex confirm. Quia tertium prædicabile habet pro immediato correlatiuo speciem, & mediante illa respicit indiuiduum sub ea contentum, ergo magis dicitur vniuersale per ordinem ad speciem, quàm per ordinem ad indiuiduum. Conseq. probat. Quia relatio magis denominatur per ordinem ad immediatum correlatiuum, quàm in ordine ad mediatum. Anteced. verò probat. Quia tertium prædicabile formaliter inquantum tale respicit suum correlatiuum in quale: sed non immediatè qualificat indiuidua, sed naturam indiuiduorum, quæ est species, alias non esset qualitas essentialis, si immediatè non qualificaret essentiam, ergo est immediatum correlatiuum eius ipsa species, seu essentia constituta. Illud enim est immediatum correlatiuum, quod est immediatè constitutum, & qualificatum à differentia.

Respondetur. Quòd illa prædicatio, *homo est rationalis*, est tertij prædicabilis quasi materialiter, & metaphysicè, non formaliter, & logicè: prædicatur enim de homine illa res, quæ est tertium prædicabile, non tamen sub formalitate, & relatione tertij prædicabilis, seu tertij vniuersalis, & sic est magis tertium prædicatum, quàm tertium prædicabile, licet concomitanter ibi retineat vniuersalitatem tertij prædicabilis quam exercet, non respectu speciei, sed respectu indiuiduorum, sicut genus
cum

um prædicatur de indiuiduo, vt *Petrus est animal*, ibi retinet rationem generis, licet non per ordinem ad illud sit genus, sed per ordinem ad speciem. Et propria passio, cum prædicatur de natura specifica, vt *homo est risibilis*, non exercet rationem vniuersalis, licet prædicet naturam, quæ susceptiua est quarti prædicabilis per ordinem ad indiuidua.

Ad confirm. Negatur anteced. Et ad probat. dicitur, quod species est immediatum constitutum per differentiam, & in ratione constitutiui, respicit illam immediatè per modum differentie metaphysicæ, non in ratione vniuersalis, & differentie Logicæ, sic enim immediatum correlatiuum eius sunt inferiora, sed quia respicit illa secundum prædicabilitatem in quale, oportet quod supponatur ordo ad ipsam naturam specificam vt constitutam tali modo per differentiam, quod fundet prædicabilitatem in quale. Neque est inconueniens quòd alia sit habitudo differentie ad speciem in ratione constitutiui, alia in ratione vniuersalis ad inferiora, sicut enim differentia respicit genus vt contractiua illius, & tanquam compartem ad constituendam speciem, ita relatione constituentis respicit ipsum constitutum, quæ tamen relatio est rationis, quia non distinguuntur realiter genus, differentia, & species. Relatio verò differentie ad sua inferiora in quale, est relatio superioris ad inferiora, quæ tamen præsupponit relationem ad speciem in ratione constitutiui.

Secundo arguitur. Differentia, vt tertium prædicabile, eadem relatione, seu intencione respicit speciem, & indiuidua, sed ista relatio

Ut tangit indiuidua, est vniuersalis, ergo etiā
 ut tangit speciem. Conseq. constat, & minor
 concessa est supra. Maior verò probat. Tum
 quia respiciendo speciem respicit omnia sub
 ea contenta, quicquid enim vniuersaliter dici-
 tur de aliquo, & adaequatè, dicitur de omni
 contento sub illo. Tum etiam quia differentia
 sub eodem conceptu, & prædicatione prædica-
 tur de specie, & de indiuiduis, ergo sub eadem
 intentione, & relatione.

Et confirm. Quia differentia prædicatur de
 specie ut æqualis, & ad conuertentiam cum
 illa, ergo ut vniuersalis, quia species non po-
 test æquari nisi ab vniuersali, cum in se vni-
 uersalis sit.

Respond. Disting. anteced. Si sumatur rela-
 tio differentiae pro relatione constitutiuæ ad
 speciem ut constitutiuam, sic eadem relatione
 respicit speciem, & indiuidua, quia non aliud
 constituit in indiuiduis, quam in specie, scili-
 cet naturam. Si verò sumatur ratio differ-
 entiae pro relatione vniuersalis, & prædica-
 bilis formaliter, & logicè, sic diuersa relatione
 respicit indiuidua, & speciem, quia indiuidua,
 ut superior, speciem, ut æqualis. Et ad prob. di-
 gitur. Quòd respiciendo speciem, respiciuntur
 etiam indiuidua, sub ratione quidem consti-
 tuentis eadem relatione; sub ratione verò su-
 perioritatis & æqualitatis, diuersa, licet vna
 connexionem habeat cum alia. Et sic prædica-
 tio de indiuiduis est vniuersalis, de specie ve-
 rò non.

Ad Confirm. Dicitur, quòd hoc ipso quod
 differentia est æqualis ad speciem, habet qui-
 dem esse vniuersalis, sed non respectu speciei,
 cui

cui æqualis est, sed respectu indiuiduorum, quibus æqualis non est, sed superior.

ARTICVLVS IV.

Verum differentia superiores, & generica includantur in differentijs athomis, & de illis prædicentur.

Certum est, supposito quod gradus metaphysici non distinguuntur nisi ratione, ut supra determinauimus, non distingui rem, quæ est differentia, & quæ est genus realiter, & materialiter inter se, & consequenter differentiam genericam non distingui à specifica in eodem subiecto. Sed difficultas est, an secundum formalem prædicationem, differentia superior, & generica ita se habeat ad inferiorem, quòd de illa prædicetur, & in illa includatur tanquàm prædicatum illius constitutum.

Resolutio est negativa. Et inter Doctores communior, de qua videatur Sanchez hic lib. 3. q. 28. & Cabero tract. 3. disp. 4. dub. 3. Carm. disp. 7. q. 4. Sumiturque ex D. Thom. in 3. Met. lect. 8. §. *Obijcit ad propositum.* Et in 1. contra Gent. c. 17. eo quòd genus non potest prædicari de differentia, differentia enim non participat genus, ut dicitur in 4. Topic. Sic enim genus includeretur in differentijs, reddereturque analogum, ut in tractatu de Analogia probabimus. Eadem autem ratio est de differentia generica, quia hæc constituit genus, & est pars illius quidditatiua. Et explicatur amplius. Quia differentia specifica contrahendo genus, etiam contrahit ipsam differentiam gener-

genericam, ex qua quidditas generis constituitur; sed differentia contrahens genus est extra conceptum generis, ergo etiam est extra conceptum differentia genericæ, siquidem illam contrahit, contrahendo genus. Min. prob. ex Phyl. 3. Metaph. & D. Thom. ibi lect. 8. Quia si genus includeretur in differentiis, non posset in eis includi tanquam pars contrahibilis, sed ut tota, & integra differentia, quia differentia, cum sit simplex, non componitur ex genere, & differentia, neque ex aliquo contrahibili, & contrahente, alioquin esset processus in infinitum, quia si differentia constaret ex genere, & differentia, rursus illa differentia, per quam constituitur, etiam genere, & differentia constaret, & de illa alia; rursus inquireretur, esset enim de illa eadem ratio. Quare si genus, vel differentia generica includitur in specifica, non includitur tanquam pars contrahibilis, & generica, sed cum ipsa differentia sit simplex, & sine parte, erit tota ipsa differentia. Et sic genus esset analogum utpote partim idem inquantum dicit unicam naturam, in qua conveniunt species, & partim diversum inquantum dicit ipsam differentiam integrè, quæ differunt species inter se, & similiter si differentia generica includitur in specifica, non tanquam pars (differentia enim, cum sit simplex, partibus caret) differentia generica esset tota, & integra differentia specifica, & sic sequeretur quod una species infima differret ab alia per ipsammet differentiam genericam sine alio superaddito, quod repugnat: sic enim eadem differentia constitueret genus quatenus differentia generica est, & di-

& diuideret ipsum, quia totaliter, & integrè esset differentia specifica.

SOLVUNTUR ARGUMENTA.

Primo obijciuntur ex Aristot. qui 7. Met. tex. 43. lect. 12. apud D. Thom. dicit quod differentiarum communes diuiduntur in alias differentias, sicut habere pedes, quæ est differentia quorundam animalium, diuiditur in habere pedes scissos, vel non scissos. Imò de differentia pedalitatis scissæ, dicit quod prædicatur differentia superior: verum est enim dicere quod scissio pedum est pedalitas quædam. Ergo differentiarum superiores prædicantur de inferioribus. Item 10. Metaph. tex. 23. lect. 9. apud D. Thom. in fine, ostendit quod in generibus sub quibus inueniuntur contraria, differentiarum mediæ componuntur ex differentiis contrariis. Ergo ruit nostrum fundamentum, quo dicimus genericas differentias non includi in specificis, quia non sunt compositæ.

Confirm. Illo vulgari syllogismo: Omnis homo est sensibilis, omnis homo est rationalis, ergo aliquod rationale est sensibile, qui est in bona figura, scilicet in Darapti, & præmissæ sunt veræ: ergo & conclusio.

Si dicas, Non sequi in conclusione quod rationale sit sensibile formaliter, sed materialiter, seu identicè. Contra est. Tum quia prædictio illa est formalis, rationale est sensibile, sicut & prædicationes præmissarum. Tum quia potest fieri syllogismus addendo particulam formaliter, omnis homo formaliter est sensibilis, omnis homo formaliter est rationalis, ergo

ergo aliquod rationale formaliter est sensibile.

Respond. Ad primum locum Arist. quod differentiarum communes diuiduntur in alias, non formaliter, sed materialiter, idest non ratione sui, sed ratione generis constituti per differentias superiores. Non enim potest diuidi genus per differentias inferiores, nisi etiam ipsae differentiae constitutivae generis diuidantur; potius autem dixit Arist. diuidi ipsas differentias superiores, quam genus constitutum per ipsas, ut ostenderet quanam sint differentiae per se alicuius generis, & quae sint differentiae per accidens. Quando enim aliquod genus diuiditur per differentias inferiores, secundum quod tale genus ex intrinseca ratione, qua constituitur, est in potentia ad illas, diuiditur tale genus differentiis per se, & non per accidens. Sicut animal bipes ex ipsa ratione bipedis est in potentia ad habere pedes scissos, vel non scissos, & ideo per se diuiditur animal bipes in tales differentias. Quando vero genus est in potentia ad inferiora non ratione suae differentiae constitutivae, sed aliunde, talis diuisio non est per differentias per se, sed per accidens, sicut si animal bipes diuidatur in album, & nigrum. Ceterum ex hoc non potest concludi quod ipsae differentiae communes praedicentur de inferioribus differentiis formaliter, imò potius diuiduntur per illas, non praedicantur de illis, & quia diuiduntur per illas, potius ipsum genus ut tali differentia constitutum, est id, quod diuiditur, & cum eo ipsa eius differentia. Et haec est plana explicatio illius textus quam ibi tradit D. Tho. lect. 12. citata, ubi inquit: *Quod hoc modo haec differentia*

ferentia est diuidenda, habens pedes, scilicet, huiusmodi animalium, aliud est habens pedes scissos, aliud non scissos. Vbi non solum ipsa ratio bipedis, seu differentia habendi pedes, sed etiam ipsum animal diuiditur, & sic quando dicitur quod scissio est quædam pedalitas, idem est, inquit Diu. Tho. Quod esse contentum sub hoc, quod est habere pedes, atque adeò continetur sub pedalitate, sicut differentie continentur sub genere, cuius pars est differentia generica.

Eodem modo Respond. ad secundam auctoritatem ex 10. Metaphys. differentias medias ibi non sumi pro differentiis, quæ sunt tertium prædicabile, sed pro speciebus oppositis sub eodem genere, non oppositione contraria, seu extrema, sed media; dicuntur verò tales species differentie medie, quia differunt, seu opponuntur, non extremæ sicut contraria, sed tanquam contraria media.

Ad Confirm. Respond. Quod in primo syllogismo nulla est difficultas, verificatur enim conclusio illata, rationale est sensibile, identicè non formaliter. Neque est necesse, quod ex præmissis in sensu formali verificatis, inferatur conclusio vera etiam in sensu formali, sed sufficit quod in sensu identico, ut frequenter contingit in hac tertia figura, ut si dicas omne lac est album, omne lac est dulce, ergo aliquod dulce est album, hic homo currit, hic homo est iustus, ergo iustus currit. Quæ conclusiones solum sunt veræ in sensu identico. In secundo autem syllogismo ubi additur illa particula formaliter, manifestè variatur appellatio ex diuersa applicatione illius particule

culæ formaliter, quia sub respectu sub quo applicatur in præmissis facit prædicationem formalem. In conclusione autem verificantur extrema identicè, & ideò illa particula *formaliter*, non habet ibi locum. Ad bonitatem autem syllogismi sufficit quod si antecedens est verum, etiam & consequens, sed non requiritur quòd in eodem sensu, & respectu verificetur, sed potest antecedens esse verum secundum prædicationem formalem, & consequens secundum identicam, ut vidimus. Et ratio est. Quia illa particula *formaliter*, semper debet intelligi respectuè, & sub aliqua appellatione, quod enim est formale respectu unius, potest non esse respectu alterius. Vnde semper ille respectus, suo quo formaliter se habet, debet manere invariatus quoties apponitur particula *formaliter*. Et quia verificatur quòd homo sit rationalis, & sensibilis formaliter, quia recipit ista prædicata tanquam formalia, quòd vero rationale sit sensibile, non verificatur nisi ex identificatione in eodem subiecto, ideo non possunt sub eadem formalitate verificari, sed si apponatur particula, *formaliter*, variatur appellatio.

Quod si infes: Hic syllogismus est bonus in Celarent: *Nullum rationale formaliter est sensibilis, omnis homo formaliter est rationalis, ergò nullus homo est sensibilis*. Vbi nulla est variatio appellationis: & tamen etiam si tollatur particula, *formaliter*, à conclusione, illa est falsa, ergò solutio data non est sufficiens.

Respond. Eodem modo variari appellationem ex parte illius particule *formaliter*, quæ semper facit sensum non absolutum, sed cum ali-

aliqua restrictione, & dependentia, seu respectu, quatenus, scilicet, subest illi formalitati, & respectui extremorum. Contingit autem, quod ea, quæ sub vna formalitate, & respectu non coniungitur, neque conueniunt, sub alio conueniant, vnde à negatione sub vno respectu, ad negationem sub alio, vel negationem absolutè, non valet. Et sic ex eo quòd rationale formaliter, idest, sub conceptu, & formalitate rationalis, nullo modo sit sensibile, non licet inferre, quòd sub conceptu, & formalitate hominis, homo qui est idem cum rationali non sit sensibilis. Quæ variatio formalitatum, & appellationum in multis alijs materijs valde obseruanda est. Sicut non valet, Christus posito præcepto hic & nunc, potest operari & non operari, quia liberè operatur, & si non operaretur peccaret, ergo potest peccare, & non peccare. Non inquam valet, quia potest non operari sub respectu, & formalitate operationis vt requiritur ad rationem liberi, non sub formalitate, & conceptu peccati, vt est à ratione liberi deficientis.

Ultimo arguitur. Differentia specifica inferior habet aliqua prædicata communia, & superiora, v. gr. rationale est viuens, & est substantia, &c. Ergo aliquid habet sibi commune tanquam genericum, & superius: ergo potest talis differentia generica, seu genus prædicari de differentia inferiori.

Et confirm. Quia conceptus differentie aliquam compositionem admittit, cum aliquid habeat potentialitatis, vtpotè res creata, solus autem actus purus est omnino simplex, ergo potest resolui in conceptum communem, seu gene-

genericum, & specialem, seu differentialem. Ille autem conceptus superior est differentia subalterna; quia differentia inferior habet naturam & operationem subordinatam differentiae genericæ, v. g. inuisibile in equo est quædam operatio sensibilis, & consequenter subordinata sensibili in communi, quod est differentia generica animalis.

Respond. Quod illa prædicata superiora conueniunt differentiae non in formali, & directa linea, sed reductiue, & secundum quandam habitudinem, seu connotationem. Dicitur enim rationale substantia, vel viuens, non quia in se sit substantia, vel viuens, sed quia forma, à qua sumitur, est principium substantiæ, vel viuentis, vel alterius gradus, non enim forma est id quod est, sed quo aliquid est, sicut etiam materia, & forma sunt substantiæ, quasi principia substantiæ, seu substantiæ incompletæ. Eodem modo differentiæ sunt quid incompletum in suo prædicamento. E: sic non ipsa ratio superior, quæ completa est, prædicatur de illis, nec differentiæ ipsæ genericæ, sed incompleta ratio illius prædicamenti, v. g. substantia ut abstrahit à completa, & incompleta, quæ modo transcendentali includitur in omni eo, quod ad tale prædicamentum pertinet, & reducitur.

Ad confirm. Respond. Differentiam non esse compositam ex his, sed compositam huic; quia est pars, seu per modum partis se habet, pars autem non est simplex, sicut actus purus simplicitate perfectionis, sed simplicitate negationis, quia scilicet, non est plenè perfectæ. Simplicitas autem negationis, plus habet po-

ten-

entialitatis, quia est componibilis alteri, à quo perficiatur, non tamen est composita per resolutionem in plures conceptus, ex quibus constat, nisi forte analogicè, quia ens in omnibus includitur, etiam in differentiis, nec differentia inferior est subordinata superiori formaliter, & directè tanquam generi, licet præsponat illam, sicut præsupponit genus, quod constituitur ex illa. Et sic hinnibile est principium operationis sensibilis, distinguo, præsuppositiue, & materialiter sensibilis, transeat, formaliter, & directè sensibilis, nego. Id est, ut sic hinnibile, præsupponitur sensibile, sed non formaliter est illud.

Q V Æ S T I O XI.

De Proprio.

A R T I C V L V S I.

Explicatur natura Proprii, eiusque diuisiones expenduntur.

POrphyrius in cap. de Proprio quatuor proprii acceptiones posuit, & ipsa diuisione videtur vnumquodque definisse. Diuiditur enim Proprium quatuor modis: *Primò*, dicitur proprium, quod conuenit soli speciei, sed non omni eius indiuiduo, ut esse Grammaticum, vel Medicum homini. *Secundò*, quod è contra, conuenit

omni indiuiduo, sed non soli speciei, sicut homini conuenit esse bipedem. *Tertiò*, quod conuenit soli speciei, & omni indiuiduo, sed non semper, vt homini in senectute canescere. *Quartò*, quod est maximè proprium, quod soli speciei, & omni indiuiduo, & semper conuenit, vt hominem esse risibilem. Et est maximè proprium, quia plenè conuertitur cum suo subiecto.

Vbi Porphyrius omnem rationem proprii aliquo modo per ordinem ad speciem, idest, ad naturam aliquam rei, siue sit species infima, siue subalterna explicauit, quia ad quamcumque potest consequi aliquo modo proprium. Et deinde perfectam rationem proprii ex perfecta conuenientia, & adæquatione cum ipsa specie, seu natura, & contentis sub specie desumit. Tunc autem dicitur ad conuertentiam, quando comitatur ipsam naturam ubicumque sit, & extra ipsam non inuenitur, nam hoc ipso quod in alijs inuenitur, non est perfectè proprium eius, sed etiam alijs commune, sibi vero solum erit quasi appropriatum, aut accommodatum, eo modo quo videmus pleraque accidentia inueniri extra proprium subiectum, vt calorem, frigus, albedinem, &c. Ad hoc autem, vt aliquod accidens perpetuò comitetur aliquod subiectum, & extra illud non sit, oportet quod in tali subiecto habeat aliquam radicem, seu principium, quo illi sit connexum, & à quo dimanet. Accidentia verò, quæ conueniunt etiam ijs subiectis, in quibus radicem non habent, communia dicuntur, quia carent principio quo illis solum conueniat.

Vnde

Vnde contingit quod, quando aliquod accidens habet principium, & radicem in aliqua natura, & ex illa communicatur alteri, v.g. lux, quæ in sole habet radicem, à qua dimanat, communicatur verò aeri, & calor habet radicem in igne, communicatur verò aquæ, vel alij corpori, illud accidens habet rationem propriij respectu illius subiecti, à quo dimanat; non respectu illius, cui communicatur. Cæterum tale accidens, quod communicatur extra proprium subiectum, non eodem modo est in alijs subiectis, atque in proprio, quia in alijs est quasi participatiue, & imperfectè; in proprio autem subiecto, plenè, & perfectè, vtpotè suo proprio principio coniunctum. Vnde sub illa perfectione, & modo, quo est in proprio subiecto, nunquam communicatur extra proprium subiectum. Quæ ratio est, vt aliqui Authores dicant, non posse accidens proprium crescere, & augeri etiam intrinsecè in ipso subiecto, cuius est propria passio, quia ibi habet summam perfectionem, quæ sibi nata est competere. Solum verò potest augeri in subiecto alieno, sicut lux non potest crescere in sole, neque calor in igne. Quod in Physicis latius disquiretur. & Theologi tractant agentes de plenitudine gratiæ Christi, 3.p.q.7. art. 11.

Duo ergo nobis restant explicanda. *Primum*, quodnam sit diuisum istius diuisionis propriij, & quæ nam sit ipsa diuisio in quatuor modos. *Secundum*, quomodo sit explicanda definitio ipsius propriij quarto modo.

Circa primum. *Respondeo, & dico primò*. Diuisum huius diuisionis non est proprium

quartum prædicabile, sed ratio proprii communiter dicti, quæ consistit in relatione convenientiæ ad unum, cum exclusionem consortij, seu communicationis alterius; quod enim mihi est proprium, ita est peculiare, quod non est alterius, nec illi commune. Itaque procedimus in hac diuisione, sicut in diuisione differentiæ in communem, propriam, & propriissimam. Et ratio conclusionis est. Quia ratio quarti prædicabilis consistit in hoc, quod prædicetur in quale necessario accidentaliter; per hoc enim distinguitur à reliquis prædicabilibus, per ly, *in quale*, à genere, & specie, per ly *accidentaliter*, à differentia, quæ est quale essentialiter, per ly, *necessario*, ab accidente communi, quod est quintum prædicabile, sed istæ conditiones non conueniunt diuiso huius diuisionis, sed tantum uni membro diuidenti, scilicet, proprio quarto modo. Ergo quartum prædicabile non est diuisum in hac diuisione, cum sit membrum diuidens, & consequenter diuiditur proprium communiter dictum. Et hoc ideo est. Quia ad hoc ponitur hæc diuisio, ut inter multa, quæ nomen proprii sumere possunt, inuestigetur illud, quod est propria passio, cui quarta prædicabilitas assignetur, non ergo debebat pro diuiso accipi ipsam quartum prædicabile, sed inter membra diuidentia quaeri, & discerni ab alijs, quæ etsi rationem proprii videantur habere; non tamen rationem propriæ passionis assequuntur.

Dico secundo. Proprium communiter dictum diuisione analogæ diuiditur in istos quatuor modos proprii. Non est in hac conclusione magna Authorum dissensio, sed communiter

niter eam sequuntur, præsertim Thomistæ.
 Et vocamus proprium communiter dictum,
 quod est proprium quasi physicè, seu meta-
 physicè consideratum, prout opponitur ei.
 quod est commune, non pro proprio quarto
 prædicabili, ut diximus. Hic enim solum agi-
 mus de natura proprii, non de intentione;
 sicut ergo rectè dicimus, quod commune ab-
 solutè sumptum est illud, quod habet condi-
 tiones requisitas ad rationem communis; Ita
 proprium communiter dictum est, quod ha-
 bet condiciones requisitas, ut aliquid sit pro-
 prium, & sicut commune dicit relationem
 communicatiui, seu conuenientie ad multa,
 ita proprium dicit relationem conuenientie ad
 vnum cum exclusionem communicationis ad
 extraneum. Et sic ista duo generaliter re-
 quiruntur ad rationem proprii, Et secundum
 quod istæ duæ condiciones simpliciter seruan-
 tur, simpliciter inuenitur ratio proprii; si au-
 tem secundum quid inueniantur, simpliciter
 non erit proprium - Sic autem se habent isti
 quatuor modi, quod solum in quarto modo
 inueniuntur istæ duæ condiciones, non in alijs:
 Nam prima conditio est, quod conueniat vni
 non separando se ab illo, quo ad conuenien-
 tiam: secunda quod non conueniat alteri ex-
 traneo, & ut prima conditio seruetur, debet
 conuenire vbicumque talis res inuenitur, &
 semper, hoc est, firmiter, & inseparabiliter;
 tunc autem aliquid firmiter conuenit alicui,
 quando habet in illo radicem, & principium;
 si enim ibi radicem non habeat, transeunter,
 & separabiliter conuenit quantum est ex vi
 connexionis, licet per accidens ex aliquo ex-

trinfecoconferuante possit permanere, quoad existentiam, non quoad conuenientiam. Ad secundam autem conditionem, requiritur quod conueniat soli, quia non debet conuenire alij extra ipsum. Vnde deficiente aliqua ex his conditionibus, non datur simpliciter proprium, nec integrè, quia non habet ipsam rationem propriij, & condiciones essentialiter requisitas. Deficiunt autem in tribus primis modis propriij, nam primus modus conuenit soli, sed non omni, nec semper, vnde est separabile, & sic non est proprium. In secundo modo conuenit omni, sed non soli, & sic est commune alijs. In tertio modo conuenit omni, & soli, sed non semper, & sic neque permanenter, sed separabiliter, quod est non possidere, & habere ipsum tanquam proprium, non solum, quia non existit aliquando in ipso, sed quia non conuenit semper ipsi.

Quod si inquiras. Cur ergo vocantur propria ea, quæ istis modis propria sunt, cum vere propria non sint.

Respond. Quod sunt propria secundum quid, primo, quia saltem participant aliquas conditiones propriij, vt quod conueniant vel soli, vel omni. Et secundo, quia licet absolute non sint propria; comparatiue tamen propria sunt, v.g. esse bipedem, licet absolute non sit proprium hominis, tamen comparatiue ad quadrupedia, proprium est illi.

Vnde tandem constat diuisionem esse adæquatam, quia ex tribus conditionibus, quæ requiruntur ad proprium, scilicet, omni, soli, & semper, vel conueniunt omnes, vel deest aliqua, si conueniunt omnes est proprium simpliciter

pliciter, & quarto modo: si deest aliqua, vel deest prima, scilicet, quod non conueniat omni, & sic est proprium primo modo, vel secunda, scilicet, quod non conueniat soli, & sic est proprium secundo modo, vel deest tertia, & sic est tertio modo proprium. Si verò desint omnes, nullo modo est proprium.

Circa secundum. Definitio proprii simpliciter ex dictis manet explicata. Et traditur dupliciter, vno modo à Porphyrio, quod proprium quarto modo, est quod conuenit omni, soli, & semper: alio modo ab Aristotele 1. Topic. cap. 3. quod proprium est, quod non indicat esse rei, soli autem inesse, & conuersim prædicatur. Vbi potius explicatur ipsum substratum quarti prædicabilis, idest, ipsa propria passio, quam ratio ipsa quarti prædicabilis. Et in definitione Porphyrij, si ly conuenit, sit idem, quod prædicatur, seu prædicari potest, & ly omni, distributiue accipiatur pro inferioribus, reddatur illa definitio secundo intentionalis, & pro prædicabili logico, poteritque, sic in formam redigi. *Proprium est, quod prædicatur de pluribus in quali accidentaliter, & necessario.* Quam definitionem sequenti articulo explicabimus. Si autem ly, conuenit, idem est, quod inesse, seu competere, vel deberi, tunc ly, conuenit, sumitur primò intentionaliter, pro eo, quod fundat prædicationem vniuersalem per modum quarti prædicabilis. Et reducetur definitio ad hanc formam. *Proprium est, quod necessario consequitur ad aliquam naturam, & illi conuenit accidentaliter, sed conuertibiliter.* Et sic comprehendimus etiam definitionem Philosophi, prout dicit conuenientiam

accidentalem . & conuertibilem .

Quod si inquiras . Quid fit consequi , & dimanare ab essentia , seu habere illam pro radice , & quæ causalitas sit ista dimanatio .

Respondet . Hoc ad Metaphysicam spectare . Sed breuiter dicimus dimanationem propriè non esse causalitatem effectiuam ; idest , quæ per actionem agat , sed habet modum efficientiæ , nam substantia se sola sine accidentibus non efficit propriè , & ideò ipsa accidentia , quibus efficit , & operatur , dicuntur dimanare à substantia , non quia ab ipsa producantur , producantur enim ab agente simul cum ipsa substantia , dependenter tamen ab ipsa substantia , cuius sunt propriæ passionēs , & à qua habent participationem , sicut formæ secundariæ , & minus principales à radicali , & primaria , quod autem est participatiuè tale , dependet ab eo , quod est principaliter , & radicaliter tale . Et talis dependentia dicitur dimanatio , quia ab ipso tanquam à principio participatur , & sic habet rationem quasi actiuam , seu reductiuè actiuam , non formaliter , quatenus est participatio quædam , & connexio cum natura . De quo videri potest D. Thom. 1. p. quæst. 77. ar. 6. ad 3. & artic. 7. ad 1. & opusc. 48. cap. de Proprio in fine . Videri etiam potest Caietanus cap. 7. de ente & essentia , quæst. 16. §. *Accedit* , ubi tractat quomodo propria passio causetur à subiecto in genere causæ materialis , efficientis , & finalis .

SOLVUNTUR ARGUMENTA .

Contra diuisionem datam arguitur , ad probandum , quod non diuiditur in illa
pro-

proprium primo intentionaliter acceptum, & physicè ; sed secundo intentionaliter . Nam proprium , vt inuenitur in re, est indiuiduum, & singulare, vel ergo est proprium quatenus singulare, vel secundum se, si quatenus singulare, non est proprium quarto modo, cum non dimanet à principio essentiali, sed indiuiduali: si secundum se, non conuenit cuilibet subiecto singulari, vt proprium, sed vt commune, quia conuenit multis indiuiduis, ergo in re nunquam datur proprium, sed solum quo ad secundam intentionem . Si autem sumatur proprietas in singulari, v. g. hæc risibilitas respectu huius indiuidui, v. g. Petri, talis proprietas est indiuidualis, de qua non agimus in præsentia, sed de illo, quod est proprium naturæ, & potest esse quartum prædicabile .

Et confirm. Quia proprium sic diuisum dicitur de pluribus, scilicet, quod conuenit omni, &c. ergo non propriam prout physicè est in re, sed prout est in intellectu . Et sic est proprium logicè acceptum.

Respond. Quod proprium, vt inuenitur in re, est quidem singulare, quia nihil nisi singulare datur in re, non tamen est proprium ratione singularitatis subiecti, sed ratione naturæ . Et sic inest cuilibet singulari, vt proprium, non ipsius singularitatis, sed naturæ, quæ in eo inuenitur : sicut etiam prædicata constitutiva naturæ in re inueniuntur singularizata, & non sunt quidditativa, & essentialia ratione singularitatis, sed ratione naturæ quam in re constituent essentialiter, vt naturam indiuidualiter, vt hanc . Eodem modo se habet passio, quæ à natura dimanat in re .

Ad confirm. Respond. Quod proprium quod dicitur de pluribus, quantum ad rem substratam huic prædicabilitati de pluribus, inuenitur in re, quantum ad modum prædicabilitatis, non. Sicut etiam genus, & species pro secunda intentione, non sunt in re: pro natura vero substrata, in re sunt, licet sub alio modo. Sic proprium quantum ad relationem proprietatis, & rem ipsam, quæ propria passio est, in re inuenitur. Et hæc fundamentaliter habet conuenire omni, & de pluribus prædicari: formalis autem intentio prædicabilitatis conuenit per intellectum: & in hac diuisione consideratur ipsa ratio proprii secundum se, non intentio.

Secundò arguitur, Diuisum huius diuisionis debet esse aliquod accidens, vel ergo abstrahens à quarto, & quinto prædicabili. vel determinate quartum, vel quintum. Si primum, diuisum huius diuisionis non est proprium, sed abstrahens à proprio, & communi. Si secundum, ergo male negauimus diuisum huius diuisionis esse quartum prædicabile. Si tertium, quomodo vnum ex membris diuidentibus est quartum prædicabile, scilicet proprium quarto modo, quod opponitur quinto prædicabili.

Confirm. Quia proprium secundo modo, est accidens commune, conuenit enim omni, sed non soli ergo nullo modo pertinet ad rationem proprii, sed ei opponitur; cuiuscumque enim proprii intentio siue primi, siue secundi modi, non debet esse intentio quinti prædicabilis.

Respond. Quod diuisum huius diuisionis non est accidens, vt abstrahit à proprio, & communi accidenti, quia in ista diuisione non consideratur

deratur formaliter diuifio in ratione prædicabilis quarti, vel quinti, licet in re membra diuidentia aliquo ex illis modis prædicentur. Sed diuifum est accidens, prout potest inducere, & fundare conditiones proprii, & relationem conuenientiae ad aliquid sub formalitate proprietatis, ficut ratio differentiae, quæ diuiditur in communem, proprium, & propriiffimum, non est differentia sub conceptu prædicabilis, fed sub conceptu facientis differre. Et quia formalitas illa proprii, & conditiones ad illam requifitæ, non ex æquo inueniuntur in omni proprio, ideo diuifio ifta fit analogicè fecundum diuerfos modos habendi proprietatem.

Ad conf. Refpoud. Quod proprium fecundo modo, in genere prædicabilis, & vniuerfalis pertinet ad quintum prædicabile, quia simpliciter est accidens commune, in ratione tamen conuenientiae, proprietatis, & proprii phyficè confiderati, induit rationem proprii, non simpliciter, fed quantum ad aliquam conditionem, fcilicet, quia conuenit *omni*, neque absolute, fed refpectiuè, & comparatiuè, ficut effe bipedem, absolute quidem conuenit alijs ab homine, refpectu tamen quadrupedum, proprium est hominis. Et hoc modo reductiuè pertinet ad proprium quarto modo, vt ad principale analogatum. Neque est inconueniens, quod simpliciter pertineat ad vnum prædicabile, & fecundum quid, & reductiuè ad aliud: ficut rationale refpectu Petri, & Pauli est differentia, refpectu huius, & illius rationalis, induit modum fpeciei.

Vltimo arguitur, contra definitionem proprii

prij quarto modo. Nam illa particula, *semper*, non conuenit omnibus proprijs passionibus, ergo male ponitur. Antecedens probatur, nam in primis, potest Deus separare propriam passionem à subiecto, sicut quantitatem à corpore in Eucharistia, vel sine illa subiectum conseruare, vt solem sine luce, imò naturaliter potest impediri propria passio, vt motus deorsum in lapide, frigus in aqua, potentia sensituius in animali; quæ tamen ab anima dimanant. Denique, existentia contingenter conuenit omni creaturæ, nec potest esse propria passio; aliàs idem efficeret se ipsum, si à se dimanaret existentia, & tamen per se conuenit formæ, sicut rotunditas circulo, vt dicit Diu. Thom. 2. contra Gentil. c. 55. ideòque, si forma est subsistens, hoc ipso est incorruptibilis, quia per se conuenit illi existentia, ergo non consistit propria passio in diminutione, & perfectate ad subiectum.

Respond. Negan. Antec. Et ad probationem, quòd attinet ad separationem propriæ passionis à subiecto, non est negotij logici id disputare, sed admittimus reales passionem separari posse à subiecto, licet modales, quæ consistunt in solo modo, aut quæ admiscunt priuationem aliquam, vel negationem, non possint separatæ existere, quia non distinguuntur realiter à subiecto. Quia ergo solum reales separari possunt, dicimus quòd in definitione proprii, quod conuenit semper, *ly*, *conuenit*, non dicit existere, vel adesse subiecto, sed *ly*, *conuenit*, est idem quod *debetur*, seu connectitur, & postulatur à subiecto, licet non semper actu existat in eo. Et ita intelligitur D. Thom. quando di-

dicat in q. de Spiritualib. creaturis ar. vii. ad 7.
quod subiectum esse sine propria passione, nec
intelligibile est, idest, non conuenire, aut non
connecti ei propriam passionem. Quam con-
uenientiam in hoc assignamus, quod non potest
per secundam operationem, idest, per compo-
sitionem, & diuisionem negari propria passio
de subiecto, seu non conuenire illi, licet per
primam operationem possit separari à subie-
cto; accidens autem commune, quod distin-
guitur à proprio, etiam per secundam ope-
rationem potest negari de subiecto, eo non de-
structo, vt benè S. Tho. notat opusc. 48. c. de
Accidēte, & in 1. dist. 26. in expositione literę.

Ad aliam partem argumēti de proprijs pas-
sionibus, quę impediuntur. *Resp.* Quod licet
omnes proprię passionēs dimanēt à subiecto,
& connectantur ei, sed non omnes eodem mo-
do. Quędam enim dimanant absolutē, & sine
vlla alia dependentia, quā à subiecto à quo
dimanant, sicut risibilitas, & intellectus ab
homine, diaphanitas à cōlo, lux à sole. Alię
dimanant supposito aliquo statu connaturali,
vt lapidi quiescere non absolutē, sed in cen-
tro, nec moueri absolutē, sed extra centrum,
& gratiæ in statu consummato habere lumen
glorię, in statu vię, fidem, & spem, & aquę
habere frigus summum in suo connaturali sta-
tu, & animali habere potēcias sensitiuas sup-
posito temperamento organi, ac denique gra-
ui conueniri moueri per medium non impedi-
tum, sed liberum. Dicimus ergo has passio-
nes impediri posse ab extrinseco, quia non di-
manant à subiecto absolutē, sed supposito ali-
quo statu, vel aliquo extrinseco. Primę ve-
rò

io quæ absolutè dimanant à subiecto, eo posito non possunt impediri naturaliter. Et aliquæ etiam proprietates conueniunt subiecto: non determinatè, sed vage, vt aliqua figura quantitati, aliquis color mixto: si tamen proprietates sunt.

Ad id quod additur de existentia. *Resp.* Respectu cuiuscunque creaturæ non habere necessariam connexionem, sed contingenter conuenire, aliàs conueniret semper, & ab æterno propter connexionem æternæ veritatis, cum tamen ab efficiente libero, scilicet, Deo dependeat. Dicitur autem per se conuenire formæ, non perfectate logica, quæ fundatur in habitudine connexionis intrinsecè, sed perfectate physica, quæ fundatur in re, vt producta, & vt subest influxui physico agentis. Et dicitur sequi ad formam existentia, sicut splendor ad lucem, quia existentia determinationem, & specificationem accipit à forma cuius est, & ita vt determinata, & specificata erit à forma, existentia enim hominis, vt specificatiuè est hominis, & non Angeli, sequitur ad formam hominis, quia de se existentia determinata, & specificata non est, sed ratione eius cuius est existentia. Et in forma dependente à materia, per segregationem formæ à materia soluitur existentia, quia forma amittitur, si autem dependens non sit à materia, non potest tolli à forma, nisi per suspensionem actionis agentis, à quo solo pendet talis forma, quod est desinere per annihilationem.

ARTICVLVS II.

Quid sit proprium quartum prædicabile, & respectu quorum sumatur.

DVo sunt, quæ in hoc quarto prædicabili, quatenus vniuersale est, explicatione indigent. *Primum*, an ratio quarti prædicabilis conueniat solum proprio quarto modo, an etiam alijs. *Secundum*, respectu quorum inferiorum conueniat ei ista vniuersalitas quarti prædicabilis.

Circa primum, non pauci Doctores existimant intentionem quarti prædicabilis non solum proprio quarto modo, sed etiam proprio secundo modo conuenire, vel etiam omnibus. Et totum fundamentum videtur reduci ad hoc: quia ista propria, saltem quod est proprium secundo modo, prædicantur in quale accidentaliter, & distincto modo à quinto prædicabili, quod solius dicit posse abesse, & conueniunt necessario, quia quod est proprium secundo modo, ut hominem esse bipedem necessario illi conuenit, licet non soli, ergo pertinet ad quartum prædicabile.

Et confirm. Quia nullum est accidens, quod ab aliqua substantia non dimanet, licet etiam possit conuenire alijs subiectis à quibus non dimanet. Vnde Sanctus Thom. in 7. cap. de ente, & essentia absolute docet omnia accidentia dimanare à substantia. Quod constat, quia omne accidens est quædam participatio substantiæ, ergo sub ea ratione, qua dimanat à substantia debet pertinere ad quartum prædicabile;

bile, licet quatenus communicatur alijs, à quibus non dimanat, deficiat à perfecta ratione proprij.

Nihilominus, oppositum tenendum est. Et dico solum proprium quarto modo, vel quod ad illud reducitur, esse substratum intentionis quarti prædicabilis. Quæ sententia est communior inter Thomistas, de quo videri potest Soto, Masius Atauxo, & alij cum Cursu Carmel. disp. 8. q. 1.

Ratio sumitur ex determinatis per Philosophum 1. Poster. cap. 4. lect. 10. apud D. Thom. Vbi assignans quatuor modos per se, & explicans secundum, scilicet, quando subiectum ponitur in definitione prædicati, dicit hanc esse differentiam inter accidens proprium, & commune, quod quando in definitione alicuius prædicati ponitur subiectum, est accidens proprium. Si verò aliquod prædicatum non ponatur in definitione subiecti, neque subiectum in definitione prædicati, talia sunt accidentia communia, & per accidens prædicantur. Sed quando aliquid non significatur, ut proprium quarto modo, quod omni soli, & semper convenit, subiectum non ponitur in definitione ipsius accidentis, sicut homo non ponitur in definitione bipedis, nec cygnus in definitione albi; ergo illud non est proprium, ut discernitur à quinto prædicabili. Et quod non ponatur subiectum in definitione talis prædicati patet. Quia saluatur extra illud subiectum, quia licet competat omni, sed non soli.

Dices: Hac ratione probaretur, quod risibile non esset proprium quarto modo respectu Petri, & aliorum indiuiduorum, quia etiam

Petrus

Petrus non ponitur in definitione risibilis, sicut neque homo in definitione bipedis.

Respond. Quòd Petrus non ratione singularitatis, sed ratione naturæ specificæ, quæ in Petro est, ponitur in definitione risibilis, omne enim, quod pertinet ad naturam specficam Petri, in definitione risibilis ponitur, sed non quod pertinet ad singularitatem Petri; non verò tota natura hominis ponitur in definitione bipedis. Et hæc est causa quòd ex proprietatibus genericis magis fiunt propria secundo modo respectu specierum, quam ex specificis.

Deinde, ut optimè notat S. Thom. opus. 48. cap. de Proprio, Accidentia communia solum habent habitudinem ad subiectum, ut ad causam materiale, & receptiuam, quia causa materialis, ut sic, non ponit necessariam connexionem cum forma accidentali. Propria autem non respicit subiectum solum ut causam receptiuam, sed ut principium à quo dimanat, quia habet causam connexionis cum illo. Quod etiam aduertit S. Thom. 1. Poster. loco citato. Ergo ut aliquid sit proprium quartum prædicabile ut discernitur à quinto, oportet quod subiectum non solum habeat recipere, sed etiam habeat esse radix talis accidentis, & necessariam connexionem cum illo. Sed si non conuenit ei soli, non habet necessariam connexionem cum illo, siquidem est commune alijs, & non potest habere pro principio essentiali, & radicali diuersas essentias ut diuersa sunt, ergo, ut sic quartum prædicabile, debet conuenire omni, soli, & semper. Vnde dicit D. Thom. in 1. dist. 8. quaest. 1. art. 1. ad primum.

Quod

Quod cum dicitur aliquid propriè conuenire ex parte subiecti, oportet, quòd per proprietatem excludatur omne extraneum à natura subiecti, ut cum dicitur proprium hominis esse risibile, quia nulli extraneo à natura hominis competit: Quod ergo omni competit, sed non soli, conuenit extraneo à natura subiecti, & sic non propriè conuenit.

Ad fundament. opposita sentent. Respon. Quod alia propria, etiam quæ secundo modo propria sunt, non prædicantur necessario necessitate, quasi formali, & connexionis intrinsecæ, sed necessitate, quasi materiali, seu necessitate materiæ indiuidualis, ut sumitur ex D. Thom. opusc. 48 cap. de Accidente, sicut dicemus de Accidente inseparabili quaest. seq. Quod autè prædicatur necessario necessitate quasi formali, & ex principijs naturæ, & non solum ex principijs indiuidualibus, & necessitate materiæ, hoc est proprium quartum prædicabile. Dicitur autem quintum prædicabile, quod potest adesse, & abesse, quia non habet connexionem intrinsecam, neque radicem in principijs naturæ, licet ex aliqua causa extrinseca separari non possit quantum ad existentiam. In homine autem esse bipedem, si est proprium quarto modo respectu gradus subalterni, respectu illius erit quartum prædicabile, & solum secundum quid erit in secundo modo proprii, in quantum non dicitur ad conuertentiam respectu hominis.

Ad confirmat. Respond. Omnia accidentia causari à substantia, ut ibi dicit D. Thom. sed quædam secundum principia formalia, & ista sunt propriæ passionēs, quia habent conne-
xio.

xionem necessitatis formalis, quædam ex principijs materialibus, & sunt accidentia communia, seu accidentia indiuiduorum, vt ibi dicit D. Thomas. Quæ autem ex formalibus principijs causantur, si alij subiecto communicentur, erunt accidentia communia respectu eius, cui communicantur, vt calor respectu aquæ, vel lignis, sed propria respectu eius, à quo causantur.

Circa secundum punctum, scilicet, respectu quorum subiectorum conueniat ratio quarti prædicabilis, An respectu speciei, cum quo passio conuertitur, An verò respectu inferiorum, de quibus dicitur: ratio dubitandi est, quia proprium quarto modo neque conuenit indiuiduis necessario, neque conuertibiliter, ergo respectu illorum non est prædicabile vt proprium.

Antecedens patet, quia proprium non conuenit soli indiuiduo, sed alijs, ergo non habet necessariam connexionem cum indiuiduo quatenus tale: neque conuertitur cum illo, quia non valet mutua consequentia inter indiuidua & proprium, licet enim valeat est Petrus, ergo est risibilis, non tamen è contra, est risibile, ergo est Petrus, ergo non se habet conuertibiliter cum indiuiduis.

Et confirmat. Quia propriæ passionis generis respectu inferiorum non se habent vt propria quarto modo, sed secundo, ergo non dicitur quantum prædicabile respectu inferiorum, sed respectu naturæ, cum qua conuertitur. *Antecedens probat.* Quia bipes est propria passio animalis condistincti contra quadrupedia quod est genus innotatum respectu omnium bipedum, & tamen respectu homi-

minis est proprium secundo modo ; imò omnia accidentia communis , vt albedo , & nigredo & similia , respectu alicuius subiecti sunt propria quarto modo ; & tamen de corporibus singularibus dicuntur tanquam accidentia communia , ergo quartum prædicabile non dicitur tale respectu inferiorum . Ac denique potest fieri simile argumentum , sicut supra de differentia , quia hæc prædicatio , homo est risibilis , est quarti prædicabilis , cum non pertineat ad alium modum prædicandi , & est vniuersalis , quia prædicatur de vniuersali ad conuertentiam , scilicet , de homine , ergo est vniuersale quarti prædicabilis respectu speciei .

Omitto rationes ad probandum , quod inferiora proprii non debeant esse ipsamet propria singularizata , v. g. respectu risibilis , hoc & illud risibile , quia in simili iam hoc resolui-
mus in quaestione præced. de Differentia .

Ad propositam ergo difficultatem Respondetur ; Iuxta dicta quaestione præcedenti de differentia , quod proprium non induit rationem quarti prædicabilis , nisi respectu indiuiduorum ipsius speciei , cum qua conuertitur . Itaque quantum ad metaphysicam rationem propriæ passionis , scilicet , rationem necessariæ connexionis , & conuertibilitatem , cum eo , cuius est proprium , totum hoc habet respectu speciei , cum qua dicitur ad conuertentiam , & est potius quartum prædicatum , quàm quartum prædicabile . Quantum verò ad rationem quarti vniuersalis logici , sic necessariò debet respicere inferiora ipsius speciei , cum qua conuertitur .

Et ratio est , quia proprium respectu suorum singularium , v. g. risibilitas ad hanc , & illam
rifi-

riffibilitatem, est quidem superius, & vniuersale, sed non in quale, sed in quid, sicut species & indiuiduum. Accidens enim proprium, etiam habet suam quidditatem, & naturam, quam prædicat de suis inferioribus. Respectu autem speciei, seu naturæ, a qua dimanat proprium, sumptæ in communi, prædicatur quidem in quale, sed non ut superius, sed ut æquale, & cōuertibiliter. Vnde concomitanter erit vniuersale, sed non formaliter respectu eius, cum non sit respectu illius superius. Vnde cum proprium prædicetur per se, & de omni, per se quidem dicitur respectu subiecti, seu naturæ, a qua dimanat, de omni autem, respectu contentorum sub tali natura: ut egregie adnotauit D. Tho. 1. Post. lect. 9. §. *Interponit, &c.*

Ad fundamenta opposita Respon. Ad primum negatur antecedens. Ad probat. dicitur. Proprium habere necessariam connexionem cum indiuiduis mediate, & ratione naturæ, a qua dimanat non ratione indiuiduationis cui communicatur. Similiter mutuo conuertitur cum illis ratione naturæ eorum, non ratione indiuiduationis, quod autem sit commune multis non tollit rationem proprii, quia hæc communitas non est ad extranea, sed ad indiuidua propria naturæ. Nec requiritur quod connexio necessaria fundetur in aliquo ratione omnium, quæ in eo sunt, vel sub eo continentur; sed ratione radicis, & principij, in quo fundatur. Vnde non requiritur quod sit mutua consequentia inter proprium alicuius naturæ, & quodlibet indiuiduum, sed sufficit, quod inter ipsam naturam, & proprium sit mutua connexio, & consequentia.

Ad

Ad confirm. Respon. Quod ea, quæ verè sunt passiones generis, conueniunt omnibus infemoribus tanquam propria quarto modo, non minus quam propria specifica individuis talis speciei, sicut tactuum, quæ est proprietas animalis, & quantitas respectu corporis, si tamen consequitur ad formam corporis, & non solum ad materiam. Nam quod quantitas sic proprietas corporis satis significat D. Thom. quæst. de Spiritual. Creat. art. 3. ad 18. Alij autem de hoc dubitant, de quo Caietanus de ente & essentia, cap. 7. q. 16. ad 1. Hoc tamen ad præsens non spectat.

Quod autem dicitur de bipede non omnino constat esse proprium quarto modo, nam inter essentielles differentias ponitur à D. Thom. 5. Metaph. lect. 16. in principio, sed tamen absolute numeratur inter accidentales differentias 1. de Anima lect. 1. in fine, & dicitur accipi tanquam differentiam essentialem, quia vrimur accidentalibus differentiis nobis notioribus pro essentialibus.

Ad id, quod dicitur de alijs accidentibus, respond. Non omnia esse proprias passiones, quia non omnia oriuntur ex principijs formaliibus naturæ, sed quædam oriuntur ex materialibus, vt supra diximus ex D. Thoma 7. cap. de ente & essent. & idem habet in 1. dist. 17. q. 1. art. 2. ad 2. Et talia non sunt propriæ passiones alicuius naturæ, licet ab extrinseco possint habere causam inseparabilitatis in aliquo subiecto, vt nigredo in coruo.

Ad argumentum autem de prædicatione proprij de specie *Respond.* esse quidem prædicationem rei vniuersalis, sed tamen non habent.

bentis vniuersalitatē respectu speciei, quæ est illi æqualis, non inferior, vniuersale autem formaliter solum est respectu inferiorum.

Primo aduerte aliquando propriam passionem non esse accidens determinatum, sed disiunctum, vt par, vel impar respectu numeri, masculinum, & fœmininum respectu animalis, & tunc quodlibet eorum determinatè est accidens, illud verò disiunctum est, quod conuenit per se. De quo videatur D. Thom. 1. Poster. lect. 10. in fine.

QVÆSTIO XII.

De-Accidente quinto predicabili.

ARTICVLVS I.

Præm Definitiones, & diuisiones Accidentis rectè sint traditæ à Porphyrio,



Vpponimus differentiam inter accidens prædicamentale, & accidens prædicabile, quæ consistit in hoc, quod accidens prædicamentale contraponitur substantiæ, quæ est primum prædicamentum, & sic solum stat pro accidenti inhzrenti; accidens autem prædicabile contraponitur prædicato essentiali, & sic quicquid non conuenit essentialiter, vel necessario, dicitur accidens prædicale, siue sit aliquid reale, siue rationis, siue inhzrens, siue subsistens.

Igitur

Igitur in præfenti Porphyrii tres definitiones tradidit de accidente. Prima est, *Accidens est, quod adest, & abest sine subiecti corruptione.* Secunda, *Accidens est quod eidem inesse, & non inesse potest.* Tertia, *Accidens est, quod neque est genus, neque species, neque differentia, neque proprium, semper autem inest in subiecto.* Circa quæ, duo sunt explicanda in præfenti articulo. Primum. Vtrum definatur hic accidens primo intentionaliter, vel pro secunda intentione huius quinti prædicabilis. Secundum. Quomodo intelligendæ sint illæ particularæ definitionis. *Quod adest, & abest sine subiecti corruptione.*

Circa primum existimant aliqui, ut Martinez hic super cap. de Accidente, definiri secundam intentionem, quia definitur aliquid, quod conuenit accidenti per intellectum, non in re, licet enim adesse vni, & abesse ab alio realiter conueniat accidenti, tamen adesse, & abesse ab eodem subiecto non conuenit in re, sed per rationem, præsertim accidenti inseparabili. Et alij ex eo probant. Quia si definiretur hic accidens pro prima intentione, non conueniret omni prædicato, quod potest adesse, & abesse, non enim conueniret entibus rationis, quæ non sunt primæ intentiones, sed secundæ, & tamen multa ex illis prædicantur prædicatione quinti prædicabilis, ut cum dico animal est gentis.

Nihilominus Respond. Definitionem traditam conuenire substrato, seu primæ intentioni huius quinti prædicabilis; possit tamen aliquid addendo accommodari secundæ intentioni. Et intelligimus pro substrato huius quinti prædi-

prædicabilis non solum primam intentionem realem, sed quodcumque prædicatum accidentale, etiam si sit ens rationis. Est manifesta ratio: Quia id, quod explicant istæ definitiones, inuenitur etiam in accidenti singulari, & individualiter accepto, sed quicquid inuenitur in singularibus, & ad illa descendit, non pertinet solum ad secundam intentionem prædicabilitatis & vniuersalitatis, quia hæc non descendit ad singularia, ergo hic prima intentio accidentalis definitur. *Maiores probat.* Quia adesse & abesse in subiecto etiam conuenit accidenti singulari, ut patet, tum in accidente separabili, quod aliquando adest, aliquando abest in singulari sine subiecti corruptione, tum in accidenti inseparabili, quod etiam individualiter acceptum non dependet ab eo subiectum, seu natura cui inest, licet conseruatio individualis aliquando dependeat, ergo id, quod explicant istæ definitiones, conuenit etiam accidentibus singularibus.

Si quis autem velit secundæ intentioni Accidentis accommodare definitionem accidentis, oportet subintelligere particulam *de multis*, dicendo, quod accidens est quod prædicatur de multis ut prædicatum, quod adest & abest præter subiecti corruptionem.

Vnde patet solutio fundamenti contrarij. Dicimus enim ad primum, quod adesse & abesse vni, & eidem subiecto, accidenti conuenit in re, tam in ipso accidente separabili, quam inseparabili, quod contingenter, & non necessario connectitur subiecto. Nihil autem aliud illa verba significant, quam contingentiam conuenientiæ.

Ad secund. Dicitur quod etiam in entibus rationis potest inueniri prima intentio, sicut sunt multae negationes, & priuationes, & denominationes extrinsecæ, potest etiam vna secunda intentio materialiter subterni, & denominari accidentaliter ab alia secunda intentione. Et sic induit quasi modum primæ intentionis respectu eius, cui subternitur.

Instabis: Adesse & abesse in prædicta definitione sumitur secundò intentionaliter, pro eo, quod est affirmari, vel negari sine subiecti corruptione, ergo traditur per id, quod est secundæ intentionis, scilicet, affirmationem & negationem.

Respondetur in primis hoc non conuincere, quòd hæc definitio tradatur per secundam intentionem vniuersalitatis huius quinti prædicabilis, sed per secundam intentionem affirmandi & negandi, quod pertinet ad secundam operationem intellectus. Deinde dicitur, quod affirmari, & negari potest utroque modo sumi, & fundamentaliter, quod est primæ intentionis, & inuenitur in omni accidente etiam singulari, & formaliter pro secunda intentione affirmandi & negandi, prout statim explicabimus.

Circa secundum punctum, controuersia est inter Auctores quomodo debeat intelligi illa particula, *adest*, & *abest*, &c. An intelligatur de reali præsentia & absentia, an verò de affirmatione & negatione; nam quod non possit intelligi de reali præsentia, & absentia, illud videtur conuincere, quia accidens inseparabile non potest realiter adesse & abesse, alioquin esset separabile. Si verò dicatur intelligi secundum

cundo intentionaliter pro affirmari & negari, sequeretur omne accidens esse separabile, quia nullum est, quod per intellectum non possit separari, etiam ipsum proprium, sine quo subiectum potest optimè intelligi. Nec per hoc euaditur, sed supponitur realis præsentia & absentia, quia affirmatio illa, & negatio, vel est vera, vel falsa, si falsa, ergo falsum est, quod accidens adsit & absit, sine subiecti corruptione. Si vera, ergo ita est à parte rei, quod adest & abest: in re ergo datur præsentia & absentia accidentis realis. Si dicatur non intelligi adesse & abesse de affirmatione & negatione per modum compositionis, sed per modum simplicis præcisionis intelligentis vnam sine alio.

Contra est. Tum quia hoc expressè aduersatur D. Thomæ quæst. de Spiritual. Creatur. artic. ultimo ad 7. & opusc. 48. cap. de Accidente. Tum quia hoc modo etiam proprium adesse & abesse potest à subiecto per simplicem cognitionem præscindendo, siue intelligendo vnum sine alio.

Propter hoc aliqui singularem viam sequuti sunt dicentes, quod in hac definitione debet intelligi idem accidens posse adesse, & abesse respectu diuersorum subiectorum intra adæquatam sphaeram eorum, quibus conuenire potest, & sic conuenit omni accidenti quantumcumque inseparabili, v. g. Albedo habet multa corpora pro subiecto adæquato, scilicet, niuem, lapidem, hominem, &c. & extra totam adæquationem non potest abesse, intra illam tamen adæquationem alicui determinato abest, alicui verò adest. Ita Martinez sup. cap. de Accid.

Cæterum hic modus sentiendi verus non est :
 Tum quia Porphyrius loquitur de accidente separabili & inseparabili tanquam de diuersis ; in hac autem sententia omne accidens est inseparabile ab adæquatione omnium subiectorum suorum , est verò separabile ab inadæquatis subiectis : Vum etiam, quia tunc sensus definitionis erit, quòd accidens partim adest, & partim abest sine subiecti corruptione , sed respectu cuius subiecti ? Si respectu totalis & adæquati, ab hoc nunquam potest abesse ; si respectu partialis, aliquando datur subiectum aliquod determinatum, à quo non potest abesse, sicut albedo respectu niuis. Quare hoc non euitat, sed augeat difficultates. Denique, quia dari potest aliquod accidens separabile à tota adæquatione sui subiecti, ergo saltem respectu illius patitur easdem difficultates , quomodo intelligenda est definitio, quod adest & abest sine subiecti corruptione. Anteced. constat, nam esse Grammaticum est accidens , & potest separari ab omni homine , vt patet si tantum sint duo homines in mundo non Grammatici, & similiter dormire est accidens , quod potest separari in tali casu , si vterque homo vigilaret.

Quapropter dicendum est. Per illa verba, *Adest & abest sine subiecti corruptione*, nihil aliud significari, quam contingentiam accidentis, quod prædicatur, & indemnitatem subiecti in sua quidditate ex conuenientia, vel disconuenientia talis accidentis. Quòd videntur communiter sentire, qui definitionem quinti prædicabilis, sic explicant, *quod est illud, quod dicitur de pluribus in quale contingenter.* Vnde
 ne-

nēque consistit in hoc quod est adesse vel abesse per realem præsentiam, vel affirmari & negari per prædicationem intellectus præcisè, sed in tali fundamento negationis, vel affirmationis, quòd sine dissolutione quidditatis & naturæ subiecti possit aliquid accidens convenire, vel disconvenire subiecto.

Quæ resolutio & explicatio sumenda est ex D. Thoma q. 2. de Anima, art. 12. ad 7. vbi totam difficultatem sic resoluit. *Tria*, inquit, *sunt genera accidentium*, *quædam causantur ex principijs speciei*, & dicuntur propria, sicut risibile homini, *quædam causantur ex principijs individui*, & hoc dicitur, vel quia habent causam permanentem in subiecto, & hæc sunt accidentia inseparabilia, sicut masculinum & femininum, & alia similia; *quædam vero habent causam non permanentem in subiecto*, & hæc sunt accidentia separabilia, ut sedere & ambulare; est autem commune omni accidenti, quod non sit de essentia rei, & ita non cadit in definitione rei, unde intelligimus quod quid, absque hoc quod intelligamus aliquod accidentium eius. Sed species non potest intelligi sine accidentibus, quæ consequuntur principium speciei, potest tamen intelligi sine accidentibus individui etiam inseparabilibus; sine separabilibus vero esse potest non solum species, sed etiam individuum. Ita S. Doctor.

Ex cuius doctrina colligimus, quod illa particula *adesse*, & *abesse* sine subiecti corruptione, idem est ac dicere, convenit subiecto sine dissolutione quidditatis, & naturæ eius in prædicatis essentialibus. Quod verò accidens sit separabile, & inseparabile, non respectu speciei,

ciei, & naturæ subiecti, sed respectu indiuiduorum sumitur, in quibus aliquando habet causam permanentem, aliquando transeuntem, Et ita potest accidens conuenire, vel abesse à subiecto cum corruptione indiuidui; non tamen cum corruptione speciei, sed cum indemnitate illius. In quo distinguitur à proprio, quod si abest, idest, si non conuenit, neque connectitur cum specie, dissoluitur species. Et ex hoc constat, quod indiuiduum dependere potest in sui conseruatione & existentia, imò in ipsa indiuiduatione ab accidentibus; species autem, & quidditas à nullo accidente dependet. Et ita quæcumque affirmatio vel negatio, conuenientia, vel disconuenientia accidentis ad subiectum semper est sine corruptione, sed cum indemnitate quidditatis.

Et benè nota, quòd illud adesse & abesse non sumitur hic pro eo, quòd est inhærere, vel non inhærere, id enim soli accidenti prædicamentali conuenit, sed sumitur pro eo, quòd est conuenire, vel disconuenire accidentaliter. Neque negamus, quòd ly adesse, & abesse significet affirmari vel negari, sed non solùm hoc, sed etiam fundamentum illius quòd est conuenire, vel non conuenire naturæ specificæ sine hoc, quòd dissoluat essentialem prædicatorum eius connexionem. Ex quo sequitur, quòd possit affirmari vel negari cum indemnitate quidditatis in subiecto, & in hoc consistit contingentia accidentis in conueniendo, vel disconueniendo subiecto.

Ad fundamenta opposita. Dicitur ad primum. Quòd accidens inseparabile non potest adesse, &

se, & abesse secundum realem absentiam, & præsentiam respectu individui in ordine ad quod sumitur ista distinctio separabilis, & inseparabilis. Respectu tamen speciei, siue quidditatis in ipso subiecto potest adesse, & abesse, idest, conuenire, vel disconuenire, sine destructione subiecti in sua quidditate, licet in sua existentia destruat.

Ad secund. dicitur. Quod omne accidens separari potest ab ipsa specie, seu quidditate, transeat, ab ipso individuo, & existentia eius, quæ sequitur indiuiduationem, nego, quia potest habere causam permanentem in illo, separabile autem, & inseparabile dicitur in accidentibus respectu subiecti ex parte indiuiduationis, adesse autem, & abesse sine subiecti corruptione respectu quidditatis. Et sic potest intelligi de adesse, & abesse realiter, & affirmari & negari verè sine corruptione subiecti ex parte quidditatis, licet non sine corruptione ex parte indiuiduationis, vel existentia, quæ indiuiduationem sequitur. Vel secundo adesse, & abesse sumitur conditionate, idest, siue adsit, siue absit accidens, sine subiecti corruptione, ex parte quidditatis id fiet.

Quod si infer. Quia separatio, vel conuenientia respectu speciei ut distinguitur ab individuo est secunda intentio rationis, quia species non distinguitur ab individuo nisi per rationem, ergo definitio hæc intelligitur secundo intentionaliter.

Respond. Quod nomine speciei non intelligimus ipsum itatum abstractionis ab individuo, sed naturam ipsam specificam, quæ etiam in indiuiduis reperitur, vnde potius utimur

nomine quidditatis dicendo quòd accidens ad-
est, & ibest sine corruptione quidditatis etiam
individualiter sumptæ in subiecto.

Adhuc tamen inquiret ? Quomodo per hoc
distinguaturs accidens à proprio, siquidem etiam
proprium potest intelligi, & separari ab essen-
tia sine corruptione ipsius quidditatis, cum sit
extra definitionem illius ?

Respond. Ex D. Thoma quæst. de spiritualib.
citata artic. ultimo ad 7. ubi inquit: *Quod du-
plex est operatio intellectus, alia qua intelligit
quod quid est, & tali operatione potest intelligi
essentia rei, & sine proprio, & sine accidente, cū
neutrum eorum ingrediatur rei essentiam. Alia
est operatio intellectus diuidentis & componen-
tis, & sic potest intelligi substantia sine acciden-
tali prædicato, etiam si secundum rem sit insepa-
rabile, sicut potest intelligi cornus albus, non
enim est ibi repugnantia intellectuum, cum op-
positum prædicati non dependeat ex principiis
speciei, quæ significatur nomine in subiecto posito,
Hæc vero operatione intellectus non potest intel-
ligi substantia sine proprio, non enim potest in-
telligi, quod homo non sit risibilis, aut triangu-
lus non habeat tres angulos æquales duobus re-
ctis, hic n. est repugnantia intellectuum, quia op-
positum prædicati dependet ex natura subiecti.*

Ita D. Thom. Ex quo colligitur non solum
solutio argumenti, sed etiam quòd licet pro-
positio, in qua accidens inseparabile negatur
de subiecto, & in qua negatur proprium, vera-
que sit falsa, quia in re non ita est, tamen fal-
sitas vnius plus destruit quam alterius. Ex eo
enim quòd negetur conuenire accidens inse-
parabile, non destruitur quidditas, si autem ne-
getur

getur conuenire propria passio, & radicari in natura destruitur essentia. Quòd tamen non tollit, quin de facto possit Deus propriam passionem separare à subiecto non quantum ad conuenientiam, sed quantum ad existentiam.

Dices: Mors est prædicatum accidentale respectu animalis, & tamen non solum corrumpit indiuiduum, sed etiam naturam, quia conceptus naturæ animalis non comparitur cum conceptu mortis: ergo datur aliquod accidens, quod destruit subiectum etiam quantum ad quidditatem. Et omitto hoc prædicatum *existens*, quod dicitur quidem contingenter de ente creato, & tamen non abest sine corruptione eius, cæterum absentia existentia non inducit quidditatis corruptionem, sicut coniunctio mortis, quando prædicatur.

Resp. Quòd illud prædicatum mors, vel potest sumi pro morte in facto esse, vel in fieri, ut quando homo agit animam dicitur mori. Si sumatur hoc secundo modo est prædicatum accidentale respectu hominis, & verificatur pro eo tempore, quo propinquat morti, nec tollit essentiam hominis, sed eam supponit, disponit autem ad corruptionem. Si primo modo sumatur, sic non est prædicatum quinti prædicabilis, homo est mortuus, quia respectu hominis est prædicatum repugnans, respectu cadaueris est prædicatum essentialiale. Et sic si ly homo alienatur in illa propositione ab illo prædicato mortuus, & stat pro homine non viuo, qui æquiuocè est homo, sic est propositio essentialis: si autem non alienetur, sed maneat in suo significato proprio ly homo, sic prædicatum non verificatur de subiecto, sed

ei repugnat, & ita non pertinet ad quintum prædicabile. Si autem sumatur per ampliacionem, vt sit sensus, homo est mortuus, idest, qui fuit homo, est mortuus, sic etiam propositio est essentialis, quia id quod fuit homo, nunc est cadauer, & sic essentialiter illi conuenit tale prædicatum. Aliqui etiam dicunt verificari hanc propositionem per synedochem, idest, ratione partis, quia corpus, quod est mortuum est idem, quod fuit in homine ratione materiæ.

Pls. inquires an omne accidens sit propria passio respectu alicuius subiecti ad quod per se sequatur. Aliqui affirmatiuè respondent. Sed verius est, non omnia accidentia esse proprias passiones, nec sequi ex principijs formalibus naturæ, sed quædam sequi ad principia materialia, & indiuiduantia, quæ est expressa sententia D. Thom. 7. c. de ente, & essent. & in 1. dist. 17. q. 1. art. 1. ad 2. & 1. Post. lect 14. & constat manifestè in aliquibus accidentibus, quæ non immediate sequuntur ad substantiam, sed ad aliqua alia accidentia, vt actus immanentes, species repræsentantes, habitus supernaturales, & in corporibus pulchritudo, sanitas, ægritudo, & similia, quæ sunt accidentia contingenter conuenientia, & non necessariò, neque ex principijs naturæ. Et talia accidentia prius conueniunt indiuiduis quam speciei; è contrario autem propriæ passiones prius conueniunt speciei, quam indiuiduis, licet quantum ad inherenciam prius sustentatur ab indiuiduis, quæ sunt prima substantia.

Et si dicas. Quod omne quod conuenit per accidens reduci debet ad id, quod conuenit
per

per se. Resp. Quòd reducitur ad id quod est per se non quantum ad connexionem necessariam cum aliquo subiecto, à quo dimanat, sed quantum ad causalitatem efficientem, vel finalem, quia non per accidens causantur ab aliqua causa, sed per se; non enim est necesse, quòd omne, quod convenit per accidens, reducatur ad omnem modum per se, sed sufficit, quod ad aliquem sicut est ad causalitatem per se, licet non ad connexionem per se cum subiecto.

ARTICVLVS II.

Quomodo accidens dicatur quantum prædicabile. Et respectu quorum inferiorum?

TRia breuiter in hoc articulo tractanda sunt. *Primum*, quomodo accidentale prædicatum verificetur de subiecto, an ratione nominis, vel ratione rei, quæ illi inhæret. *Secundum*. Respectu quorum inferiorum dicatur quantum prædicabile, an respectu suorum singularium, ut album respectu huius, & illius albi, an respectu subiectorum. *Tertium*, an solum prædicetur quantum prædicabile respectu subiectorum existentium, vel etiam respectu possibilium.

Ad primum aliqui affirmant, quòd cum accidens prædicatur de subiecto, nudum nomen prædicatur, dicit enim Philos. cap. 5. in antepredicamentis, quod eorum, quæ in subiecto sunt nomen prædicari de subiecto nihil prohibet: rationem verò impossibile est prædicari. Cuius ratio est, quia prædicatio per verbum

bum substantiarum est dicere identitatem prædicati cum subiecto, hæc autem non datur inter subiectum, quod est substantia, & accidens.

Nihilominus oppositum omnino dicendum est, scilicet, prædicari in istis prædicationibus accidentalibus non ipsum nomen, sed rem significatam per nomen, denominatiuè tamen. Et deficit valde hæc sententia, quia non distinguit denominationem fieri dupliciter, primo ex parte nominis, ut album ab albedine, secundo ex parte formæ significatæ, etiam si in eodem nomine non participant, sicut ab officio deriuatur hoc nomen officiosus non quantum ad nomen, sed quantum ad rem significatam ab effectu, seu diligentia, vnde non prædicat nomen, sed rem, & constat manifestè, quòd quando dico Petrum esse album, non verifico hoc, ratione nominis, sed ratione rei significatæ, si enim nomen illud verificatur de Petro, oportet quòd ratione sui significati verificetur, non ratione ipsius vocis ridiculum enim esset dicere, quòd Petrus est illa vox album, significatum autem est res ipsa, scilicet, habens albedinem, ergo hæc prædicatur, & verificatur in his prædicationibus accidentalibus. Et hoc est, quòd intendimus significare per istas prædicationes, scilicet, quòd illa accidentia insint, & conueniant illis subiectis non verò sola nomina. Et de his plura diximus supra quæstione 5. agentes de prædicatione concretorum accidentalium.

Unde ad fundamentum contrarium Resp. communem Aristotelis expositionem esse, quòd accidentia dicuntur de subiecto secundum nomen, & non secundum rationem, id est,

id est, non quidditatiuè, sed denominatiuè, quia ibi ly ratio significat essentiam : essentia autem accidentis non conuenit essentiæ subiecti, alioquin si secundum nomen tantum, & non secundum rem significatam prædicarentur, solum essent communia quantum ad nomen, & non quoad rem, atque adeo essent æquiuoca.

Ad argum. Ex ratione Respon. Quòd accidens est idem secundum rem cum subiecto, identitate denominatiua, & concretiua, non essentiali, & intrinseca, quia ut dicit D. Thom. 1. p. qu. 12. art. 12. *In propositione vera affirmatiua oportet quòd prædicatum, & subiectum significant idem secundum rem aliquo modo* (nota secundum rem, & non secundum nomen) *quia etiam in prædicatis accidentalibus prædicatum, & subiectum sunt idem supposito.* Accidens ergo in concreto, v. g. album, quia dicit habens albedinem, ratione de ly habens, est idem cum subiecto. Et quia alia est prædicatio per identitatem, alia per denominationem, ut dicit S. Thom. in 3. dist. 5. in expositione literæ, concedimus quidem, ad omnem prædicationem requiri aliquam identitatem, sed sufficit denominatiua, & accidentalis, sicut inuenitur inter accidens in concreto, & subiectum, non vero est necessaria omnimoda, & essentialis.

Circa secund. difficult. Resp. Inferiora quinti prædicabilis esse ipsa subiecta, de quibus dicitur denominatiuè, & accidentaliter non ipsa constituta ex accidente, & subiecto, de quibus dicitur per se, & quidditatiuè, v. g. album de hoc, & illo albo prædicabitur essentialiter, sed ut quantum prædicabile de subiectis, quibus inest, siuè inter se distinguantur specie, siuè non.

Et ratio est manifesta Quia quantum prædicabile prædicatur in quale accidentaliter, ergo oportet, quod inferiora eius sint illa, ad quæ comparatur in quale accidentaliter: solum autem respectu subiectorum comparatur hoc modo, quia accidentaliter conuenit illis, & per modum formæ actuantis, & qualificantis. Respectu autem propriorum inferiorum, ut album respectu huius, & illius albi prædicatur essentialiter, quia dicit totam eorum quidditatem. Quare cum album dicat albedinem in concreto, vel potest respicere inferiora ipsius albedinis, quæ sunt inferiora ex parte formæ, vel inferiora ex parte subiecti, quod connotatur de albo; si respiciat inferiora formæ, essentialiter dicitur de illis, quia sicut hæc & illa albedo essentialiter participant albedinem, ita hoc & illud album essentialiter participant album ex parte formæ. Si autem considerentur inferiora ex parte subiecti sic accidentaliter participant rationem albi, & consequenter respectu illorum prædicatur in quale accidentaliter, quod est quantum prædicabile.

Sed obijciat. Album, v. gr. non potest esse vniuersale respectu Petri, & Pauli nisi abstrahat ab illis, non ut subiecta sunt, sed ut alba, ergo ipsa subiecta secundum se non sunt inferiora istius prædicabilis. Conseq. patet quia illa sunt inferiora, à quibus abstrahit, ergo si non abstrahit quatenus subiecta, sed quatenus alba, quatenus alba erunt inferiora. Anteced. probat. tum quia abstractio accidentis à subiecto ut subiectum est, est abstractio formalis, abstrahit enim forma à materia: abstractio autem vniuersalis debet esse totalis. Tum etiam quia

quia hoc vniuersale, quod est quintum prædicabile debet abstrahere ab inferioribus, quatenus sunt similia, seu quatenus conueniunt in aliquo, & non quatenus conueniunt essentialiter, ergo quatenus conueniunt accidentaliter. Sed conueniunt accidentaliter in albo quatenus sunt alba, ergo ab illis quatenus alba abstrahit album in communi.

Et confirm Quia ipsa subiecta sunt inferiora albo per accidens, quia per accidens identificantur Petrus, & Paulus in albo, ergo respectu istorum subiectorum album est vniuersale, & prædicabile per accidens, atque adeo non est vna ex speciebus prædicabilium, quia prædicabilia sunt vniuersalia per se.

Respond. Quod album potest vtroque modo abstrahere, & ab hoc, & illo albo, & à suis subiectis, sed à subiectis dupliciter. Vno modo, vt forma physica à subiecto, & vt abstractum à concreto; alio modo, vt denominatiuum à denominato: si fiat abstractio, vt forma à subiecto, vel vt abstractum à concreto, erit abstractio formalis, nec tunc abstraheretur album, sed albedo. Sed hæc non prædicatur de subiecto, quia significatur vt pars respectu totius, quod est album. Si verò fiat abstractio, vt denominatiuum à denominato sic abstrahitur album, vt quintum prædicabile ab hoc, & illo subiecto, quod est inferius ipsi albo ex parte connotati, non ex parte formæ, & sic ad abstractionem formalem requiritur, quod non abstrahatur accidens in concreto, sed in abstracto, & tanquam forma à materia, sed si abstrahatur album in concreto per modum abstractionis totalis se habet, & comparatum

tum ad subiecta est quintum prædicabile;
comparatum ad inferiora formæ est quiddita-
tium.

Et sic etiam intelliges, quod id, quod adest,
& abest secundum physicam inhærentiam, non
est album, sed albedo: quod verò adest, &
abest secundum denominationem, est album
in concreto.

Ad secund. prob. dicitur. Quod album non
abstrahitur à Petro, & Paulo, vel alijs subie-
ctis quatenus formaliter alba (sic enim sunt in-
feriora formæ importata per album) sed qua-
tenus denominatiuè, vel potius quatenus deno-
minabiles ab albo. Et prout sic conueniunt in
albo accidentaliter, seu denominatiuè, & con-
tinetur in illis album, non formaliter, sed de-
nominatiuè, quia sic considerantur non vt for-
maliter alba subiecta, sed vt denominabilia ab
albo, & sic conueniunt in aliquo, quod extrin-
secum est ipsis, scilicet, in albo, & consequen-
ter sunt inferiora illi accidentaliter tanquam
quinto prædicabili.

Ad confirm. respond. Quod inferiora sunt
subiecta per accidens ex parte rei, quæ subij-
citur, sed intentio subijcibilitatis, & prædica-
bilitatis per se est vera intentio prædicandi, &
subijciendi, sicut requiritur ad vniuersalita-
tem. Itaque intentio quinti prædicabilis per
se est intentio vniuersalis, & per se postulat in-
feriora, sed non inferiora, quæ habeant perse-
tatem in natura, & forma, quæ prædicatur, sed
contingentiam. Et ita ei, quod prædicatur ac-
cidentaliter de multis, conuenit per se vniuer-
salitas, seu respectus ad multa, sicut opinioni
per se conuenit versari circa propositiones
con-

contingentes, & libertati per se conuenit contingenter operari.

Circa tertiam difficult. Constat tanquam certum, quod prædicata accidentalialia, ut actus exerceant prædicationem affirmatiuam, requirunt tanquam conditionem existentiam subiecti. *Ratio est*, quia in prædicationibus accidentalibus verbum est non absolutum à tempore, ergo verificatur dependenter ab existentia extremorum, & non existente subiecto non verificatur. Et intelligo, requiri existentiam, prout fuerit prædicatio præterita pro præteritis, & futura pro futuris. *Difficult. vero est*: An non solum exercitium prædicationis accidentalialis, sed etiam ipsa vniuersalitas, quæ est aptitudo ad prædicandum accidentaliter, solum respiciat inferiora existentia. Et aliqui affirmant moti ea ratione, quia non possunt respici ab accidente subiecta non existentia, nisi per modum possibilium, in quibus possibiliter esse potest, sed existentia possibilis non prædicatur accidentaliter, sed essentialiter, ut si dicas: Adam possibiliter ambulat, vel possibiliter est albus ergo vniuersalitas quinti prædicabilis non respicit possibilia.

Et confirm. Quia respectu subiectorum non existentium prædicatio redditur impossibilis, cum sit contingens, quæ requirit existentiam tanquam conditionem: si autem prædicatio est impossibilis, vniuersalitas, seu prædicabilitas dari non potest.

Nihilominus oppositum verius videtur, non destrui vniuersalitem quinti prædicabilis ex sola destructione existentie subiectorum, quia vniuersalitas consistit in aptitudine quantum
est

est ex parte naturæ, ut prædicetur de multis. Quod verò illa multa de facto non dentur non est impedimentum intrinsecum illius aptitudinis, nec illi opponitur, sed solum opponitur ipsi exercitio prædicationis. Quod autem opponitur actui, seu exercitio non destruit aptitudinem, & potentiam, oppositio enim ad actum non est oppositio ad potentiam.

Et confirm. In accidente physico, & reali. Quod ex hoc, quod separatur à subiecto non amittit aptitudinem ad inhærendum in illo, quia hæc sequitur naturam accidentis, ergo similiter accidens concretum metaphysicè consideratum non amittit potentiam, ut prædicetur de multis contingenter, quia hæc habilitas non tollitur ex defectu existentiae subiectorum, sed solum applicatio eorum, ut in illis sit.

Dices: Tollitur ratio concreti, quia destruitur omne subiectum, quod possit concernere, & sic manet solum accidens in abstracto.

Sed contra, quia solum destruuntur subiecta singularia per defectum existentiae, subiectum autem in communi adhuc potest concipi, concretum autem accidentis in communi non est subiectum singulare, sed subiectum in communi acceptum, sicut album, ut sic non habet pro subiecto suæ concrecionis solum hoc, vel illud corpus, sed corpus in communi.

A fundament. oppositum Respond. Quod accidens respectu subiectorum possibile, est ut illis conveniat. Cæterum hæc existentia, & respectus possibilis, non est id, quod prædicatur,

dicatur, sed conditio ex parte rei prædicabilis, & si ipsa possibilitas prædicaretur, non accidentaliter, sed essentialiter prædicaretur de subiecto. Omnis enim propositio modalis, si est vera, est propositio essentialis, & sic procedunt exempla allata. Nos verò dicimus, quòd accidens in communi remota existentia subiectorum habet aptitudinem, ut prædicetur de illis contingenter, non quantum ad possibilitatem prædicando ipsam, sed quantum ad formam, quæ contingenter potest conuenire, quando subiecta extiterint.

Itaque vno verbo. Possibilitas ut prædicata facit propositionem essentialem: possibilitas verò ex parte subiectorum de quibus potest prædicari forma accidentalis, non facit prædicationem essentialem, sed relinquit illam cum sua aptitudine, & potentia, ut possit contingenter prædicari, licet exercitium eius sine existentia subiectorum fieri non possit.

Ad secund. fundament. dicitur. Quod talis prædicatio est impossibilis subiectis non existentibus, non ex defectu accidentis secundum se, sed ex defectu applicationis ex parte subiectorum, sicut accidens separatum retinet possibilitatem inhærendi, licet actu non inhæreat, nec applicetur stante tali statu.

F I N I S.



IN

INDEX RER VM

NOTABILIVM.

A

Ars est recta ratio operum faciendorum.
q. 1. art. 2. pag. 18
Quæ, & quanta requirantur ad ipsam. *ibid.*

Quæ cadant sub illius consideratione. *ibid.*

Quomodo dicatur esse de singularibus. q. 1.
art. 2. 23

Quomodo dicatur esse in parte animæ opinatiua.

Qua ratione est virtus intellectualis. *ibid.*

Non est de ratione artis procedere modo compositiuo, & practico. *ibid.*

Ars liberalis quomodo dicatur ars similitudinaria. *ibid.*

Attributorum distinctio ad quid reducatur. q. 2. art. 5. 125

Attributa diuina in quo fundent suam distinctionem. *ibid.* 134

Aptitudo & indifferentia ad multa an conueniat rebus extra operationem intellectus.
q. 3. art. 4. 167

Abstractio negatiua, & positiua quid. *ibidem*
art. 5. 182

Aliqua analogari in ratione entis, & non in modo prædicandi. q. 4. art. 2. 284

Accidentia habere definitionem incompletam, quomodo intelligatur. q. 7. art. 2. 309

In

Index rerum notabilium.

- In definitione accidentium in concreto non
inuenitur definitum, vt quod essentialiter,
sed denominatiue. *ibid.* 310
Dantur per additionem & quare. *ibid.* 311
Cur traduntur per id, quod denominatur ta-
le, non per id quod est tale. *ibidem.* 311
& 312.
Subiectum ponitur ex consequenti in defini-
tione illorum. *ibid.* 319

C

- C**ausa vniuersalis instrumentalis quomodo
sit necessaria ad effectus inferiores. q. 1.
art. 1. 16
Cœlum est causa vniuersalis principalis. *ibid.*
Collocatio aut dispositio conceptuum quid sit.
q. 1. art. 3. 33
Conclusio vltima syllogismi practici etiam est
operatio. q. 1. art. 4. 56
Comparisonem rationis ad creaturas potest
dupliciter intelligi conuenisse Deo. q. 2.
art. 5. 126
Comparatio Essentiæ Diuinæ non est cognita
ad instar relationis. *ibid.* 133. & 135
Conceptus obiectiuus est vnus non vnicate rea-
li, sed rationis & præcisionis. q. 3. art. 2.
pag. 150
Concretum quomodo significet subiectum. q. 7.
art. 2. 307

D

- D**emonstratio quid importet. q. 1. a. 2. 16
Quid requirat. *ibid.*
Est

Index rerum notabilium.

- Est obiectum principalitatis in Logica.** q. 1.
art. 3. 35
- Denominatio extrinseca** quando est ens ratio-
nis. q. 2. art. 1. 84
- Quando pertinet ad relationem.** ibid. 85
- Distinctio rationis formaliter est relationis.**
ibid. 86
- Quid sit distinctio, & vnitas rationis ratio-
cinantis, & ratiocinatae.** q. 2. ar. 3. 91
- Distinctio, pluralitas, diuisio, separatio, di-
uersitas, differentia, in quo conueniant,
& in quo non.** ibid.
- Quid sit distinctio realis & rationis.** ibi. 96
- Differentia inter distinctionem rationis ratio-
cinantis, & rationis ratiocinatae.** ibi. 99
- Quid requiritur ad distinctionem rationis
ratiocinatae.** ibid. 100
- Quid sit fundamentum illius tam ex parte
obiecti, quam ex parte intellectus.** ibi. 104
- Distinctio conceptuum ponit aliquid in obie-
cto.** ibid. 109
- Deus cognoscit perfectissime actus nostros, qui-
bus imaginamur, & fingimus entia ratio-
nis.** ibid. art. 3. 123
- Intelligit entia rationis formata à nostro in-
tellectu, sed non formæ.** ibid.
- Quo pacto intelligat entia rationis à nobis
efformata.** ibid. 124
- Non potest formare entia rationis imperfe-
cta.** ibid.
- Non dicitur sillogizare, aut enunciare.** ibi-
dem. 125
- Deum esse participabilem, & imitabilem quo-
modo intelligitur.** ibid. 126
- Deum cognoscere aliquid aliter quam est, ri-
dicu-**

Index rerum notabilium.

- dicululum est. *ibid.* 128
Cognouit fictionem meam præsuppositiuè.
ibid. 130
Intelligit priuationes per formam opposi-
tam, qua priuant. *ibid.* 132
Distinctio quotuplex. *q.3. ar.6.* 181
Diuisio vniuersalis in quinque prædicabilia est
vniuoca, *q.6. ar.2.* 285

E

- E**ns rationis quid sit. *q.1. art.3. pag.25. &*
q.2. art.1. pag. 76
Quotuplex sit. *ibid.*
Est obiectum Logicæ. *q.1. ar.3.* 27
De quibus & quomodo detur scientia. *ib.* 36
Non est scibile subiectiue bene tamen obie-
ctiue. *ibid.*
Quomodo sit vniuocè & simpliciter scibile.
ibid. & pag. 37
Quomodo habeat passiones, & causas. *ibid.*
Habet causas metaphysice non physice. *ibid.*
Definitur ens rationis. *q.2. ar.1.* 77
Non omne, quod aliter concipitur, quam sit in
re, est ens rationis. *ibid.* 79
Quomodo diuidatur. *ibid.* 80
Negatio quomodo dicatur esse à parte rei. *ibi-*
dem. 83
Non formantur neque à Voluntate, neque à
sensibus externis, imò neque ab internis.
q.2. ar.4. 111
Intellectus indiget aliquo actu comparatio-
ut entia rationis formentur. 113
Cognitio formans ens rationis quænam sit.
ibid. 116
Sim.

Index rerum notabilium.

Simplex apprehensio format entia **rationis**,
ibid. pag. 119

In simplici apprehensione potest esse **fictio**
& quomodo, ibidem. 120

Ens rationis in communi non dicitur forma-
ri, ibid. 122

Concipitur ad similitudinem entis realis,
ibidem.

Illius difficultas in quo consistit, quatenus
pertinet ad cognitionem Dei, ibid. art. 5.
pag. 123

Entia rationis imperfecta, imperfectam cogni-
tionem sortiuntur, ibid. 124

Ens rationis in quo consistat. 129

Explicatio illius axiomatis, quæ sunt eadem
vni tertio, sunt eadem inter se. q. 3. art. 2.
pag. 151

Explicationes variz circa sententiam Scoti de
Vnitate formali, ibid. 155

F

Fallacia accidentis quando committatur, q.
1. art. 1. pag. 14

G

Gradus metaphysici nomine quid intelliga-
tur, q. 3. **art. 6.** 187

Quomodo distinguantur, ibid. 191

Genus quomodo sumatur à materia, ibid. 193

Index rerum notabilium.

H

Homo in communi quomodo dicatur incorruptibilis, & ingenerabilis. qu. 3.
art. 2. pag. 151

I

Instrumentum non repugnat quod sit eiusdem rationis cum re effecta. q. 1. ar. 2. 20

Iudicium mentis quid sit. I

Iudicij firmitas à quo sumatur. ibidem.

Intentiones rationis, de quibus agit Logica, respiciunt conceptus obiectiuos, formales, & voces, sed diuersimode. q. 1. ar. 3. 25

Impressio superioris potentie, vel artis in inferiorem, ut ordinetur ad obiectum, seu finem superioris solum est effectus superioris non formale obiectum. q. 1. a. 3. 32

Intentio alia formalis, alia obiectiua. q. 2. art. 2. pag. 88

Quid sit, & quotuplex. ibid.

Vnde secunda intentio vocatur. ibid. 89

Non omnis relatio rationis est secunda intentio. ibid.

Vna secunda intentio induit aliquando rationem primæ. ibid. 91

Secunda intentio prædicatur de prima in concreto. ibid. 93

Distinctio secundæ intentionis desumi debet, ex fundamento. ibid.

Idæarum distinctio in quo fundatur. ibidem. art. 5. 134

Indiuidua quomodo sunt vnum in natura. q. 3. art. 2. 151

Art. Log. Pars II.

X

In-

Index rerum notabilium.

- Intentio Vniuersalitatis quomodo sit vniuersa-
lis, ibid. 17
Inferiora quomodo includant superius, ibidem
art. 5. 185
Indiuiduatio quomodo habeatur à materia &
etiam à forma, ibid. ar. 6. 191
Intellectus agens & possibilis & eius officia, q.
4. ar. 1. 198
Quomodo cognoscat naturas, ibid. 206
Intentiones prædicabilium quomodo inter se
differant, q. 6. ar. 2. 287

L

- L**ogica naturalis quid sit, q. 1. ar. 1. 3
Logica artificialis ad scientias speculati-
uas est simpliciter necessaria quantum ad
statum perfectum scientiæ, q. 1. a. 1. 6 & 7
Est etiam simpliciter necessaria quoad eius
conservationem non quoad imperfectum
esse & quasi primam generationem, ibid.
Quare non sit necessaria ad scientias practi-
cas, ibid.
Logica sicut iuuat alias scientias, ita etiam
iuuat se ipsam & conseruat, vnde non in-
diget alia Logica, sed ipsa sibi sufficit, q.
1. ar. 1. 14
Quomodo sit causa vniuersalis, q. 1. a. 1. 16
Est scientia, & ars liberalis simul, q. 1. art.
2. pag. 17. & ar. 3. 27 & 38
Quæ sit materia remota, & dirigibilis illius,
q. 1. ar. 2. 18 & 19
Est modus, seu instrumentum sciendi obie-
ctiue non formaliter, ibid.
Ex quo capite differat ab alijs scientijs, ib. 20
Non

Index rerum notabilium.

Non est instrumentum aliarum scientiarum;
sed intellectus. ibid.

Quomodo ut utens habeat actum opinati-
uum. ibid. 21

Non agit de omni ente rationis in tota sua
latitudine. q. 1. ar. 3. 25

De quibus entibus rationis agit. ibid.

Sit ne forma, sub qua obiecta materialia per-
tinent ad Logicam; aliquid rationis cum
fundamento in re. ibid.

Quid sit logicam dirigere actus intellectus.
ibid. pag. 32

Ratio quæ illius quænam sit. q. 1. ar. 3. 32

Ratio sub qua illius quænam sit. ibid.

Quid sit obiectum principalitatis ipsius. ibid.

Effectiva & physica causalitæ quæ actus de-
monstrationis generat scientiam habitua-
lem non pertinet per se ad Logicam; sed
ad scientiam directam. ibid. 38

Quomodo differat ab arte mechanica, & a
prudentiali. ibid. 39 & 40

Circa quæ sit eius difficultas. ibid. 41

Daretur ne Logica si non resultarent entia
rationis circa obiecta. ibid. 42

Quid intelligat D. Tho. quando dicit, Logi-
cam versari circa actus rationis. ibid.

Num sit speculativa, vel practica. quæst. 1.
art. 4. 49

Quotuplicem usum habeat. q. 1. ar. 5. 61

Logica secundum quem usum denominetur
formaliter scientia. ibid. 62

Secundum quem usum dirigat partem topi-
cam, & demonstratiuam. ibid. 63

Qua ratione versetur circa partem topicam,
tantum. ibid. 64

Index rerum notabilium.

Quomodo distinguantur Logica docens, & vtens. *ibid.* 66

Actus vtentis generat quamdam facilitatem, non tamen habitum. *ibid.* 14

M

Medicina fit ne practica, q. 1. ar. 4. 56

N

Necessarium ad finem consequendum duplex simpliciter, & secundum quid quid. q. 1. ar. 1. 6

Necessitas Logicæ ad alias scientias. Vide Logica.

~~Necessarium simpliciter est, quod requiritur ad esse rei siue in prima generatione, siue in conseruatione. q. 1. ar. 1.~~ 12

Natura tripl. cem statum fortitur. q. 3. a. 1. 139

Naturæ secundum re solum conuenit vnitas formalis negatiua. *ibidem.* ar. 3. 156

Secundum se considerata est indifferens ad vnitatem, & pluralitatem. *ibidem.* 157 & 158

Posita extra intellectum accipit statum singularitatis. *ibid.*

Diuersimodè importat rem, quæ prædicatur, & conditionem vt prædicetur. *ibid.* 160

Contracta quomodo reddatur vna & quid repræsentet. *ibid.* 161

Quid fortitur in vno indiuiduo. *ibid.* 166

Natura secundum se quomodo ex cognitione habeatur vniuersalis. q. 4. ar. 1. 201 & 203

Obis.



- O** Biectum formale quid sit. q. 1. ar. 3. 24
 Dicitur ratio quæ, & etiam sub qua ob-
 iectiua. ibid.
 Diuiditur in rationem quæ & sub qua. ibid.
 Ratio sub qua, quid sit. ibid. 25
 Obiectum Logicæ pro formali esse ens rationis,
 & pro materiali, ipsas res cognitæ, &
 conceptus ordinatos, non potest dubitari
 de mente D. Thom. q. 1. ar. 3. 30
 Obiectum formale luminis superioris non est
 actus inferioris, qui illuminatur, sed ip-
 sum obiectum, quo proposito inferius il-
 luminatur. ibid. 32
 Obiectum formale Logicæ quid sit. ibid.
 Quam abstractionem habeat. ibid. 34 & 35
 Operationes intellectus quomodo sint dirigibi-
 les. q. 1. ar. 4. 56
 Obiecta scientiarum & veritates, quæ ab illis
 attinguntur quomodo dicantur perpetuæ
 & æternæ. q. 3. ar. 2. 148
 Obiectum intellectus quomodo debeat esse uni-
 uersale. q. 3. ar. 4. 177

P

- P** rudentia dirigit consilio, & non arte, &
 quare. q. 1. ar. 2. 18
 Habet duas partes. q. 1. ar. 3. 39 & 40
 Quare alienatio prudentiæ non sit ens ratio-
 nis. ibid.
 In suo principali actu formalius respicit eli-
 cientiam actuum, quam ordinationem ob-
 iecto.

Index rerum notabilium.

- señtorum. ibidem
Practicum quomodo differat à speculatio. q.
1. ar. 4. 43
In practico & speculatio semper distin-
guuntur scire, & fieri. ibidem.
Practicum & speculatum non possunt simul
vni & eidem scientiæ naturalis ordinis
competere. ibid. 45
Quomodo hæc duo adunentur in Theolo-
gia, & alijs habitibus supernaturalibus.
ibidem. 47
Quomodo repugnet æctum intellectus esse
praxim. ibid. 53
Medicina sit ne practica? ibid. 56
Scientia moralis quomodo sit practica, ibi-
dem. 58
Providentiæ actio & perfectio in quo consistat.
q. 1. ar. 5. 73
Propositio denominativa quando formatur in
exercitio. q. 2. ar. 4. 121
Particulare quomodo sit correlativum vniuer-
salis. q. 3. ar. 4. 177
Prædicabilitas est quasi passio vniuersalis. q. 3.
art. 5. 185
Potentia quando deest. q. 4. ar. 1. 205
Phantasma quomodo illuminetur. ibid. 206
Proprium & accidens quomodo dicantur. q. 6.
ar. 2. pag. 285

Q

- Q**uomodo sit verum, quod ea, quæ conue-
niunt rei secundum se semper illi con-
venient. q. 3. ar. 4. 173
Quare non valeat ista consequentia. Natura
secun-

Index rerum notabilium.

secundum se non est singularis, ergo secundum se est non singularis, seu vniuersalis. *ibid.* 174

R

Relatio rationis tunc formatur quando con-
sequitur ex modo cognoscendi, quæ sit. 2.
art. 5. 127

Respectus idæales causantur ab intellectu hu-
mano, idest fundantur. *ibid.* 133

S

Scientia in statu perfecto, & in statu imper-
fecto quid sit. q. 1. ar. 1. 5

Secunda intentio sit ne ratio quæ, vel sub qua
q. 1. ar. 3. 34

Speculatiuum quid dicatur. q. 1. ar. 4. 43

Sensus externus format entia rationis imperfe-
cta. q. 2. art. 5. 125

Species producta ab intellectu agente quid re-
præsentet. q. 4. ar. 1. 201 & seq.

T

Totum physicum, & metaphysicum quo-
modo sint idem. q. 3. ar. 6. 197

V

Vsus Logicæ quotuplex? q. 1. ar. 5. 61
Vniuersalis nomine quid intelligatur. q.
3. ar. 1. 136

Vniuersale triplex. ibid.
Vni-

Index rerum notabilium.

- V**niuersale in causando quomodo respicit effectus suos, *ibid.* 137
Vniuersalis definitio. *ibid.* 138
Vniuersale duplex alterum metaphysicum, alterum topicum. *ibid.* 139
Vniuersalium vocibus, & conceptibus quid cor-
respondeat. *ibid.* 142
Vniuersalis nomen quando ponitur ex parte
prædicati, & ex parte subiecti quid im-
portet. *ibid.* 145
Vnitatis formalis quid importat. *q.3. ar.3.* 152
Quomodo distinguatur ab indiuidua. *ibid.*
Vniuersale formale, seu Logicum in quo con-
sistat. *q.3. ar.5.* 185
Vniuersale metaphysicum fit per actum abso-
lutum tam negatiuè, quam positiuè. *q.4.*
art. 2. 210
Vniuersale Logicum per quem actum fit. *ibi-*
dem. 214

Laus Deo, Beatissimæ Virgini, & An-
gelico Præceptori.

**V.D Fulgentius Orighetus Re.
ctor Pœnitentiariæ pro Illu-
stris.& Reuerendis. Domi-
no Iosepho Musotto Vica-
rio Capitulari Bononiæ.**

Reimprimatur.

**Fr. Vincentius Vbaldinus Vica-
rius Generalis S.Officij Bo-
non.Ordinis Prædicatorum.**









